

Xtidxcoob Dios ni biädnä dad Jesucrist

Mitla Zapotec New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

San Mateo	4
San Marcos	33
San Lucas	51
San Juan	82
Hechos	104
Romanos	134
1 Corintios.....	146
2 Corintios.....	158
Gálatas	165
Efesios	169
Filipenses	173
Colosenses.....	176
1 Tesalonicenses	179
2 Tesalonicenses	182
1 Timoteo	184
2 Timoteo	187
Tito.....	190
Filemón	192
Hebreos.....	193
Santiago	202
1 Pedro	205
2 Pedro	209
1 Juan.....	211
2 Juan.....	215
3 Juan.....	216
Judas	217
Apocalipsis.....	218

San Mateo

Retoxpengoldoo Jesucrist (Lc. 3:23-38)

1 Guijtz ni rusule' laj retoxpengoldoo xten Jesucrist xi'n toDavid, xi'n toAbraham.
2 Abraham gujc xtad Isaac, Isaac gujc xtad Jacob, Jacob gujc xtad Judá con rebejtzni. **3** Judá con Tamar gujc xczuzajn Fares con Zara. Fares gujc xtad Esrom, Esrom gujc xtad Aram. **4** Aram gujc xtad Aminadab. Aminadab gujc xtad Naasón. Naasón gujc xtad Salmón. **5** Salmón con Rahab gujc xczuzajn Booz. Booz con Rut gujc xcuza-jn Obed. Obed gujc xtad Isaí. **6** Isaí gujc xtad reii David. David con nani gujc cháäl Urías gujc xczuzajn Salomón. **7** Salomón gujc xtad Roboam. Roboam gujc xtad Abías. Abías gujc xtad Asa. **8** Asa gujc xtad Josafat. Josafat gujc xtad Joram. Joram gujc xtad Uzías. **9** Uzías gujc xtad Jotam. Jotam gujc xtad Acáz. Acáz gujc xtad Ezequías. **10** Ezequías gujc xtad Manasés. Manasés gujc xtad Amón. Amón gujc xtad Josías. **11** Josías gujc xtad Jeconías con rebetzni cheni huij rebeñ Israel pres lo guedx Babilonia.
12 Che gudejd huij rebejnğa pres Babilonia, dxejc guyu' xi'n Jeconías, Salatiel. Salatiel gujc xtad Zorobabel. **13** Zorobabel gujc xtad Abiud. Abiud gujc xtad Eliaquim. Eliaquim gujc xtad Azor. **14** Azor gujc xtad Sadoc. Sadoc gujc xtad Aquim. Aquim gujc xtad Eliud. **15** Eliud gujc xtad Eleazar. Eleazar gujc xtad Matán. Matán gujc xtad Jacob. **16** Jacob gujc xtad José cháäl Marii nani gujc xnan Jesús ni birilaj Crist.
17 Ni'cni gujc tzudaj xfamilj reni agudejd gubi'reni lo guedxliujre che gubajñli toAbram cheni gubajñliza toreii David. Tzudajza rexagdoo najc reni gudejd cheni gubajñli toDavid cheni huijli rebeñ Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

Cheni gojl Jesucrist (Lc. 2:1-7)

18 Scree gujc cheni gojl Jesucrist. Abia'n xnanni, Marii, diidx guchñaani José ni gac cháälni. Per ansde xca' sa'reni, Marii agac nuxi'nni sa'csi biäd Sprit Dxaan xten Dios lojni. **19** José com najcni te beñsa'c, di rlanjni nuro'nni Marii nez loj rebeñ te niacbeereni, ni'c bejnxi xhigab Guřonxhiga'tzni Marii. **20** Xhigabga cayujñni cheni baluiloj te xangl Dios lojni, lo bacał räjpni lojni:
 —José xajg toDavid, na'c guidxeyblu xca'lu Marii gacni cháällu sa'csi xi'nni nani chu najc xten Sprit Dxaan xten Dios. **21** Che gaal xi'nni cuälajluni Jesús sa'csi laani gusłaani rexejnñi lo rextojlreni.

22 Guiraa redee gujc si'c te guzojb diidx ni gunii tej ni bacuaa xtidx Dios. Räjpni:

23 Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajñ con nuure).

24 Che gubajñ José lo bacał, bejnxi si'cni räjp xangl Dad lojni. Cua'ni Marii gujc cháälni. **25** Luxh dini niem-beeni si'c cháälni dxejli cheni gudejd gojl xingangalojni ni gulälajni Jesús.

Che biädhuii rebeñ nanduxh ni laa remagos lojni

2 Cheni gojl Jesús neñ guedx Belén xten guedx Judea, najc Herodes reii xten guedx Judea. Dxejc bidzujñ rebeñnajn ni najc remagos, siädreni nejz cadro rliejn gubijdx, bidzujñreni guedx Jerusalén. **2** Rni-abdiidxreni:

—¿Con reii xten rebeñ Israel nani golgaj, ä? Nurnu abihuiinu xpajlñi laadxlinu, ni'cni siopdoñnuni.

3 Che biejn diajg reii Herodes diidxga, guyuduxhni yärsia' näjza guiraa rebeñ Jerusalén. **4** Dxejcti batie'ni guiraa rebixhojzro ni rnibee loj rebixhojz, näjza guiraa renani ruluu xleii Moisés lo rebeñ te gunabdiidxni lojreni:

—¿Caro gaal Crist?

5 Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

6 Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neñ guedjdxre guirii tej nani guinibee, te ni ga'p rexeñä Israel.

7 Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. **8** Dxejcti baxhalnireni guedx Belén, räjpni lojreni:

—Cołchaj ro'c, cołnabdiidxsa'c xcuent biuuxga te che abidxältuni jädniitu loä te näjza narä chagañani.

9 Che biejn diajgreni xtidx reii, sä'tireni. Bajl nani bahuiireni lagajc lajdxreni lałtis nijdñi lojreni. Che bidzujñlireni cadro yu' bázga, dxejcru guzobdx bajlga.

10 Che bahuii remagos loj bajlga, rbalazduxhrene. **11** Si'c bidzujñreni. Che biu'reni neñ yu', bahuiireni lo bázga con xnanni Marii. Dxejcti bazuxhijbreni, gojnreni bázga, baxhalreni rexcälñnasa'creni bazalajzreni oor, näjza yaal näjza yalnejh. **12** Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biääd te xangl Dios baluilojñi lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläz che guiniäli lojlu. Siguil Herodes biuxe're sa'csi rlaizni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. ¹⁵ Ro'c guyu'reni cheni gujtli Herodes. Guiraa dee guzajc te guzojb diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbäz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p iiz näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzojb diidx ni bacuaa Jeremías ni gunii xtidx Dios che räjpni:

¹⁸ Biejn xse' bejn neñ guedx Ramá, te yälhuinduxh, te yälrbexdij, yälrbexneñ:

laa Raquel ni roon yejc rexi'nni.

Naaddini jiajñi laizni sa'csi agujt rexi'nni.

¹⁹ Cheni gujt Herodes, dxejc lo te bacal huiluloj xangl Dios lo José neñ Egipto. ²⁰ Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlaiz ju't biuxe're.

²¹ Dxejcti huistie José, cua'ni biuxe're näjza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuini ro'c. Dxejc gunisac Dios lojni loj te bacal, ni'c huijñi lo reguejdx xten Galilee. ²³ Dxejc biädläizni neñ guejdx ni laa Nazare't te si'c guzojb diidx ni bacuaa niguii ni gunii xtidx Dios cheni räjpni: “Sirilajni nazareñ.”

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn. 1:19-28)

3 Neñ redxejga biääd Juan Bautist lo reyubijdz xten guedx Judea, ro'c cagulijdxni, ² cayäjpni:

—Colgusiechlaiztu rextolitu sa'csi xcälrnibee Dios abidzongajxhni.

³ Juan najc nani basä't Isaiás, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh.

⁵ Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcua diajgreni xtiidxi. ⁶ Che ruxhobdojñreni xtojñreni, ru-tiobnis Juanreni ro' gueu Jordán.

⁷ Che bahuiini siääd xhidajñ reben guidoo ni najc re-farisee näjza ni najc resaducee, rlaizreni gutiobnis-nireni, räjpni lojreni:

—La'tu benguidxduxh, najctu si'c bäl. ¿Chu balijdxtu guxuñtu loj xcälrdxech Dios ni siääd? ⁸ Colguibañsa'c

si'cni nungäjl te fiipac rebejn guliipac abasiechlaiztu.

⁹ Na'c litis guntu xhigab naatu: “ñNi nurnu najcnu rex-agdoo toAbram!” Rniliä lojtu, sajx xca' Dios reguijre gunni gacreni rexi'n toAbram. ¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹ Narä guliicani rustiobnisä con nis si'c te seen cheni abasiechlaiztu, abaxhobdojñtu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Bengsacduxhni. Nicla xcura'chni digacdi chanää.

¹² Aca'ni xhi cojn gusiani triuu xtenni te chuchee triuu-ga neñ ngodx xtenni. Dxejcti guixhtriuuga, suze'cni guijxhga lo guiboo ni rejx par tejpas.

Che gurobnis Jesús

(Mr. 1:9-11; Lc. 3:21-22)

¹³ Dxejc birii Jesús nez Galilee, bidzujñni ro' gueu Jordán cadro yu' Juan te gutiobnis Juanni. ¹⁴ Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäädlo loä te gutiobnisälu.

¹⁵ Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlaiz Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädyäjt Sprit Dxan xten Dios si'c te palom, biäjtñi lojni. ¹⁷ Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

Che huij Jesús lo reyubijdz

(Mr. 1:12-13; Lc. 4:1-13)

4 Dxejc bejn Sprit Dxan xten Dios huij Jesús nez lo reyubijdz te nejzga nuhual bendxab Jesús.

² Che gulujx bacua'n Jesús tiuu gubijdx, tiuu guxhijñ, gulaanni. ³ Sas biääd bendxab lojni, räjpni:

—Palga guliilu Xi'n Dioslu, gunibee gac reguijre yätx-tiil.

⁴ Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yälxtiil guibajñ rebejn; sibajñzani con guiraa diidx nani rnii Dios.”

⁵ Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejcru räjp bendxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj; siliäsreni luj con naareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸ Stee huält huinä bendxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcälñasa'creni. ⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—¡Huij nez rec beñdxab! Scree caj loj rexquijtz Dios: “Dad Xtioistislu ganlu; lojtisni chulu.”

¹¹ Dxejcti gubicaj beñdxab loj Jesús. Dxejc biääd rexanl Dios biädhuiireni Jesús.

Gusloj Jesús cayujn xtzuumni

(Mr. 1:14-15; Lc. 4:14-15)

¹² Che biejn diajg Jesús yu' Juan neñ ladzguiib, huijni nez Galilee. ¹³ Dxejcti gudejndi guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabalón con Neftalí. ¹⁴ Si'c gujc te guzobj diidx ni bacuaa Isaías ni gunii xtidx Dios:

¹⁵ Lajdx Zabalón, lajdx Neftalí, nezyuj ni rij nez ro' nis-doo, stelaad gueu Jordán,

Galilee cadro rbäjz rebejn nani di gac rexpen Israel.

¹⁶ Rebejn nani rbäjz neñ te yälçäjy abahuiireni te bajlga,

luxh bajlga basanij xcäriejn renani nabajn lo xcälrdxejb, lo xpalaa yälgujt.

¹⁷ Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibañsa'ctu sa'csi abidzongajxh xcälrnibee Dios.

Che gurejdx Jesús tajp xpejnji

(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäj, ni'c cacuaareni guijxh lo nisdoo. ¹⁹ Dxejcti räjp Jesús lojreni:

—Coltanajl narä. Naj riniaaztu bäj, niluxh narä gunä cuedxtu rebejn.

²⁰ Lagajc dxejc basa'nreni xquijxhreni te sanajlreni laani.

²¹ Che gudejdreni ro'c, bahuiini loj stio'p niguii, Jacoob con bejtzni Juan. Yu'reni neñ te barcw con xta-dreni, ni laa Zebedeo cayunsa'creni guijxh. Dxejc gurejdx Jesúsreni. ²² Lagajc dxejc basa'nreni barcw näjza xta-dreni te sanajlreni Jesús.

Cagului Jesús xhidajl bejn

(Lc. 6:17-19)

²³ Sasajti Jesús guideb nez región xten Galilee, caguluiini neñ tejga rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälguijdx. ²⁴ Biejn diajg rebejn Siria diidx xcuent ni cayujn Jesús. Sas biädnäreni guiraa rebeñracxhuu ni cayajc guiraloj yälguijdx, yäl-nayan; guiraa reni rajc yejcreni, guiraa reni rajc mayälguijdx, reni rajc yälguidxbej, guiraareni abixu'ñ tiejxhreni. Dxejcti basiajc Jesús rebejnga. ²⁵ Xhidalduxh beñ Galilee huinajl, näj rebeñ reguedx Decápolis, näjza rebeñ guedx Jerusalén, näjza rebeñ Judea näjza rebejn ni tre' stelaad gueu Jordán.

Yejc te dajn balijdx Jesucrist rebejn

5 Che bahuii Jesús loj rebeñ xhidajl, huä'pni yejc te dajn. Dxejcti gubig rexpejnñi ni gurejdxni lojni.

² Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³ —Sibaalajz rebejn nani nanchee rquinduxhreni xcälracnäy Dios, sa'csi laareni nungäjreni xcälrnibee Dios.

⁴ Sibaalajz rebejn nani rac-huin lajzreni xcuent rextoljreni, sa'csi sudzucay Dios xtojlreni, susiäjlni lajzreni.

⁵ Sibaalajz rebejn nani nadolajz nani rlajz guntis si'cni rnibee Dios, sa'csi sacnäy Diosreni lo xcäl'nabajlreni lo guedxliujre.

⁶ Sibaalajz rebejn ni nastoocanu rliareneni, riojlreni, sa'csi rlajzreni guibañsa'ctisreni nez loj Dios, sa'csi sudeed Dios lojreni guiraa ni rniabreni.

⁷ Sibaalajz rebejn nani rulaslajz sa'reni, sa'csi sulaslajza Diosreni.

⁸ Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ Sibaalajz rebejn nani ruscuecdilajz sabejnreni, sa'csi laareni sirilajreni rexi'n Dios.

¹⁰ Sibaalajz rebejn nani rusutijp lajzreni che rusacsi bejnreni sa'csi nabañsa'creni nez loj Dios, sa'csi xtenreni najc xcälrnibee Dios xhaguibaa.

¹¹ Colspaalajztu che gusacsi bejntu tilnäjreni la'tu, guiniireni guiraloj didx-xhii xcuent xtidxä.

¹² Colguibaalajz, colbalajz sa'csi xhaguibaali sunidduxh Dios xcuent xtzuumtu. Sigajcza basacsíreni reniguii ni gubajn galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Räjpszani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejnñi dxejc? Susälreni sejdga detz yu', suläj bejn yejcní.

¹⁴ La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jiäuuni neñ te caj. Maazru huen soobni jiaa neñ te gandilieer te gusanijni loj guiraa rebejn ni tre' neñ yu'. ¹⁶ Xcäl'nabañsa'ctu najc si'c te bajl loj rebeñ guedxliuj. Suhuiireni xtzunsa'ctu dxejc sil-ia'preni xpala'n xtadtu ni yu' xhaguibaa.

Rului Jesús xcuent leii

¹⁷ Räjpszani:

—Na'c guntu xhigab siädgudzucaá leii xten to-Moisés, niclaza rediidx ni baluii redad ni gunii xtidx Dios. Xhet siäddzucaá dini, narä siälä te guluiäpacni si'cni najcni. ¹⁸ Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlajz gusaan te diidx nani caj loj leii, mase te didxbäzni, luxh

ruluiini gun bejn si'c, laani guxiduxh sajcnj lajdx Dios guibaa. Niluxh renani rucuaadijg xtidx leii, luxh rujn-pacreni si'cni caj lo leii, ruluiizani leii, beñsacduxh gacni lajdx Dios guibaa. ²⁰ Ni'cni rniä lojtu, palga ditu gun-sa'cru xtzun Dios, ditu guibañsa'cru loj reni najn xcuent xleii toMoisés, näjza loj reben guidoo ni laa farisee, dipactu jiu' lajdx Dios xhaguibaa.

Ruluii Jesús xcuent yälrdxe'ch
(Lc. 12:57-59)

²¹ Räj pzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jjiäuni neñ latzguiib.” ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “beñnayälajz” sidejndi loj yälguxhtis xten Dios, sijni gabijl cadro cayejc guiboduxh.

²³ Che sanälu gojn guidoo te gusa'n'luni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

²⁵ Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di gutedni luj lo juejz. Luxh juejz suteedni luj loj reguixhajg te gusa'reni luj neñ latzguiib. ²⁶ Rniäpác lojlu: “Dilu guirii ro'c palga dilu cue'c guirali meel nani guini-abni lojlu.”

Ruluii Jesús xcuent yälrusguee sa'ni

²⁷ Räj pzani:

—Abiejn diajgtu guniireni galoo: “Na'c guesnäjtu gunaa nani di gac chäälto.” ²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni. ²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. ³⁰ Palga ñaalu ladbee rujn rujnlu dojl, batiu'ni sa'csi hueenru gunijtlu te ñaalu quela chää guideb tiejxhlu gabijl.

Ruluii Jesús xcuent yälruo'n chääl bejn
(Mt. 19:9; Mr. 10:11-12; Lc. 16:18)

³¹ Räj pzani:

—Abiejn diajgtu guniireni galoo: “Chutis niguii ni rla-jz guo'n chäälni, nanabtis gudeedni te guijtz nani rniä abarö'nni chäälni.” ³² Narä rniä, niguii nani guo'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchñaa gunaaga sujnzani yälgubejxh.

Ruluii Jesús xcuent che ria'n diidx

³³ Räj pzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtidx lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por

guedx Jerusalén sa'csi ro'c najc guedxlajdx reiuro, ³⁶ niclaza por lagajc bitiuvejclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitlslu: “Mbaj” o “Ajndi”. Palga yu' xhiru rniilu, beñdxab najc ni rujn rniiluni.

Chanälajzni rebejn ni rdxe'ch lojni
(Lc. 6:29-30)

³⁸ Räj pzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹ Narä rniä, na'c tiñäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rla-jz tiñäjl te xca'ni xcamangwlu, badeedza näj xsa'cwlu lojni. ⁴¹ Palga yu' chu guinibee guulu xcargwni te kilómetro, huiñäni tio'p kilómetro. ⁴² Nani guiniab xhi guini-abxlia'ni lojlu, badeedni. Nani guiniablaa xhi guin-ablaani lojlu na'c gudxoijnluni lojni, na'c gäblu: “Xheti-ni.”

⁴³ Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” ⁴⁴ Narä rniä lojtu, colchanälajz rebejn ni rdxe'ch lojtu. Benle' yejz reni rgue lojlu. Colyejn dxunsa'c loj renani rdxe'ch lojtu. Colcuedjdx, colñab loj Dios xcuent rebejn nani rdxagdijl-tu, rusacsireni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo rebenguijdx. ⁴⁶ Palga la'tu chanälajztu lagajctis rebejn nani rinälajz la'tu, xhi gaan guntu dxejz? Najctu lagajc si'c najc rebejn ni rutie' meel ni rajx lo gubier. ⁴⁷ Palga guiniitu: “Xchan”, lagajctis loj resa'tu, xhini'c rujntu ni najc hueenru lo chutis bejn? xLa et sigajcdiza rujn rebejn nani di gumbee Dios? ⁴⁸ Colyajc bensa'c si'c ni najc xtadtu ni yu' xhaguibaa.

Ruluii Jesús xho gudeedni gojn

6 Räj pzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴ te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

Ruluii Jesucrist xho cueedx, guiniabni lo Dios
(Lc. 11:2-4)

⁵ Räj pzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchagljazreni rniabreni lo Dios rsiuliireni neñ reyu' cadro riel xtidx Dios, näjza guiraa resquiin, näjza nez ronejz te ruhuii rebejn xho

rujnreni. Rniliápac, acua'reni gaan xtenreni. ⁶ Naj luj cheni cueedx, guiniablu lo Dios, biu' neñ xyu'lu. Basáuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnájni luj nez loj rebejn.

⁷ Cheni caniiitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. ⁸ Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. ⁹ Ni'cni scree colguinii lo Dios:

Xtadnu ni yu' xhaguibaa dxan najc lajlu.

¹⁰ Sujiaäd xcälriibeelu;

bejn si'cni rrajzlu lo guedxliujre sigajc rujnlu xhaguibaa.

¹¹ Nadxej baniidx xcu'nnu sa' ni rdaunu guira dxej.

¹² Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

¹³ Na'c gusaanlu jiaabnu xhigabguijdx,

basłaa nuure lo dojl,

sa'csi xten guejblu najc yälriibee, yälriidip näjza yälriidimbicha' par tejpas.

Sugacni si'c.

¹⁴ Palga la'tu gusiäjł lajzlu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu. ¹⁵ Palga ditu gusiäjł lajzlu redojl ni rujn rebejn lojtu, sigajcza xtadnu ni yu' xhaguibaa di lajzni jiajłza rextojłtu.

Ruluu Jesús xho gucua'n bejn

¹⁶ Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. ¹⁷ Niluxh la'tu, che rucua'ntu, colcuñ yejctu, colquii lojtu ¹⁸ te na'c gacbee rebejn cagucua'ntu, xtadtistu suhuii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

Yälriidip ni yu' xhaguibaa

(Lc. 12:33-34)

¹⁹ Räjpzani:

—Na'c gapdajntu yälriidip lo guedxliujre cadro rajw reman o rbibtiejn xhixtentu, niluxh richu' gubaan rolizj bejn te rbajnreni. ²⁰ Hueenru ga'ptu xcälriidip xhaguibaa cadro di reman gauu, diza rexhixtentu cuibtiejn, diza regubaan jiu' te cuanreni. ²¹ Sa'csi cadro yu' xcälriidip, ro'cza naga' lastootu.

Bianij xten tiejxhtu

(Lc. 11:34-36)

²² Räjpzani:

—Bianij xten tiejxhtu najc balojni, ni'cni palga rhuisa'c balojtu, guideb tiejxhtu yu' lo bianij. ²³ Niluxh palga rebalojtu di fisa'c, guideb tiejxhtu yu' lo nacäy, ni'cni palga bajl nani yu' tiejxhtu dini gusanij, ilinacäi-boo najc guidebtu!

²⁴ 'Ni'cni te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtuun Dios palga caguillistu xcälriidip lo guedxliujre.

²⁵ 'Ni'cni rniä lojtu, na'c chutu yärsia' por xcälriidip, xhicha gautu, xhicha yätu, niclaza naatu xhicha lajd gajcwtu. Yälriidip sajzru lo yälriidip, luxh sajzru tiejxhtu lo xhajbtu. ²⁶ Colhuu remane' ni rtajt xhaguibaa. Direni cue'c binij, dizareni guilia' gäjł, dizareni cuhee xhi gaureni neñ yu', luxh xtadtu ni yu' xhaguibaa rudeedni xhi rajwreni. ¿Laa xhet sajzdirutu loj remane'ga, ä? ²⁷ ¿Chu tej la'tu sa'csi ru'tu yärsia' sajz tiobrutu ste bo'c jiaaru?

²⁸ ¿Xhicuent runduxhtu xhigab xcuent xhajbtu? ¿Colhuu reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹ Narä rniä lojtu, nicla rei Salomón guideb najcwni rexhabsa'c xtenti di nisiuchee si'c rsiuchee tej reguiiga. ³⁰ Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? ³¹ Ni'cni na'c chutu yärsia' guntu xhigab: "¿Xhicha guidaunu, xhicha guiduñnu, xhicha gacwnu?" ³² Sa'csi rebejn nani di gumbee Dios xhigabtisga rujnreni, caguillreni guiraa recosga. Niluxh xtadtu ni yu' xhaguibaa anajnni xhini'c rquiintu. ³³ Colquixgaa yälriidip xten Dios näjza yälriidip sa'c si'cni rrajz Dios dxej sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riäd dxej con dxej.

Na'c cubeetu sa'tu

(Lc. 6:37-38, 41-42)

7 Räjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutiehx Dios lojtu. ³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ¿Xhicuent gäblu lo sa'lu, nädoñnu cuää guijxh ni yu' neñ balojlu, luxh dilu fii loj yagro ni yu' neñ balojlu? ⁵ Beñguijdx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

⁶ Na'c guluiitu guiraa rextidix Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cos-sa'c najcreni si'c cuch ni ruläj yejc xhitis xhi cos.

Colriidip, colquii, colgusejz rolä'

(Lc. 11:9-13; 6:31)

⁷ Räjpzani:

—Colriidip lo Dios te guniidxni nani rniabtu. Colquii lo guidxäjłtuni. Colriidip rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzaren lojni.

⁹ ¿La yu' chu tejtu che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bäl, ¿la

sudeedni te bäl? ¹¹ Palga la'tu ni najc beṇ guijdx rajc rudeedtu cossa'c loj xi'ntu, aticaxh xtadtu ni yu' xh-aguibaa. Laani suniidxni cossa'c loj renani guiniabni lojni.

¹² Ni'cni guira'ti cos ni rlaiztu gunnäj beṇ la'tu, sigajca colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yäl'nabajṇ najc dää
(Lc. 13:24)

¹³ Coljiu' nez rolä' nani najc dää, sa'csi gulajg najc rolä', gulajg najcaza nezyuj nani rinä beṇ lo yälrunijt, luxh xhidajlreni riu' nejzga. ¹⁴ Sa'csi dää najc rolä', dääza najc nezyuj nani rinä beṇ nez loj yäl'nabajṇ, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga
(Lc. 6:43-44)

¹⁵ Räjpzani:

—Colnatiro rebeṇ nani rlaiz gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni beṇ si'c re'ch xiil che riädchu' loob lojreni. ¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. ¹⁸ Digacdi xcaj ninexhdxuudx loj te yajg ninexhsa'c. Di gacdi xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajca sajc gumbeetu beṇsa'c sa'csi rujnreni dzunsa'c.

Xhet guiraadi beṇ jiu' lo xcäl'rnibee Dios
(Lc. 13:25-27)

²¹ Räjpzani:

—Xhet guiraadi renani rnii, “Dad, Dad”, jiu' lo xcäl'rnibee Dios xhaguibaa. Ganaxtis renani rujn si'cni rlaiz Xtadä ni yu' xhaguibaa. ²² Sidzujṇ dxej sinii xhidajl beṇ loä: “Dad, Dad, con lajlu basule'nu xtiidxlu, con lajzalu biläenu rebeṇdxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Colbicaj loä beṇlatsiaj.”

Tio'p cimient
(Lc. 6:47-49; Mr. 1:22)

²⁴ Räjpzani:

—Chutis nani rucua diajg diidx nani cania, luxh ru-zoob xtidxä, laani najc si'c te beṇsiṇ nani basoob rolijzni yejc te guilaj. ²⁵ Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶ Nani riejn diajgni xtidxä, luxh di ni guzoob xtidxä najc si'c te beṇ guyalajz nani basoob rolijzni lo yujxh. ²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebän yu'ga. Lacti xhiroob banijt bejnga.

²⁸ Che gulujx gunii Jesús rediidxga, lacti bidxeloj re-beṇ rediidx ni baluiini, ²⁹ sa'csi baluiini rebeṇ si'cpac te nani rnibee, xhet si'c ruluiidi rebeṇ ni najn leii.

Rusiajc Jesús te beṇ ni raḷ tiejxhni
(Mr. 1:40-45; Lc. 5:12-16)

8 Che biäjt Jesús yec dajn, xhidajl beṇ huinajl ni. ² Dxejcti biäd te beṇracxhuu ni raḷ tiejxhni nez loj Jesús. Bazuxhijbni, räjpni:

—Dad, palga rlaizlu, sajc gusiajclu narä.

³ Dxejcti basгаа Jesús ṇaani, gudajnni dade'ga con ṇaani, räjpni:

—Rlazä jiajclu. Siajc tiejxhlu.

Lagajc dxejc gubicaj guejdx ni raḷ tiejxhni. ⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed beṇ ni riajc, te fii rebixhojzga abiajclu.

Rusiajc Jesús te xmos capitán roman
(Lc. 7:1-10)

⁵ Che biu' Jesús guedx Capernaum, bidzujṇ te capitán roman nani rnibee te gayuu soldaad. Gunabduxhni lo Jesús, ⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räj Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäj jiu' guejblu rolizä. Guiniitis te diidx, siacgajc xmosä. ⁹ Narä nacäza xmos rebeṇ ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, räjpni loj renani siädnajni:

—Rniliäpac lojtu, nicla neṇ guideb reguedx Israel dina nidxälä te beṇ ni rililajz si'c rililajz dade're. ¹¹ Niluxh rniä, sirii xhidajl benzijt nez ladjiaa, nez ladjiaät, te jiäd-cuenäjreni Abram, Isaac, Jacob lajdx Dios xhaguibaa.

¹² Luxh rebeṇ Israel nani niajc xi'n Dios sijreni te laad lo yälcäy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajca gacni. Dxejc lagajc orga biajc xmosni.

Rusiajc Jesús xnansueegr Pedr
(Mr. 1:29-31; Lc. 4:38-39)

¹⁴ Che bidzujṇ Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. ¹⁵ Dxejc gudajntis Jesús ṇaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl beṇ racxhuu

(Mr. 1:32-34; Lc. 4:40-41)

¹⁶ Che biu' guxhijṇ, biädñäreni loj Jesús xhidajl bejṇ ni yu' rebēṇdxab lastooreni; con xtiidxni gunibeeni birii guiraa rebēṇdxabga. Basiajczani guiraa rebēṇ racxhuu. ¹⁷ Si'c bejnṇi te guzojb diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanäzani rexcäl-nayannu.

Reni rlažz ninajl Jesús

(Lc. 9:57-62)

¹⁸ Che bahuii Jesús tre' xhidalduxh rebejṇ guideb gabi cadro suga'ni, gunibeeni tednäjni rexpejṇpacni stelaad ro' nis. ¹⁹ Dxejcti biääd te beṇnajn loj Jesús, räjpni:

—Mastr, sisiaäza cadrotis chäálu.

²⁰ Räjp Jesús lojni:

—Rebäžz rajpreni xpiliääreni, remane' ni rutajt xh-aguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹ Stee rexpejṇpacni räjp lojni:

—Dad, basaan chaxgaä ladxä te chacuatzä xtadä.

²² Räjp Jesús lojni:

—Gudanajl narä. Basaan sugucua'tz resabēṇgutreni rebejṇ nani najc si'c beṇgut sa'csi najcreni beṇdojl.

Basiacdxl Jesús te beduxh

(Mr. 4:35-41; Lc. 8:22-25)

²³ Che biu' Jesús neṇ barcw, biu'za rexpejṇpacni laga-jc nēnga. ²⁴ Dxejc huäjs te bedonduxh lo nisdoo. Lirusiääzni barcw neṇ nisdoo. Luxh Jesús nagayejsni.

²⁵ Dxejcti huij rexpejṇpacni huicuäänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdexjbtu, bejṇ ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni. ²⁷ Dxejc bidxeloduxh rexpejṇpacni, räjpreni:

—¿Chuni'c najc niguiire? ¡Ahuilaa xho rucua diajg bej näjza nisdoo xtiidxni!

Rebēṇdxab ni yu' lajdx regadarenos

(Mr. 5:1-20; Lc. 8:26-39)

²⁸ Che bidzujṇ Jesús stelaad nisdoo cadro najc lajdx regadarenos, tio'p bejṇ ni yu' beṇdxab lastooreni biäd-chaglojreni Jesús. Rebejṇga riireni neṇ rebaa, nialaz-duxhreni, ni'cni rut rajcdi rdejz nezyujga.

²⁹ Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siädldu ree te gusacsilu nuure luxh gad gałdi xoṛnu, ä?

³⁰ Nez te laad, zijte' cadro suga'reni, cayajp bejṇ xhidarlo cuch. ³¹ Dxejcti gunab rebēṇdxabga loj Jesús, räjpreni:

—Palga cuäálu nuure, basaan jiu'nu neṇ recuchre.

³² Dxejcti räjp Jesús:

—Colchäj.

Dxejcti biriireni neṇ lastoo redade'ga, huichu'reni neṇ recuchga. Dxejcti guiragajc recuchga caguxuṇreni, huitejbreni ro' te guilaj, biääzreni neṇ nisdoo, gujt-tireni neṇ nis.

³³ Rebejṇ ni cayajp recuchga, baxuṇreni, huijreni lajdxreni, huiyeireni diidx guiraa ni guzajcreni näjza ni guzajc redade' ni guyu' rebēṇdxab lastooreni. ³⁴ Dxejcti guiraa rebēṇguejdxga huichaglojreni Jesús. Che bahui-ireni lojni, gunabduxhreni lojni, jiu'nežzni lajdxreni.

Basiajc Jesús te bejṇ nani abixu'ṇ tiejxhni

(Mr. 2:1-12; Lc. 5:17-26)

9 Dxejcti biu' Jesús neṇ barcw. Gudejdni stelaad ro' nis te bidzujṇni lajdxni. ² Ro'c biädñäreni lojni te bejṇ nani abixu'ṇ ṇaani, ni'ni. Naga'ni lo te da'. Che bahuii Jesús lacti rililajzreni, räjpni loj beṇracxhuuga:

—¡Baspaa lajzlu xi'nä! Agubicaj rextojllu.

³ Dxejcti gaii beṇnajn ni ruluii xleii Moisés cayujnreni xhigab ensilaareni, caniyaj dee Dios con rextiidxni.

⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx neṇ lastootu?

⁵ ¿Con ni najc guyasiru? Guiniä lo te bejṇ: "Agubicaj rextojllu", o guiniä lo te bejṇ: "Huistie, guzaj." ⁶ Dec gunä te gacbeetu Xi'n Dios ni gujc Niguii rajp yälrnibee lo guedxliujre te gudzucajni dojl.

Dxejcti räjpni loj beṇracxhuuga:

—Huistie, cua' xta'lu, huij rolijzlu.

⁷ Dxejcti huistie beṇracxhuuga, siini rolijzni. ⁸ Che bahuii rebejṇ lojni, bidxeloduxhreni, gulä'preni xpala'n Dios, ni badeed yälrnibeega loj rebejṇ.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajcnī beṇracxhuu, sä'ti-ni. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejṇ nani ruquijx xcuent guiraloj, ni najc rebejṇ ni di gac xpeṇ Israel, gurejzarenī lo mex näj Jesús näjza reni najc rexpejṇpacni. ¹¹ Che bahuii rebeṇ guidoo, ni laa refarisee, xhi cayujn Jesús, räjpreni loj rexpejṇpac Jesús:

—¿Xhicuent raunäj xmastrtu rebejṇ nani ruquijx xcuent reyuj näjza rebejṇ ni di gac xpeṇ Israel?

¹² Che biejn diajg Jesús xhi guniireni, räjpni lojreni:

—Rebejṇ nani nadaan dini guiquiini chu gusiajcnī, niluxh rebejṇ racxhuu ni'c rquiinreni chu gusiajcnī.

¹³ Colchäj te colchaseed xhi säloj diidxre ni caj loj reguijtz: "Yäl'rulaslajz rlažzä, dina rlažzä guniidxtu guidxaa loä." Sa'csi narä dina niädtedxä rebeṇsa'c, narä siädtedxä rebēṇdojl te gusiechlajzreni.

Gunabdiidxreni xcuent yälrucua'n

(Mr. 2:18-22; Lc. 5:33-39)

¹⁴ Dxejcti biääd rexpejn^{pac} Juan loj Jesús räjpreni:—Nuure con refarisee rcua'nnu xhidal huält, z̄xhicuent di rexpejn^{pac}laclu gucua'n, ä?¹⁵ Räjp Jesús lojreni:—Che ruch^{naa} te bi'n, z̄xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dx-^{ejc} sii soonreni, sucua'nreni.¹⁶ Rut gundi remiend te ladbiewjw con te la' ladcoob sa'csi sixu'n ladcoobga, sutiäjsruni ladbiewjwga, sajc xhi-roobru cadro biräjs^{ga}. ¹⁷ Niclaza gac guida' bincoob neñ reguidbiewjw, sa'csi reguidbiewjw siräjsni dxejc sixe' bin, sinij^{tza} reguij^{dga}. Ni'cni nanab guida' bincoob neñ reguidcoobza, te si'c nicla tejreni di nit.**Xindxa'p Jairo näjza gunaa nani gudajñ xhajb Jesús**

(Mr. 5:21-43; Lc. 8:40-56)

¹⁸ La^l ni caniiini rediidxga, biääd te dade' ni rnibee neñ guidoo xten rexpejn^{pac} Israel. Bazuxhijbni nez loj Jesús räjpni:—Entis gujt xindxa'pä. Gudaa, badzuub ^{naalu} yej^{cni} te guiba^{nsacni}.¹⁹ Dxejcti huisu Jesús, sanäni Jairo. Näj rexpejn^{pacni} sanajlreni. ²⁰ Luxh guyu' te gunaracxhuu nani agujc tzubitio'p ijz cayaj^{cni} yälguidxbäi. Bidzuj^{ñni} nez dejt^z Jesús, gudaj^{ñni} ro' xhajbni, ²¹ sa'csi bejnⁿⁱ xhigab neñ lastooni: "Palga sajc canätis ro' xhajbni, siacä." ²² Dxejc gubiré Jesús bahuiini loj gunaaga, dxejc räjpni:—Gulecdxilajzlu xindxa'pä. Yäl^rililajz xtenlu abasiaj^{clu}.

Luxh lagajc dxejc bialc gunaaga.

²³ Cheni biu' Jesús roliz dade' nani rnibee neñ xquidoo rexpejn^{pac} Israel, bahuiini rebejnⁿⁱ ni ro^l bizej näjza xhidaj^l rebejnⁿⁱ ni cabedxa' cayoon, li te biey^z cayajc, dx-^{ejc} ²⁴ räjpni loj rebejn^{ga}:—Colguibicaj. Nagayejstis dxa'pga, gajdⁿⁱ guet.Dxejc rebejn^{ga} alga ruxhiznäjn^{reni} Jesús. ²⁵ Cheni abirii rebejnⁿⁱ neñ yu', biu' Jesús, gunaazni ^{naa} dxape', dxejc huistie dxape'ga. ²⁶ Dxejcti bire'ch diidxga guiraa neñ reguejdx ni tre' nejzga.**Basiajc Jesús tio'p lotiä'p**²⁷ Che birii Jesús ro'c, huinaj^l tio'p bejnⁿⁱ nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸ Che bidzuj^ñ Jesús cadro caya'nni, gubigreni lojni. Dxejcti gunabdiidx Jesús lojreni, räjpni:—z̄La rililajz^{tu} sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹ Dxejcti gudaj^{ñni} balojreni, räjpni:—Sugacni si'cpacni rililajz^{tu}.³⁰ Lagajc dxejc bixal balojreni. Sas räjp^{pac} Jesús lojreni:—Arniä, na'c chayeitu diidxre, te rut gacbeedi xhi guzajct^u.³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.**Basnii Jesús te gop**³² Che biriireni cadro bialc baloj rebejn^{ga}, biääd sgaii bejnⁿⁱ biädnäreni te gop loj Jesús. Yu' xp^{rit} beñdxab neñ lastoo bejn^{ga}. ³³ Che barilaagw Jesús xp^{rit} beñdxab neñ lastoo beñgopga, guslogaj^{cni} caniiini. Rdxeloduxh rebejnⁿⁱ räjpreni:—Gajdpacnu guihui sa' redzuunre lajdx rexpejn^{pac} Israel.³⁴ Dxejc rebeñ guidoo ni najc refarisee, räjpreni:—Rbääni rexpr^{it} beñdxab con yäl^rrnibee xten beñdxabro.**Rulasajz Jesús rebejn**³⁵ Gudejd Jesús guiraa reguedxro näjza reguedxbäz, basule'ni xtidx Dios neñ reguidoo xten rexpejn^{pac} Israel. Basääbni diidx xten xcäl^rrnibee Dios. Basiajczani guiraloj yälracxhuu, guiraloj yäl^guijdx ni rajc bejnⁿⁱ neñ reguejdxga. ³⁶ Che bahuiini loj rebeñ xhidaj^l biaduxhni rebejn^{ga} sa'csi rdebya' lajzreni, rac-huin lajzreni, najc^{reni} si'c najc rexiil nani di ga'p baxtoor. ³⁷ Dxejcti räjpⁿⁱ loj rexpejn^{pacni}:—Guliipac xhidalduxh beñ guedxliuj di gan xtidxä, luxh guxii najc reni guluiireni; najcni si'c gäj^l ni agoj^l guilia', niluxh ruti mos ni guilia'ni. ³⁸ Colnab lo Dad nani najc xtenni guedxliujre te guxha^lni rebejnⁿⁱ ni sajc guluui rebeñ guedxliujre, gacreni si'c mos ni rlia' gäj^l.**Gule Jesús guitzubitio'p rexpejn^{pacni}**

(Mr. 3:13-19; Lc. 6:12-16)

10 Dxejcti gurejdxni guitzubitio'p rexpejn^{pacni}, badeedni yäl^rrnibee lojreni te gurilaagwreni rexpr^{it} beñdxab lastoo bejnⁿⁱ näjza te gusiajczreni guiraloj yäl^guijdx näjza yäl^rracxhuu.² Laj reguitzubitio'p rexpejnⁿⁱ ni guleni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob; ³ Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo; ⁴ Simón, te bejnⁿⁱ ni yu' loj recananita; Judas Iscariote, nani bateed Jesús ladz^{naa} rebejnⁿⁱ nani rdxe'ch lojni.**Baxha^l Jesús rexpejn^{pacni} gutie'chreni diidx**

(Mr. 6:7-13; Lc. 9:1-6)

⁵ Guitzubitio'p rebejn^{re} baxha^l Jesús. Baliidxnireni räjpni:—Na'c chäätu nez cad yu' rebejnⁿⁱ ni di gumbee Dios. Na'c jiu'tu lajdx rebeñ samaritan. ⁶ Colchäxgaa lo rexpejn^{pac} Israel nani agunij^t neñ dojl. ⁷ Colchäj, colzäbdiidx lo rebejnⁿⁱ, colye'tz lojreni xcäl^rrnibee Dios abidzungajxh. ⁸ Colgusiaj^c beñ racxhuu, colgusiaj^c tiejxh rebejnⁿⁱ ni ral^guejch tiejxh^{reni}, colguspaj^ñ beñgut. Colgurilaagw

xpriet beŋdxab lastoo rebejn. Ligaj cua'tu yäl̄rnibee, lig-
ajza colyejn dzuun.

⁹ Räj pzani:

—Na'c chanätu oor, niclaza pla't, niclaza coobr neŋ
xdoobdäjltu, ¹⁰ niclaza guijxh na'c chanätu lo nejz.
Na'cza chanätu tio'p xhajbtu, nicla gura'ch, nicla bas-
toŋ sa'csi bejn ni rujn dzuun nungäj̄l xca'ni xhi gauni.

¹¹ Räj pzani:

—Che guidzujntu xhitis te guedxro, xhitis te
guedxbäz, col̄quiiil te beŋsa'c. Rolijztisni col̄jia'n dxejli
ni jiuenejtu guejdxga. ¹² Cheni jiu'tu neŋ yu', col̄nii
xtidx Dios lo rebejn̄ga. ¹³ Palga najcreni bejn ni num-
bee Dios, sujia'n yäl̄rbedxilajz loj rebejn̄ga. Niluxh pal-
ga direni gac beŋsa'c, naaddireni xca'reni xtidx Dios,
suguibi' yäl̄rbedxilajzga lojtu, col̄jiunejz ro'c. ¹⁴ Palga
direni gusaan jiu'tu rolizreni, palga di rlazreni gucua-
dajgreni xtiidxtu, dxejc col̄jiunejz rolizj bejn̄ga, o col̄ji-
unejz guejdxga, dxejc col̄cuij̄b guxhuj ni'tu si'c te seen
gulälazreni xtidx Dios. ¹⁵ Rniliápac lojtu, dxej ni gun
Dios xcäl̄guxhtisni, te yäl̄guxhtisoru gun Dios rebejn̄-
ga, quela yäl̄guxhtis ni gujc rebeŋ guedx Sodoma näj
Gomorra.

Yäl̄rusacsí ni siäd

¹⁶ Räj pzani:

—iCol̄huiire! Narä suxhalä la'tu si'c xile' nez loj
reloob, ni'cni col̄gacnasiŋduxh si'c najc te bäl̄, col̄yajza
nadolajz si'c te palom. ¹⁷ Col̄natiro rebejn sa'csi sutee-
dreni la'tu ladzŋaa rexcuxhtisreni, siguijzareneni la'tu
neŋ xquidooreni. ¹⁸ Sinäzareneni la'tu nez loj regubier,
nez loj rereii xcuent rextidxä, te gusule'tu xtidxä nez
lojreni näjza nez loj rebejn nani di gumbee Dios.
¹⁹ Cheni chanäreneni la'tu nez loj reguxhtis, na'c guntu
xhigab xho guiniitu, niclaza guntu xhigab xhicha ni'c
guiniitu, sa'csi lagajc Dios suniidx diidx guiniitu orga.
²⁰ Sa'csi et la'ditu ni guinii dxejc, Sprit xten Xtadtu Dios
ni yu' neŋ lastootu, laani guinii neŋ lastootu.

²¹ 'Luxh rebejn suteedreneni lagajc bejtzreni ladzŋaa
reni ju'treni. Redad suteedreneni lagajc xi'nreni, rexi'n
bejn sidxe'chzareneni lo xcuzajreneni te ju't bejn xcuzaj-
reneni. ²² Guiraa rebejn guedxliuj sidxe'chreneni lojtu
xcuent xtidxä. Nani chanuu lo xtidxä dxej lultli, ni'c su-
jn gaan yäl̄nabajn par tejpas. ²³ Che guirinajlreneni la'tu
te gusacsíreneni la'tu neŋ te guejdx, col̄guxuŋ ro'c,
col̄chäj stee guejdx. Rniliä lojtu, ditu gun gaan tedtu
guiraa reguejdx xten rexejn̄ Israel ansde jääd Xi'n
Dios ni gujc Niguii.

²⁴ 'Di te bejn ni casieedgaj beŋroru lo xmastrni, diza
te mos gac beŋroru lo xlam̄ni. ²⁵ Te bejn ni casieed,
rsieedruni te gacni si'c najc xmastrni, sigajcza rujn
mos, riuni xtidx xlam̄ni te gacni si'c najc xlam̄ni. Palga
rbälajreneni Beelzebú nani rnibee beŋdxab, xho direni
cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räj pzani:

—Ni'cni na'c guidxejbtu rebejn, sa'csi anajntu xheti te
cos ni niäuu lojni ni di guidzujn dxej guixal lojni, te fii
chutis bejn lojni. Xhetiza te cos xhiga'tzdi ni di guidzu-
jn dxej siejn diajg bejn xcuentni. ²⁷ Diidx nani rniä lojtu
guxhijn, col̄guiniini che nianij lo guedxliuj. Rediidx nani
rniä chigaj rodiajgtu, col̄guiniini dip, jiaali col̄zuj,
guredxa' te jiejn̄ni. ²⁸ Na'c guidxejbtu renani rugu't be-
jn, sa'csi direni gun gaan ju'treni xaim bejn. Col̄guidxe-
jbru nani rugu't tiexh bejn näjza xaim bejn neŋ gabijl.

²⁹ '¿La di bejn guto' tio'p manbäz ni rutajt por te cen-
taab, ä? Luxh racbee Xtadnu ni yu' xhaguibaa che riadj
tejni lo yuj. ³⁰ Näjza rexquidxejclu nagab tebgajreni.

³¹ Ni'cni rniä na'c guidxejbtu; sajcrutu lo te chinaa man-
bäz ni rutajt.

Renani rusule' xtidx Jesucrist nez loj rebejn

(Lc. 12:8-9)

³² Räj pzani:

—Chutis renani rusule' xtidxä nez loj rebejn, narä
siniäza xcuentni nez loj xtaä ni yu' xhaguibaa.

³³ Guiraa renani di gusule' xtidxä nez loj rebejn, siga-
jza narä dina guiniä xcuentni nez loj xtaä ni yu' xh-
aguibaa.

Rlia' Jesús sa' bejn

(Lc. 12:51-53; 14:26-27)

³⁴ Räj pzani:

—Na'c guntu xhigab siädnaä yäl̄rbedxilajz lo reben
guedxliujre, xhet yäl̄cuedxidi ni siädnaä, yäl̄rdxagdiij
siädnaä. ³⁵ Narä siädnaä yäl̄rdxagdiij te bi'n con xtaäni;
te dxa'p con xnanni; te gulijzni con xnansuegrni.

³⁶ Ni'cni lagajc resa'tu ni yu' roliztu sidxe'chreneni lojtu.

³⁷ 'Nani sanälajzru xtaäni, xnanni, luxh narä dini
chanälajz, digacdi gacni xpeŋä; nani sanälajzru xin-
gaanni o xindxa'pni, di gacdi gacni xpeŋä. ³⁸ Nani di
guu xcruzni, nalajznu tedni trabajw, jäädnajl̄ni narä, di
gacdi gacni xpeŋä. ³⁹ Nani guidxäl̄ xcäl̄nabajn̄ni lo
guedxliujre, sunitni yäl̄nabajn̄ xhaguibaa. Luxh nani
gunijt xcäl̄nabajn̄ni lo guedxliujre xcuent rextidxä,
sidxäl̄ni yäl̄nabansa'c xhaguibaa.

Gaan nani xca'ni

(Mr. 9:41)

⁴⁰ Räj pzani:

—Nani guniidx rolizni jia'ntu, runiidxzani rolizni
jia'nä; luxh nani ruscuääz narä rolizni, rolizni rus-
cuääzani Gueb Dios nani baxhał narä. ⁴¹ Nani gus-
cuääz te niguii ni rnii xtidx Dios rolizni sa'csi baxhał
Dios niguiiga, sica'za bejn̄ga lagajc gaan ni xca' niguii
ni rnii xtidx Dios. Nani guscuääz te beŋsa'c rolizni
sa'csi beŋsa'cni, sica'zani lagajc gaan ni xca' beŋsa'cga.
⁴² Chutis nani gudeed mase te xhijgtis nis niäl̄liuj
xcuentä lo rebixue're, rniliápac lojtu, direni gunijt,
sica'pacreneni nani nungäj̄l xca'reni.

Renani baxha! Juan Bautist loj Jesús

(Lc. 7:18-35)

11 Che gulujx baluui Jesús rexpejn pacni xho gunreni dzuun, dxejcti biriini ro'c te saluui, chasule'ni diidx lajdx rexpejn pacni.

² Juan yu' neñ latzguiib. Che biejn diajgni xhi cayujn Jesús, baxha! ni tio'p xpejn pacni ³ te huinabdiidxreni:

—¿La luj ni najc Crist ni jiääd, ä?, o ¿la siläaznu chu stee bejn?

⁴ Dxejcti badzu' Jesús diidxre räjpni:

—Co!chäj, colye'tz loj Juan recos nani riejn diajgtu, näjza recos nani ruhuiitu. ⁵ Reni di fii, ruhuiireni; reni di sa, arsiyajreni, reni ra! tiejxhni, abiajc tiejxhreni; reni di jien diajg, ariejn diajgreni; rebengut, ahuäjzreni, gubansacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni rus!aa bejn neñ dojl. ⁶ Chicbaa renani di jieed narä.

⁷ Cheni sii rebejnga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? ⁸ ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolizj rereii. ⁹ La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beñroruni. ¹⁰ Laa Juan nani rusä't ni bacuaa lo reguijtz cadro caj scree:

Narä suxha!ä te niguii nani guinii xtidxä nez lojlu; laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te beñsacduxh loj Dios si'c ni najc Juan Bautist. Niluxh bejn nani najc beñ huinru lo xcälrnibee Dios xhaguibaa, bejnga maazru sajcnii loj Juan.

¹² Cheni gucli dxej ni gusloj rusule' Juan Bautist diidx najli, yu'duxh reni r!ajzpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' r!ajzreni cuäxuuni xcälrnibee Dios. ¹³ Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist.

¹⁴ Palga r!ajzta chali!ajzta, lagajc Juan najc Elías, niguii xten Dios nani bia'n diidx jiääd. ¹⁵ Nani sobdiajg diidx, gucua diajgni.

¹⁶ ¿Xhicojn guntebloä rebejn nani tre' naj, ä? Najczeni si'c najc rebiuux nani rguijtz nez lo guii cadro rdo', rbejdxreni lo sa'reni, ¹⁷ rniireni: "Bie!nu bizej te guya'tu luxh ditu nuya'. Dxejcti bie!nu redij ni nabaduxh luxh dizatu nioon." ¹⁸ Sa'csi che biääd Juan dini najcw dizani niä', luxh räjp rebejn najcni te xpejn beñdxab. ¹⁹ Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: "Niguiire rauxha't, rätezani bin, najcni xamigw rebeñdojl näjza reniguii ni ruquiix xcuent reyuj ni rajx lo gubier." Luxh loj rebejn ni najc xpejn Dios yuduxh xcälnajn Dios, ni'cni baxha!ni guiro'p rebejnre.

Reguejdx gualajz

(Lc. 10:13-15)

²⁰ Dxejcti gusloj Jesús gudi!näjni rebeñguejdx cadro benduxhni remilaagwr, sa'csi naaddireni gusiech!ajzreni xtoj!reni, sanuutis nabajñreni neñ dojl. Dxejcti räjpni:

²¹ —¡Gunatiru guedx Corazín! ¡Gunatiro guedx Bet-saida! Paru neñ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtoj!reni, cadxejli niajcwreni neñ godx, nidäab cobdäj yejcreni. ²² Luxh rniä lojtu: che guidzujñ dxej ni gun Dios xcäl!guxhtisni, sidejdrutu castiigw loj rebejn ni guläjz guedx Tiro näjza guedx Sidón. ²³ Luj guedx Capernaum di gunlu xhigab chäslu xhaguibaa; jiäjt neñ baa jiajblu, sa'csi paru neñ guedx Sodoma niajc sa' remilaagwr nani gujc guedx lajdxlu, pet najli tresijc guejdxga. ²⁴ Luxh rniä lojtu, dxej ni gun Dios xcäl!guxhtisni, trabajwduxhru tedtu loj rebejn Sodoma.

Co!taa loä, te gusilajzta

(Lc. 10:21-22)

²⁵ Laa dxejcnii räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluui!uni loj rebeñnadolajz ni najc si'c biuxbäz. ²⁶ O'n. Guliini, Xtadä, sa'csi rujnlu xhigab si'c najc hueen gacni.

²⁷ Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xinganni gumbee xtadni. ²⁸ Co!taa loä guiraatu nani abadxajg, nani rsina', narä sunidxä yälrusilajz lojtu. ²⁹ Co!guisieed guntu dzuun si'cni ruluiätu. Co!huii xho runä, xho nacä nadolajz, dizana gacä beñnayedx!ajz neñ lastoä, ni'cni sidxäl xaimtu yälrusilajz. ³⁰ Sa'csi guyasi najc xtzunä ni ruluiätu, dizani gac naganduxh.

Rutie' rexpejn Jesús triuu dxej ni rusilajzreni

(Mr. 2:23-28; Lc. 6:1-5)

12 Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejn pacni, guslojreni calädxa'reni doj lo triuu te cayajwreni. ² Che bahuii rebeñ guidoo ni laa farisee, räjpreni loj Jesús:

—Ahuii xho rujn rexpejn paclu dzuun nani di nungäj! gunreni dxej nani rusilajz bejn.

³ Luxh laani räjpni lojreni:

—¿La gajdtu go! xhi caj loj reguijtz xcuent ni bejn to-David che gulannäjni rexpejn, ä? ⁴ Biu'reni xquidoo Dios, gudajwreni yätxtiil nani di nungäj! gauni, nicla laani, niclaza rebejn nani sanäni, sa'csi yätxtiilga rebixhojztis rajwni. ⁵ O ¿la gajdtu go! lo reguijtz xten leii cadro caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzuunreni niluxh xhet dojl di rujnreni. ⁶ Narä rniä lojtu, ree suga' tej nani sajcro loj guidooga. ⁷ Paru niacbeetu xhi säloj dee: "Yäl!rulas!ajz r!azä, xhet yäl!rejtdi guidxaa", ditu nu-

cuaquij redee ni xhet bejndi. ⁸ Sa'csi narä Xi'n Dios ni gujc Niguui rnibeeä dxej ni rusilajz rebejn.

Niguui ni rxu'n naani
(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni. ¹⁰ Ro'c suga' te bejn ni gubijdz te naani. Luxh sa'csi caguillreni xho gucuaquijreni Jesús, gusloj canabdiidxreni lojni, räjpreni:

—La rusaan leii gusiajcní beñracxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gaļ dxej ni rusilajz bejn, çxhixh dini cuää xiil-ga neñ bisie, ä? ¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcní tebloj si'c najc stelaad naani. ¹⁴ Dxejcti birii rebeñ guidoo ni laa farisee, bachagsa'zarení te bia'nreni diidx ju'treni Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebeñracxhuu. ¹⁶ Dxejc räjpni lojreni:

—Na'cpac gäbreni chu najcni.

¹⁷ Si'c gujc te gusojb diidx ni gunii Isafas ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnä j bejn, dizani cuedxa'; rudza jiejni diajgni xse'ni lad nezyuj.

²⁰ Dini qui'ch nicla te nijt ni cabiejc, dizani gusuii te duxiil ni cayujn guxh, dxejli che gunni gaan guinibeeni yälguxhtis.

²¹ Lajtisni sustioob lastoo rebeñ ni digac xpejn Israel.

Rucuaquijreni Jesús rajpni yälrnibee xten beñdxab
(Mr. 3:19-30; Lc. 11:14-23; 12:10)

²² Dxejcti biädnäreni loj Jesús te bejn ni di fii, dizani guinii, yu' te beñdxab lastooni. Dxejcti basiajc Jesúsni, te gujc guniini, te gujca bahuiini. ²³ Guiraa rebejn bidxelojreni, räjpreni:

—ÇXhaa laa Xi'n toDavidni, ä?

²⁴ Che biejn diajg rebeñ guidoo ni laa farisee rediidxga, räjpreni:

—Bejnre rbää rebeñdxab con yälrnibee xten Beelzebú ni rnibee loj rebeñdxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridiñä j sa'reni, sinitlojreni. ²⁶ Sigajcza palga beñdxab rbää sabendxabni, silia' sa'reni, dxejc çxho gac chanuu xcälrnibeereni?

²⁷ Palga narä rbää rebeñdxab con yälrnibee xten Beelzebú, çchu xcälrnibee rajc rbää rexpejntu beñdxab, ä? Ni'cni lagajc laareni suluiireni xhet laadi rujntu xhigab. ²⁸ Palga narä rbää rebeñdxab con Xprit xten Dios, guliipacni abidzujñ xcälrnibee Dios lojtu.

²⁹ 'Bahuilaaare. ÇXho gac jiu' te bejn cuan roli jz te beñdaan, xho gac cuanni xhixten bejnğa, palga dini gulibxgaani beñdaanga? Che abilib bejnğa, sajc cuanni rehxixten bejnğa.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yälrusguee xte bejn sajc gusiäjļ lajzni xtebtis yälrniyaj Sprit Dxan xten Dios di Dios gusiäjļ lajzni. ³² Chutis ni guinii xhi te diidx yälrniyaj Xi'n Dios ni gujc Niguui sajc gusiäjļ lajzni, luxh chutis ni guiniyaj Sprit Dxan xten Dios, di Dios gusiäjļ lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni
(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴ Sa' la'tu beñguijdx ni najc si'c te bäl niälasduxh, çxho gac guiniitu te didxsa'c?, ni ro' bejn rniitis rehxigab ni yu' neñ lastoo bejn. ³⁵ Te beñsa'c rniini didxsa'c, sa'csi ganax xhigabsa'c yu' neñ lastooni, te beñguijdx rniitisi cosguijdx sa'csi ganax xhigabguijdx yu' neñ lastooni. ³⁶ Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis, ³⁷ sa'csi lagajc rextiidxlu sujn guinii Dios na-jclu beñsa'c, lagajc rextiidxlu sujn gunijtlu lo Dios.

Rebeñguijdx rniab te milagwr si'c te seen
(Mr. 8:12; Lc. 11:29-32)

³⁸ Dxejcti rebejn ni ruluii xleii toMoisés näjza rebeñ guidoo ni laa farisee, räjpreni loj Jesús:

—Mastr, nuurnu rrajznu guihuiinu te seen; bejn te milagwr te fiinuni.

³⁹ Badzu' Jesús diidxre, räjpni:

—Rebeñguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰ Sa'csi lagajc si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguui neñ lastoo guedxliuj choñ dxej, choñza yääl.

⁴¹ Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeñ Nínive basiejch lajzreni, bia xtojłreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Näjza reiñ xten rebeñ sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³ Räj pzani:

—Cheni rii te spritdxab neŋ lastoo te bejŋ, ricanzajni nez lo reyubijdz, ritiilni cadro gusilajzni, per cad rdxäl-dini. ⁴⁴ Dxejcti rujnni xhigab, naani, guibisacä cadro biriä. Cheni rbisacni ro'c, rdzujŋni si'c rdzujŋ te bejŋ neŋ te yu' ni naya neŋni, naliobsa'cni, sucheeni, luxh rut rbäjzdi ro'c. ⁴⁵ Dxejcti rijni, rixiini sgajdz sprit nani najc nadxuudxru lojni te jäädläznäjrenini neŋ lastoo bejŋga. Dxejcti rxhiŋduxhru bejŋga lojni gujcti galoo. Sigajcza gac rebejŋ ni tre' lo guedxliujre ŋaj.

Xnan Jesús con rebejtzni

(Mr. 3:31-35; Lc. 8:19-21)

⁴⁶ Laŋ ni caninäjni rebejŋ, bidzujŋ xnanni con rebejtzni, suga'reni rolä' rlanjreni guiniireni lojni. ⁴⁷ Dxejcti biääd tej ni räjp loj Jesús:

—Xnanlu näjza rebejtzlu suga' rolä' rlanjreni guinäjnreni luj.

⁴⁸ Laani badzu'ni diidx lo bejŋga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani ŋaani nez loj rexpejŋpacni, räjpni:

—Redee najc xnanä redeeza najc rebetzä! ⁵⁰ Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

Xcuent bejŋ nani rbe'c binij

(Mr. 4:1-9; Lc. 8:4-8)

13 Lagajc dxejga birii Jesús royu'ga, huicueni nez ro' nisdoo. ² Xhidalduxh bejŋ bire' cadro suga'ni, sas biu'ni neŋ te barcw, ro'c gurejni. Dxejcti rebejŋ gurej nez lo plaii. ³ Dxejcti gusloj caguluui Jesús con recuent, räjpni:

—Coŋcuadiajg. Birii te dade' ni rbe'c binij te cue'cni binij. ⁴ Laŋ ni cabe'cni binij yu' binij ni bitejb gajxh nez ro' nesuij, biääd remane' ni rutajt, sas gudajwreni binijga. ⁵ Yu' binij ni bitejb nez neŋ reguij cadro guxii yu' yuj. Gulengajc binijga sa'csi direni nibej jäät neŋ yuj. ⁶ Che birii gubijdx, bigoŋreni sa'csi xhetiza xlobaani, dx-ejc gubijdzni. ⁷ Yu'za binij ni bitejb neŋ reguejch. Che guroob reguejchga, dini nusaan niroob regäjle', gubijdzitireni. ⁸ Guyu' binij ni gurej lo reyusa'c, ro'c gucduxh-ni. Yu' binij cuaj te gayuu, yu'za binij cuaj gayoŋni, yu'za ni cuaj gaŋbitzuuni loj cade tej binij ni gurej. ⁹ Nani rsobdiajg diidx gucuardiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰ Dxejcti gubig rexpejŋpacni, gunabdiidx lojni, räjpreni:

—¿Xhicuent rusule'lu diidx loj rebejŋ con recuent?

¹¹ Dxejcti badzu' Jesús diidx rajpni lojreni:

—Sacnäŋ Dios la'tu te gacbeetu recos xhiga'tz xten xcäl'rnibee Dios xhaguibaa, luxh laareni digacdi gacbeerenini. ¹² Chutis ni arajp yälracbee, sica'runi te gapruni yälracbee. Sas nani guxii rajp yälracbee,

guiraa yälracbee ni rajpni sibicaj. ¹³ Ni'cni rniä lojreni con recuent sa'csi mase cadxelojreni, direni fii, mase cacuardiajgreni di diajgreni jiejn, xhet racbeedireni.

¹⁴ Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu, sidxelojactu, niluxh ditu fii.

¹⁵ Sa'csi guyalajz rebejŋre, lastooreni najc si'c te guij, di diajgreni jiejn, luxh niäuzä balojreni, didi fisa'creni con balojreni, didi jiejnza diajgreni, didi gacbeeza lastooreni, didi gusiejch lajzreni guibi'reni loä te gusiäcä lastooreni.

¹⁶ La'tu coŋguibalaznäŋ balojtu sa'csi rhuisa'ctu, riena-sa'cza diajgtu. ¹⁷ Rniliäpac, xhidajl redade' ni gunii xtidx Dios, näjza xhidajl beŋsa'c rlazduxh nuhii sa' recos ni cahuiitu, luxh direni nuhuiini, rlanjreni niejn diajgreni sa' rediidx nani cayejn diajgtu, luxh di diajgreni niejnini.

Rusule' Jesús xcuent bejŋ ni rbe'c binij

(Mr. 4:13-20; Lc. 8:11-15)

¹⁸ Coŋcuadiajg xhi säloj xcuent bejŋ nani rbe'c binij.

¹⁹ Rebejŋ nani rucuardiajg diidx xten xcäl'rnibee Dios, niluxh direni gacbeeni, najcreni si'c najc binij nani bitejb nez ro' nesuij; riääd beŋdxab rudzucajni rediidx nani biu' neŋ lastooni. ²⁰ Rebinij nani bitejb nez neŋ reguij, najc si'c rebejŋ nani rucuardiajg diidx, gustli rca'reni diidxga, ²¹ luxh guxii yu' xlobaani, direni sutijp. Che rdejreni trabajw, che rdxe'ch bejŋ lojreni, sa'csi rucuardiajgreni xtidx Dios, rusiejch lajzreni, rbälazni diidxga. ²² Rebinij nani gurej neŋ reyaguejch säloj rebejŋ nani rucuardiajg rextidx Dios rujnrureni te gunreni dzu-un te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios neŋ lastoo rebejŋre, dini gusaan gac te cosechsa'c neŋ lastoo rebejŋre. ²³ Dxejcti rebinij nani rtejb lo reyusa'c, ni'c najc si'c rebejŋ nani rucuardiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejŋ ni najc si'c binij ni gujcti te gayuu; yu' bejŋ ni najc si'c binij ni gujcti te gayoŋ; yu'za bejŋ ni najc si'c binij ni gujcti gaŋbitzuu.

Xcuent triuu cadro guyu' cuanguejch²⁴ Dxejcti bij Jesús stee cuent, räjpni:

—Xcäl'rnibee Dios xhaguibaa najc si'c te bejŋ nani gule'c ganax triusa'c lo xyujni. ²⁵ Laŋ nagaguejcs bejŋga, biääd te bejŋ nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejŋga, dxejcti sääni. ²⁶ Cheni gulejn triuuga, birii doj lojni, dxejcti biricaj näjza cuanguejch ro'c. ²⁷ Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” ²⁸ Räjp xlamreni: “Te bejŋ ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlanj guejblu cholädxa'nu recuanguejchga, ä?” ²⁹ Dxejcti räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. ³⁰ Coŋsaan tioobreni tebloj. Che guire' cose'ch, dxejcti guinibeä remos gutiexgaareni cuanguejch, guili-

ibrenini gacni ters, dxejcti checni. Dxejcti sajc gutie'reni triuu chucheeni neṅ yu'."

Xcuent bedz muxhtas
(Mr. 4:30-32; Lc. 13:18-19)

³¹ Bijza Jesús stee cuent räjpni:
—Xcäl̄rnibee Dios xhaguibaa najcni si'c te bedz muxhtas nani cue'c te beṅ lo xyujni. ³² Gulii bejdzga najc baze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

Xcuent levaduur
(Lc. 13:20-21)

³³ Bijzani stee cuentre, räjpni:
—Xcäl̄rnibee Dios xhaguibaa najc si'c levaduur nani rugu'ch te gunaa lo choṅ mediid ariṅ, dxejc ni'c rusaguijni guideb cojbga.

Xhicuent baluui Jesús ganaxtis con cuent
(Mr. 4:33-34)

³⁴ Baluui Jesús guiraa rebeṅ ganaxtis con recuent, xhetiru stee mood nuluiini, ganaxtis con cuent guniini lojreni. ³⁵ Si'c bejn̄ni te guzobj xtidx dade' ni gunii xtidx Dios che bacuaani lo reguijtz, räjpni:
Suiyā diidx con recuent,
suiyā diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch neṅ triuu

³⁶ Dxejcti basadiidx Jesús rebeṅ, biu'tini neṅ yu' cadro bire' rexpejṅpacni lojni, räjpreni lojni:
—Basule' loonu xcuent cuanguejch ni guyu' loniaa.
³⁷ Räjp Jesús lojreni:
—Beṅ nani rbe'c retriusa'c, najc Xi'n Dios ni gujc Niguii; ³⁸ loniaaga najc guedxliuj; retriusa'c najc rebeṅ nani najc xpejṅ Dios, nani rucuaiajg xtiidxni; recuanguejchga najc rebeṅ ni najc xpejṅ beṅdxab. ³⁹ Beṅ nani rdxe'ch lajz najc lagajc beṅdxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguii suxhaḷ rexangl̄ni te jiädgutie'reni, te jiädlääreni lo xcäl̄rnibeeni guiraa renani rujn riabj beṅ neṅ dojl, näjza reni rujn cosguijdx. ⁴² Susäl̄reni rebeṅ-ga neṅ te oṛ cadro cayecduxh. Ro'c sonduxhreni, sauya'reni läjyreni. ⁴³ Dxejcti rebeṅsa'c sidimbicha'reni si'c gubijdx lo xcäl̄rnibee Xtadreni. Palga sobdiajgtu, colgucuaiaagsa'c.

Te cossacduxh ni naga'tz

⁴⁴ Räjzp̄zani:
—Si'cza xcäl̄rnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räjzp̄zani:
—Xcäl̄rnibee Dios xhaguibaa najcza si'c najc te dad rapduxh nani caguuil perlsa'c te siini. ⁴⁶ Che bidxäl̄ni te perlsa'c, tejni sacduxh, bato'ni guiraa xhixtenni te gusiini perлга.

Guijxh ni rniaaz bāj̄l

⁴⁷ Räjzp̄zani:
—Xcäl̄rnibee Dios xhaguibaa najcza si'c te guiijxh ni rusäl̄ beṅ lo nis te rniaazreni guiraloj cuaa bāj̄l. ⁴⁸ Cheni agudxajni, rbäärenini nez ro' nisdoo, te ro'c rbereni loj rebāj̄l. Rebāj̄l ni najc hueen rucweeni neṅ te dxijm; nani di gac hueen rusäl̄renini te laad. ⁴⁹ Si'cza gac che gac fis guedxliuj; sirii rexangl Dios te sudzucaren̄i rebeṅguijdx lo rebeṅsa'c. ⁵⁰ Dxejcti susäl̄reni rebeṅguijdx neṅ te oṛ cadro cayecduxh; ro'c sonduxhreni, sauya'reni läjyreni.

Te beṅ rajp

⁵¹ Dxejcti gunabdiidx Jesús lojreni, räjpni:
—¿La racbeetu guiraa ni caniä lojtu, ä?
Dxejcti räjpreni:
—O', racbeenuni Dad.
⁵² Dxejcti räjpni lojreni:
—Cheni rsieed te beṅ nani najn leii xcuent yäl̄rnibee xten Dios xhaguibaa, najcni si'c te lam̄ nani rajc rbää lo rexcäl̄nasa'cni recos ni nacoob, näjza recos bieṅw.

Jesús lo guedx Nazare't
(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni.
⁵⁴ Huijni lagajc lajdxni. Ro'c gusloj caguluiini neṅ xquidobäzreni ro'c. Dxejcti rdxeloduxh rebeṅ ro'c, räjpreni:
—¿Caro bisieedni reyäl̄najnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas. ⁵⁶ Luxh rebisiajnni rbäjzreni lo guejdxre. ¿Cacharo bisieedni guiraa nani caguluiini?
⁵⁷ Dxejcti cayujnreni xhigab chugan la guliini, dxejc räjp Jesús lojreni:
—Guiraa rebeṅ rinälajz te niguii nani rnii xtidx Dios, biädla rebeṅ lajdxpacni direni jiu xtiidxni.
⁵⁸ Ni'c dini niujn xhidal milagwr ro'c sa'csi direni chalilajz xtiidxni.

Che gujt Juan Bautist
(Mr. 6:14-29; Lc. 9:7-9)

14 Lagajc neṅ redxejga Herodes, ni laaza tetarcarca, bieṅ diajgni diidx xcuent ni cayujn Jesús. ² Dxejc räjpni lo rexmosni:
—Dee najc Juan Bautist. Pet agubaṅsacni lo rebeṅgut, ni'cni rajpni yäl̄rnibee te rujnni remilagwr.
³ Si'c gunii Herodes sa'csi laani basäuuni Juan neṅ latzguiib. Niluxh gunibeeni biliibni con caden̄ neṅ

latzguiib xcuent Herodías, ni gujc chääł bejtzni Felipe.

⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääł bejtzlu.

⁵ Rlajz Herodes nugu'tni Juan, luxh rdxejbni re-benguejdx, sa'csi guiraareni rniireni Juan najc te niguii ni rnii xtidx Dios. ⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷ räjpni loj gunaaga:

—Gunab xhitis ni rlaizlu, sa'csi gudix lazä gunidxä ni guiniabtislu.

⁸ Dxejcti gunaaga, abaliidx xnannini, räjpni lo Herodes:

—Loj te platón baniidx bitiuwejc Juan Bautist.

⁹ Diidxga benhuin lastoo reii Herodes, per sa'csi abia'ni, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' yejc Juan Bautist neñ latzguiib. ¹¹ Sas biädnäreni yejcti lo te platón, badeedreni loj gunaaga. Dxejcti gunaaga badeedreni lo xnanni.

¹² Dxejcti bidzujñ rexpejn Juan sanäreni togoolga te huicua'tzrenini. Dxejcro huisa'nreni diidx loj Jesús.

Bayaan Jesús gaii mił bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni. ¹⁴ Che birii Jesús neñ barcw, bahuiini loj xhidalduxh bejn, dxejc balazla-jznireni, basiajcti rebejn nani racxhuu. ¹⁵ Cheni acayu' guxhijñ, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjł rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjł, guläsn lojni xh-aguibaa, badeedni xquixhtios lo Dios, dxejcti gula'ni reyätxtiil. Badeedreni loj rexpejn pacni. Dxejcti rexpejn pacni gudisrenini loj rebeñ xhidajł. ²⁰ Guiraareni guda-jw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. ²¹ Renani gudajw najczeni si'cti gaii mił niguii, xhet näjdi regunaa niclaza rebiuux bigab.

Gusaj Jesús lo nisdoo

(Mr. 6:45-52; Jn. 6:16-21)

²² Sas gunibee Jesús biu' rexpejn pacni neñ barcw te ganidreni tedreni stee lad nis lałni casadiidxni rebejn.

²³ Che gulujx basadiidxni rebejn, huä'p Jesús yecdajñ te xtebni guninäjni Dios Xtadni. Che gojl guxhijñ, ro'c

sugaxteb Jesús. ²⁴ Luxh barcw galäi lo nis sasaj. Ca-gusnibduxh reol barcw, liriääzni lo nis sa'csi cabi' beduxh cadro sääreni. ²⁵ Rsiidooru gubig Jesús, bidzujñni lojreni, siädsajni lo nisdoo. ²⁶ Che bahuii rexpejn pacni siädsajni lo nisdoo, bidxejbreni, räjpreni:

—Colhunii te fantasmni —guredxa'reni sa'csi bidxeb-duxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiläl lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús. ³⁰ Che bahuii Pedr beduxh ni cabi', bidxej-bni, dxejc gusloj cayääzni neñ nisdoo. Guredxa'ni, räjpni:

—Dad, jgulää narä!

³¹ Lagajc dxejc gunaaz Jesús naani, räjpni loj Pedr:

—Guxii rajplu yärlirilajz. ¿Xhicuent guctio'p lajzlu?

³² Che huä'preni neñ barcw, guläzgjajc bej. ³³ Dxejcti renani sää neñ barcw bazuxhijbreni nez loj Jesús räjpreni:

—Gulliipacni najclu Xi'n Dios.

Basiajc Jesús rebeñ racxhuu guedx Genesare't

(Mr. 6:53-56)

³⁴ Che gudejdreni lo nis, bidzujñreni nez lo reyuj xten Genesare't. ³⁵ Che biembee rebeñ ro'cni, batie'chreni diidx guideb gabi lajdxreni. Dxejcti biädnäreni guiraa rebeñ racxhuu lojni. ³⁶ Gunabduxhreni gusaanni canreni ro' xhajbtisni. Dxejcti guiraa renani gudajñ xhajbni, bjaicreni.

Nani ruxhiñ bejn

(Mr. 7:1-23)

15 Dxejcti gubig gaii rebejn nani ruluii leii näjza re-bejn guidoo ni laa farisee. Siäädreni guedx Jerusalén, räjpreni loj Jesús:

² —¿Xhicuent di rexpejn pacnu jiu xcostrumbr rebeñ-gool? ¿Xhicuent direni gusoob yälrdiib naareni che rajwreni?

³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riuuru rexcostumbrtu. ⁴ Dios gunibeeni xho guntu che räjpni: "Gojp xpala'n xtadlu, xnanlu", näjza "Nani guiniyaj lo xtadni o loj xnanni, suguetni." ⁵ Luxh la'tu rniitu sajç gäb chutis bejn loj xtadni o loj xnanni: "Di-gacdi gacnäätu sa'csi guiraa ni rapä abadedäni lo Dios." ⁶ Luxh chutis ni guinii si'c, xhetru nanabdi gac-näjni xtadni o xnani. Si'c ni cabälaztu rextidx Dios te gac chanuutu rexcostumbrtu. ⁷ ;Bejn ni rusguee najc-tu! Laaca gunii Isafas, bejn nani gunii xtidx Dios xcuenttu cheni räjpni:

⁸ Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹ Xlia'si rajñreni narä, sa'csi ruluiireni si'c xtidxä reyälrnibee xten rebeñ guedxliuj.

¹⁰ Dxejcti gurejdxni rebejn, räjpni lojreni:

—Colcuadiajg, colyacbee. ¹¹ Nani riu' ro' bejn di guxhiñ bejnğa, sanga nani rii ro' bejnğa ni'cni ruxhiñ bejnğa.

¹² Dxejcti rexpejnıpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtađä ni yu' xhaguibaa nusuj sil-iađxa'ni guideb xlobaani. ¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii caneñz cháä stee lotiä'p, guiro'preni sitejbreñi neñ te gueed.

¹⁵ Räjp Pedr loj Jesús:

—Basule' cuentre loonu.

¹⁶ Räjp Jesús:

—¿La näjza la'tu ditu gacbee, ä? ¹⁷ ¿La ditu gacbee guiraa ni rajw bejn ru' xque'ni, dxejcti che rdejđni xque'ni, abigo'ñni? ¹⁸ Niluxh diidx nani rii ro' bejn, neñ lastoo bejn riini; dee ni ruxhiñ bejn. ¹⁹ Sa'csi neñ lastoo bejn rii rexhigabguijđx xten rebejn ni rugu't sa'ni; xten rebejn ni rusguee gunaa; xten rebejn ni rusguee cháäl sa'ni; xten rebejn ni rbajn; xten rebejn ni rñii didxxhii lo sa'ni; xtenza rebejn ni rutijl sa'ni. ²⁰ Laa sa' recosre ni ruxhiñ bejn. Che dini gusoob recostumbr xte yälrdiib ñaani, di ni'c guxhiñ bejn.

Te gunazit nani huililajz xtidx Jesús

(Mr. 7:24-30)

²¹ Biriiti Jesús ro'c, sääni nez región xten Tiro näjza Sidón. ²² Neñzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beñdxab lastooni, niluxh cagusacsíduxhñni.

²³ Xhet räjpdi Jesús lojni. Dxejcti biädnađduxh rexpejnıpacni lojni, räjpreni:

—Barilaagw gunaare, didi rbedxa'ni siädnađni luj.

²⁴ Dxejcti räjp Jesús lojni:

—Dios baxhał narä lojtis xpeñ Israel nani agunijt neñ dojl.

²⁵ Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn xcuxtiil rexi'ñni gusälñini lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcälirililajzlu. Sugac si'cni rrlajzlu.

Lagajc dxejc biajc xindxa'pni.

Basiajc Jesús xhidal beñ racxhuu

²⁹ Birii Jesús ro'c gudejđni nez ro' nisdoo ni laa Galilee. Huäpgajcni yejc te dajn, ro'c gurejni. ³⁰ Xhidajl bejn bidzujñ cad sobga'ni. Siädñäreni rebeñ ni rajc

ni'ni, rebeñ ni najc lotiä'p, rebeñ gop, rebeñ ni xheti ñaani, näjza xhidalro beñ racxhuu, bidzujñäreni nez loj Jesús. Dxejcti basiajcnireni. ³¹ Ni'cni lacti bidxeloduxh rebeñ xhidajlga che bahuiireni rñii regop, riajc reni xheti ñaani, rsiaj reni rajc ni'ni, ruhuii relotiä'p, dx-ejc rliä'preni xpala'n Xtios rexpeñ Israel.

Badeed Jesús xhi gudajw tajp mił bejn

(Mr. 8:1-10)

³² Gurejdx Jesús rexpejnıpacni räjpni lojreni:

—Riaä rebejnre sa'csi agujc choñ dxej yunäjreni narä luxh xhet ca'direni gaureni. Di rlazä guxhałäreni jiireni rolizreni palga gajđreni gau didi guidxajgreni lo nezyuj.

³³ Dxejcti räjp rexpejnıpacni lojni:

—¿Xho guidxälñu xhi gau rebeñ xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajđztisni, näjza gaii bälbäze'.

³⁵ Sas gunibee Jesús cue rebejn lo yuj. ³⁶ Dxejc cua' Jesús guigajdz yätxtiilga näjza rebäjł, badeedni xquixtios lo Dios dxejc gula'ni reyätxtiilga näjza rebäjłga badeedñireni loj rexpejnıpacni. Dxejcti laareni gudisreni yätxtiilga con rebäjłga lo rebeñ xhidajlga.

³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajđz dxijmni. ³⁸ Renani gudajwga najc si'cti tajp mił bejn, niluxh xhet näjdi regunaa ni claza rebiuux bigab. ³⁹ Dxejcti basadiidx Jesús rebejn, biu'tini neñ barcw te gudejđni lo nisdoo nez región xten Magdala.

Rebeñ guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

16 Refarisee näjza resaducee bidzujñreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagusguesireni, sa'csi rlazreni guiga' Jesús. ² Dxejc badzu' Jesús diidxre räjpni lojreni:

—Che rajł gudxej, rñiitu: "Saru gac te dxej guixee sa'csi naxniaa xhaguibaa." ³ Che rajł rsil rñiitu: "Etladi gac te dxej nadxej sa'csi naxniaa xhaguibaa niluxh tre'za." Xhoxh numbeetu xhi säloj reseñ ni rien xhaguibaa, luxh ditu gumbee xhi säloj reseñ xcuent redxejre, nalajznu recos ni cayajc. ⁴ Rebeñ guijđxre, rebeñ guyalajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejđ rexpejnıpacni stelaad nisdoo biäl-lazreni ninäreni yätxtiil. ⁶ Dxejcti räjp Jesús lojreni:

—Bacuadiajg, colñati levaduur xten refarisee näjza resaducee.

⁷ Dxejcti bejnreni xhigab neŋ lastooreni: “Si'c caniini sa'csi dinu niopnā yätxtiil.” ⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¡Huinduxh najc xcälirililajztu! ⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii miļ bejn, ä? ¿Bal dxijmni batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap miļ bejn, ä? ¿Bal dxijmni batie'tu? ¹¹ ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

¹² Dxejcru gucbeereni dini niäjp: “Colnati levaduur xten yätxtiil.” Laani caniini: “Colnaati yälrluluii xten refarisee näjza resaducee.”

Bicäjp Pedr Jesús najc Cristpac (Mr. 8:27-30; Lc. 9:18-21)

¹³ Che bidzujn Jesús región xten Cesarea xten guedx Filipo, gunabdiidx Jesús loj rexpejnpacni, räjpni:

—¿Chu naj rebejn nacä narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejndi baluui dee lojlu, Xtradätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejlū guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yälrnibee lojlu te gulijdxlu rebejn nani ahuililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejnpacni laani najc Guejb Crist.

Gunii Jesús xho guetni (Mr. 8:31-9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejnpacni, guniini lojreni xho nanabpac chääni guedx Jerusalén te ro'c tedni trabajwduxh ladzŋaa rebengool xten guidoo, ladzŋaa rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

²² Dxejcti huinä Pedr Jesús te laad, gusloj cadiñajnini, räjpni:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpni lo Pedr:

—¡Gubicaj loä beñdxab! Na'c rusieyjtislu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti räjp Jesús loj rexpejnpacni:

—Palga yu' chu tejtū rlaiz guirinajl narä, sucuälazni lagajc laani, suguuni xcrujzni, nalajznu tedni trabajw,

sujiädnaļni narä. ²⁵ Sa'csi nani rlaiz gunni gaan xcälñabajnni, sunijtnini. Luxh nani runijt xcälñabajnni por narä, sidxälñi xcälñabajnni par tejpas. ²⁶ Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? ²⁷ Sa'csi narä Xi'n Dios ni gujc Niguii siälä lo yälrdimbicha' xten Xtradä con rexanglñi, dxejcti siguixä tebgaj bejn si'ctis ni gujc xtzuunni. ²⁸ Rniliápac lojtu, loj reni tre' ree ŋaj, yu'reni di guet dxejli ni fixgaareni jialä narä Xi'n Dios ni gujc Niguii lo xcälñnibeä.

Chuni'c najc guroob (Mr. 9:2-13; Lc. 9:28-36)

17 Che gudeed xho'p dxej, huinä Jesús Pedr, Jacoob, con Juan betz Jacoob, xtebreni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajnbi gujc nolbäj si'c te bajl. ³ Dxejc bahuigajcreni loj Moisés näjza loj Elías, cayujyreni diidx con Jesús. ⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rlaizlu, sajc jienno choŋ yuguijxh, tejni gac xten guejblu, steeni gac xten Moisés, steeni gac xten Elías.

⁵ Laļni canii Pedr, biäjt te za ni rdimbicha' guideb gabireni; neŋ zaga biejn te xse' ni räjp:

—Dee najc xi'nä ni sanälazä, ruspadxhni lazä, colcuadiajg xtiidxni.

⁶ Che biejn diajg rexpejnpac Jesús diidxga, bazuxhijbreni, basajbreni lojreni lo yuj, bidxebduxhrenei. ⁷ Dxejcti gubig Jesús lojreni, batzuubni ŋaani yejcreni, räjpni:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäjdini.

⁹ Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguii lo rebengut.

¹⁰ Dxejcti gunabdiidx rexpejnpacni lojni:

—¿Xhicuent rnii rebejn ni najn xleii Moisés ganid Elías nanab jiaäd, ä?

¹¹ Badzu' Jesús diidxre, räjpni:

—Guliini siädxgaa Elías, laani gunsa'cni guira'ti,

¹² niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rlaizreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhrenei narä.

¹³ Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej beñdxab (Mr. 9:14-29; Lc. 9:37-43)

¹⁴ Cheni bidzujnreni cadre tre' xhidajl bejn, gubig te bejn lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguijdxgani, yu' huält rtejbn lo guiboo yu' huält rtejbn lo nis. ¹⁶ Biädñääni loj rexpejnpacnu, luxh di niajcdi nusajcrenini.

¹⁷ Jesús badzu' diidxre lojreni räjpni:
—Benguijdx, bejn ni di chalilajz, ¿gucli yu'ä lojtu?
¿Cati gac gunä huant la'tu? ¿Coltanä biuuxga ree!

¹⁸ Dxejcti gudijnäj Jesús beñdxab ni yu' lastoo biuuxga, gunibeeni biriini, lagajc dxejc biasc biuuxga.

¹⁹ Dxejc guninäj rexpejn pacni Jesús te laad, gunabdiidxreni räjpreni:

—¿Xhicuent di niajcdi nibäanu beñdxab neñ lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälirililajz xtentu si'cti te bejdz muxhtas, sajz gäbtu loj dajn rec: "Gubicaj ro'c, gudejd stelaad", luxh sibicaj dajnga. Palga rililajz pactu, xhetliidi yu' ni di gacdi guntu.

²¹ Niluxh sa' beñdxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²² Lañi sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladzña rebeñdojl te gusacsireni narä. ²³ Niluxh sugu'treni narä, dxejc ni riojn dxej sibansacä lo rebengut.

Che biejn diajgreni diidxga, guc-huinduxh lajzreni.

Gudijxni impuest xten guidoo

²⁴ Che bidzujn Jesús näjza rexpejn pacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr neñ yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni nibee lo guedxliujre? ¿Chuni'c rguijx reimpuest, recuyo't? ¿Rebeñ lajdxreni o rebeñzajt?

²⁶ Badzu' Pedr diidxre räjpni:

—Rebeñzajt.

Räjp Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bäjl ni guiniazgaalu. Ro' bäjlga sidxällu te melpla't ni saj te chatijxlu impuest xcuentä näjza xcuentlu.

¿Chuni'c sajrcu lajdx Dios xhaguibaa?

(Mr. 9:33-37; Lc. 9:46-48)

18 Laa dxejcti gubig rexpejn pac Jesús lojni te gunabdiidxreni:

—¿Chuni'c sajrcu lajdx Dios xhaguibaa?

² Dxejcti gurejdx Jesús te biuxbäz, bazujnini nez galäiireni, ³ dxejc räjpni:

—Rniliäpac lojtu, palga ditu gusiechlaiztu, palga ditu gac nadolajz si'c te biuxbäz, ditu jiu' lajdx Dios xhaguibaa. ⁴ Ni'cni chutis bejn nani gac nadolajz si'c biuxe're, laani gac ni sajrcu lajdx Dios xhaguibaa.

⁵ Chutis ni riu te sa' biuxe're, sa'csi rinälajzni narä, laga-narä riuni.

Riezwg jiajbni neñ dojl

(Mr. 9:42-48; Lc. 17:1-2)

⁶ Räjpzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojl yejnini, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ Palga ni'lu o ñaalu gun jiajb lu lo dojl, batiu'ni. Hueenru jiu'lu lo xcälñabajn Dios nitiujnglu o ñatiujnglu lacuaa jiilu con guiro'p ni'lu o guiro'p ñaalu lo balduxh ni rej par tejpas. ⁹ Palga te balojlu rujn riajb lu lo dojl, gulääni. Hueenru jiu'lu lo xcälñabee Dios najclu lotiä'p lacuaa chu guiro'p baloj chazälreni luj lo balduxh ni rej par tejpas.

Xcuent xiil ni gunij

(Lc. 15:3-7)

¹⁰ Räjpza Jesús lojreni:

—¿Colnatiro, andi cuälaztu rebejn ni najc si'c biuxbäzre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹ Sa'csi Xi'n Dios ni gujc Niguii biääd te guslaani rebejn nani aguni-jt neñ dojl.

¹² Räjpzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' neñ gurajl te chatiilni xile' ni gunij, ä? ¹³ Luxh palga guidxälni xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiil nani di ninijt. ¹⁴ Sigajcza Xtadnu ni yu' xhaguibaa di rlaiz nit lo Dios nicla tej reni ahuililajz xtiidxni, ni najc si'c biuxbäzre.

Xho gunnäjlu bejtzlu

(Lc. 17:3)

¹⁵ Räjpzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejnini lojlu. Palga saru gucuadiajgni xtiidxlu, abiäjl lajztu. ¹⁶ Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnnga, te arajplu tio'p o choñ testiigw. ¹⁷ Palga di bejtzlu gucuadiajg xtidx rebejnnga, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu rebeñ guidoo, sugacni nez lojlu si'c te benguijdx ni di gumbree xtidx Dios o si'c rebeñ nani rusquijx loj rebeñ nani ruto'.

¹⁸ Ni'cni rniliäpac lojtu, guiraa yälguxhtis xten bejn ni di gusiechlaiz xtojlreni ni guntu lo guedxliuj, si'c jia'nni xhaguibaa; guiraa redojl nani gusiäljl lajztu lo guedxliuj sa'csi basiechlaiz beñdojlga, si'cza jia'nni xhaguibaa.

¹⁹ Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni. ²⁰ Sa'csi

cadrotis nadxagsa' tio'p o choṅ bejṅ sa'csi rinälajzreni narä, anasuga'ä galäii rebejṅga.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjl lazä? ¿La sajl gajdzli huält, ä?

²² Badzu' Jesús diidxre lojni räjpni:

—Dina guiniä gajdztis huält, rniä gayoṅbidzuu huält, nalajznu si'ctiza huält basiäjl lajzlu.

Xcuent tio'p bejṅ ni nazäab meel

²³ Xcälrnibee Dios xhaguibaa najc si'c te reii ni rlaiz gunni cuent lac nazäab rexmosni lojni. ²⁴ Agusloj cayujni xcuentni chela bidzunnäjreni te mos ni nazäab balti mil lojni. ²⁵ Luxh mosre xhet rajpdini te quiixni rexti'nni, ni'c gunibee reii guido'ni si'c sclav, näjza chäälni, näjza rexi'nni, nägajcza guiralii xhixtenni, te gaxh xti'nni. ²⁶ Dxejcti mosga bazuxhijbni loj xlamni, gunabduxhni lojni, räjpni: “Guläzsijc tiop-choṅ dxej, Dad, te gac quixä xti'nä.” ²⁷ Dxejcti lamga balazlazjni xmosni, badzucajni guiraa ni nazäab mosga lojni, baslaanini. ²⁸ Cheni birii mosga rolijz xlamni, bidxaagni stee samosni ni nazäab bale'si beex lojni. Gunaaznini, baxhiya'ni yejnini, dxej räjpni: “Gudijxga ni nazäablu loä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni neṅ latzguuib te bejnini gaan gudijxni guiraa ni nazäabni. ³¹ Cheni bahuii sgaii mos xhini'c bejnini, gucnaduxhla-jzreni, huiye'tzreni lo xlamreni xhi huiyejnini. ³² Dxejcti gurejdx xlamreni mosga, räjpni lojni: “¡Mos guijdx! Narä badzucä di'n ni nazäablu loä, sa'csi gunabduxhlu loä. ³³ Si'cza niunnäjlu sa'lu, nulazlazluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazäabni lo xlamni.

³⁵ Baluux Jesús cuentga, räjpni:

—Sigajcza gunnäj Xtaädi ni yu' xhaguibaa guiraa rebejṅ ni di gusiälajzpac guiraa redojl ni rujn resa'ni lojni.

Jesús ruluii xcuent yälruo'n sa'ni

(Mr. 10:1-12; Lc. 16:18)

19 Che gulujx gunii Jesús recuente, biunejzni Galilee, huijni lo región xten Judea, stelaad gueu Jordán. ² Xhidajl bejṅ birinajlmi, ro'c basiajcni rebenracxhuu, ³ dxej gubig refarisee lojni, rlaizreni gusguesireni Jesús ni'c räjpreni lojni:

—¿La sajc guro'n te niguii chäälmi che rlaiztisni, ä?

⁴ Badzu' Jesús diidxre lojreni, räjpni:

—¿La gajdte gojl lo reguijtz nani bacuaa toMoisés cadro caj xho benchee Dios bejṅ galooli: “Niguii näjza gunaa bencheenireni?” ⁵ Guniiza Moisés: “Ni'cni gusaan niguii xtadni con xnanni te xca'ni chäälmi, dxej dirureni gac tio'p, tejtis bejṅ najcreni.” ⁶ Ni'cni dirureni gac tio'p, anajcreni tejtis bejṅ, digacdi guilia' rebejṅ lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo chäälmi te si'c gac guro'nni gunaaga, ä?

⁸ Räjp Jesús lojreni:

—Sa'csi najc lastootu si'c te guij, ni'c basaan toMoisés boro'n niguii chäälmi, niluxh galodoo et si'cti gujcti.

⁹ Luxh rniä lojtu, niguii nani gusaan chäälmi, luxh xhet dojldi bennäj chäälmi stee niguii, dxejcti guchṅaani ste'ca gunaa, rujnni dojl. Sigajcza niguii ni guchṅaa gu-naaga ni abaro'n chäälmi, rujnza niguiiga dojl.

¹⁰ Dxej räjp rexpejṅpacni lojni:

—Palga si'c najc xcuent niguii con chäälmi, hueenru na'c guchṅaani.

¹¹ Jesús räjp lojreni:

—Xhet guiraadi bejṅ rajc gacbee rediidxre, rebejntis ni ruedeed Dios te xcäriensa'c ni'ctis racbee. ¹² Yu' xhicuent digacdi guchṅaa niguii: yu'reni digacdi guchṅaa sa'csi si'c gojlni; yu'reni digacdi guchṅaa sa'csi baxhiṅ sabejṅreni; yu'zarenini digacdi guchṅaareni sa'csi rlaizreni gunreni xtuuntis Dios. Nani rajc racbeenini rediidxre, sugacbeenireni.

Biädnäreni rebiuux loj Jesús

(Mr. 10:13-16; Lc. 18:15-17)

¹³ Dxejcti biädnäreni rebiuxe' loj Jesús te gudzuubni ṅaani yejcreni, guiniabni lo Dios xcuentreni. Luxh rexpejṅpacni gudilnäj rebejṅ ni siädnä rebiuxe'ga. ¹⁴ Dxej räjp Jesús lojreni:

—Colgusaan guibig rebiuxe' loä, na'c gudxojtuneni, sa'csi xcälrnibee Dios xhaguibaa najc xten reni nadolajz si'c najc rebiuxe're.

¹⁵ Che gulujx badzuubni ṅaani yejc rebiuxe', biunejzni ro'c.

Te bejṅ ni rajp guninäj Jesús

(Mr. 10:17-31; Lc. 18:18-30)

¹⁶ Dxejcti biäd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yälṅabajṅ lo Dios par tejpas?

¹⁷ Dxejcti räjp Jesús lojni:

—¿Xhicuent rniilu mastr sa'c narä? Diostis najc sa'c. Per par rlaizlu xca'lu yälṅabajṅ lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejcti räjp Jesús lojni:

—Na'c ju'tlu, na'c guesnäjl bejṅ nani di gac chäällu, na'c cuanlu, na'c guiliäslu didxxhii xcuent bejṅ.

¹⁹ Bazoob xtidx xtaädlu con xnanlu, huinäälajz sa'lu si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacáli biuux. ¿Xhiruxni'c riäd dx gunä?

²¹ Dxejcti räjp Jesús lojni:

—Palga rlaizlu gaclu beṅsa'c lo Dios, huij, bato' guiraa ni rajplu, dxejcti gudisni lo rebenproob, dxejcti xhaguibaa sapduxhlu xhixtenlu. Dxejcti gudaa te jädnajllu narä.

²² Cheni biejn diaj bi'nga rediidxre, guc-huinduxh lajzni sa'csi rajpni xhidalduxh xhixtenni.

²³ Sas Jesús räjp loj rexpejn̄pacni:

—Rniliápac lojtu, naganduxh jiu' te bejn̄ rajp loj xcäl̄rnibee Dios. ²⁴ Rnisacä lojtu, guyasiru ted te cameii nen̄ baloj te guux; naganduxhru jiu' te bejn̄ ni rajp lo xcäl̄rnibee Dios.

²⁵ Che biejn̄ diajg rexpejn̄pacni rediidxre, bidxelo-duxhreni, dxejc canabdiidx loj sa'reni:

—¿Chuni'c sajc jiu' lo xcäl̄rnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn̄ dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliápac lojtu, la'tu ni biädnajl̄tu narä, che guscobä guiraa rejos cheni cueä narä, Xi'n Dios ni gujc Niguii, lo yagxhil cadro guinibeä lo guiraa reben̄ guedxliuj, la'tu ni siädnajl̄tu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn̄ Israel. ²⁹ Luxh guiraa rebejn̄ ni basa'n rolizni o rebejtzni, o rebisiajnni, o xtadni, o xnanni, o chääl̄ni, o xi'nni, o rexhujni, te siädnajl̄ni narä, rebejn̄ga sajc te gayuu huält locni gojpn̄i, nägajc ga'preni xcäl̄nabajn̄ Dios par tejpas. ³⁰ Rebejn̄ nani rchalo najczeni ben̄roru lo sa'reni nez loj Dios, reni'c gac bejn̄ ni guxii sajc nez loj Dios. Rebejn̄ nadolajz ni di guchalo sajcruren̄i lo sa'reni, reni'c sajcruren̄i nez loj Dios.

Xcuent reni rujn̄ dzuun

20 Räjpzani:

—Xcäl̄rnibee Dios najc si'c te bejn̄ ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxäl̄ni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhañnireni loj xyujni sayujnreni dzuun. ³ Birisacni, satiilni sgaii mos si'cti rcagaa, rsil. Bidxaagni sgaii bejn̄ ni xhet cayujndi, suga'sireni nez lo guii. ⁴ Räjpni lojreni: “Näjza la'tu colchayujn̄ dzuun lo xyuä. Narä siguixä si'cni riäj̄l̄ xca'tu.” Sä'ti rebejn̄ga lo dzuun. ⁵ Birisac dade' si'cti läidxej, birisaczani si'cti rcachon̄ gudxej. Bidxaagni sgaii bejn̄, sigajcza räjpni loj rebejn̄ga. ⁶ Dxejc si'cti rcagaii birisacni, huijni lo guii. Ro'c bidxäl̄ni sgaii bejn̄ ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” ⁷ Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näjza la'tu colchayejn̄ dzuun lo xyuä. Narä siguixsa'cätu.” ⁸ Che biu' guxhij̄n̄, räjp lam̄ lo mos ni rnibee remos: “Gurejdx remos te quiixluren̄i. Gudix-xгаа reni biu' gudxejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn̄ dzuun guideb dxej. ¹⁰ Cheni biu' reni biu' lo dzuun rsildoo, bejnreni xhigab sica'ruren̄i meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadxe'chreni lo baxhuaan xten dzuunga. ¹² Räjpreni:

“Redee ni biu' lult lo dzuun pet teb ortis bejnreni dzuun, luxh gudijxluren̄i sigajcni gudijxlu nuurnu, luxh biennu dzuun guideb dxej, luxh biennu dzuun lo yäl̄nan-laa.” ¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixäl̄u tebdxej? ¹⁴ Huij, cua' xmeellu. Narä rlazä quixä bejn̄re ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?” ¹⁶ Ni'cni reni biädä lult sajcreni tebloj con reni biädä ganid, luxh reni biädä ganid sajcreni tebloj con reni biädä lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn̄pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladzḡaa reni rnibee lo rebixhojz, näjza lo rebejn̄ ni najn̄ leii. Laareni sinibeereni guetä. ¹⁹ Suteedreni narä ladzḡaa reben̄zijt te cubeereni narä quiinreni narä, dxejc gucuaareni narä lo cruju. Luxh ni riojn̄ dxej, sibansacä loj reben̄gut.

Ni gunab xnan Jacob näjza Juan

(Mr. 10:35-45)

²⁰ Dxejcti gubig xnan Jacob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

²¹ Gunabdiidx Jesús lojni:

—¿Xhini'c rlaizlu?

Räjp gunaaga lojni:

—Che jiu'lu lo xcäl̄rnibeelu, gunibelaa cue tej rexi'nä xladbeelu, steeni cue xladbäjgwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yäl̄rsacsí sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Gullipacni. Sidedxgaatu trabajw, sidedxgaazatu yäl̄rsacsí. Et narädi cueä reni cue xladbägwä o xladbeä. Xtaä ni yu' xhaguibaa alaguleni rebejn̄ga.

²⁴ Che biejn̄ diajg stzuu rexpejn̄pac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn̄ regubier ni rnibee lo reben̄zijt, rnibeereni rebejn̄ga si'c xlam̄reni. Luxh reni najc reben̄ro lojreni runnäjreni rebejn̄ga si'ctis ni rlaizreni.

²⁶ Et si'cni gunditu la'tu loj rebejn̄. Chutis rlaiz gac ben̄ro lojtu, nanab gunni dzuun gacnäjn̄i guiraliitu si'c te mos. ²⁷ Luxh chutis tejt̄u ni rlaiz guiliä'p xpala'nni, nanab gacni si'c xmos lo guiraliitu. ²⁸ Sigajcza biädä Xi'n Dios ni gujc Niguii. Dini niniab mos chu lojni, alga laani najc xmos bejn̄, badeedzani lagajc yäl̄nabajn̄ xtenni te gudijxni baslaani xhidal bejn̄ ni yu' lo dojl̄.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹ Che gojl guiriireni guedx Jericó, xhidalduxh bejn sanajlni. ³⁰ Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilnäj rebejnreni, te gusäureni ro'reni. Luxh laareni dipru guedxa'reni:

—iDad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lo-jreni:

—¿Xhini'c rlanjtu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

21 Cheni Siäddzongajxhrene guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejn pacni, ² räjpni lo-jreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colgux-hecni, coltanäni loä. ³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajc-nini.”

⁴ Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Sión, bahuii xreiilu siääd lojlu,

nadolajzni bijbni te burbäz, te burbäz, xi'n man ni ru-jn dzuun, ni ruu cargw.

⁶ Dxejcti huij rexpejn pacni, bejnreni si'c gunibee Jesús gunreni. ⁷ Biädnäreni burga näjza burbäz xi'nni. Gudixhrene xhajbreni detz burbäzga, dxejc gubijb Jesús burbäzga. ⁸ Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhrene rebalajg lo nez yuj cadro ted Jesús. ⁹ Rebejn ni nijd, näjza reni siääd dejtzn gusloj cabedxa'reni, räjpreni:

—iXchej guibajn Xi'n toDavid! iChicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús nejn guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹ Yu'zaren i räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús nejn guidoro xten Dios, gulääni guiraa rebejn ni caguto' näjza rebejn ni casii. Barexhät-

ni remex xten reni ruchaa meel xten rebejn, näjza reyagxhil xten reni ruto' repalom. ¹³ Dxejc räjpni lo-jreni:

—Loj reguijtz ni bacuaa rebengaloo caj: “Sirilaj xquidoä yu' xten yäl'rbejdx, yäl'rniab loj Dios.” Niluxh la'tu abejntuni xpiliää gubaan.

¹⁴ Lagajc nejn guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵ Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebixxe' caniiireni: “Rliä'pnu xpala'nlu Xi'n to'reii David”, bidxe'ch rebixhojzga. ¹⁶ Dxejc räjpreni loj Jesús:

—¿La riejn diajglu xhi caniiireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goj lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goj rebixhojz näjza rebäznite' dij ni rliäpsa'cpac xpala'n Dios.

¹⁷ Dxejcti basaan Jesúsreni, biunejzni ro'c sääni guedxe' ni laa Betania, ro'c gudejzni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Lañ ni sääni, gusloj calaanni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—iNuncru xcaj nicla tej ninejxh lojlu!

Dxejcti gubidzga yajgga. ²⁰ Cheni bahuii rexpejn pacni, bidxeloduxhrene, gunabdiidxreni loj Jesús:

—¿Xhi cuent gubidzga yajgga?

²¹ Räjp Jesús lojreni:

—Rniliäpac lojtu, palga chalilajz pactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²² Guiraa ni guiniabtu loj Dios, palga chalilajz pactu, suniidxnini.

Xcäl'rnibee Jesús

(Mr. 11:27-33; Lc. 20:1-8)

²³ Dxejcti biu' Jesús nejn guidoro, dxejc lañ ni caguluii-rebejn gubig reni rnibee loj rebixhojz näjza reben-gool, gunabdiidxreni lojni:

—¿Xhi yäl'rnibee rajplu ni'cni rajc rujnlu recosre? ¿Chuni'c baniidx yäl'rnibeere lojlu?

²⁴ Badzu' Jesús diidxre lojreni räjpni:

—Sigajca narä gunä te yäl'gunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yäl'rnibee te runä recosre. ²⁵ ¿Chuni'c gunibee gutiobnis Juan ni rutiobnis? ¿La Dios o la bejn guedxli-uj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, xhxicuent ditu nililajz xtidxni? ²⁶ Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni rililajzreni Juan na-

jc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangaloj: "Xi'nä, nadxej chayujnlu dzuun cadro care' uub." ²⁹ Dxejc badzu' xi'nni diidx lojni, räjpni: "Di rlazädi cha'a." Luxh che gojl ste ra't, basiejch lajzni säätini sayujnni xtzun xtadni.

³⁰ Dxejc räjp dade'ga lo stee xi'nni: "Xi'nä, nadxej chayujnlu dzuun." Dxejc badzu' xi'nni diidxre, räjpni: "Mbaj, dad, sia'ä." Luxh dini nij. ³¹ Loj guiro'preni, çchu-ni'c bejn si'cni rlazj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regun-abdxab ganidreni jiu'reni lojtu loj xcäl'rnibee Dios, ³² sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhrene xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ ¡Colcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcn te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gatii bejn ni rujn dzuun, sä'tini te bias zijtro. ³⁴ Che agojl guire' cose'ch baxhał baxhuaanga gatii xmosni loj xyujni te chaxiireni cose'ch ni riäjł xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhałsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ Dxejcti bejn baxhuaanga xhigab: "Maazru huen guxhałä xi'nä; sucuadiajgrureni xtiidxni." ³⁸ Cheni bahuiireni lo xi'n baxhuaan xten yujga, bejnreni xhigab: "Deeni jiannäj yujre; do'o guigu'tnuni te jian-nänu yujre." ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiääd baxhuaan xten yujga, çxhi gunnäjni re-bejn nani biannäj xyujni?

⁴¹ Dxejc räjpreni loj Jesús:

—Dini gulazlajz rebenguijdxga, sugu'tnireni, suded-laani xyujni loj ste'ca bejn nani gudeed cose'ch ni riäjł xca'ni che gał guire' cose'chga.

⁴² Dxejcti räjp Jesús lojreni:

—¿La gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijga gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejn.

⁴³ 'Ni'cni rniä lojtu, sibicaj xcäl'rnibee Dios lojtu, sidej-dni loj rebejn nani gudeed ni riäjł xca' xcäl'rnibee Dios, nalajznu renani chalilajzpac xtiidxni. ⁴⁴ Luxh xcuent guijga: nani jiajb lo guijga, silia'ni, per nani guitejb guijga yejcn, li siujyni, gacni däj.

⁴⁵ Che bejn diajg reni rnibee lo rebixhojz näjza re-farisee recuent ni canii Jesús, gucbeerene cagusä'tni la-gajc laareni. ⁴⁶ Rlazjreni niniaazrenini, per bidxejbreni rebejn sa'csi salilajz rebejn najc Jesús bejn ni nii xtidx Dios.

Xcuent yäl'ruchnaa

22 Guslosac canii Jesús lojreni con recuent, räjpni:
² —Xcäl'rnibee Dios najc si'c te rei ni bejn te sa'

te guchnaa xi'nni. ³ Baxhałni rexmosni te saxiireni re-golnejdx chääreni sa', niluxh rebejnre di rlazjdireni.

⁴ Dxejc baxhałsacni rexmosni, räjpni: "Colye'tz loj reni abidon, agujc comiid. ¡Abagutä balti gonsa'c, gonguro'! Anacchee guira'ti yäl'rajw. Coltaa." ⁵ Niluxh reni abidon-ga di niu xtiidxreni. Tejni sahuu rexyujni, steeni säa lo rexnegosni, ⁶ dxejcti sgaii reni niajc biooz gunaazreni rexmos reii, basacsíreni remosga, sas bagu'trenini.

⁷ Che bejn diajg reiiga, bidxe'chduxhni, baxhałni rex-soldaadni te sagu'treni guiraa rebenguijdxga, te saze'czareni guejdx cadro rbäjzreni. ⁸ Dxejcti räjpni loj rexmosni: "Guiraa dee anacchee, di nungäjł jiäädru reni abidon. ⁹ Colchäj, pues, lo resquii lo nezyuj, colcuedjx chutis bejn ni guidxaagtistu." ¹⁰ Birii rex-mosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc bejhueen te gudxaj roliz reiiga.

¹¹ Dxejc biu' rei biädhuini loj rebiooz. Bahuiini loj te bejn ni sobga' ro'c, luxh xhet xhablanijdini najcwni.

¹² Dxejc räjp rei lojni: "Xamigwä, çxho bejnlu biu'lu ree luxh xhet xhablanijdilu najcwlu?" Dxitis sobga' bejn-ga, xhet rniidini. ¹³ Dxejc räjp rei loj rexmosni: "Colguliib ni'ni näjza naani, colsäłni detzyu' cadro nacäjy te ro'c gonduxhni chubejli reläjyni." ¹⁴ Sa'csi xhidajł najc reni bidon luxh guxii najc reni bibee.

La sajc quiixni impuest

(Mr. 12:13-17; Lc. 20:20-26)

¹⁵ Dxejcti sii re-farisee, bia'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhałreni gatii xpejnreni näjza gatii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xti-idxpac Dios, luxh dilu jiu xhi rni rebejn, sa'csi dilu cue bejn ni sajcr lo stee bejn. ¹⁷ Gunii loonu, pues: ¿La laa-ca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni neñ lastooreni, dxejc räjpni lojreni:

—¡Benguixd! ¿Xhicuent rlaiztu guquiltu narä?

¹⁹ Colgululii te meel loä.

Dxejc badeedreni te meel ni laa denario. ²⁰ Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibañsac rebejn

(Mr. 12:18-27; Lc. 20:27-40)

²³ Lagajc dxejga bidzujñ gatii reni laa saducee, reni di chalilajz sibañsac bejn loj rebengut. Gubigreni loj Jesús, gunabdiidxreni, ²⁴ räjpreni:

—Mastr, si'c naj toMoisés, palga yu' te bejn ni abachña, luxh ruti xi'nni che guetni, riäjł guchña bejtzni biuudga te chu xi'nreni xcuent bejtzni. ²⁵ Mbaj.

Loonu yu' gajdz niguii ni najc bejtz sa'reni. Betzgoolga bachña, dxejc gujtni, luxh di xi'nni niu'. Basa'nni chäälni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojñ bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, näjza gunaaga gujt. ²⁸ Che guibañsac rebejnğa lo rebengut, ¿chu tej lo rebejtzga gac chäälpac gunaaga, ni guiraareni bachñaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios nicla xcuent xcälñibee Dios. ³⁰ Ni che guibajñ rebengut, diru yälñuchña chu, diruza bejn gudeed rexindxa'preni guchña. Dxejc sajcreni si'c rexangl Dios ni yu' xhaguibaa. ³¹ Dxejc xcuent yälñibañsac loj rebengut, ¿la gajdtu goł reguijtz ni bacuaa toMoisés che räjp Dios xcuent retoxtagoldoonu: ³² “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios bengut, Xtiosis rebejn ni nabajñ najcni.

³³ Che biejn diajñ rebejn xtidx Jesús, bidxeloduxhreni diidx ni ruluini.

Diidx ni maazru sajç

(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najñ leii, rlaizni guquiltu Jesús ni'c gunabdiidxni lojni räjpni:

³⁶ —Mastr, ¿xhi diidx ni gunibee Dios sajçru lojreni caj lo leii?

³⁷ Räjp Jesús lojreni:

—Nani rñii scree: “Huinälajz Dad Xtioslu guideb las-toolu, guideb xaimlu, näjza guidebgajc xcäriejnlu.”

³⁸ Diidxre ni gunibee Dios najc ni sajçru, luxh ganidni siädni loj rextidx Dios. ³⁹ Ni ro'pğa sigajcza najcni: “Huinälajz resa'lu sigajc ni sanälajzlu lagajc luj.”

⁴⁰ Guiro'p remandamientre nanab te guzoob bejn

guiraa rediidx ni bacuaa toMoisés näjza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lałni tre' refarisee, gunabdiidx Jesús lojreni, räjpni:

⁴² —¿Xhi rujntu xhigab xcuent Crist? ¿Chu xi'n najcni? Räjpreni lojni:

—Laani najc xajç toDavid.

⁴³ Räjp Jesús lojreni:

—¿Xhicuent räjp David “Xtadä” lojni che basaniñ Sprit Dxañ xten Dios lastooni? Ni'c bacuaa toDavid rediidxre:

⁴⁴ Dad Dios räjp lo Xtadä, gurej xladbeä lał ni gudzugä guiraa reni rdxe'ch lojlu ladzni'lu.

⁴⁵ Palga lagajc David rñii: “Dad” lojni, ¿xho mood najcni xi'nni?

⁴⁶ Dxejc rut gujcdi badzu' nicla te diidx lojni, luxh dxejliga rutru gojpdì xhi diidx niniabdiidxrreni lojni.

Rucuaquij Jesús refarisee näjza rebejn nani najñ leii

(Mr. 12:38-40; Lc. 11:37-54; 20:45-47)

23 Dxejc räjp Jesús loj rebejn xhidaalga näjza loj rexpejn pacni:

² —Rebejn ni najñ leii näjza refarisee rajp yälñajn te gusule'reni xleii Moisés. ³ Ni'cni colguzoob guiraa rextidxreni, na'c guntu sa' recos ni rujnreni, sa'csi laareni rñiireni xhini'c guntu, dxejcti lagajc laareni direni gun ni rñibeereni guntu. ⁴ Rñibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni. ⁵ Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsreni näjza roxhajnreni recaje' cadro yu' tla' guijtz ni caj xtidx Dios lojni. Rustioolzareni xi' xhajbreni. ⁶ Rlaizreni ganidreni tedreni lo mex che gał te lanij; rlaizreni cuereni lo rebancw ni suga' delant neñ reguidobäz. ⁷ Sigajcza rlaizreni guchagro' bejn ñaareni nez lo guii, guiniiza rebejn “Mastr” lojreni.

⁸ Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu “Xtadä” loj te beñ guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc beñroru loj resa'ni. ¹² Sa'csi chutis ni rchaloni najcni beñro lo sa'ni, ni'c sustuiyä lojni, chutis ni najc nadolajz loj Dios, ni'c sunäni beñro lo sa'ni.

¹³ ¡Proobzatu remastr xten leii näjzatu refarisee, najctu benguijdx! Sa'csi rudxoñtu jiu' rebejn loj xcälñibee Dios. Lagajc la'tu ditu jiu' luxh dizatu gusaan jiu' rebejn ni rlaiz jiu'.

¹⁴ ¡Proobzatu remastr xten leii näjzatu refarisee, najctu benguijdx! Sa'csi rudzucajtu roliz renanbiuud lałsi cabedx canabduxhtu lo Dios, naatu gusguetu bejn si'c. Sa'csi rujntu scree, siabduxh fis xten Dios yejctu.

¹⁵ 'Proobzatu remastr xten leii näjzatu refarisee, najctu beṅguijdx! Zijt rijtu lo renezyuj näjza lo nisdoo te guntu gaan guchaa mase tejtis beṅ xmoondni te ganṅi Dios si'c rajntuni. Luxh che ahuililajz beṅga xtiidxtu, rujntuni tio'p huält maazru te xi'n gabijl loj ni najctu.

¹⁶ 'Proobzatu, najctu si'c lotiä'p, rlaiztu guluiitu nezyuj! La'tu ni rnii palga te beṅ guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' neṅ guidoo, dxejc sii rniliini dxejc nungäj] guzoobni xtiidxni. ¹⁷ 'Beṅ nayääl, beṅlotiä'p! ¿Xhini'c sajcru? ¿La oor la guidoro ni rundxan oorga?

¹⁸ Rniizatu: "Palga te beṅ guiniliipacni guzä'tni lo bacuug ni yu' neṅ guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäj] gusoobni xtiidxni."

¹⁹ 'Beṅ nayääl, beṅ lotiä'p! ¿Xhini'c sajcru? ¿La gojn o la bacuug nani rundxan gojnga, ä? ²⁰ Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni. ²¹ Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäzza neṅ guidoro ruzä'tni. ²² Sigajcza ni ruzä't guibaa che rniliipacni caguzä'tzani yagxhilo xten Dios näjza lagajc Dios ni sobga' ro'c.

²³ 'Proobzatu remastr xten leii näjzatu refarisee, najctu beṅguijdx! Bedzxtiil, anis näjza comiṅ ni rajptu, rudeedtu lo Dios tej tantga yejc cade te tzuu, niluxh ditu jiu ni sajcru lo xtidx Dios, cadro caj xcuent yäl'n-abanya, yäl'rulazlajz, näjza yäl'rililajz. Deeza ni riäj]pac guntu la] ni cayujnzatu steega. ²⁴ 'La'tu, lotiä'p ni rlaiz guluii nezyuj! Riutu rediidx ni guxii saj, niluxh rediidx ni sacduxh ditu jiuni, najctu si'c beṅ ni rbää te rex lo xpla'tni dxejcru räjmni te cameii.

²⁵ 'Proobzatu remastr xten leii näjzatu refarisee, najctu beṅguijdx! Rusiatu detz bas näjza pla't luxh neṅni najc-dxuudx. Sigajcza la'tu riuduxhtu recostumbr, luxh lastootu guidxa yäl'gubaan näjza yäl'rdxe'chljajz.

²⁶ Farisee ni najc lotiä'p: gudibxgaa neṅ bas näjza neṅ pla't, dxejc näj dejtznii saj naya.

²⁷ 'Proobzatu remastr xten leii näjzatu refarisee, najctu beṅguijdx!, sa'csi najctu si'c rebaa ni nacchesa'c; nolbäjreni, saru rluini, luxh neṅreni guidxa dzujt xte beṅgut näjza bälyudx. ²⁸ Sigajcza najctu la'tu. Saru rujn lojtu, rchalo rebeṅ najctu beṅsa'c, niluxh lastootu guidxa yäl'rusguee näjza yäl'guyalajz.

²⁹ 'Proobzatu remastr xten leii näjza refarisee, najctu beṅguijdx! Runcheetu xpaä redade' ni gunii xtidx Dios galoo, rusucheezatu ro' xpaä rebeṅ ni gujc beṅsa'c, ³⁰ dxejc rniitu: "Paru nibajṅnu neṅ redxer ni gubajṅ re-toxtadgoldoonu dinu niacnäṅ reni bagu't redade' ni gunii xtidx Dios." ³¹ Lagajc con rediidxre rcäjptu najctu rexajg renani bagu't redade' nani gunii xtidx Dios.

³² 'Colguscuääz guntu sa' recos ni guläxtiej re-toxtad-goldootu!

³³ 'La'tu ni najc si'c bäl, la'tu ni najc si'c te bitiiääz guidxa bäl'nialajz! ¿Xho guntu te na'c chäätu gabijl par tejpas? ³⁴ Ni'cni, guxhala' rexpənä ni guinii xtidxä, näjza beṅnajn, näjza mastr. Luxh yu'reni sugu'ttu sucuaa-tureni lo cruzj; yu'zarenii siguijntu neṅ reguidobäz, siri-

najltureni guejdx por guejdx. ³⁵ Si'cza yejctu jiajb xtejn guiraa rebeṅnadolajz ni bagu't beṅ xchejli toAbel ni gujc nadolajz, xchejliza Zacarías, xi'n Berequías, ni bagu'ttu neṅ guidoro gajxh lo bacuug. ³⁶ Rniliäpac lojtu, dojl xten guiraa recosga siajb yejc rebeṅ ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Räj]pza Jesús:

—'Jerusalén, Jerusalén! Xpejṅlu rugu't redade' ni rnii xtidx Dios, rucuaazareni guij yejc rebeṅ ni ruxha] Dios te gusule'reni xtiidxni lojtu. 'Balti huält rlazä nutie'ä la'tu si'cni rutie' guidco'c rexquidbäzni neṅ xhigani, per ditu nicäjb! ³⁸ Colhuui xho jianxteb xquidootu cuälazrenini. ³⁹ Rnixgää lojtu, naj dirutu fii loä, dxejli che guiniitu: "Benle' Dios nani siääd xcuentni."

Jesús räjp sibijl guidoro

(Mr. 13:1-2; Lc. 21:5-6)

24 Birii Jesús neṅ guidoro te asiini, dxejc gubig rex-pejṅpacni lojni, gusloj caguluiireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

Cos ni guluiiloj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejṅpacni lojni te xhiga'tz gunabdi-idxreni lojni:

—Rlaaznu guiniilu loonu guc gac guiraa recosre. ¿Xhi seen guluiiloj ameer jiiädlu näjza che ameer nitloj guedxliuj?

⁴ Dxejc räjp Jesús lojreni:

—'Col'natiro te rut gusgueedi la'tu! ⁵ Sa'csi su' xhidajl reni jiiäd, naareni: "Narä nacä Crist", luxh susgueerene xhidajl beṅ. ⁶ Siejn diajgtu xcuent cadro cayajc guer, näjza xcuent cadro rlaiz chu guer, na'c guidxejbtu sa'csi si'c nungäj] gac, niluxh gajd gal]di nitloj guedxliuj. ⁷ Sa'csi siäjs te nación sidil'näjni stee nación; te yäl'rnibee sujn guer con stee yäl'rnibee, luxh su' gubijn, su' yäl'guijdx, su'za xuduxh xhidajl lajt. ⁸ Luxh guiraa redee cuäxtiejtis retrabajwduxh ni churu chu.

⁹ 'Dxejc guteedreni la'tu ladzṅaa rebeṅdojl te gusac-sireni la'tu, te gugu'tzarenii la'tu, luxh guiraa rebeṅ sidxe'ch lojtu sa'csi sanälajztu narä. ¹⁰ Neṅ redxer, xhidajlreni sibälaz xcäl'rililajzreni, sidxe'ch lo sa'reni, su-to' sa'reni lo sa'reni. ¹¹ Dxejc siricaj xhidajl beṅ ni rus-guee, gäbreni xcuent Dios rniireni, luxh susgueerene xhidajl beṅ. ¹² Sa'csi lacti suduxh yällatsiaj lo guedxliuj, diru beṅ chanälajz sa'ni. ¹³ Dxejcti beṅ ni chasanäj xnezyujtis Dios, ni'c sun gaan xca'ni yäl'nabajṅ par tejpas. ¹⁴ Luxh sisiule' xtidx Dios guideb lo guedxliuj te gacbee guiraa rebeṅ guedxliuj xtiidxni; dxejcru jiiäd fis xten Dios.

¹⁵ 'Cheni fiitu asobga' te beṅguidxduxh neṅ yu' ni najc dxan neṅ guidoro, si'cni gunixgaa toDaniel ni gunii

xtidx Dios gacni, bejn ni goj dee sugacbeeni nani rojni, ¹⁶ dxejc renani rbäjz lo guedx Judea, suguxunreni gucuatzlojreni neñ dajn. ¹⁷ Bejn ni niä'p yejc xyu'ni dxejga di galđi jiajtni te chalääni xhixteni neñ xyu'ni; ¹⁸ bejn nani cayujn dzuun lo niaa, na'c guibi'ni niclaza chaxhii- ni xhajbni. ¹⁹ ;Proobza regunaa ni nuxi'n, näjza reni cagusiä' báz neñ redxejga! ²⁰ Colnabduxh loj Dios xhet neñdi redxej ni cayacnalduxhdi nanab guxunđitu, niclaza dxej che rusilajz bejn. ²¹ Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yejc redxejga, nicla tej bejn di laa. Luxh sutiu' Dios yejc redxejga sa'csi rinälajzni reni aguleni.

²³ Neñ redxejga palga yu' chu naa lojtu: "Colhunii, aree Crist", o "Colhunii ani arec", na'c chalilajztuni. ²⁴ Siääd xhidajl niguii ni rusguee, gäbreni najczeni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni nemilagwr sujnzareni senro, parsi gusgueereni, susgueduxhreni rebejn, niluxh rla- jzreni gusgueezareni rebejn ni agule Dios, ni rililajz xti- idxni. ²⁵ Agunixgää lojtu xhini'c gac. ²⁶ Ni'cni palga naareni lojtu: "Bahuii, a crist yu' nez lo reyubijdz", na'c chäätu; o palga naareni: "A crist suga' neñ yu're", na'c chalilajztuni. ²⁷ Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiaäsaä lo guedxliuj. ²⁸ Ni najntu cadro naga' te mangut, ro'c re' regolbetz.

Cheni jiaäsaä Xi'n Dios ni gujc Niguii

(Mr. 13:24-37; Lc. 21:25-33; 17:26-30, 34-36)

²⁹ Räjzpzeni:

—Cuantsi ted guiraa retrabajwduxh, sicäy lo gubi- jdx, diruza bäi gusanij, sitejbza rebajl ni yu' xh- aguibaa, sinibduxhza guideb xhaguibaa. ³⁰ Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälrnibee näjza yälrđim- bichaduxh. ³¹ Dxejc suxhalni rexangl ni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² ;Colguisieed ni ruluii yajg iigw! Che naren reñaani che cabääni be'n, asiääd bäi curex, ³³ sigajcza cheni fi- itu cayajc guiraa recosre, sacbeetu asiädgajxh fis, rolä'li abidzujni. ³⁴ Rniliäpac lojtu, guiraa redee sajc laj ni nabajp gatii rebejn ni suga' ree naj. ³⁵ Guibaa näjza guedxliuj sinitloj, niluxh xtidxä di nitloj.

³⁶ Rut najndi xhi dxej, xhi or gacni, nicla rexangl Dios, niclaza Xi'n Dios; Dad Diostis najn.

³⁷ Sigajcni gujc neñ redxej che gubajp toNoé, si'cza gac che jialä Xi'n Dios ni gujc Niguii. ³⁸ Neñ redxe ga- loo, cheni gajd nisguiduxhga jiajb, rebejn ni nabajp dx- ejc cayajwreni, cayä'reni, caguchñaareni, cagudeedza bejn xindxa'preni guchña, dxejli cheni biu' Noé neñ barcwro. ³⁹ Direni niacbee xtiidxni; cheni biäädli nis- guiduxh ni sanä guiraareni dxejcru gucbeereni. Siga-

jczä gacni che jiaäsaä narä Xi'n Dios ni gujc Niguii.

⁴⁰ Neñ redxejga palga cayujn tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² Ni'cni colsusin, sa'csi ditu gan xhi dxej jiaäd Dad xtentu. ⁴³ Colganchee, paru niacbee baxhuaan xten yu' cor yääl niääd gubaan ni siädlan rolizni, nisiusin ni dx- ejc, dini nusaan niu'ni rolizni te cuanni. ⁴⁴ Ni'cni col- susinza la'tu, sa'csi siääd Xi'n Dios ni gujc Niguii lagajc or ni ditu gun xhigab jiaädni.

Xcuent te mossa'c näjza te mosguijdx

(Lc. 12:41-48)

⁴⁵ ;Chuni'c najc mossa'c ni ruzoob diidx, ni basannäj xlamni rebejn ni yu' rolizni te gudeedni xhi gaureni ä? ⁴⁶ Chicbaa mos ni saru cayujn xtuunni che guidzujn xlamni. ⁴⁷ Rniliäpac lojtu, lamga susa'nni sa' mosga te fiini guiraa xhixteni. ⁴⁸ Dxejc palga mosga di gusoob xtidx xlamni, gunni xhigab: "Sacladuxh guibi' xlamä", ⁴⁹ dxejc guisloj cagusacsini resamosni, guislojni gaunäjni, yänäjni rebengu. ⁵⁰ Dxejc sidzujn xlamni dxej che dini gun xhigab jiaädni, luxh or ni dini gan guidzu- jni. ⁵¹ Dxejc siguinduxhni mosguijdxga, surilaagwnini te guidxagsa'ni sabenguixdxni, dxejc sonduxhni, chubejli reläjyni.

Xcuent tzuu gunaa

25 Räjpa Jesús:

—Pues xcälrnibee Dios najc si'c tzuu gu- nadxa'p nani cua' xcandilse'treni te huijreni te sa'. ² Gaii regunaaga nasin, sgaiireni nayääl. ³ Reni nayääl- ga sanäreni xcandilreni, niluxh direni nica' sijl se't. ⁴ Niluxh reni nasinga sanäreni sijl se't te guze'creni neñ xcandilreni. ⁵ Sa'csi bi'nga di nidzungaj, gunaa bacal regunadxa'pga, gudiejstreni. ⁶ Dxejc si'cti garol yääl, biejn te xse' ni räjp: "Bi'n asiääd, colchäj, colchachaglo- jni." ⁷ Guiraa regunaare huistieguxunreni, dxejc ben- sa'creni xcandilreni, te cuaguijreni. ⁸ Dxejc guigaii re- gunayääl räjpreni loj reni nasin: "Colgunidxlaa te bo'c se't gusanijnu xcandilnu, sa'csi arlajzni jiuini." ⁹ Dxejcti regunanasin räjp lojreni: "Digacdini, dxejc dini gal nicla par nuurnu nicla par la'tu. Colchäj cadro ruto'reni se't colchazii xse'ttu." ¹⁰ La'ni sasi guigaii regunaa-nayääl- ga se't, bidzujn bi'n. Regunaa-sin ni cabäjz bi'n bi- unäjreni lo sa', biäuuti ro lä'. ¹¹ Cheni bidzujn regu- nanayäälga, räjpreni: "Dad, Dad, baxhal ro lä'." ¹² Dxejc räjpni lojreni: "Rniliäpac lojtu, dina gumbeätu."

¹³ Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

Xcuent lam ni badeed meel

¹⁴ Xcälrnibee Dios xhaguibaa najc si'c te bejn ni agojl guirii chääni zijt te bij. Gurejdxni rexmosni, badeedni meel lojreni.

¹⁵ Lo tejni badeedni si'cti gaii mil meel, lo steeni badeedni si'cti tio'p mil, dxejc steeni cua' te mil. Loj tej-

gani badeedni si'cti ni rujnri xhigab sajc gunnäjreni dzuun, dxejcti biriini xpiajni. ¹⁶ Ni cua' garii miļ meel bejn te dzunro, bejnri gaan sgarii miļ meel. ¹⁷ Sigajcza ni cua' tio'p miļ meel, bejnri gaan stio'p miļ. ¹⁸ Dxejcti ni cua' te miļ meel, huicua'tzni xmeel xlamni neņ te gued ni gudäänni lo yuj.

¹⁹ Gudejdti balti bäii, dxejc gubi' xlam remosga, bejnri cuent loj guiraareni. ²⁰ Che bidzujņ ni cua' garii miļ meel, bidzujņnäjnri sgarii miļ meel ni bejnri gaan, räjpni loj xlamni: "Dad, baniidx guejblu garii miļ loä. Aree sgarii miļ meel ni benä gaan." ²¹ Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu beņsa'c con te cos bāz, ņaj sunidxä guinibeelu xhiroobru. Biu' loä, bibalaznäj narä." ²² Che bidzujņni ni cua' tio'p miļ meelga, räjpni loj xlamni: "Baniidx guejblu tio'p miļ meel loä, aree stio'p miļ meel ni benä gaan." ²³ Räjp xlamni lojni: "Mbaj. Mos hueen najclu rusoobzalu diidx. Sa'csi gujclu beņsa'c con te cosbāz, ņaj sunidxä guinibeelu xhiroobru. Biu' loä, bibalaznäj narä." ²⁴ Che bidzujņ mos ni cua' te miļ meel, räjpni lo xlamni: "Dad, ananä najclu te bejn ni di gulazlajz; rca'lu cose'ch cadro dilu nibe'c binij, rutojpszalu cadro dilu nutie'ch binij. ²⁵ Ni'cni bidxebä, huicua'tzä xmeellu neņ yuj. Niluxh axh aree xmeellu." ²⁶ Dxejc räjp xlamni lojni: "iMos guijdx, mos ploj! Najnlu rca'ä cose'ch cadro dina nibe'cä binij, rutopä cadro dina nutie'chä binij. ²⁷ Riäjl nisa'nlu xmelä neņ te bancw te che nibi'ä nicasacä xmelä con xi'nni ni niujni gaan." ²⁸ Dxejc räjpni loj reni suga' ro'c: "Colgudzucaj te miļ meel ni ca'ni colgudeedni loj ni rajp tzuu miļ meel. ²⁹ Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni." ³⁰ Dxejc räjpni: "Colca' mosre ni xhet sajcdi, colguzälni lo yälñacäy, cadro chu yälñronduxh, näjza yälñrajw reläy bejn."

Yälñuxhtis xten reguejdx

³¹ Che jädsac Xi'n Dios ni gujc Niguii con yälñrdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni. ³² Dxejc sidojp nez lojni guiraa rebeņ guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³ Suzujni rexiil xladbeeni dxejc redxib xladbäjgwni. ³⁴ Dxejc säjb řei loj reni suga' xladbeeni: "Coltaa, la'tu ni beņle' Xtidä. Coljiu' lo yälñrabee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijit, la'tu banidxlaatu cadro bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neņ latzguiib, biädhuiitu narä." ³⁷ Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸ ¿Guc bahuiinu najclu si'c te benzijit, baniidxnu cadro bianlaalu, o biäädx xhajblu, baniidxnu xhi gojtlu? ³⁹ O ¿guc bahuiinu cayacxhuulu, o yu'lu neņ latzguiib, biophuiinu lojlu?" ⁴⁰ Dxejc řeiiga säjb lojreni: "Rniliäpac lojtu, xhitis xhi bejntu loj te rex-

peņä ni rnii xtidxä mase proobreni, lagajc loä bejntu recosga."

⁴¹ Dxejc säjpszani loj reni suga' ladbäjgwni: "Colguibicaj loä, beņguijdx, colchäy lo balduxh ni cayejc par tejpas ni cayejc par beņdxab ni rnibee näjza rexpēdxabni. ⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³ cuanzaä si'c te benzijit, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza neņ latzguiib, niluxh ditu niädhuii loä." ⁴⁴ Dxejc laareni säjbreni: "Dad, ¿guc bihuiinu calaanlu, o cayojllu, o canzajlu si'c te benzijit, o cayäädx xhajblu, o cayacxhuulu, o yu'lu neņ latzguiib, luxh dinu niacnäjlū?" ⁴⁵ Dxejc säjb řeiiga lojreni: "Rniliäpac lojtu, loj xhitis ni ditu niacnäy rebejn ni rililajz xtidxä, mase proobreni naräni ditu niacnäy." ⁴⁶ Dxejcti sij rebejņre lo yälñrusacsı par tejpas, per rebejņ ni nadolajz, ni agule Dios, sijreni lo xcälñabajņ Dios par tejpas.

Bejnreni xhigab xho guiniaazreni Jesús

(Mr. 14:1-2; Lc. 22:1-2; Jn. 11:45-53)

26 Che guluix gunii Jesús rediidxre, räjpni loj rexpejņpacni:

² —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladzñaa reni gucuua narä lo cruzj.

³ Dxejc bidojpe rebejņ ni rnibee rebixhojz, näjza remastr xten leii, näjza rebeņgool lo rexpejņ Israel. Lo xle' Caifäs, ni rnibee loj rebixhojz, bidojpreni. ⁴ Ro'c bachaagreni diidx xho guiniaazreni Jesús con yälñrus-guee, te ju'trenini. ⁵ Luxh räjpreni lo sa'reni:

—Na'c jiennuni neņ redxe lanij, te di gun rebejņ bieidxh.

Te gunaa ni biädnä perfum

(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajncni che raļ tiejxhni, ⁷ ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸ Che bahuii rexpējņpacni xhi cayujnri, bidxe'chreni, gusloj cayäjpreni:

—¿Xhicuent casäxlia'ni perfumga? ⁹ Perfumre niajc nido'ni, nirii xhidajl meel lojni te niacnäjnri rebeņproob.

¹⁰ Biejn diajg Jesús xhi caniiireni, dxejc räjpni lojreni:

—¿Xhicuent cadxe'chnäjtū gunaa? Ni te coshueen najc dee nani bejnri loä. ¹¹ Ni guirasi dxej su' rebejņ ni xhet rajpdi lojtu, peta narä guxii dxej su'ä lojtu. ¹² Nani bejn gunaa che bachajni perfumre guideb lagaa tiexhä, najcni par guzucheeni narä te guiga'tzä. ¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäy gunaaare narä, te guinaj lajzreni gunaaare.

Judas bato' Jesús
(Mr. 14:10-11; Lc. 22:3-6)

¹⁴ Dxejc lo retzubitio'p rexpennpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtu loä te gutedä Jesús ladzñaatu?
Dxejc badeedreni galbitzuu melpla't lojni. ¹⁶ Dxjecli caguuil Judas xho gutedni Jesús lojreni.

Lult xchej xten Jesús
(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Primer dxej lanij, dxej ni rajwreni yätxtiil ni di saguij, gubig rexpennpacni loj Jesús, räjpreni lojni:
—¿Caro rlajzlu chozucheenu te gaulu xchej xten lanipascw?

¹⁸ Dxejc räjpni lojreni:
—Colchäj lo guejdx rolijz te dade', colye'tz lojni: "Si'c naj Dad mastr: Asiäddzungajx xorn, ni'cni rolijzlu gaunäjni rexpennpacni xchej lanipascw."

¹⁹ Bejnti rexpennpacni si'cni gunibee Jesús gac, bazucheereni xchej xten pascw.

²⁰ Che biu' guxhijñ, sobga' Jesús lo mex con retzubitio'p xpejnpacni. ²¹ Lał ni cayajwreni räjpni lojreni:

—Rniliä lojtu, yu' tejtü ni guto' narä.
²² Dxejc guc-huinduxh lajzreni, räjpreni lojni:
—Dad, ¿andi naräni?

²³ Dxejcti räjp Jesús lojreni:
—Ni gaunäj narä neñ tejtis pla't, laa ni'cni guto' narä.
²⁴ Xi'n Dios ni gujc Niguii sajç si'ctis ni caj loj guijtz xten Dios, per gunatiro bejn ni guto'ni. Huenru na'c niajl bejnga.

²⁵ Dxejcti gunii Judas, ni caguto' Jesús, räjpni:
—Mastr, ¿andi naräni?
Jesús räjp lojni:
—O'n, lujni.

²⁶ Lał ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeedni ni loj rexpennpacni, räjpni:
—Coltajw; dee najç si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpennpacni, räjpni:
—Guiraatu colyá', ²⁸ sa'csi dee najç si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni neñ dojl. ²⁹ Luxh rniä lojtu, diruna yä'a nis nani rii yejc uub, dxejlini yänäsacätu lo xcälrnibee Dios, Xtadä.

Räjp Jesús sibälaz Pedroni
(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijñ sa'csi lo reguijtz xten Dios caj scree: "Sugu'treni baxtoor dxejc sire'ch rexiiil." ³² Dxejc cheni guibañsacä lo rebeñgut, ganidä cha'a región Galilee, dxejcti jiädnaļtu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.
³⁴ Dxejc räjp Jesús lojni:
—Rniliäpac lojlu, lagajç guxhijñre, nicla gajd guidgaii cuedxa', luxh luj alagulälazlu narä choñ huält.
³⁵ Räjp Pedr loj Jesús:
—Masque riäjł guetnäälü, dina cuälazälu.
Dxejc sigajcza gunii guiraa rexpennpacni.

Gurejdx-gunab Jesús loj Dios neñ Getsemaní
(Mr. 14:32-42; Lc. 22:39-46)

³⁶ Dxejcti bidzujñ Jesús näjza rexpennpacni te lajt ni laa Getsemaní, räjpni lojreni:
—Colcuésijc ree lał ni cuedx-guiniabä lo Dios.
³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh.
³⁸ Dxejc räjpni lojreni:
—Te yälhuinduxh yu' lastoä; astoocanu agojl guetä. Coljia'n ree, coltie'ch bacał lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajçni, basanlaa tedcaj trabajwduxhre ni tedä, te na'c tedäni. Xhet si'cni ni rlazä gacni; si'cpani rlajzlu gac, si'c gacni.

⁴⁰ Dxejcti gubi'ni cadre suga' guichon rexpennpacni, che bidzujñni ro'c, nagayejsreni. Räjpni lo Pedr:

—¿La di niajçdi nutie'chtu bacał lojtu nicla tebor, ä?
⁴¹ Colguibajñ, colnab lo Dios te na'c jiajbtu neñ dojl.

Guliipacni, lastootu nadip, niluxh tiejxhtu rdxajç.
⁴² Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlajzlu gacni.

⁴³ Dxejc gubisacni, bidxälñi rexpennpacni, nagayejsreni sa'csi yuduxh bacał lojreni. ⁴⁴ Basaannireni, dxejc säasacni, gurejdx-gunabni lo Dios ni riojñ huält, gunisacni lagajç rediidx ni guniini galoo. ⁴⁵ Dxejc huijni cadre suga' rexpennpacni, räjpni lojreni:

—iNaj sii, colguejs, colgusilajz! Abidzujñ or ni gute-dreni Xi'n Dios ni gujc Niguii ladzña rebeñdojl.

⁴⁶ Colchastie, colcho', colhuii! Asiääd nani guted narä ladzña rebeñdojl.

Gunaazreni Jesús sanäreni pres
(Mr. 14:43-50; Lc. 22:47-53; Jn. 18:2-11)

⁴⁷ Lałni canii Jesús bidzujñ Judas, nani najç tej retzubitio'p xpejnpacni. Bidzujñäjni xhidalduxh bejn ni ca' espaad, ni ca' garo't, najçreni xpejn reni rnibee rebixhojz, näjza xpejn rebeñgool xten rexpenn Israel. ⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najç laani; colguiniiazgajçni.
⁴⁹ Dxejc gubigni loj Jesús, räjpni:

—Xchan, Dad Mastr.
Dxejc bachagro'ni lojni. ⁵⁰ Jesús räjp lojni:

—Xamigwä, çxhi siädllu?
Dxejcti gubig rebejn lojni, gunaazreni.

⁵¹ Per tej reni suganäj Jesús gulääni te spaad, batiu'ni diajç te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajca guiniabä lo Xtadä, luxh laani suxhalgajcni gay-onbitzubitio'p mił xanglni gacnäj narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäjł gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädnaü spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiäü neñ guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojpc guiraa rebejn nani ruluii leii näjza rebeñgool xten xpejn Israel. ⁵⁸ Dxejcti zit-zijt biädnañl Pedr rebejn ga, bidzujnli reni lole' xten bixhojz ni rnibeega. Ro'c biu'ni, gurenäjni rexquixhajc bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebeñgool con guiraa reni rajp yälrnibee gusloj caguilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajca gutzułä guidoro xten Dios, sajca gunchesacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde ñajli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—iNiguiire aguniyajni Dios con xtiidxni! ¿Xhiru testi-igw rquiinnu? Abiejn diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—iAbiga'ni! Riäjł guetni.

⁶⁷ Dxejc batiobxhejnreni lojni, gudijnreni. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Lał ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siäd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siäd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejn ni; huenliisi riejn didx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgii. ⁷⁵ Dxejrcu banalajc Pedr rediidx ni gunii Jesús lojni che räjpni: “Che gajdli guidgii cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

27 Che bianij lo guedxliuj, guiraa reni najc rebixhojz ni rnibee näjza rebeñgool xten rexpejn Israel bia'nreni diidx xho gunreni ju'treni Jesús. ² Baliibreni, guläärenini ro'c, huisa'nreni loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzoo meel pla't loj rebixhojz ni rnibee näjza loj rebeñgool. ⁴ Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neñ guidoro, biritini ro'c. Sas huijni, baliibni te duu guejn ni, gojlni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälnu meelre neñ caj gojn sa'csi najcni xcuent xtejn te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt. ⁸ Ni'cni ñajli rniireni yujga: “Yurejn”. ⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzoo melpla'tga si'cti basoob rex'i'n Israel sajca bejn ga. ¹⁰ Con meelga guziireni yuj lo bejn ni runchee guejs, sigacni gunibee xtadnu Dios.”

Gusuj Jesús nez loj Pila't
(Mr. 15:2-5; Lc. 23:3-5; Jn. 18:33-38)

¹¹ Bidzunäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

¹² Lałni cabe'c rebixhojz ni rnibee nájza rebengool rexquej Jesús xhetliidi guniidi Jesús. ¹³ Dxejc räjp Pila't lojni:

—¿La di diajglu jiejn guiraa rediidx ni caniireni cagu-cuaquijreni luj, ä?

¹⁴ Per xhetliidi diidxd basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús
(Mr. 15:6-20; Lc. 23:13-25; Jn. 18:38-19:16)

¹⁵ Nen redxe lanij rajpreni costumbr ruslaa Pila't tej bejn ni cue rebejn loj reni yu' nen latzguiib. ¹⁶ Nen redxejga guyu' te bejn ni säab xtiidxni ni laa Barrabás. ¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlaiztu guslaá, la suslaa Barrabás o Jesús ni laa Crist?

¹⁸ Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹ Lał ni sobga' Pila't lo yajgxhiil cadro rujnni yälguxhtis, baxhał chäälni diidx lojni, räjpni:

—Xhet gundilu dade'ga ni xhet bejndi, sa'csi nucej nadxuudx gunixcalä xcuentni.

²⁰ Niluxh rebixhojz ni rnibee nájza rebengool baquiiireni rebejn te gunabreni laa Barrabás, nájza te guet Jesús. ²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlaiztu guslaá?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruzj!

²⁴ Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

²⁵ Dxejc guiraa rebejnğa badzu' diidxre, räjpreni:

—Suxcaquijnu xtiejnni, nuurnu nájza rexi'nnu.

²⁶ Dxejc baslaa Pila't Barrabás, dxejc gunibeereni gudi-jnreni Jesús dxejc bateednini ladznaa rebejn te gucuaarenini lo cruzj.

²⁷ Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni

guiraa resa'reni. ²⁸ Dxejc gulääreni xhajbni, bashuajcwenini te lad xniaa. ²⁹ Dxejc bencheereni te coron guejch, basälrenini yejcní, basälreni te yabixijl naani, xladbeeni, sas bazuxhijbreni nez lojni guslogajc caguxhisnärenini, räjpreni:

—¡Collä'p xpala'n reii xten rexpejn Israel!

³⁰ Sas batiobxhejnreni lojni, cua'reni yabixijlga te ni'c batiäjlreni yejcní. ³¹ Che gulujx baxhiznärenini, gulääreni lad xniaa ni najcwni. Dxejc bashuacwsacreni ni lagajc xhajbni, sanätirenini te xcajni lo cruzj.

Bacuaareni Jesús lo cruzj
(Mr. 15:21-32; Lc. 23:26-43; Jn. 19:17-27)

³² Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

³³ Che bidzujnreni te lajt ni laa Gólgota, nani säloj: dan Calabeer, ³⁴ ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

³⁵ Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios.

³⁶ Gurejtireni ro'c, gusloj canäjreni Jesús. ³⁷ Yejc cruzjga bacuaareni te guijt con lettro. Lo guijtza rcay xhini'c najc xtojł nani cayejt. Lo guijtza caj: “Dee najc Jesús reii xten rexpejn Israel.”

³⁸ Nájza tio'p gubaan cuaj lo stio'p cruzj con laani. Tejni cuaj lo te cruzj xladbee Jesús, steeni cuaj xladbäjgwni. ³⁹ Luxh renani sadejd nejzga guniyajreni Jesús, cagusniibreni yejcreni, ⁴⁰ cayäjpreni lojni:

—¡Ja'ä! Luj ni nutiexhlu guidoo, luxh choñtis dxej ni-unchesacluni; palga gullii najclu Xi'n Dios, biäjt loj cruzjga.

⁴¹ Nájza rebixhojz ni rnibee, náj remastr xten leii, baxhiznärenini räjpreni loj sa'reni:

⁴² —Baslaani xhidajł bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtñi lo cruzj nañaj te chalilajznu xtiidxni. ⁴³ Huinäłajzñi Dios, ñaj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recruzj sigajcza guniyajreni Jesús.

Che gujt Jesús
(Mr. 15:33-41; Lc. 23:44-49; Jn. 19:28-30)

⁴⁵ Dxejcti bicäy guideb guedxliuj läidxej hasta rca-choñ gudxej. ⁴⁶ Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

⁴⁸ Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni bina-grga ro' Jesús. ⁴⁹ Dxejc reni tre' ro'c räjp:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpri-
ni. ⁵¹ Lagajc orga biräsyä' ladro ni zääb neñ guidoro,
gujcnio'p la' jiaali hasta lo yuj. Gujc te xuro, sas gusuj
bej reguiro. ⁵² Dxejc gubicaj reguij ni niäuu ro' rebaa,
luxh gubañsac xhidajl xpejn Dios ni gujt aguc xchej.
⁵³ Dxejcti, che huäjs Jesús lo rebengut, biriireni neñ
baa, baluilojreni lo xhidajl bejn ni rbäjz guedx
Jerusalén.

⁵⁴ Dxejc capitán xten resoldaad näjza resoldaad ni
canäj Jesús, che bahuiireni xuduxh näjza guiraa recos
ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnañ Jesús che birii-
ni nez Galilee te bahuiireneni. Cadxelojtisreni guiraa ni
cayajc ro'c. ⁵⁶ Tej regunaaga najc Marii Magdalen,
steeni najc Marii xnan Jacoob näjza José, steeni najc
xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujñ te beñrajp ni siääd guedx
Arimatea; laani José. Näjza dade'ga najc tej reni birinajl
Jesús. ⁵⁸ Huij dade'ga loj Pila't, gunabni tiejxh Jesús. Dx-
ejc gunibee Pila't gudeedreneni lojni. ⁵⁹ Cua'ti José
tiejxh Jesús, batejbnini neñ te bariadya, ⁶⁰ huitixhnini
neñ xpaapacni. Nacoob baaga, gojnñi bidäänni cuä' te
guilaj. Dxejc basäuni ro' baaga con guiro, dxejcti siini.
⁶¹ Sobga'za Marii Magdalen näjza stee Marii nez loj
baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni gulec-cheereni lanij, bara
yää bidojp rebixhojz ni rnibee näjza rebejn ni laa re-
farisee, bidzujñreni loj Pila't, ⁶³ räjpreni lojni:

—Dad, banaj laaznu xhi räjp bejn ni rusgueere. Räjp-
ni: “Che ted choñ dxej sibañsacni loj rebengut.” ⁶⁴ Ni'c
baxhañ chu chacanäj ro' baaga dxejli guisa' choñ dxej,
te di chää rexpejñpacni chalääreneni tiejxhni, dxejc
gäbreni loj rebejn: “Agubañsacni loj rebengut.” Yälrus-
gueega sajc cuentroru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzut'
ro' baaga si'ctis ni sajc guntu.

⁶⁶ Dxejcti sääreni, basäutzut'zreni ro' baaga; con
resoldaad bacuaareni te seii lojni te rut fal'dini. Dxejc
basa'nreni resoldaad canäj ro'c.

Sibañsac Jesús loj rebengut

(Mr. 16:1-8; Lc. 24:1-12; Jn. 20:1-10)

28 Che gudejd sabd, dxej ni ruzilajz rexpejn Israel,
che gusloj cayänij lo guedxliuj te jiu' stee xmaan,

bidzujñ Marii Magdalen näjza stee Mariiga, siädhui-
ireni lo baa. ² Luxh alagujc te xuro ni basniib lo yuj,
sa'csi biääd te angl xten Dios xhaguibaali te badzucajni
guij ni niäuu ro' baaga, dxejc gurejni yejc guijga.

³ Rdimbichaduxhni si'c najc che rdinya', luxh xhajbni
najc nolbäj si'c najc yejg ni riajb. ⁴ Che bahuii resol-
daadni, bichebduxhreni, sädiidxreni, gujcreni si'c
bengut. ⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguilu Jesús ni cuaj lo
cruz. ⁶ Rutini ree sa'csi agubañsacni sigajc ni najni.
Coltahuii cadro gojtni. ⁷ Colguxuñ, colchaye'tz loj rex-
pejñpacni agubañsacni loj rebengut. Luxh naj agunijd-
ni lojtu sääni región xten Galilee. Ro'c suhuiitu lojni.
Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga.
Cadxejbreni, cabalazduxhareneni sanäreni diidx loj rex-
pejñpac Jesús. ⁹ Chela bidxaagreni Jesús lo nejz, räjpni:
“Xchan”, lojreni. Sas gubigreni loj Jesús, bazuxhijbreni,
gudääzreni guenni'ni, gojñreni. ¹⁰ Dxejc räjpni lojreni:
—Na'c guidxejbtu. Colchanä diidx loj rexpenä,
chääreni región Galilee, sa'csi ro'c suhuiireni loä.

Rediidx ni räjp resoldaad

¹¹ Lañi sää regunaaga, bidzujñ gaii soldaad ni
huicanäj ro' baa lo guejdxga, huisa'nreni diidx lo rebix-
hojz ni rnibee xcuent guiraa ni guzajc ro' baaga. ¹² Dxe-
jc rebixhojz ni rnibee bachagsa'zareneni con rebengool
te bia'nreni diidx gudeedreni xhiroob meel lo resol-
daad, ¹³ räjpreni lojreni:

—Scree colye'tz lo rebejn: “Lañ ni nagayesnu, canäjnu
ro' baa, biääd rexpejñpac Jesús guläxhiga'tzreni tiejxh-
ni.” ¹⁴ Palga jriendiajg gubernadoor dee, siohuiinuni te
di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp re-
bixhojz. Luxh si'c bire'ch diidx loj guiraa rexpen Israel.
Najli canisijcreni si'c.

Baxhañ Jesús rexpejñpacni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejñpac Jesús lo región
Galilee, lo dajn cadro bia'n Jesús diidx guidxaagnireni.

¹⁷ Cheni bahuiireni loj Jesús, bazuxhijbreni, gojñreni,
per yu' reni ractio'p lajzreni. ¹⁸ Dxejc gubig Jesús lo-
jreni, guninäjnireni, räjpni:

—Arapä guiraa yälrnibee xhaguibaa näjza lo guedxli-
uj. ¹⁹ Ni'cni, colchäj, guideb guedxliuj colchagajn bejn
gac xpenä, colgutiobnisreni, con laj Gueb Dios, naj laj
Xi'n Dios näjza laj Sprit Dxan xten Dios. ²⁰ Colguluiireni
gusoobreni guiraa rediidx ni guinibeä. Luxh lagajc
narä suganää la'tu guiraa redxej, dxejli che nitloj
guedxliuj. Sugacni si'c.

San Marcos

Baluu Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

1 Scree gusloj diid xcuent Jesucrist, Xi'n Dios.
² Si'cni bacuaa toIsaías, ni gunii xtidx Dios, che räjp Dios:
 Bahuii gan, guxhaĵä ni chanä xtidxä, ganidni chääni loĵlu te guzucheeni xnezyujlu.
³ Riejn xse' ni rbedxa' nez loj reyubijdz:
 "Colyunsa'c xnezyuj Dad, colslui rexnezyulajzni."
⁴ Biricaj Juan ni rutiobnis nez loj reyubijdzga. Räpgajcni nanabpac gusiechĵajzreni, tiobnisgajcneni, te ĵia xtoĵlreni. ⁵ Riädcuadijg xhidajl reni rbäĵz Judea, näĵza reni rbäĵz guedx Jerusalén. Dxejcti cheni ruxhobdoĵlreni lo Dios, rustiobnis Juanreni neĵ gueu Jordán.
⁶ Xhajt Juan nacchee con guichĵajd cameii, xsin-doorni nacchee con guijd, niluxh gudajwini guxha't näĵza dzunbäserguijxh. ⁷ Caguluiini rebeĵn, räpgajcni:
 —Detzä siääd tej nani sajcru loä, nani nicla di nungäĵl surloä, cuää xcura'chni. ⁸ Narä abatiobnisä la'tu con nis, biädla laani guxhaĵni Sprit Dxan xten Dios te cuääzni neĵ lastootu. Si'c gustiobnis nani ĵiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neĵ redxejga, birii Jesús guedx Nasare't ni yu' Galilee. Dxejcru batiobnis Juan Jesús neĵ gueu Jordán. ¹⁰ Che birii Jesús neĵ nis, bahuiini bixal guibaa. siädäĵt Sprit Dxan xten Dios yejcti si'c te palom. ¹¹ Dxejcti guibaali biejn xse' te ni räjp:
 —Luj najclu xi'nä ni sanälazä; rbanälazduxhälu.

Bateed beñdxab prueb Jesús

(Mt. 4:1-11; Lc. 4:1-13)

¹² Sas baxhaĵ Sprit Dxan xten Dios Jesús lo reyubijdz. ¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil beñdxab nani rnibee, nani laa Satanás, xho niujjni te nusoob Jesús xtiidxni. Dxejcru biääd reangl xten Dios, biädhuiireneni.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basäĵreni Juan neĵ latzguiib. Dxejcti huij Jesús nez Galilee, huiluiini xtidx Dios. ¹⁵ Dxejc räjp Jesús:
 —Abidzujñ dxej, luxh yäĵrnibee xten Dios abidzujñ gajxh. Colsiejch lajztu, colchalilajz xtidx Dios.

Gurejdx Jesús tajp bejn ni rniaaz bäjl

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón näĵza loj Andrés bejtz Simón. Cazäĵreni xquiĵxhreni lo nis, sa'csi rniaazreni bäjl. ¹⁷ Dxejc räjp Jesús lojreni:
 —Coltanajl narä, te gunä cueedxtu bejn lacuaa ni guiniaaztu bäjl.
¹⁸ Lagajc dxejc basa'nreni rexquiĵxhreni, sanätirenini.
¹⁹ Dxejc gusaj Jesús sche'n, sas bahuiini loj Jacob näĵ Juan, rexi'n Zebedeo. Cayunsa'cneni xquiĵxhreni neĵ xcanuurenini. ²⁰ Guredxgajcni guiro'preni, dxejcti laareni basa'nreni xtadreni Zebedeo neĵ canuu, näĵza rexmosni, sanätirenini Jesús.

Te bejn nani guyu' beñdxab neĵ lastooni

(Lc. 4:31-37)

²¹ Bidzujñtirenini guedx Capernaum. Dxejcru sabd, dxej ni rusilajz rexpeĵ Israel, biu' Jesús neĵ guidobäz xten rexpeĵ Israel. Dxejcti baluu Jesús rebeĵn ni tre' ro'c. ²² Bidxelojni rebeĵn xtiidxni, sa'csi caguluiinireni si'cpac te ni rnibee, xhet si'c di remastr xten leiidi. ²³ Neĵ xquidobäzreni yu' te bejn yu' te beñdxab neĵ lastooni. Beñdxabga guredxa', räjpni:
²⁴ —Jesús, ni siääd Nazare't, ĵxhicuent riu'lu loonu? ĵLa siädgunitloĵlu nuunu? Narä numbeälu, luxh nanä ĵlu najclu beñdxan ni siääd lo Dios.
²⁵ Dxejcti gudidxa' Jesús lo beñdxabga, räjpni lojni:
 —Basäuu ro'lu, birii neĵ lastoo niguiire.
²⁶ Sas beñdxabga batienguui niguiiga, luxh cabedxa'ni biriini neĵ lastoo niguiiga. ²⁷ Bidxejbtu guiraareni, canabdiidx loj sa'reni:
 —ĵXhi dee? ĵXhi dzuun nacoobre ruluiini? Niguiire rnibeeni näĵ rebeñdxab, luxh ruzoobreni xtiidxni.
²⁸ Di niaclaa gucbee rebeĵn guideb nez Galilee xhi ruĵn Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

²⁹ Che biriireni xquidobäz rexpeĵ Israel, huinä Jesús Jacob näĵ Juan roliz Simón näĵza Andrés. ³⁰ Luxh xnan suegr Simón naga', yu'ni xliaa. Dxejc räjpreni lo Jesús:
 —Cayacxhuuni.
³¹ Dxejcti gubig Jesús lojni, gunaazni ĵaani, guläsnini; lagajc dxejc biriini xliaa. Dxejc gusloj cayunireni.

Xhidajl beņracxhuu basiajc Jesús che huääz gubijdx (Mt. 8:16-17; Lc. 4:40-41)

³² Che huääz gubijdx, luxh abiu' guxhijn, biädnäreni guiraa rebeņracxhuu loj Jesús, nájza renani yu' beņdxab neņ lastooni. ³³ Luxh guideb guejdxga bidojp ro' yu'ga. ³⁴ Basiajc Jesús xhidajl renani rajc garen-garen yälguijdx. Niluxh gulääzani xhidajl beņdxab, niluxh dini nusaan ninii rebeņdxabga, sa'csi najnreni chu najcni.

Baluu Jesús nez Galilee (Lc. 4:42-44)

³⁵ Che bara yääl, cäjyru bistie Jesús, biriini sääni te laad cadro ruti beņ. Ro'c cabejdx-canabni loj Dios. ³⁶ Dxejcti Simón náj resa'ni huitilreni Jesús. ³⁷ Che bidxälrenini, räjpreni lojni:
—Guiraa rebeņ caguillu.
³⁸ Dxejc räjpre Jesús lojreni:
—Coļcho' reguejdx ni yu' gajxh, te gusuleä xtidx Dios ro'c. Par ni'cpac biälä.
³⁹ Dxejcru cuansaj Jesús guideb nez Galilee, caguluui- ni xtidx Dios neņ reguidobäz xten rexepeņ Israel. Gu-nibeezani birii rebeņdxab neņ lastoo xhidajl rebeņ.

Basiajc Jesús te beņ ni raļ tiejxhni (Mt. 8:1-4; Lc. 5:12-16)

⁴⁰ Gubig te beņracxhuu ni raļ tiejxhni loj Jesús, bazux-hijbni. Dxejcti räjpreni lojni:
—Narä nanä sajc gusiajclu narä palga rļajzlu.
⁴¹ Balaslajc Jesús beņracxhuuga, gunaazni ņaani, rāp-gajcni:
—Rlazä jiajclu. Biajc ņaj.
⁴² Cheni guniini scree, biacgajc beņracxhuuga. ⁴³ Dxe-jcti gulunejz Jesús beņnga. Per rāpxgaani lojni:
⁴⁴ —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani rājpre toMoisés gudeed beņ lo Dios si'c te seen, te gacbee rebeņ abiajclu.
⁴⁵ Dxejc sää beņnga. Sas gusloj cayujyni diidx lo rebe-ņ xcuent guiraa nani gujcni. Ni'cni diru niajcdi niu' Jesús nicla tej guejdx. Cansajni te laad cadro ruti beņ. Niluxh guiranejz rii rebeņ, siädhuiireni Jesús.

Basiajc Jesús te beņ ni di guniib (Mt. 9:1-8; Lc. 5:17-26)

2 Che agudejd balti dxej, biusac Jesús neņ guedx Capernaum. Dxejcti bieņ diajg rebeņ arbājzni. ² Bidopgajc xhidalduxh beņ. Gudxaj neņ yu'. Nicla rolä' di niajļ nisiujreni. Dxejcti caguluui Jesús xtidx Dios lo rebeņ. ³ Dxejcti bidzujņ tajp beņ, nuureni te beņ ni digacti guiniib; siädnärenini lo Jesús. ⁴ Luxh di niajcdi nidzujņreni cadro suga' Jesús, sa'csi yu' xhidajl beņ ro'c. Ni'c baxhalreni yejc yu' nej cadro sujni. Dxejcru cadro baxhalreni basiājtreni da' ni naga' beņracxhuuga lojni. ⁵ Che bahuii Jesús rililajzreni, dxejc rājpreni loj beņracxhuuga:
—Xi'nä, agubicaj rextojļlu.

⁶ Sas gaii beņ ni ruluui leii ni sobga' ro'c beņreni xhigab neņ lastooreni, naareni: ⁷ “¿Xhicuent rnii nigui-ire scree? Caniyajni Dios; rut rajcdi rudzucaj dojl. ¿Dioſtis rajc rudzucaj dojl!” ⁸ Dxejcti gucbegajc Jesús xhi xhigab cayujnreni. Dxejc rājpreni lojreni:
—¿Xhicuent rujntu xhigab si'c neņ lastootu? ⁹ ¿La guyasiru gābni loj beņracxhuuga: “Agubicaj rextojļlu”, o la gābni: “Huistie, cua' xta'lu, gusaj”? ¹⁰ Baj ņaj, te gan-tu rajc rudzucaj Xi'n Dios, nani gujc Niguii, dojl lo guedxliujre, caniä loj beņracxhuuga:
¹¹ —Lojlu rniä, ¿Huistie, cua' xta'lu, huij rolizlzlu!
¹² Lagajc dxejc huistie beņracxhuuga, gulāzni xta'ni, biriini ro'c nez loj guiraareni. Ni'cni bidxelo guiraareni. Dxejc gulā'preni xpala'n Dios, rājpreni:
—Gajdpacnu guihuii sa' dzuunre.

Gurejdx Jesús Leví (Mt. 9:9-13; Lc. 5:27-32)

¹³ Dxejcru gubisac Jesús ro' nis xten Galilee, luxh che bidojp guiraa rebeņ lojni, baluiini xtidx Dios lojreni. ¹⁴ Sasaj Jesús che bidxaagni Leví, xi'n Alfeo. Sobga'ni cadro rusquijxni rebeņ. Dxejc rājpre Jesús lojni:
—Gudanajl narä.
Sas huisuni, sanajltini Jesús.
¹⁵ Dxejc sobga' Jesús cayajwni roliz Leví. Luxh sob-ganāj Jesús xhidajl reni rusquijx, nájza rebeņdojl ni di chasanāj leii, nájza rexepeņpacni, lo mex. Xhidajlreni tre', luxh sanajlreni Jesús. ¹⁶ Dxejcru rebeņ ni ruluui leii náj refarisee, che bahuiireni cayaunājni renani rusquijx nájza rebeņdojl, rājpreni loj rexepeņpac Jesús:
—¿Xhicuent rbenāj xmaſtrtu reni rusquijx náj rebeņ-dojl, luxh raunājnirenii, rānājnirenii?
¹⁷ Che bieņ diajg Jesús xhi caniiireni, rājpreni lojreni:
—Renani nadip nadaan di guiquiini doctoor, per reni racxhuu rquiini doctoor. Dina niädtedxä rebeņsa'c, biädtedxä rebeņdojl, te gusiech lajzreni.

Gunabdiidxreni loj Jesús xcuent yälrucua'n (Mt. 9:14-17; Lc. 5:33-39)

¹⁸ Cagucua'n rexepeņ Juan náj rexepeņ refarisee, re-nani najc rebeņguidoo loj guedx Israel. Dxejc biäd gaii beņ loj Jesús, gunabdiidxreni lojni rājpreni:
—¿Xhicuent cagucua'n rexepeņ Juan náj rexepeņ re-farisee luxh rexepeņpaclu di gucua'n?
¹⁹ Dxejcti rājpre Jesús lojreni:
—¿La rucua'n rebeņ ni rdoņ chää cadro ru' yälruchnaa che meer suga' bi'n? Che meer suga' bi'n lojreni, direni gucua'n. ²⁰ Per sidzujņ dxej sibicaj bi'n lo-jreni, dxejc sii sucua'nreni.
²¹ ‘Rut rucuaadi tla' ladcoob loj tla' ladyux, sa'csi lad-coob rxcu'nni luxh rutiājzni ladyuxga, dxejc xhiroobruni rājs. ²² Rutza rusälđi bin ni gajd guilaj neņ guidyux ni abigaa. Sa'csi bin ni gajd guilajga sutiājzni guijdga che guilajni, luxh sinijt binga nájza guijdga. Ni'cni nanab gusälđi bincoob neņ guidcoobza.

Batojp rebejn ni rinajl Jesús triuu sabd

(Mt. 12:1-8; Lc. 6:1-5)

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. ²⁴ Dxejc räjp reфарisee, renani najc benguidoo loj guedx Israel, loj Jesús:

—Arniä, çxhicuent rujn rexpejn paclu dzuun ni di guchaag gunni neñ dxej ni rusilajznu, ä?

²⁵ Dxejcti räjp Jesús lojreni:

—çLa gajdte goj nani bejn toDavid te huält, laani näj resa'ni, ä? Che biäädx xhi gauureni, gulaanreni. ²⁶ Biu' David neñ xyu' Dios cheni guyu' toAbiatar loj Dios. Abiatar saj cru loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquiinpac gusilajz bejn. Dini niujn sabd te gapda bejn ni. ²⁸ Ni'cni narä, Xi'n Dios ni gujc Niguii, näjza sabd rnibeä.

Niguii ni nabijdz te ñaani

(Mt. 12:9-14; Lc. 6:6-11)

3 Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te ñaani. ² Niluxh ro'c cagula'tz rebejn Jesús don la susiaj cni niguiiga sabd, dxej ni rusilajz rexpejn Israel, sa'csi rlaizreni cue'creni xquejni loj nani rnibee rexpejn Israel. ³ Dxejc räjp Jesús lo niguii nani nabijdz ñaani:

—Huistie, guzuj galäiire.

⁴ Dxejcti gunabdidxgajcni loj gaii rebejn ga, räjpni:

—çLa laaca gunni dzunza'c, o la dzunguijdx, sabd, ä? çLa suslaani yälñabajn, o la sugu'tni?

Luxh laareni biacdxireni. ⁵ Dxejc nadxe'ch bahuii Jesús lojreni, luxh guc-huin laizni, sa'csi guc najd laizreni. Dxejc räjp Jesús loj niguiiga:

—Baslii ñaalu.

Dxejcti basliini ñaani. Biajctini. ⁶ Dxejcru biunejz reфарisee. Guslogajcni caguchaagreni diidx con reni nadxaag Herodes, te don xho ju'treni Jesús.

Xhidajl bejn bire' ro' nis

⁷ Jesús näjza rexpejn pacni sääreni ro' nis, luxh xhidajl beñ Galilee birinajl ni. ⁸ Che goj nreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejz stelaad gueu Jordán, biriizaren nez guedx Tiro, näj nez guedx Sidón, biädhuiireni loj Jesús. ⁹ Ni'cni räjp Jesús loj rexpejn pacni quiilreni te canuu, te na'c gutää rebeñxhidaalgani. ¹⁰ Abasiajz Jesús xhidajl beñracxhuu, ni'cni guiraasi beñracxhuu caxa't lojni, te cañrenini te jiajcreni. ¹¹ Niluxh che rhuii rebeñdxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús guidixa' lojreni te na'c niäjbreni chu najcni.

Gule Jesús tzubitiop bejn loj reni rinajl ni

(Mt. 10:1-4; Lc. 6:12-16)

¹³ Birii Jesús sääni lo te dajne' cadre gurejdxni renani rlaizni cueni. Gubigtireni lojni. ¹⁴ Dxejcti guleni tzubitio'preni te sanäjreni laani, te guxhañniren chaluireni xtidx Dios; ¹⁵ te ga'preni yälñnibee te gusiajcreni beñracxhuu, te cuääzaren rebeñdxab. ¹⁶ Retzubitio'p bejn ni gule Jesús najc: Simón, ni gulälajzani Pedr. ¹⁷ Dxejcti Jacobo con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacobo xi'n Alfeo, Tadeo, Simón, ni di guidxejb rnigajc, ¹⁹ näj Judas Iscariot, ni bato' Jesús loj reni rdxechlajz lojni. Sä'tireni rolijz te dade'.

Yälñriyaj loj Sprit Dxan xte Dios

(Mt. 12:22-32; Lc. 11:14-23; 12:10)

²⁰ Dxejc bidopsac rebeñxhidaalga; nicla niajz niaunäj Jesús rexpejn pacni. ²¹ Che biejn diajz resa' Jesús dee, biädxhiireneni, sa'csi naareni, yej cni cayajc.

²² Rebejn ni ruluu leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebeñdxab, yu' neñ lastoo niguiire. Niluxh nani rnibee rebeñdxab rudeed yälñnibee lo Jesús te cuääni beñdxab.

²³ Dxejc gurejdx Jesús rebejn ga, bijyni te cuent ni ruluu lojreni, räjpni:

—çXho gurilaagw beñdxab lagajc sabbeñdxabni?

²⁴ Palga rebejn xten te yälñnibee la'reni, luxh tiññaj te cuaani ste cuaaga, di yälñnibeega chu xchej. ²⁵ Palga te famil' rdiññaj lagajc sa'ni, di familga chu xchej. ²⁶ Palga beñdxab nani rnibee tiññaj lagajc laani, di xcälñnibeeni chu xchej, sa'csi ni'c gun luuxni.

²⁷ 'Rut gacdi jiu' rolijz te niguidaani, cuanni xhixhtenni, palga dini gulibxgaani, si'ctis saj cuanni xhixhtenni.

²⁸ 'Rniliäpac lojtu guiraa dojl näjza yälñriyaj xten rebejn sajz jia. ²⁹ Nani guiniyaj Sprit Dxan xten Dios, di gacdi guibicaj rextolj ni, anuutisni xtoj ni par tejpas.

³⁰ Räjpni si'c sa'csi caniireni yu' beñdxab neñ lastooni.

Xnan con rebetzhuin Jesús

(Mt. 12:46-50; Lc. 8:19-21)

³¹ Dxejcru bidzujn xnan Jesús, näj rebetzhuinni. Direni niu', baxhañtisreni chu huitejdxni. ³² Rebejn ni sobga' gabi Jesús räjpreni lojni:

—Xnanlu näj rebejtzlu suga' ro lä', caguilreni luj.

³³ Dxejcti räjp Jesús lojreni:

—çChu reni'c najc xnanä näj rebetzä?

³⁴ Bahuijajcni loj renani sobga' gabini, dxejc räjpni lojreni:

—Redee najc xnanä, rebetzä. ³⁵ Chutis ni rujn ni rlaiz Dios, ni'c najc betzä, bisianä, näjza xnanä.

Xcuent niguii ni sale'c binij

(Mt. 13:1-23; Lc. 8:4-15)

4 Suga' Jesús ro' nis guslosac caguluiini xtidx Dios, luxh bidojx xhidajl bejn cadre suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni neñga, biääd guiraa bejn bia'ntireni ro' nis. ² Dxejc baluiinireni guiraloj, ganax cuent ni ruluu guniini. Che caguluiini, räjpni lojreni:

³ —Gucuadiajgtu dee. Guyu' te niguii. Biriini sale'cni binij. ⁴ Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵ Stee lajt biajb binijga neñ guij cadre xheti xhidajl yuj. Binijga gulengajcni, sa'csi xheti xhidajl yuj ro'c.

⁶ Dxejc, sa'csi lo jiaa yu' xlobaani, che birii gubijdx, bigolni, gubijdzitini. ⁷ Stee lajt biajb binijga neñ yaguejch. Dxejcti biroob reyaguejchga, luxh bejnreni balaa loj binijga, ni'cni gujcn ganax bilii. ⁸ Per stee lajtga biajb binij lo yusa'c. Gulejn reyälga, guroobreni, gucsa'creni. Yu'reni cuaj galbitzoo xob, yu'reni cuaj gayojn xob, yu'zaren cuaj tegayuu xob.

⁹ Dxejc räjpni lojreni:

—Chutis ni rlanj guisieed, sucuadiajgni.

¹⁰ Che asii xhidajl bejn, rebejn nani suga' gajx cadre suganäj Jesús guitzubitio'p xpejn pacni gunabdiidx lo Jesús xhi säloj cuentre. ¹¹ Dxejc räjp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, ¹² te mase cahuiireni direni gumbee, te mase cayiejn diajgrenti, direni gacbee. Scree gacni, te na'c gusiejch lajzreni, te na'c guibicaj xtojreni.

¹³ Räjpzani lojreni:

—¿La ditu gacbee cuentre? ¿Xhocha gacbeetu xhidajlru cuent? ¹⁴ Niguiire nani sale'c binij najc si'c te nani ruluu xtidx Dios. ¹⁵ Yu' bejn ni najc si'c binij ni biajb cuä' nezyuj: riejn diajgrenti xtidx Dios nani ruluu bejn. Dxejc che jiejn diajgrenti xtidx Dios, riääd Satanás rbägajcni xtidx Dios ni yu' neñ lastooreni. ¹⁶ Yu'za rebejn ni najc si'c binij ni biajb neñ reguij, renani che jiejn diajgrenti xtidx Dios, rbaa lajzreni rca'reni diidxga. ¹⁷ Niluxh direni nisiudzu'tz, sa'csi guxii huilii lajzreni. Che rdej-dreni trabajw o che rusacs' bejnreni xcuent xtidx Dios, rusaanreni xtidx Dios. ¹⁸ Yu'zaren najc si'c binij ni biajb neñ yaguejch, riejn diajgrenti xtidx Dios, ¹⁹ dxejc che ru'ruren yärsia' xcuent recos guedxliujre, rsia' lajzreni ga'preni meel, rlanjreni ga'pruren guiraloj recos, dxejc riu' redee neñ lastooreni, rusäuuni lo xtidx Dios, xlia'si biejn diajgrenti xtidx Dios. ²⁰ Yu'za bejn ni riejn diajgrenti xtidx Dios, rlii lajzreni diidxga, xhet xlia'ti biejn diajgrenti xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzoo xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx

(Lc. 8:16-18)

²¹ Räjpza Jesús lojreni:

—¿La riädnätu te bajl te suuni dejtz te alm, o neñ te loon, ä? ¿La xhet nanabdi suuni jiaa te guzanijni, ä?

²² Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³ Pal yu' chu rlanj guisieed, sucuadiajgni.

²⁴ Räjpza Jesús lojreni:

—Colyunxgaa xhigab rediidx ni riejn diajgtu. Nani rusäl'tu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵ Renani rajp che'n yäl'najn, lojreni sudeedru Dios yäl'najn. Luxh renani xhetru rusäl'di loj xhigabreni, sudzucaj Dios yäl'najn nani rajpreni.

Xcuent binij ni roob

²⁶ Guniiza Jesús lojreni:

—Yäl'rnibee xten Dios najc si'c rsiajc te niguii che rbe'cni binij lo yuj, ²⁷ dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejzde' neñ dojga. ²⁹ Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpn.

Xcuent bedz muxhtas

(Mt. 13:31-32; Lc. 13:18-19)

³⁰ Räjpza Jesús:

—¿Xhini'c najc si'c najc xcäl'rnibee Dios? ¿Xhi te cuent guiniinu te guiluiinu? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj. ³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiäazni neñ xpa'laani.

Si'c baluii Jesús ganax con cuent

(Mt. 13:34-35)

³³ Si'c ruluu Jesús rebejn xtidx Dios guniini xhidajl cuent sa' redee, si'ctis ni rajc racbeereni. ³⁴ Con recuent ni ruluu itis gunii Jesús lojreni. Niluxh lo rexpejn pacni basule'ni guiraa recuente.

Rusiadxi Jesús bej näj nisdoo

(Mt. 8:23-27; Lc. 8:22-25)

³⁵ Lagajc gudxejga räjpni loj rexpejn pacni:

—Colcho', chonnu stelaad nis xten Galilee.

³⁶ Basa'ntireni rebejn, sanätireni Jesús neñ canuu cadre sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis neñ canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, räpgajcni lojni:

—Dad mastr, ¿la dilu jiu siäaznu neñ nis, ä?

³⁹ Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biadxiini. ⁴⁰ Räjp Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹ Luxh laareni bidxelojreni, räjpreni loj sa'reni:
—¿Chucha dee ni rnibee bej con nis, luxh ruzoobreni xtiidxni?

Nigui Gadara ni yu' beñdxab neñ lastooni
(Mt. 8:28-34; Lc. 8:26-39)

5 Bidzujntireni stelaad ro' nisga, lo yuj xten Gadara. ² Si'ctis ni birii Jesús neñ canuu, biädgajc te niguii lojni ni birii neñ rebiliää cadro rga'tz bengut. Yu' beñdxab neñ lastoo niguiiga. ³ Rbäjzni neñ rebiliääga luxh rut rajcdi rucuaaduuni, nicla con cadenguiib.

⁴ Xhidajl huält agacbacuaduureni ni', ñaa niguiiga con cadenguiib, luxh litis batiuugni recadenguiibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni neñ redajn, neñ rebiliää, luxh cagutiugni tiejxhni con reguij. ⁶ Che bahuiini loj Jesús zijtru, baxuñni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—¿Xhicuent siäädllu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

⁸ Sa'csi agac cayäjb Jesús lojni:

—Luj, beñdxab, birii neñ lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejcti räjpni:

—Narä laä Legión, nani säloj xhidalro, sa'csi xhidajl najcnu.

¹⁰ Sanuutis canabni lo Jesús na'c guxhañni rebeñdxabga ste'ca guejdx. ¹¹ Ro'c tre' xhidalduxh cuch cuä' dane'ga, cayajwreni. ¹² Dxejcti gunab rebeñdxabga loj Jesús, räjpreni:

—Baxhañ nuure loj recuchre te jiu'nu neñ lastooreni.

¹³ Dxejcti basaan Jesúsreni. Biriiti rebeñdxabga neñ niguiiga, dxejcti biu'reni neñ lastoo recuchga. Yu' si'cti tiop miñ cuch ro'c. Baxuñ recuchga, dxejcti biroñreni ro' guilaj, bitejbreni neñ nis, gujttireni neñ nisga.

¹⁴ Renani cayajp recuchga baxuñreni, huiyeireni didxga neñ guejdx, näjza loniaa. Dxejcti biäd bejn biädhuui nani gujc ro'c. ¹⁵ Che bidzujntireni cadro suga' Jesús, bahuiireni loj niguii nani guyu' rebeñdxabga neñ lastooni. Sobga'ni ro'c, najcwni xhajibni luxh nasa'c yejcti. Niguiire näjc nani guyu' beñdxab ni laa Legión neñ lastooni. Bidxeljcti rebejn nani bahuii lojni. ¹⁶ Dxejcti rebejn ni bahuii xhi gujc ro', huiyeireni diidx xho guzajc niguiire nani guyu' beñdxab neñni galoo, näjza nani guzajc recuch. ¹⁷ Dxejcti gusloj canabreni loj Jesús jiunejzni.

¹⁸ Che biu' Jesús neñ canuu, niguii nani guyu' beñdxab neñ lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räjp Jesús lojni:

—Huij rolizlu, lo resa'lu. Huiyeii diidx lojreni xho benäj Dadlu, näjza xho balaslajzni luj.

²⁰ Sä'ti niguiiga, gusloj cayujyni diidx neñ reguejdx xten Decápolis xho bennäj Jesúsni. Guiraa rebejn bidxeloj.

Xindxa'p Jairo näjza gunaa ni bahuañ xhajib Jesús
(Mt. 9:18-26; Lc. 8:40-56)

²¹ Che bidzunsac Jesús stelaad ro' nisga neñ canuu, bidzujnti xhidalduxh bejn cadro suga'ni. Bia'nti Jesús ro' nisga. ²² Dxejcti biäd te niguii nani laa Jairo, ni rnibee neñ xquidobäz rexpen Israel. Che bahuiini loj Jesús, bazuxhijbni lojni. ²³ Canabpacni lojni, räjpni:

—Xindxapä'ä acayejt. Gudaa, guzujlu ñaalu yejcti, te jiajcti, te guibajnti.

²⁴ Sanäti Jesús bejnga. Xhidajl bejn sanajlni, luxh cagutääreneni. ²⁵ Loj rebeñxhidaalga yu' te gunaa ni agujc tzubitio'p ijj racxhuuni yälguidxbäi. ²⁶ Agudeduxhni trabajw, abahuii xhidajl doctoori. Xlia'si abanijtni guiraa nani rajpni, luxh xhet racnäjdini, alga rxuuri. ²⁷ Sa'csi biejn diajnti xhini'c canii rebejn xcuent Jesús, gubig gunaaga nez dejt Jesús, guideb neñ rebejn, bahuañni xhajib Jesús. ²⁸ Cayujnti xhigab, naani: "Palga narä falä xhajibtisni, siacä." ²⁹ Lagajc dxejcti guläjz caxe' xtiejnti, gucbeza tiejxhni abirii xcälracxhuuni.

³⁰ Gucbegajc Jesús yu' chu abasiajcti. Gubiregajcti neñ rebeñxhidaalga, räjpni:

—¿Chuni'c bahuañ xhabä?

³¹ Dxejcti räjp rexpejntpacni lojni:

—Rhuuillu beñxhidaal cagutääl, luxh naalu: "¿Chuni'c bahuañ xhabä?"

³² Sas cahuii Jesús nez ree, nez rec, te fiini loj nani bahuañni. ³³ Dxejcti bidxeljcti gunaare, racsejsni, sa'csi gucbeeni xhini'c gujcti. Dxejcti biädni, bazuxhijbni loj Jesús, räbliini loj Jesús guira'ti ni bejnti. ³⁴ Dxejcti räjp Jesús lojni:

—Xindxapä', abiajclu sa'csi huililajzlu. Gulecdxi lajzlu, huij rolizlu, abiajcti xcälracxhuulu.

³⁵ Canisijc Jesús si'c che bidzujnti renani birii roliz dade' ni rnibee neñ xquidobäz rexpejn Israel. Räjpreni: —Agujt xindxape'lu. ¿Xhicuent rusieedrulu Dad mas-tr?

³⁶ Dxejcti che biejn diajnti Jesús nani caniiireni, räjpni lo dade'ga:

—Na'c guidxeljblu. Bililajzti.

³⁷ Luxh dini nusaanru nij chu ninäni, Pedrtis näj Jacoob näjza Juan bejznti. ³⁸ Che bidzujnti roliz dade'ga, bahuii Jesús biejn ni cayujnti rebejn ni rbedxa' roon.

³⁹ Biu'tini räjpni:

—¿Xhicuent rujntu si'c? Gajd dxape're guet. Na-gayejsini.

⁴⁰ Alga baxhiznäjreni. Dxejcti gunibee Jesús birii guiraa rebejnga. Dxejcti huinäni xcuzajnti dxape'ga con renani sanäni. Biu'reni cadro naga' dxape're. ⁴¹ Gu-naazni ñaa dxape'ga, dxejcti räjpni:

—Talita cumi —nani säloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijj yu' dxape'ga. Bidxeloduxh rebejn ni bahuii guläs Jesús dxape'ga. ⁴³ Dxejcti balijdx Jesús reni te rut lojdi chaye'tzreni xhini'c gujc. Gunibegajcti gudeedreni xhi gauu dxape'ga.

Che guyu' Jesús Nazare't

(Mt. 13:53-58; Lc. 4:16-30)

6 Dxejcu birii Jesús ro'c, huijni lajdxni, sanāzani rexpejnpacni. ² Che bidzujñ sabd, dxej nani rusilaj rexpejñ Israel, gusloj caguluiini neñ xquidobāz rexpejñ Israel. Bidxeloj xhidajl bejñ nani biejn diajg rextidixni, rājpreni:

—¿Caro bisieed niguiire guiraa recosre? ¿Xhi yālnajre cua'ni ni'c rajc rujñni rextzunduxh Dios con ñaani? ³ ¿La xhet laadi carpinteer, xi'n Marii, bejtz Jacoob, nāj José, nāj Judas, nājza Simón dee, ā? ¿La xhet reedi rbājz rebisianhuinni?

Luxh bidxechlajzreni lojni. ⁴ Dxejç rājp Jesús lojreni: —Catis rināljazreni te ni rnii xtidx Dios. Lajdxtisni, la-gajc loj resa'ni, rolijztisni, ro'c rut rināljazdini.

⁵ Luxh di niajcdi niujñ Jesús xhidajl milaagwr ro'c. Tiopchontis beñracxhuu basiajçni, bazujni ñaani yejçreni. ⁶ Bidxelo Jesús sa'csi di lajzreni nilii. Caguluiitini neñ guiraa reguejdx' ni ria'n gajxh nejzga.

Baxhal Jesús tzubio'p bejñ ni rinajl ni chaluiireni xtidx Dios

(Mt. 10:5-15; Lc. 9:1-6)

⁷ Dxejcu gurejdxni guitzubitio'p xpejnpacni. Gusloj caguxhalni tiopgajreni; badeedzani yālnibee lojreni te guinibeereni loj rebeñdxab. ⁸ Gunibeeni xhet chanādireni lo nejz, ganaxhtis te yajg te sanājreni. Di nungājñ chanāreni nicla bisiuud, nicla yātxtiil, niclaza meel neñ dobdājñ. ⁹ Nungājñza xcaj gura'ch ni'reni, nā-gajc ga'preni tejtis gamangw, xhet tio'pdini. ¹⁰ Dxejçti rājpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. ¹¹ Palga yu' te guejdx cadro direni gusaan jiu'tu luxh di rlaizreni cuadijgñeni diidx ni sanātu, colrii guejdxga, colçuijb guxhuj ni'tu si'c te seen te gacbeereni xhet laadi bejnreni. Rniliāpac lojtu, guxiiru trabajw ted rebeñ Sodoma nāj rebeñ Gomorra quela rebejñ ni yu' guejdx cadro direni gusaan jiu'tu.

¹² Dxejç biriireni, sääreni. Cayābgajçreni nanabpac gusiejch lajz rebejñ. ¹³ Gulääzaren i xhidajl beñdxab dx-ejçti gudääbreni se't yejç xhidajl beñracxhuu, luxh bia-jçreni.

Xcālgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejç. Biejñ diajgñi xpala'n Jesús, sa'csi guiralii rebejñ calā'p xpala'nni. Dxejç rājp Herodes:

—Juan nani rutiobnis ahuājs loj rebengut, ni'c rajc rujñni remilagwre.

¹⁵ Sgāii bejñ rājp:

—Laa Elías ni gunii xtidx Diosni.

Sgāiiireni rājp:

—Laa te bejñ ni rnii xtidx Dios, o sa' te rebejñ ni gunii xtidx Dios agujc xchero.

¹⁶ Che biejñ diajg Herodes si'c, rājpni:

—Laa Juan dee, nani gunibeā biru' yejçni, luxh ñaj agubañsacni loj rebengut.

¹⁷ Sa'csi lagajc Herodes gunibee biga' Juan, dxejç bacuaduurenini con cadenguiib neñ latzguiib, xcāl-nasa'c Herodías. Herodías gujç chāäl Lib, bejtz Herodes, dxejç cua' Herodes gunaaga si'c chāäl ni.

¹⁸ Rājp Juan loj Herodes:

—Xhet laadi rbāznājñlu chāäl bejtzlu.

¹⁹ Ni'cni rdxechlajz Herodías loj Juan, luxh rlaizni ju'tnini, luxh di niajcdini ²⁰ sa'csi rdxejb Herodes Juan, sa'csi najñni beñsa'c, beñdxan najc Juan, ni'cni dini nusaan niujñ Herodías latsiajñi. Mase dini gacbesa'c ni rnii Juan, rucuaadiagsa'cni xtiidxni. ²¹ Niluxh guyu' xmood Herodías. Che gojñ laj Herodes, bayaanni rexpejñni ni rnibee, nājza rebejñ nani sajç nez región Galilee. ²² Dxejçti biu' xindxa'p Herodías cadro caya-jwreni, baya'ni nez lojreni. Bidxaglazduxh Herodes nājza rexpioozni baya' gunaaga, xindxa'p Herodías. Dxejç rājp Herodes lo gunaaga:

—Gunab ni rlaiztislu loā, narā sunidxāni.

²³ Dxejcu rāpli Herodes lojni:

—Sunidxā xhitis ni guiniablu. Mase gala' yuj ni rnibee.

²⁴ Biriitini neñ yu', huiye'tzni loj xnanni, rājpni:

—¿Xhini'c guiniabā lojni?

Dxejç rājp xnanni lojni:

—Gunab yejç Juan ni rutiobnis lojni.

²⁵ Huigajçni loj reii, sas gunabni lojni, rājpni:

—Rlazā gunidxgajçlu loā yejç Juan ni rutiobnis. Neñ te pla't baniidx yejçni.

²⁶ Dxejçti guc-huinduxh lajz Herodes, sa'csi abadeedni xtiidxni lojni, luxh sa'csi abiejñ diajg renani sobganājñi lo xmexni, ni'c dipac rlaizni nudxojnñi nani gunab gunaaga lojni. ²⁷ Baxhalgajç reii te soldaad ni rcanāj ro'c, baxhalnini, te chaxiini yejç Juan. ²⁸ Ni'c huij, dxejçti bagu'tni Juan neñ latzguiib, biādnātini yejç Juan neñ te pla't. Badeedtinini loj gunaaga. Dxejçti gunaaga badeednini loj xnanni.

²⁹ Che biejñ diajg rexpejnpac Juan si'c, biādlāsreni to-goolga. Dxejçti bacua'tzrenini neñ te baa.

Bayaan Jesús gāii mil bejñ

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, bijreni diidx guiraa ni bejnreni nājza ni baluiireni. ³¹ Dxejç rājp Jesús lojreni:

—Coltaa, xtebnu choñnu cadro rut rbājzdi, guisi-laaznu tudxe'n.

Rājp Jesús si'c sa'csi yu' xhidajl bejñ ni sää, ni siāäd, nicla gal gauureni. ³² Dxejçti sääreni neñ te canuu cadro rut rbājzdi. ³³ Bahuii xhidajl bejñ sääreni, biem-beereni Jesús. Dxejç xhidajlreni huini' ro'c, xhidajl guejdx biriireni, ganidreni bidzujñreni loj Jesús nājza rexpejnpacni, dxejçti bidojpreni lojni. ³⁴ Birii Jesús neñ canuu, bahuiini loj beñxhidaalga. Dxejç balazlajznireni, sa'csi najçreni si'c rexiiil ni ruti baxtoor xtenreni. Dxejç gusloj caguluiinireni guiraloj. ³⁵ Che gojñ gudxej, gubig rexpejnpacni lojni, rājpreni:

—Rut rbäjzdi ree, luxh agudxej naj. ³⁶ Baxhaļ rebejn te chääreni lo reguejdx, nájza reřench, te chasiireni yätxtiil gauureni sa'csi xheti xhi gauureni ree.

³⁷ Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—ǂXhixh saļ tiop gayuu meel yätxtiil chosiinu gauu guiraa rebeñhidajlre?

³⁸ Dxejcti räjp Jesús lojreni:

—ǂBal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, nájza tiop bājļ.

³⁹ Dxejcru gunibee Jesús räjpreni loj guiraa rebejn:

—Colcuj xcuaxcuuatu loj guixhaya'.

⁴⁰ Sas gurej xcuaxcuuareni. Yu' lajt gurej tegayureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga nájza guiro'p bājļga, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bājļ, badeedni loj rexpejnpacni te badeedreni loj guiraa rebeñhidaalga. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm guidxadoo yätxtiil nájza bājļ ni bia'n. ⁴⁴ Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejnpacni neñ canuu, chäga-jceni Betsaida, ni tre' dejt nis stelaad, laļni cagusadi-dxni rebejn. ⁴⁶ Che gulujx basadiidxnireni, sääni neñ redane', sanabni lo Dios. ⁴⁷ Cheni acayu' guxhijņ, yu' rexpejnpacni neñ canuu galäi nis laļ ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanareni nez dejtzeni stehuält. Dxejcru che acara yääl, gusaj Jesús loj nis, huijni cadro sasajreni, rļajzni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te beñmalni, ni'c guredxa'reni.

⁵⁰ Guiraareni bahuiireni lojni, bidxebduxhrene. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdx bej, luxh laareni bidxeloduxhrene, ⁵² sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

Basajc Jesús rebeñracxhuu neñ guedx Genesare't

(Mt. 14:34-36)

⁵³ Gudejdreni lo nis, bidzujņreni lo yuj xten Genesare't. Ro'c bacuaduureni canuu ro' nis. ⁵⁴ Che biriireni neñ canuu, biembegajc rebejn Jesús, ⁵⁵ dxejcti birii rebejn guideb nejzga. Guslojti siädnäreni beñracxhuu loj Jesús, naga' rebeñracxhuuga lo da'. Cadrotis riejn diajgreni yu' Jesús riädnäreni rebeñracxhuu. ⁵⁶ Niluxh cadrotis rij Jesús, neñ reguedxbāz, neñ reguedxro, nájza loj reřench, rguixhrene rebeñracxhuu cadro rajc guii. Dxejcti rniabreni loj Jesús te gac caanreni xhajnbi, niluxh biajc giralii renani gudajw xhajn Jesús.

Nani runijt lastoo bejn

(Mt. 15:1-20)

7 Dxejcti refarisee, renani najc benguidoo loj guedx Israel, nájza gaii rebejn ni ruluii leii, renani birii Jerusalén, bidojpreni loj Jesús. ² Bahuiireni cayajw gaii rexpejnpac Jesús, luxh canii rebejn nacdxuudx naareni (dee säloj direni quib naareni si'ctis ni rdiib naa rebeñ lajdxrene). Ni'cni guniyajreni rexpejnpac Jesús. ³ (Guiraa rebejn xten Israel, nájza refarisee, sasanāj nani baluii rebeñgool ni yu' guedx Israelreni. Direni gauu palga direni quib naareni balti huält. ⁴ Che rbi'reni rijreni lo guii, rguibsa'creni naareni, lojreni, ni'reni, dxejcti rajc rajwrene. Niluxh guyu' xhidajl costumbr ni sasanajruren, luxh yu' mood rguibbreni rextrastreni nájza rexplooreni, nájza rextrastguibbreni, nájza rexloonreni.) ⁵ Dxejc gunabdiidx refarisee nájza rebejn ni ruluii leii loj Jesús, räjpreni:

—ǂXhicuent di rexpejnpaclu gun si'cni baluii rebeñgool, niluxh rajwrene guideb nacdxuudx naareni?

⁶ Dxejcti gunii Jesús lojreni räjpni:

—ǂBeñ guijdx! Laaca gunii Isafas xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni,

niluxh lastooreni zitro suga' loä.

⁷ Xliasi ruzuxhibbreni, sa'csi direni chanälajz narä.

Ruluiireni si'c xtiidxpac Dios nani rni rebejn.

⁸ Rusa'ntu xleii Dios, sasanädzut'ztu costumbr nani baluii rebeñgool. Rdibsa'c rexploortu, rextrasttu, luxh rujnzatu xhidajlr cos sa' redee.

⁹ Räjpza Jesús lojreni:

—Rusa'ntu xtidx Dios te risanäjtu recostumbr xtentu.

¹⁰ Sa'csi räjp Moisés: "Huinälajz xtdadu con xnanlu." Räjpzani: "Suju'tpactu nani gudzubde yejc xtdadni o yejc xnanni." ¹¹ Niluxh la'tu rniitu sajz gāb bejn loj xtdadni o loj xnanni: "Dina gapä xhi cojn gacnäälü" (nani säloj, abadedä guira'ti loj Dios). ¹² La'tu ditu gusaan gunru bejn por xtdadni nicla por xnanni. ¹³ Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä. ¹⁵ Rexhicos yälrajw ni rajw bejn, dini gunijt bejnga, rediidx ni rii neñ lastoo bejn, nájza recos ni rujn bejn, ni'c runijt bejnga. ¹⁶ Pal yu' chu rļajz guisieed, sucuadiajgni.

¹⁷ Dxejcti gula'reni loj rebeñxhidaal, biu'reni neñ yu'. Dxejc gunabdiidx rexpejnpacni loj Jesús xhi säloj cuent ni guniini. ¹⁸ Basejc Jesús diidx lojreni, räjpni:

—ǂLa nájza la'tu xheti xcäriejntu? ǂLa di'tu gacbee xhitis yälrajw nani riu' neñ bejn digacdi gunijtni lastoo bejn, ä? ¹⁹ Sa'csi dini jiu' neñ lastooni; riu'ni xque'ni, rdejdtni.

Si'c guniini te baluiini guira'ti xhicos najc naya. ²⁰ Dxejc räjpni:

—Rediidx ni rii neñ lastoo bejn, nájza recos ni rujn bejn, ni'c sii runijt lastoo bejn. ²¹ Sa'csi neñ lastoo rebejn rii rexhigabguijdx, nájza yälresnäjä chääl sa'ni, yälres-

näj ni xhet najcdi chäälni, yälrugut sa'ni, ²² yälgubaan, yälrlajzni ga'pni xhixhten bejn, yälłatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälınayechlajzni, yälğuyalajz. ²³ Guiraa reyälłatsiajre neñ lastoo bejn riireni, luxh reni'csi runijit bejn.

Tej guna Sirofenicia ni bililajz xtidx Jesús

(Mt. 15:21-28)

²⁴ Dxejci biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlajzni niacbee re-bejn caro yu'ni, niluxh di niacdi niuxhiga'tztisni. ²⁵ Bi-engajc diajg te gunaa ro'c yu' Jesús. Xindxape' gunaa-ga yu' beñdxab neñ lastooni. Bidzujñ gunaaga, bazux-hijbni lo Jesús. ²⁶ Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. ²⁷ Dxejci räjp Jesús lojni:

—Basaan gauxgaa rebiiux, sa'csi xhet laati gudzucajni xcuxtiil rebiiux te gudeednini loj rebä'cw.

²⁸ Dxejci gunii gunaaga, räjpni loj Jesús:

—Yo, Dad. Näjza rebäcuc' ni suga' neñ mex rajw nani rtejb ro' rebiiux.

²⁹ Dxejcti räjp Jesús lojni:

—Laaca nniililu. Huij rolijzlu. Abirii beñdxab neñ lastoo xindxape'lu.

³⁰ Luxh che bidzujñ gunaare rolijzni, a dxape' naga' lo da'. Gucbegajc gunaaga abirii beñdxab neñ lastoo dxape'ga.

Basiajz Jesús te bengop

³¹ Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujñtini ro' nis xten Galilee. ³² Biädna gatii bejn te niguii ni nacua't diajgni lo Jesús. Digacdziza guinisa'c niguiiga. Biädnaabreni lo Jesús nusujni ñaani yejc niguiiga. ³³ Dxejcti badzucajnini loj rebejn. Baquitzgajcni rebicueñaani neñ diajgni, dxejcru batiobxhejnini, gudajñtini lujdxni. ³⁴ Bahuiini xhaguibaa, bazaa lajzni, dxejci räjpni:

—¡Efata! —nani säloj bixal.

³⁵ Dxejcru bixalgajc rediajgni, gubangajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga.

³⁷ Rdxeloduxhrene, räjpreni:

—Guira'ti laaca rujñni; ruxhalni diajg rediagcua't, luxh rusniini regop.

Bayaan Jesús tajp mil bejn

(Mt. 15:32-39)

8 Neñ redxejga bidojp xhidalro bejn, luxh xheti xhigauureni. Dxejci gurejdx Jesús rexpeljñpacni ni rinajlni, räjpni lojreni:

² —Rulazlazä rebejnre, sa'csi ñaj rajc choñ dxej tre'reni loä, luxh xhet yu'di gauureni. ³ Niluxh palga guxhaläreni rolijzreni, xliajzreni, sidxajgreni lo nejz; sa'csi yu' renani zijtru siädreni.

⁴ Dxejcru räjp rexpeljñpacni lojni:

—¿Caro chaca'nu yätxtiil te cha xque' rebejnre ree, cadre rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztisni.

⁶ Gunibee Jesús gurej rebeñxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejci badeednini loj rexpeljñpacni te gutedrenini loj rebeñxhidaal. Bateedtireni yätxtiilga lo rebeñxhidaalga. ⁷ Rajpzareni gatii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj rebeñxhidaalga. ⁸ Dxejci gudajwreni, gudxaj xque'reni. Dxejci batojñ rexpeljñpac Jesús gajdz dxijñ reyätxtiil näj rebäjł dxuc ni bia'n.

⁹ Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰ Biunägajc Jesús rexpeljñpacni neñ canuu, biädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biäd refarisee, renani najc rebeñguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajz gun. Cagula'tzsireni, don xhi gunni. ¹² Dxejcti bazaa lajz Jesús neñ lastooni, räjpni:

—¿Xhicuent rlajz rebejn ni nabajñ ñaj fii gac resenro xten Dios? Rniliäpac lojtu, di rebejn ni nabajñ ñaj fii nicla tej sen xhaguibaali.

¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduur xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu. ¹⁵ Caguljdx Jesús rexpeljñpacni, räjpni lojreni:

—Colñsusiñ, colñati levaduur xten refarisee, colñatiza levaduur xten Herodes. (Nalajznu, xtiidxreni najc si'c levaduur.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejci räjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: "Sa'csi dinu jia'p yätxtiil"? ¿La gajdtu fii, la gajdtu gacbee? ¿La lałtis nacnajd lastootu?

¹⁸ ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che gula'a guigaii yätxtiil te gudajw gatii mil niguii, ¿bal dxijñ yätxtiil biujy batojptu?

Sas räjpreni lojni:

—Tzubitio'pni.

²⁰ —Che gula'a guigajdz yätxtiil te gudajw tajp mil bejn, ¿bal dxijñ yätxtiil biujy batojptu?

Sas räjpreni:

—Gajdzni.

²¹ Dxejci räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²² Bidzunäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. ²³ Dxejc gunaazni naa lotiä'pga, guläänini neñ guejdx. Che batiobxhejn ni neñ rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuilu, ä?

²⁴ Luxh che bahuii bejnga räjpni:

—Rhuia sasaj rebejn, luxh si'c yajg rhuia lojreni.

²⁵ Basusac Jesús naani yejc rebaloj bejnga. Dxejc bejn Jesús bahuii bejnga. Bijaictini, zijtru gujc bahuisa'cni lo guiraa rebejn. ²⁶ Dxejcti baxha Jesúsni rolizjni, räjpni:

—Basquejn, huijga rolizlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷ Birinäj Jesús rexpejn pacni lo reguejdx ni ria'n nez Cesarea xten Filipo. Lañni sasajreni lo nejz räjp Jesús loj rexpejn pacni:

—¿Chuni'c rnii rebejn nacä narä?

²⁸ Sas räjpreni lojni:

—Yu'reni rnii najclu Juan ni batiobnis, yu'zaren ni najclu Elías, yu'zaren ni najclu te rebejn ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluiini rexpejn pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebeñgool ni najc guxhtis neñ guedx Israel narä, näjza renani rnibee loj rebixhojz, näjza rebejn ni ruluii leii: sugu'treni narä, luxh ni riojn dxej guibañsacä lo rebeñgut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpejn pacni. Dxejc gudilñäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebeñxhidaal con reni najc xpejn pacni, räjpni lojreni:

—Palga yu' chu rlaiz gac xpeñapac, sucuääz gunni ni rsia' laizni gunni, sutedni trabajw si'c tej ni caj lo cruzj, sujiädnañni narä. ³⁵ Sa'csi nani rlaiz guslaa xcälñabajñni, sunijtni xcälñabajñni. Luxh nani runijt xcälñabajñni xcälñasa'c narä, xcälñasa'c xtidxä, siljaapac xcälñabajñni. ³⁶ Xlia' ga'p bejn giraloj lo guedxliujre palga

nitni lo Dios par tejpas. ³⁷ Xhet gacdi gudeed bejn te guibaññäjni Dios. ³⁸ Nani guituinäj narä con rextidxä ñaj, cheni najc rebejn beñdojl, narä, Xi'n Dios nani gujc Niguii, situinäázani che jiädnaä reangl xten Dios che jiälää lo xcälrdimbicha' Xtaä.

9 Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcälñibee Dios.

Gubixhlo Jesús garenca

(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacobo, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. ⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. Ñaj jiennu choñ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhrene. ⁷ Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibañxgaasi Xi'n Dios nani gujc Niguii lo rebeñgut. ¹⁰ Basälcheereni rediidxre neñ lastooreni. Dxejcru canabdiidx lo sa'reni xhicha säloj guibañsacni lo rebeñgut. ¹¹ Sas gunabdiidxreni lojni, räjpreni:

—¿Xhicultent rnii remastr xten leii naquiinpac jiädx-gaa Elías?

¹² Dxejcti bazejcn diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Ñaj a', ¿xhicultent caj lo guijtz xcuent Xi'n Dios ni gujc Niguii, sidejdn trabajwduxh, rutza jjudini?

¹³ Luxh narä rniä lojtu, abiääd Elías, luxh bennäjreni si'ctis ni rlaizreni, si'cpac ni caj loj guijtz ni rusule' xcuentni.

Basiajc Jesús te biuux ni guyu' beñdxab neñ lastooni

(Mt. 17:14-21; Lc. 9:37-43)

¹⁴ Che asiädreni cadre tre' sgaii rexpejn pac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluii leiireni. ¹⁵ Che bahuii guiraa rebejn loj Jesús, bidxeloduxhrene, baxunreni, huiye'tzreni xchan lojni. ¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beñxhidaalga, räjpni:

—Dad, ree siädnaä xi'nä lojlu, yu' beñdxab neñ lastooni, nani rujn najcni gop. ¹⁸ Cheni rniaznini, rutienta'ni xi'nä, luxh riduxh bitzuñ ro'ni, näjza rauya'ni ro'ni, luxh cabijdzni. Aräpä loj rexpejn pac lu cuääreni beñdxabga, niluxh di niajcdi nibääreni.

¹⁹ Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¿Coltanäni loä!

²⁰ Dxejc biädnäreni biuuxga lojni. Che bahuui beñdxab lo Jesús, basnijni bi'nga, basäl'ta'tinini lo yuj. Sädiidxni, luxh carii bitzuñ ro'ni. ²¹ Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. ²² Balti huält rusäl'nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴ Guredxa' xtad bi'nga, räjpni:

—¿Rililazä! Gucnäj narä te chaliiru lazä.

²⁵ Che bahuui Jesús bixa't xhidajl bejn lojni, gudidxa'ni lo beñdxabga räjpni lojni:

—Beñdxab ni rujn gop, narä canibeä, birii neñ lastoo bi'nga. Na'cru chulu neñ lastooni.

²⁶ Dxejcro guredxa' beñdxabga, luxh basnibzejsni bi'nga, dxejcro biriini neñ lastooni. Astoo te beñgut bia'n bi'nga ro'c. Xhidajl rebejn räjp:

—Agujtni.

²⁷ Dxejc gunaaz Jesús naa bi'nga guläsnini. Guzuliiti bi'nga. ²⁸ Dxejcti che abiu' Jesús neñ yu', gunabdiidx rexejñpacni lojni:

—¿Xhicuent di niajcdi nibäanu beñdxabga?

²⁹ Dxejc räjp Jesús lojreni:

—Di gacdi cuäätu sa' beñdxabre palga ditu cuedxguinab lo Dios, palga ditu gucuanxga.

Gunisac Jesús xho guetni

(Mt. 17:22-23; Lc. 9:43-45)

³⁰ Dxejc biriireni ro'c, gudejdreni Galilee. Luxh di rlajz Jesús niacbee rebejn sadejdreni nejzga, ³¹ sa'csi caguluiini rexejñpacni. Cayäjpni lojreni: "Xi'n Dios ni gujc Niguii sidejdni ladzhaa rebejn, niluxh sugu'trenini. Che guiza' choñ dxej gujtni, sibajñni stehuält." ³² Niluxh laareni direni niacbee xhini'c guniini, bidxejbzareni niniabdiidxreni lojni.

¿Chuni'c sajrcu?

(Mt. 18:1-5; Lc. 9:46-48)

³³ Bidzujñtirenini Capernaum. Che biu'ni neñ yu' räjpni lojreni:

—¿Xhini'c cagusiejyту lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c sajrcu lojreni. ³⁵ Sas gurej Jesús, dxejc gurejdxni guitzubitio'p xpejñpacni, räjpni lojreni:

—Palga yu' chu rlajz gasajrcu lojtu, sugacxgaani si'c te nani xhet sajcti, sugunzani xtuun chutis.

³⁶ Dxejcti cua'ni tej biuxbäz, huinänini galäiireni. Dxejc gudäazni biuxbäzga, räjpni lojreni:

³⁷ —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtadä nani baxhañ narä racnäjni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bejn ni rbää beñdxab con xcäl'rnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹ Dxejc räjp Jesús lojni:

—Na'c gudxojtntu gunni si'c sa'csi bejn nani rujn mi-lagwr con xcäl'rnibee laä digacdi guiniyagajcni narä.

⁴⁰ Nani di guidxagdijñ nuunu, xlaadnu yu'ni. ⁴¹ Rniliäpac lojtu, chutis ni guniidx te bas nis lojtu sa'csi najctu xpejñpac Crist, siguijx Diosni xcuent nani bejnni.

Nani rujn jiajb bejn lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä neñ dojl, sugañ te guimolin yejnni dxejcti gucuaarenini lo nis-

doo. ⁴³ Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb

guiro'p naalu gusäl'reni luj gabijl, loj bajl ni di jiuui,

⁴⁴ cadro diza xpisiujgreni guet, diza bajl jiuui. ⁴⁵ Luxh

palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu

luxh chäälü gabijl, lo bajl ni di jiuui, ⁴⁶ cadro di xpisiujgreni guet, diza bajl jiuui. ⁴⁷ Luxh palga tej balojlu gun

gunlu dojl, guläni: hueenru chäälü cadro rnibee Dios natiä'p lojlu quela sojb guiro'p balojlu chäälü gabijl,

⁴⁸ cadro di xpisiujgreni guet, diza bajl jiuui.

⁴⁹ 'Si'cni rloj sejd yejc xhi cos yäl'rajw, si'cza guiloj bajl yejc guiraareni. Guilojza sejd lo guira'ti ni rdeed bejn lo

Dios. ⁵⁰ Hueen najc sejd, luxh palga agudejd yäl'nadzij yejcti, ¿xho guntu te gacsacni nadzij? Colyajc nadzij

la'tu, colguibañnäsa'c sa'tu.

Baluu Jesús xcuent rälruro'n sa'ni

(Mt. 19:1-12; Lc. 16:18)

10 Dxejcro birii Jesús ro'c huijni nez Judea näjza nez ro' gueu Jordán stelaad. Ro'c bidojñ xhidajl bejn

lojni stehuält, sas guslosacni caguluiinireni si'tctis ni ruluiinireni. ² Sas refarisee, renani najc rebenguidoo loj

guedx Israel, gubigreni loj Jesús, cagula'tzreni Jesús.

Ni'c gunabdiidxreni, räjpreni:

—¿La laaca gun niguii gusaan chääl'ni, ä?

³ Dxejc laani bazejcti diidx, räjpni lojreni:

—¿Xhini'c gunibee Moisés guntu?

⁴ Dxejcro räjpreni:

—Moisés basaan gudeedni te guitz gusaan chääl'ni che guro'nnini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej beñ guedxliuj, "niguii con gunnaa benchee Diosreni." ⁷ "Ni'cni te niguii siriini loj xtadni,

loj xnanni te cuäznäjni chääl'ni. ⁸ Niluxh renani gujc tiop bejn sajcreni si'c tejsi bejn", dirurenini gac tiop bejn,

si'c tejsi bejn gacreni. ⁹ Na'c gudzucaj bejn lo sa bejnñi nani abachaag Dios lo sa'ni.

¹⁰ Che biu'reni neŋ yu' gunabdidxsac rexejŋpacni lojni xcuent rediidxre. ¹¹ Dxejc räjpni lojreni:
—Chutis niguii ni gusaan chäälni, sas guchŋaani ste'cani, rujnni dojl. ¹² Niluxh palga gunaa guro'n chäälni sas guchŋaani ste'ca niguii, rujnzani dojl.

Gunab Jesús gunle' Dios yejc rebiuxbáz
(Mt. 19:13-15; Lc. 18:15-17)

¹³ Biädnäza rebejŋ biuxbáz lojni te gutzuub Jesús ŋaani yejcreni, sas gudidxa' rexejŋpacni lojreni. ¹⁴ Che bahuii Jesús xhi cayujŋ rexejŋpacni, bidxe'chni räjpni lojreni:

—Cojsaan jääd rebiuxbáz loä. Na'c gudxojtoreni, sa'csi xcälŋnibee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rlajz jiu' lo xcälŋnibee Dios nanab guzobdiajgŋreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälŋnibee Dios.

¹⁶ Dxejcti gudääz Jesús rebiuxbáz, bazujzani ŋaani yejcreni, gunab Jesús gunle' Dios yejcreni.

Te bi'n ni rapduxh guninäj Jesús
(Mt. 19:16-30; Lc. 18:18-30)

¹⁷ Che birii Jesús loj xnejzni, ruxuŋ te niguii biäd lojni, bazuxhijbni. Dxejcti gunabdiidx niguiiga lojni räjpni:

—Dad, beŋsa'c, xhini'c gunä te xca'ä yälŋabajŋ par tejpas?

¹⁸ Sas räjp Jesús lojni:

—xhicient rniilu loä beŋsa'c? Tejtisni najc beŋsa'c; Diostis najc beŋsa'c. ¹⁹ Najnlu xhini'c gunibee Dios gunni: “Na'c guesnäjl chäälni sa'lu, na'c ju'tlu, na'c cuanlu, na'c gusgueelu chutis, na'c cuälu yejc xhixten sa'lu, huinäälajz xtadlu, xnanlu.”

²⁰ Dxejc räjp niguiiga lojni:

—Dad, guiraa redee cayunä cheni gucäli bi'n.

²¹ Che bahuii Jesús lojni, huinäälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejŋ nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rexejŋpacni:

—Naganduxh jiu' rebejŋ nani yu'duxh xhixtenni lo xcälŋnibee Dios.

²⁴ Dxejc bidxelo rexejŋpacni che biejn diajgŋreni rextiidxni. Dxejc räjp Jesús lojreni stehuält:

—Aaitu xi'nä!, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejŋ ni yuduxh xhixtenni guinibee Diosni.

²⁶ Dxejc bidxeloduxhŋreni, räjpni lojni:

—xChuxhni'c sajz laa lo dojl?

²⁷ Dxejc bahuii Jesús lojreni, räjpni:

—Bejŋ digacdi guslaa sabejŋni, Diostis rajc ruslaa bejŋ lo dojl, sa'csi Dios rac rujŋ guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajlŋ luj.

²⁹ Dxejc räjp Jesús:

—Rniliäpac lojtu, chutis nani cuälaz rolizni, rebejzŋni, rebisiajŋni, xtadni, xnanni, chäälni, rexi'nni, rexyujŋni, xcälŋnasa'c narä, näjza xcälŋnasa'c xtidx Dios, ³⁰ sica'ni lo guedxliujre te gayuu huält xhidajlru. Sica'ni rolizni, rebejzŋni, rebisiajŋni, xnanni, rexi'nni, rexyujŋni. Sisiunajlrenini ŋaj, dxejc xhaguibaa sica'ni yälŋabajŋ par tejpas. ³¹ Xhidajl rebejŋ nani sajz lo guedxliujre xhet sajcdireni xhaguibaa; niluxh rebejŋ nani xhet sajcdi lo guedxliujre, xhaguibaaru gasajcreni.

Gunisac Jesús diidx xho guetni
(Mt. 20:17-19; Lc. 18:31-34)

³² Dxejcru sasaj Jesús, nijdŋni lo rexejŋpacni sääreni Jerusalén, luxh cadxelojreni. Cadxejbza rebejŋ nani sanajlreni. Dxejcti guäläsac Jesús rexejŋpacni lo rebejŋ, gusloj cayäjpni lojreni guira'ti nani sacni. ³³ Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladzŋaa rebixhojz nani rnibee näjza rebejŋ ni ruluu leii. Luxh sinibeereni guetä. Sutedreni narä lo rebejzŋ nani digac xpejŋ Israel. ³⁴ Suxhisnäjreni narä, siguijnreni narä, sutiobxhejnzareni loä, dxejcru sugu'treni narä. Che riojŋ dxej sibaŋsacä.

Gunab Jacob näjza Juan te yälŋnasa'c
(Mt. 20:20-28)

³⁵ Dxejcti gubig Jacob näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—xhini'c rlajztu gunä xcuent la'tu?

³⁷ Räjpreni:

—Cue tejnu cuä'lu ladbee, xteenu cue cuä'lu ladbägw che acanibeelu.

³⁸ Dxejc räjp Jesús lojreni:

—Ditu gan xhini'c rniabtu. xhixh sajz yätu nani yä'ä? xhixh sajzca guirobnistu si'cni guirobnisä? Nalajznu, xhixh sajz tedtu trabajw nani tedä narä.

³⁹ Sas räjpreni lojni:

—Sajz tednuni.

Dxejc räjp Jesús lojreni:

—Gulliini sajz yätu nani yä'ä, luxh guirobnistu si'cni guirobnisä narä. ⁴⁰ Te cue tejtu ladbee xtenä steetu cue xladbägwä, xhet xtenä dini te gunidxäni. Rebejŋ nani agule Dios, reni'c cue xladbeä, xladbägwä.

⁴¹ Luxh che biejn diajg stzuurenini bidxe'chreni loj Jacob näjza loj Juan. ⁴² Sas gurejdx Jesúsreni, räjpni lojreni:

—La'tu najntu renani rnibee lo rebejŋ nani digac xpejŋ Israel, rdxaglajz gasajcurenini lo rebejŋ. Luxh rebejŋ ni sajz rnibeduxhŋreni lo rebejŋ. ⁴³ Xhet si'cni guntu la'tu. Chutis nani rlajz gasajcru lojtu, riäjŋ gacni mos lojtu. ⁴⁴ Luxh chutis la'tu nani rlajz gasajcru, riäjŋ gacni xmos guiraatu. ⁴⁵ Di Xi'n Dios ni gujc Niguii niäd, te

ga'ptisni mos, biäädzani te quiixni con xcäl'nabajñni te laa xhidajl bejn lo dojl.

Basiajc Jesús Bartimeo, ni natiä'p lojni
(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejn'pacni näjza reben'xhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx nigui-iga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas ro'ca xhablajzni gudixhni, huisuliini, biäädtni lo Jesús. ⁵¹ Dxejc räjp Jesús lojni:

—Naja', ¿xhini'c rlaizlu gunä?

Dxejc räjp lotiä'pga loj Jesús:

—Dad, rlažä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejj.

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

11 Cheni sadzujñreni gajxh Jerusalén, gudejdreni neñ reguedx Betfagé näjza neñ guedx Betania nez cuä' dajne' ni laa dan Oliib. Baxhal Jesús tiop xpejn'pacni, ² räjpni lojreni:

—Col'chäj guedx' ni ria'n nez lojtu. Che guidzujntu ro' guejdxga, sidxäلتu te bu're' ni caduu. Gajd bejn cuibni. Col'xhecní, col'tanägajcni. ³ Palga yu' chu naa lojtu: "¿Xhicuent rujntu si'c?" Col'ye'tztis: "Dad caquiinni." Dxejc suxhal'gajcni bu're'ga ree.

⁴ Sää'tireni ro'c. Dxejcru ronejz bidxälreni te bu're' caduu ro' te lä'. Dxejcti baxhecrenini. ⁵ Gaii bejn ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejn'ga si'cni räjp Jesús lojreni gäbreni. Basangajc rebejn'ga sanäreni bu're'ga. ⁷ Dxejcru biäd'näreni bu're'ga loj Jesús. Badzuubreni xhablajzreni dejtz bu're'ga. Gubijbti Jesús bu're'ga. ⁸ Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:

—¡Col'guiliä'p xpala'nni! Col'deed xquixhtiooz loj Dios sa'csi baxhal'ni nani siääd xcuentni. ¹⁰ Col'deed xquixhtiooz loj Dios sa'csi agubiré xcäl'rnibee toxtadnu David. ¡Col'guiliä'p xpala'n Dios ni yu' jiaro!

¹¹ Dxejcti biu' Jesús neñ guedx Jerusalén. Biu'zani neñ guidoro. Che bahuii Jesús guira'ti ni cayajc neñga, sanäni guitzubitio'p xpejn'pacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni
(Mt. 21:18-19)

¹² Che bara yääl, biunejzreni Betania. Dxejcti gusloj calaan Jesús, ¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejn'pacni.

Gulää Jesús renani ruto' näj renani rsii neñ guidoo
(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujñreni guedx Jerusalén. Biu' Jesús neñ guidoro. Gusloj cabääni renani ruto' näj renani rsii neñ guidooga. Niluxh batiejxhni rexmex renani ruchaa meel, näjza reyagxhil xten renani ruto' paloom.

¹⁶ Diruni nusaan nidednäjreni xhicos nez neñ guidooga. ¹⁷ Dxejc caguluiinireni, räpgajcni lojreni:

—¿La et screedi caj loj guijtz? "Xyu'ä sirilaj yu' cadro rninab guiraa reben'guedxliuj lo Dios." La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxeloj rex-tidx Jesús. ¹⁹ Che biu' guxhijn, birii Jesús guejdxga.

Gubijdz yagiigw ni bidzubde
(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcní, agubijdzni.

²² Dxejcti gunii Jesús räjpni lojni:

—Col'chalilajz Dios. ²³ Rniliä'pac lojtu, chutis nani gäb loj dajnre: "Gubicaj, bitejb loj nisdoo", luxh dini gun-tio'p lajzni, chalilajztisni scree gac nani guniini, sajcpac nani guniini. ²⁴ Ni'cni rniä lojtu, xhitis nani guiniabtu lo Dios che rninäj'tuni, col'chalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajz-tu, col'siäjlza lajztu, te näjza Xtadtu nani yu' xhaguibaa gusiäjlza rextojltu. ²⁶ Palga ditu gusiäjl lajztu con re-sa'tu, diza Xtadtu nani yu' xhaguibaa gusiäjl lajzni rextojltu.

Yäl'rnibee xten Jesús
(Mt. 21:23-27; Lc. 20:1-8)

²⁷ Sas bidzujñsacreni guedx Jerusalén. La' ni sasaj Jesús neñ guidoro, rebixhojz nani rnibee, näjza rebejn ni ruluii leii, näjza reguxhtis gubig lojni. ²⁸ Räjpreni lojni:

—¿Xhi yäl'rnibee rajplu, ni'c rujnlu redzuunre? ¿Chu baniidx yäl'rnibee rujnlu redzuunre?

²⁹ Dxejc räjp Jesús lojreni:

—Guiniabdidxäza lojtu. Col'tzu'ni loä, dxejcti guiniäza xhi yäl'rnibeere rapä ni'c runä redzuunre. ³⁰ ¿Chu bax-

hal Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, räjpreni:

—Palga jie'tznu "Dios", naani "¿xhicuent ditu nililajz xtiidxni?" ³² Diza niacti niäjbreni "rebejn" sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

Te xcuent rebenguijdx ni rbäzlaa

(Mt. 21:33-46; Lc. 20:9-19)

12 Dxejcti gusloj caguseed Jesús rebejn con recuent ni ruluii, räjpni:

—Yu' te bejn bazuj yaguub loj xyujni, bejnzani bazani, dxejcru gudäänni te lajt cadro jä't uubga. Dxejcti bejn te yu' jiaa, te ro'c cue nani ga'p lo xyujni.

¹ Badedlaatinini loj gaii bejn, sä'tini zijt. ² Che bidzuj xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäj xca' bejnga.

³ Dxejc rebejn ni rbäzlaa ro'c gunaazreni mosga, gudi-jnrenini, luxh bazejcrenini siini ganaxni. ⁴ Dxejcru baxhal baxhuaanga stee mos lojreni. Niluxh laareni bacuaareni guijni, gudiiguijdxreni yejc mosga, xho rni-ajni gubi'ni. ⁵ Dxejc baxhal bejnga stee mos, dxejc bagu'trenini. Baxhalni xhidajlrurenini. Gaii gudiiguijdxreni, sgaiini bagu'treni.

⁶ Yu'za tejtis xi'nni, luxh sanälajznini. Por lult näjza xi'nni baxhalni, naani: "Siucareni xi'nä." ⁷ Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre." ⁸ Sas gunaazrenini, bagu'trenini. Guläätirenini lo yujga.

⁹ ¿Xhicha gun baxhuaan yaguubga rebejnre? Siäädni luxh sugu'tni rebejnre, dxejcti gudeedni yujga loj ste'ca bejn.

¹⁰ ¿La gajdtu goj guijtz ni nii scree?

Guij nani guläcaj renani runchee yu', ni'c agujc mastr ni guzuj galoo.

¹¹ Dad xtenu bejn scree, cos sacduxhni nezlojnu.

¹² Dxejc rlaiz reguxhtis nani bacuadiajg cuentre nini-aaz Jesús, sa'csi gucbeereni laareni cacuaa Jesús didxre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³ Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. ¹⁴ Dxejcti biäädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj ruluiipaclu xhini'c rlaiz Dios gun bejn. ¿La laaca quix bejn reimpuest lo xcubieer César o la xhet laadi? ¿La guidixnu o la dinu guidix?

¹⁵ Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtu narä scree? Coltanä te meelga loä, te fiä lojni.

¹⁶ Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

¹⁷ Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejnca con xtiidxni.

Yälrnabiidx xcuent yälrbansacni lo rebengut

(Mt. 22:23-33; Lc. 20:27-40)

¹⁸ Sas biädhuii resaducee loj Jesús. Resaducee najc rebejn nani rnii di rebengut guibansac. Dxejc gunabdiidxreni lojni, räjpreni:

¹⁹ —Dad, xleii Moisés ruluii loonu, palga guet te nigu-ii luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni. ²⁰ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. ²¹ Dxejcti cua' ni rojppga gunaaga. Che gujtni, rut gajc di xi'nni. Si'cza gusajc ni riojnga. ²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtz gunaaga. ²³ Guigajdzreni guläznäjreni gunaare. Cheni guibansacreni lo rebengut, ¿chu chäälni gacni?

²⁴ Dxejc bazejc Jesús diidx lojreni, räjpni:

—Et laadi nniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yälrnibee xten Dios. ²⁵ Che guibansacreni loj rebengut, direni guchnaa, rutza gudeedtireni te guchnaareni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbansac rebengut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen bajl, räjpni: "Narä nacä Xtios Abraham, Xtios Isaac, Xtios Jacobo." ²⁷ Palga Dios najc Xtios rebejnre, direni gac bengut, nabañnjreni Dios. Et laadi najc xhigabtu.

Yälrnibee ni sajrcu

(Mt. 22:34-40)

²⁸ Dxejcru bidzuj tej rebejn ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajrcu lo guiraareni?

²⁹ Dxejc räjp Jesús lojni:

—Mandamient nani sajrcu loj guiraareni najc dee: "Bacuadiajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, näj xaimlu, näj guideb xcäriejnlu, näjza guideb xcäl-nadiplajzlu." ³¹ Sigajcza najc mandamient ni rojppga: "Huinälajz sabejnlu si'ctis sanälajzlu lagajc luj." Redee najc remandamient nani sajrcu loj guiraareni.

³² Dxejcti räjp bejnga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcäl-nadiplajzni, luxh chanälajzni resabejnni

sigajc laani. Redee sajcro loj ni rujn bejn che rudee-dreni gojn lo Dios.

³⁴ Che bahuii Jesús laaca guniini, räjpni lojni: —Guxii cayäädx te jiu'lu loj xcälrnibee Dios. Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús neñ guidoro, räjpni: —¿Xho mood rnii rebejn ni najn leii Crist najc xi'n David? ³⁶ Sprit Dxañ xten Dios basnii David che bacuaani:

Räjp Dios loj Dad xtenä: “Gurej ladbee xtenä, che gudzugäli reni rdxe'ch lojlu.” ³⁷ Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David? Rebeñxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lañi caguseedni rebejn, räjpni lojreni: —Cołsusin, na'c gu'chtu loj rebejn ni ruluii leii. Laareni rlañ sanäj reladsiool xtenreni. Rdxaglajzreni rnii bejn lojreni nez lo reguii. ³⁹ Rlajzarenii cuereni cadro rbej renani sajcro neñ reguidoo näjza cadro ru' relanij. ⁴⁰ Rudzucajzarenii xhixten rebiuud, rniizarenii xhidalduxh diidx che rołreni le', te rusäuureni loj rebejn. Castigwroru gac redee.

Gojn xten te biud proob

(Lc. 21:1-4)

⁴¹ Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel neñ cajga. Xhidajl reni rajp cagusäl xhidajl meel nenga. ⁴² Che biääd te biud proob, basälñi tiop melbäz ni sajc si'cti tej centaab. ⁴³ Dxejcro gurejdx Jesús rexpejñpacni, räjpni lojreni: —Rniliäpac lojtu, biud proobre basäl xhidajlru lo guiraa renani basäl neñ cajre, ⁴⁴ sa'csi guiraareni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

Gunii Jesús sibijl guidoo

(Mt. 24:1-2; Lc. 21:5-6)

13 Cheni sariireni neñ guidoro, räjp tej rexpejñpacni lojni: —Dad, bahuii lacti reguij, lacti reyu'. ² Dxejcti räjp Jesús lojni: —¿La rhuiilu loj reyu're? Nicla tej guij dijia'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Oliib, cahuiini nez ro' guidooga. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

⁴ —Gunii loonu, ¿guc gac dee? ¿Xhi guihuiinu te gacbeenu asiäddzungajxh soob guiraa rediidxre?

⁵ Dxejcti gusloj gunii Jesús lojreni, räjpni: —Cołhuii, te rut gusgueedi la'tu, ⁶ sa'csi xhidalduxh bejn jääd con laä, gäbreni: “Narä nacä Crist”, luxh rniisireni si'c, susgueezareni xhidajl bejn.

⁷ Che jieñ diajgtu yu' guer näj yälñadxeeb xten guer, na'c guidxejbtu. Nanabpac gacni; et dxejcti nitloj guedxliuj. ⁸ Säjs nación yejc sanacionni, näj yälrnibee yejc sayälrnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

⁹ Dxejc la'tu cołsusin sa'csi suteedreni la'tu ladzñaa reguxhtis, siguijnzareni la'tu neñ reguidoo. Sacrejdxtu lo regubieer näjza loj reñeii xcälñasa'c narä, te si'c gac guiniitu xtidx lojreni. ¹⁰ Nanabpac guirechxgaa xtidx Dios loj guiraa rebeñ guedxliuj. ¹¹ Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Cołñii nani jäjtis yejctu dxejc, sa'csi xhet la'ditu ni guini, Sprit Dxañ xten Dios ni guinii. ¹² Luxh suto' bejn lagajc bejzni te guet bejzni. Suto'za dad lagajc xi'nni. Säjs rebiuux yejc rexcusajñni te guet reguzajnga. ¹³ Sidxechlajz guiraa rebejn lojtu sa'csi najctu xpeñä; nani ted guiraa retrabajwre, ni'c gueed Dios xcälñabajñni.

¹⁴ Che fiitu loj nani najc yälrdxechlajz, nani najc yälrunitloj, nani gunii Daniel ni gunii xtidx Dios. Che fiitu nani suga' cadro di nunyälñ suuni, dxejcti suguxuñ renani yu' nez Judea chääreni nez neñ redajn. (Nani goł guijtze sugacbeenini.) ¹⁵ Bejn nani suga' yejc yu' na'c jäjtñi jiu'ni neñ te yu' xca'ni gaii xhixtenni. ¹⁶ Nani yu' loj niaa, di gal jäjt te xca'ni xhablajzni. ¹⁷ ¡Aii! Xhiza nalas chu regunaa ni nuu báz, luxh renani rusiä' xi'nni, neñ redxejga. ¹⁸ Cołñab loj Dios na'c sactu scree neñ rebäinajl. ¹⁹ Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejñni nani aguleni.

²¹ Dxejc palga yu' chu naa lojtu: “Cołhuii, aree Crist”, o “Cołhuiire, ani suga' rec”, na'c chalilajztuni. ²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueerene, te palga sajcnii, rlañzrenii gusgueelireni renani agule Dios. ²³ Ni'cni la'tu cołsusin; agunixgää lojtu guira'ti ni gac.

Xho gac che jääd Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴ Neñ redxejga, cheni luux retrabajwduxhga, sicäjy lo gubijdx, luxh diru bäii gusanij. ²⁵ Sitejb rebałxhaguibaa, sinibsejs recos nani nasnäñ rebałxhaguibaa. ²⁶ Dxejcti suhuii rebejn loä, Xi'n Dios nani gujc Niguii, siälä neñ reza guideb yälñribeduxh xtenä, näjza xcälñimbicha'ä. ²⁷ Dxejcti guxhalgacä rexanglä jäädtojpreni renani guleä guideb lo guedxliuj, cat nalooli guedxliuj näjza cadro nalooli guibaa.

²⁸ Colguiseed nani rului yagiigw. Cheni rii rebäte' lojni luxh che rcaj balajg lojni, acaxhnajntu bäii gusguij asadzungajxh. ²⁹ Sigajcza, che fiitu acayajc recosre, sacbeetu asiädgaxhä, ameer guidzunä. ³⁰ Rniliäpac lojtu, rebejn ni nabajn dxejc, direni nitloj, fixgaareni gac recosga. ³¹ Sinitloj guibaa näjza guedxliuj, rextidä di nitloj.

³² Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

³³ Colhüii, colsusin, colnab loj Dios, sa'csi ditu gan guc guidzujn redxejga. ³⁴ Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. ³⁵ Si'cza colsusin, sa'csi ditu gan guc jääd baxhuaan yu'ga, la jäädni gudxej, o la jäädni garol yääl, o la cäy, o la jäädni rsil. ³⁶ Colsusin, te di guiga'tu nagayejstu che guidzujni. ³⁷ Rediidx nani rniä lojtu, loj guiraa rebejn rniäni: colsusin.

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

14 Riäädx tiop dxej guidzujn lanij, dxej ni ruzaa lajzreni gułaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexejn Israel näj rebejn ni ruluii leii rlajzreni niniaazreni Jesús con yälrusguee, te nugu'trenini. ² Dxejcti räjpreni lo sa'reni: —Na'c jiennu scree neñ redxelanij, te na'c gun beñguejdx biey.

Te gunaa ni basäl se't yejc Jesús Betania

(Mt. 26:6-13; Jn. 12:1-8)

³ Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard neñni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—Xhicient banijtni setnejxhga? ⁵ Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, xhicient rudxojtntu nani cayujn gunaare? Cos sacduxh dee bennäjni narä. ⁷ Guideb ni guibajntu, su' rebejn nani xhet rajpdi lojtu, luxh che rlajztu sajg gacnäjtreni. Narä et xchejdi chu'ä lojtu. ⁸ Gunaare abejnni nani gujctis bejn. Abaslanexhgaani tiexhä, te chää tiexhä neñ baa. ⁹ Rniliäpac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

Rlajz Judas guto' Jesús

(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejnac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibal-

ajzreni. Räjpreni sudeedreni meel lojni. Dxejcti caguuil Judas xho guto'ni Jesús.

Gudauxchej Dad con rexejnacni

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gułaareni ladznaa reEgipto. Räjp rexejnacni loj Jesús:

—¿Caro rlajzlu chosucheenu te gauulu nadxej, dxe-lanij?

¹³ Dxejc baxhalni tiop rexejnacni, räjpni lojreni: —Colchäj neñ guejdx, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolijzni ro'c: “Naj Dad mastr, zcon yu' cadro ria'n rebiooz, cadro gaunäjni rexejnacni nadxej, dxelanij?” ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexgaa neñni. Colyujn xhi guidaunu ro'c.

¹⁶ Sas huij rexejnacni, bidzujnreni neñ guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelanij.

¹⁷ Che huääz gubijdx, bidzunäj Jesús guitzubitio'p xpejnacni. ¹⁸ Lałni sobga'reni lo mex cayajwreni, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpni lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Lałni cayajwreni, cua' Jesús yätxtiil, badeedzani xquixhtiooz loj Dios dxejc guła'nini, badeednini lojreni. Dxejcti räjpni:

—Colca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neñ basga.

²⁴ Dxejcti räjp Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn. ²⁵ Rniliäpac lojtu, diruna yä'ä bin nani rii yejc uub, dxejli yä'äni stehuält loj xcälrnibee Dios.

Gunii Jesús sinii Pedr dini gumbeeni

(Mt. 26:30-35; Lc. 22:31-34; Jn. 13:36-38)

²⁶ Che gulujx bilreni te dij xten Dios, biriireni, sääreni nez dajne' ni laa dan Oliib. ²⁷ Dxejcru räjp Jesús lojreni:

—Guiraatu sibälaztu narä naguxhijñ, sa'csi si'c cajni lo guijtz: “Sugu'tä baxhtoor luxh suxuñ rexiiil.” ²⁸ Che guibañsacä loj rebengut, ganidä cha'a Galilee, dxejcti jäädntu.

²⁹ Dxejc räjp Pedr loj Jesús:

—Palga guiraareni cuälazlu, narä dina cuälazläu.

³⁰ Dxejc räjp Jesús lojni:

—Rniliápac lojlu, lagajc guxhijñre, nicla gajd guidgaii cuedxa' tiop huält, luj aguiniilu choñ huält dilu gum-bee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu. Luxh guiraa rexejñpacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

³² Dxejcti bidzujñreni te lajt cadro laa Getsemaní. Dxejc räjpni loj rexejñpacni:

—Colcuj ree lañi chanabä lo Dios.

³³ Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh.

³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. ³⁶ Räjpni:

—Abba, xtadä, luj rajc rujñlu guira'ti: badzucaj retra-bajwre loä. Xhet si'cni rlazädi narä, bejn si'cni rlazlu luj.

³⁷ Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? ³⁸ Coltie'ch bacal, colñab lo Dios, te na'c guntu dojl. Lastootu rlaz gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo. ⁴⁰ Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojñ huält biäädni, dxejc räjpni lojreni:

—Agojl colguejs, colsilajz, agujc, abidzujñ or ni ted Xi'n Dios ni gujc Niguui ladzñaa rebeñdojl. ⁴² Colchastie, colcho'. Asiäddzujñgajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujñ Judas, ni najc te retzubitio'p xpejñpacni, siädñäni xhidajl bejñ. Ca'reni spaad, ca'reni yajg biriireni lo rebixhojz nani rnibee, näjza rebejñ ni ruluii leii, näjza rebengool nani najc guxhtis.

⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xspaadni, gudilgujdxni xmos bixhojz nani sajrcru, batiu'ni diajgni. ⁴⁸ Dxejc räjp Jesús loj rebejñ:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu neñ guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexejñpacni gulälazrenini, baxujñtirenini.

Bi'n nani baxujñ

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini. ⁵² Dxejcti baxujñni, libasa'nni bariaadga, sä'tini xhabäälñi.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädñäreni Jesús loj bixhojz ni sajrcru. Bidojñ rebixhojz nani rnibee, näj rebengool ni najc guxhtis, näjza rebejñ ni ruluii leii. ⁵⁴ Luxh Pedr zijt zijt sanajlñi Jesús. Che bidzujñtini lo xle' bixhojz ni sajrcru, gurenäjni rebejñ nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebengool ni najc guxhtis, caguilreni xhi tej xquej Jesús nidxälreni, te nugu'treni Jesús, xhet bidxälñireni. ⁵⁶ Xhidajl bejñ gunii didxxhii, räjpreni et laadi rujñ Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gajl bejñ ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con ñaa rebejñ, luxh choñtis dxej guncheä steeni, ni nac-chee et con ñaadi rebejñ.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajrcru galäi guiraa rebejñ, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niäuutis ro'ni, xhet guniidini. Dxejcti gunabdidxsac bixhojz ni sajrcru lojni, räjpni:

—¿La luj ni najc Crist, xi'n Dios nani rliä'p bejñ xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguui, sobga'ä xladbee Dios ni rnibee, siäläza neñ reza ni tre' xhaguibaa.

⁶³ Dxejcru bixhojz ni sajrcru, batiäjsni tla' xhajbni, räjpni:

—¿Xhi jienrunu guidiilnu diidx xcuentni? ⁶⁴ Abiejñ di-ajgtu xho guniyajni Dios. Naja', ¿xhi najtu?

Dxejcti guiraa'reni räjp nungäjñpac guetni.

⁶⁵ Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biääd te xcriaad bixhojz ni sajrcru. ⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Näjluj nadxaaglu Jesús ni siääd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgäi. ⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehüält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beṅ Galileelu, luxh guyasi rieṅ rniilu si'c rni rebeṅ Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbleä niguii nani caniiitu.

⁷² Dxejcti barojp huält guredxa' guidgäi. Dxejc banalajz Pedr nani räjp Jesús lojni: “Che gajdli guidgäi cuedxa' tiop huält, luj gacla choṅ huält aräjplu dilu gumblee narä.”

Dxejc guslojni cayoوني.

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

15 Che bara yääl bidxaag sa' rebixhojz ni rnibee, näj rebengool ni najc guxhtis, näjza rebeṅ ni ruluu leii, näjza guiraliu reguxhtis. Dxejcti gusloj cachaa-greni diidx xho gunreni. Baliibreni Jesús, sanätirenini, niluxh badeedrenini loj Pila't. ² Dxejc gunabdiidx Pila't loj Jesús räjpni:

—¿La luj ni najc reii xten rexpejṅ Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús. ⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'ceni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelaniipac ruslaa Pila't tej rebeṅ ni yu' latzguiib. Ruslaani chutis te ni rniab rebeṅ. ⁷ Lo rebeṅ ni yu' latzguiib nadxaag te niguii ni laa Barrabás. Bagu'tni te beṅ che nu'chni lo te cuaa beṅ ni gudiṅnäṅ gubieer. ⁸ Dxejc bidojp xhidajl beṅ loj Pila't, gunabreni lojni gunni si'ctis rujnni casob lanij. ⁹ Dxejc gunabdiidx Pila't lojreni, räjpni:

—¿La rlanjtu guslaá reii xten rexpejṅ Israel, ä?

¹⁰ Sa'csi gucbegajcni rdexchlajz rebixhojz loj Jesús, ni'c bateedrenini lojni. ¹¹ Ni'cni baquiilza rebixhojz ni rnibee rebeṅxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehüält:

—¿Xhini'c rlanjtu gunnää nani rniitu reii xten rexpejṅ Israel?

¹³ Dxejcru guredxa'reni:

—¡Bacuaani lo cruzj!

¹⁴ Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruzj!

¹⁵ Baslaati Pila't Barrabás, sa'csi rlanjzni nuspaani lajz rebeṅxhidaal. Che gulujx gunibee Pila't, bia Jesús. Ba-teedti Pila't Jesús loj rexsoldaadni, te xcajni loj cruzj.

¹⁶ Dxejc huinä rexsoldaadni Jesús neṅ Pretoor, yu' cadro rujnreni yälguxhtis, ro'c batojpreni guiraa re-sa'reni. ¹⁷ Dxejcti bashuajcwreni Jesús te lad moraad, bencheereni te coron guejch basälreni yejcnii. ¹⁸ Guslo-gajc caguxhi näjrenini, caniiireni lojni:

—¡Colguiliä'p xpala'n reii xten rexpejṅ Israel!

¹⁹ Batiäjlrreni te yabixhijl yejcnii, batiobxhejnreni lojni, luxh guzuxhijbreni te rajnrenini. ²⁰ Che gulujx basac-síreni Jesús, gulääreni lad moraad ni najcwni, sas bashuajcwrenini xhajbpacni. Gulägajceni Jesús te cuaarenini lo cruzj.

Bacuaareni Jesús loj cruzj

(Mt. 27:32-44; Lc. 23:26-43; Jn. 19:17-27)

²¹ Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcruzj Jesús.

²² Dxejcti huinäreni Jesús cadro laa Gólgota, nani säloj: dan Calabeer. ²³ Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴ Che gulujxti bacuaareni Jesús loj cruzj, gudzujtreni yejc rex-hajbni, te don xhini'c xca' tejjareni.

²⁵ Agujc choṅ or gulejṅ gubijdx che bacuaareni Jesús lo cruzj. ²⁶ Letreer cadro bacuaareni xtojlni scree bejnrenini: “Reii xten rexpejṅ Israel.” ²⁷ Bacuaazareni lo stiop cruzj tiop gubaan, tejni xladbee Jesús, xtee xlad-bäjgwni. ²⁸ Dxejc guzobj diidx ni caj loj guiijt nani rni: “Loj rebenguijdx bigabni.”

²⁹ Luxh renani sadejd nejzga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh choṅtis dxej ni-unchesacluni. ³⁰ Naj baslaa lagajc luj, biäjt loj cruzjga.

³¹ Näjza rebixhojz ni rnibee, näj rebeṅ ni ruluu leii, baxhiznärenini, räjp loj sa'reni:

—Ste'ca beṅ ruslaani, xhoxh digacdi guslaani lagajc laani. ³² Naj sujiäjt Cristre, reii xten rexpejṅ Israel, lo cruzj te guihuiinu, te chalilaaznu.

Näj regubaan ni caj lo cruzj guniyajzareni Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

³³ Che gojl läidxej, bicäy si'cti choṅ or. ³⁴ Che gudejd choṅ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii beṅ ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxun tejni, bahuajdxni te sponj loj binagr. Dxejcru basälreni yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruzj.

³⁷ Dxej cru guredxaduxh Jesús, gujttini. ³⁸ Dxej lajd ni najl neŋ guido ro biräjsni, guj cni tiop la', jiaali lo yujli. ³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee birinajl regunaare Jesús, luxh bahuiireneni. Yu'za xhida-jlru regunaa ni biäd najl Jesús che biädni Jerusalén.

Biga'tz Jesús

(Mt. 27:57-61; Lc. 23:50-56; Jn. 19:38-42)

⁴² Biu' gudxhijŋ, luxh najcni dxe bispr che rusucheereni par sabd, dxej ni rusilajz rexpejŋ Israel. ⁴³ Biäd José ni siäd Arimatea, najcni te rebejŋ ni saj c loj reguxhtis. Näjza laani cabäjzni xcälrnibee Dios. Guideb yäl nabajŋ gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitán lojni agujt Jesús, dxej c badeed Pila't tiexh Jesús loj José. ⁴⁶ Agusii José te bariaad, luxh che gulätŋ Jesús lo crujz, batejbnini neŋ bariaadga. Dxej gudixhni Jesús neŋ te biliää ni caj cuä' te guilaj, dxej cru batzugni te guiro ro' biliääga. ⁴⁷ Bahuii Marii Magdalen näj Marii xnan José cadro biga'tz Jesús.

Huäjz Jesús loj rebengut

(Mt. 28:1-10; Lc. 24:1-12; Jn. 20:1-10)

16 Che gudejd sabd, dxej ni rusilajz rexpejŋ Israel, Marii Magdalen näj Marii xnan Jacoob näjza Salomee gusii setnejxh te chatäábreni se'tga tiexh Jesús. ² Che biu' xmaan, rsildooru, che calejŋ gubijdx, biädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaj guijga, luxh najcni te guiroduxh. ⁵ Che biu'reni neŋ biliääga, bahuiireni lo te bi'n sobga' ladbee neŋ biliääga. Najcw bi'nga te ladnol ni najc siool. Dxej bidxejb regunaaga. ⁶ Dxejcti räjp bi'nga lojreni:

—Na'c guidxejbtu. Caguilltu Jesús ni siäd Nazare't, nani cuaj lo crujz. Rutiruni ree. Agubajŋni lo rebengut, coltahuii cadro gudixhni tiejxhni. ⁷ Colchäj, colchaye'tz lo rexpejŋpacni, loj Pedr, ganidla Jesús

guidzujŋ Galilee, dxejcti guidzujŋtu. Ro'c fiitu lojni, si'cni guniini lojtu.

⁸ Biriitireni ro' biliääga, racsejslireni sa'csi cadxeljreni. Rut lojdi guniidireni sa'csi cadebduxhni.

Baluiloj Jesús loj Marii Magdalen

(Jn. 20:11-18)

⁹ Gubajŋ Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz bendxab neŋ lastooni. ¹⁰ Dxejcti huij Marii Magdalen, huiye'tzni loj renani cuansanäj Jesús, renani cay-ac-huin lajzŋ, cayooren. ¹¹ Che biejn diajgŋreni ahuäzsac Jesús lo rebengut, luxh Marii abahuii lojni, di lajzreni nilii.

Baluiloj Jesús loj tiop xpejŋpacni

(Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

Baxhal Jesús repost

(Mt. 28:16-20; Lc. 24:36-49; Jn. 20:19-23)

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubaŋgajcni loj rebengut. ¹⁵ Räjp Jesús lojreni:

—Colchäj guideb lo guedxliuj, colnii xtidx Dios lo guiraa rebejŋ. ¹⁶ Nani chalilajz luxh tiobnisni, siljaani loj dojl; biäda nani di lajzni chalii siniŋtni lo dojl. ¹⁷ Niluxh remilagwre jiannäj renani chalilajz: sibääreni bendxab xcuentä; siniireni ste'ca diidx; ¹⁸ guiniaazreni bäl con ŋaaren; masque yäreni xhicos ni rugu't bejŋ, xhet gacdireni; susujreni ŋaaren; yejc rebenracxhuu luxh siajc rebenracxhuu.

Huä'p Jesús xhaguibaa

(Lc. 24:50-53)

¹⁹ Gulujxti gunii Dad Jesús si'c lojreni. Dxej huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laaren; bire'chreni, guniireni xtidx Dios guiranejz. Lagajc Dadga gucnäjreni, bejŋni milagwr te gucbee bejŋ laapac xtidx Dios ni caniireni. Sugacni si'c.

San Lucas

Xhicuent bacuaa Lucas rediidxre

1 Xhidajl bejn abacuaa lo guijtz xcuent guiraa redzuun ni gujc nez loonu te cuäxnejzreni redzuinga ² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴ te gacbesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶ Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laj ni cayujn Zacarías dzuun neñ guidoro si'c bixhojz nez loj Dios, ⁹ dxejc con daad bibee chuni'c jiu' neñ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ La| ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹ Dxejcti baluiloj te xangl Dios lo Zacarías, suliiini ladbee lo dxan cadre cayejc guxhyaal. ¹² Che bahuii Zacarías lo xangl Dios, di jien xhi gunni, lacti bidxebduxhni. ¹³ Sas xangl Dios räjp lojni:

—Na'c guidxiejblu, Zacaríi, sa'csi Dios abiejn diajgni xtiidxlu, luxh su' te xi'n chäälü, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi beñro gac xi'nlu nez loj Dios. Dini yä bin, nicla maxcaal. Sibäjz Sprit Dxaan xten Dios neñ lastooni cheni gaallini. ¹⁶ Sujnni gusiechljaz xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpmi lagajc yälrnibee ni gojp profe't Elías, te che jiejn diajgreni xtiidxni susiechljaz redad, susiäjzarenii diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

¹⁸ Gunabdiidx Zacaríi loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxha|ni narä te guininää luj, jiädnää didxhuenre lojlu.

²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojbe che guidzujn dxej che riäj| gacni.

²¹ La|ni cayajc dee, cadxeloj rebejn ni suga' nez ro' yudxan cabäjzreni guiríi Zacaríi sa'csi cayaclaani neñ yudxan. ²² Che biríi Zacaríi, di najcdiru niniini loj rebejn; dxejc gucbeereni yu' xhi cosro bahuiini neñ yudxan xten guidoo. Dxejc con seen guninäjni rebejnnga, sa'csi xheti xse'ni te niniini.

²³ Che gulujx bejnii dzuun neñ guidoro, gubi'ni roli-zjni. ²⁴ Che gudejd redxex dxejcti bazen nuu Elisabe't, chäälni, báz, gaii bäii diruni niríi rolizjni. Bejnii xhigab, räjpni: ²⁵ “Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäii, baxha| Dios xanglni Gabriel lo te guedx Galilee ni laa Nazare't, ²⁷ te chahuiini te dxapxteeb ni laa Marii. Agojt xtiidxni te guchñaani te dade' ni laa José. Dade're najc xagdoo torei David.

²⁸ Biu' anglre cadre sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlü. Abenle' Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextidxni, rujnni xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxiejblu, Marii; agule Dios luj. ³¹ Bacuadiajg diidx. Suulu báz, su' te xi'nlu. Che gaalni guirilajni Jesús. ³² Laani sajcmi te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David, ³³ te tejpas guinibeeni loj rexi'n Israel, luxh dipac xcälrnibeeni nitloj.

³⁴ Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpni:

—Sprit Dxaan xten Dios siääd lojlu, xcälrnibee Gueb Dios ni yu' xhaguibaa suhuajcwini luj si'c te za. Ni'cni báz ni gaal sajcmi te beñdxan, sibälaj bejnii Xi'n Dios.

³⁶ Näjza sa'lu Elisabe't su' te xi'nni luxh anajcmi te bengool; ni'cni gunaa nani najreni digacdi chu xi'nni agujc xho'p bäii nuuni báz. ³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'tctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Neñ redxejga, basquejn Marii sääni lo te guejdx ni tre' neñ redajn xten Judea. ⁴⁰ Biu'ni rolizj Zacaríi, guniini xtidxbee loj Elisabe't.

⁴¹ Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't.

⁴² Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. ⁴³ ¿Chu narä te siädhuui xnan Xtioozä narä? ⁴⁴ Biejntis diagä xtiidxlu, bibalazgajc xi'nä, biniibni xque'ä. ⁴⁵ Sibaa lajzlu, luj ni huililajz sisiojbpac nani gunii Xtadnu Dios.

⁴⁶ Dxejc räjp Marii:

Xaimä rliä'p xpala'n Xtadnu Dios.

⁴⁷ Rbalazduxhza lastoä xcuent Dios ni ruslaa narä lo dojl.

⁴⁸ Sa'csi agule Dios narä, nacä te mos gunaa ni xhet sajcdi, luxh ñajli sinii rebejn näjza reni churu chu lo guedxliuj,

chicbaani loj guiraa regunaa.

⁴⁹ Sa'csi Gueb Dios ni rajp guiraa yälñribee abejn xhidajl cosro loä,

dxanduxh najc lajni.

⁵⁰ Dini cuääz gulaslajzni guiraa rebejn ni riu xtiidxni, reni rajñni.

⁵¹ Xhidajl cosnagaj abejnni con lagajc ñaani, abatie'chni renani rustioob lastooreni rliä'p lagajc xpala'nreni.

⁵² Abasajbni reni rnibee,

per rebeñnadolajz bejnni gacreni beñro.

⁵³ Bachajni xque' reni calaan,

badeedni ganax cossa'c,

niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni nación xten xpejn Israel, ni najc xmos Dios.

Di lajzni niäl nulaslajznireni

⁵⁵ sa'csi si'c bia'nni diidx con retoxtdagdoonu, sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii rolizj Elisabe't si'cti choñ bäii, dxejc gubisacni rolizjni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te báz niguiini. ⁵⁸ Dxejc bidzujñ rexpisiñni näjza resa'ni biädhuireni guiro'preni che gucbeereni lacti hueen gujc Dios con laani. Bibalaznäjnreni. ⁵⁹ Che gudejd xhujñ dxej, huinäreni baze'ga chuni bee. Rlajz rebejn nirilaj baze'ga si'c laa xtadni, Zacaríi. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamilju ni laa si'c.

⁶² Dxejcti gunabdiidxreni con seen lo xtad baze'ga te gacbeereni xho rlajzni guirilaj baze'ga. ⁶³ Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxelojreni. ⁶⁴ Luxh lagajc dxejc gujc gunii Zacaríi stehuält, dxejc guslojni calä'pni xpala'n Dios.

⁶⁵ Bidxeloduxh rexpisiñreni xhini'c gujc ro'c. Luxh bire'ch diidx xcuent recosre guideb neñ redajn xten Judea. ⁶⁶ Guiraa reni biejn diajg rediidxga gusloj cayunreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni biļ Zacaríi

⁶⁷ Dxejcti biäd Sprit Dxan xten Dios neñ lastoo xtadni Zacaríi, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel, sa'csi abiädhuireni loonu, ni najcnu rexpejn, te siädguslaani nuurnu neñ dojl.

⁶⁹ Abaxhalñi loonu te bejn ni rajp yälrusladuxh bejn neñ dojl.

Najcni te rexagdoon toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijt galoo:

⁷¹ Suslaani nuurnu loj reni rdxe'ch loonu, näjza ladzñaa rebejn ni gulälaz nurnu.

⁷² Te gulaslajzni retoxtdagdoonu, te soob diidx ni bia'nni con rebejn ga.

⁷³ Scree bia'nni diidx con toxtadgoldoonu, Abram:

⁷⁴ Suslaani nuurnu ladzñaa rebejn ni rdxe'ch loonu, te na'c guidxeebnu chunu lojni gusoobnu xtiidxni, ⁷⁵ con yälñabañsa'c näjza yälguxhtis guiraa redxej ni guibajñnu.

⁷⁶ Luxh luj, baze', sirilajlu dade' nani nrii xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyulajzni,

⁷⁷ te gunlu gacbee rexpejn xho gac laani lo dojl,

te gac guibicaj xtojñreni.

⁷⁸ Sa'csi Dios sanälajz bejn,

näjza rulaslajzni bejn ni'cni xhaguibaali suxhalñi xi'nni te jiädñäni te dxecoob,

⁷⁹ te gusanijni lo rebejn ni nabajñ lo yälxcäy xten dojl,

näjza rebejn ni nabajñ lo xpala' yälgujt,

te guluini xho sánu lo xnez yälrbecdxilajz.

⁸⁰ Dxejc gunís biuxe'ga, guyuduxh xcäriejnni xcuent recos xten Dios. Gubajñni nez loj reyubijdz cheni bidzujñli dxej che baluilojni loj rexpejn Israel, che gusloj cagusule'ni xtidx Dios.

Che gojl Jesús

(Mt. 1:18-25)

2 Neñ redxejga, gunibee Augusto César xcaj laj rebejn guideb guedxliuj lo xquijtzi. ² Ni'c nacobgujc yälbigabre cheni najc Cirenio gobernadoon xten Siria. ³ Guiraa rebejn nanab chääreni lagajc lajdxreni te ro'c guigabreni. ⁴ Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi

najc José xagdo toDavid. ⁵ Huinäni Marii, nani guchñaani, huijreni guedx Belén te ro'c guigabreni. Luxh nuu Marii báz. ⁶ Lalsi yu'reni guedx Belén, bidzujñ dxej ni gaal xi'n Marii. ⁷ Ro'c gojl xi'n galooni, dxej batejbnini te xzuudni. Dxej gudixhnini cadro rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

⁸ Gajxh guejdxga guyu' gaii baxtoor cayajpreni xhiilreni lo niaa guxhijñ. ⁹ Chela baluiloj te xangl Dios, luxh bianij guideb gabireni con yälrdimbicha' xten Dios, dxej bidxebduxhrene. ¹⁰ Sas anglga räjp lojreni:

—Na'c guidxeybtu, narä siädnaá lojtu te didxa'c ni suspalajz guiraa beñ guedxliuj. ¹¹ Nadxej gojl neñ guejdx xten toDavid, tej ni guslaa beñ neñ dojl, laani najc Crist ni najc Dad. ¹² Dee najc te seen lojtu, sidxältu baze'ga nadejbni neñ te xzuudni, naga'ni cadro rusälreni guijxh rajw reguidxaa.

¹³ Lagajc dxej guideb gabi anglga baluiloj naclejñ xangl Dios, gulä'preni xpala'n Dios, räjpreni:

¹⁴ Collä'p xpala'n Dios ni yu' xhaguibaali.

Suchu yälrbecdxilajz lo rebeñ guedxliuj ni balazlajzni.

¹⁵ Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

¹⁶ Rusquenduxhrene sääreni, dxej bidxälreni Marii näjza José näjza baze' ni naga' neñ cadro rusälreni guijxh rajw reguidxaa. ¹⁷ Cheni bahuiireni loj rebejnga, bijreni diidx xhi räjp rexangl Dios lojreni xcuent baze'ga.

¹⁸ Niluxh guiraa reni bieñ diajg rediidxre bidxeloduxhrene xtidx rebaxtoorga. ¹⁹ Niluxh Marii gulucheeni guiraa rediidx ni bieñ diajgñi neñ lastooni, rujntisni xhigab xcuent rediidxga. ²⁰ Dxejcti rebaxtoorga gubisacreni cayo'reni, calä'pzareni xpala'n Dios xcuent guiraa rediidx ni bieñ diajgreni näjza ni bahuiireni sa'csi guiraani gujç si'cni räjpreni lojreni.

Cheni huinäreni Jesús chuni bee

²¹ Che gudejd xhujñ dxej, huinäreni baze'ga chuni bee, dxej gulälajrenini Jesús, lagajc laj ni räjp xangl Dios loj Marii guirilajni galooli guuni bázga.

²² Che basa' redxej ni gac naya te nan si'cni gunibee toMoisés loj xquijtzni, huinäjreni baze'ga guedx Jerusalén, neñ guidoro gunabreni gacnäj Diosni par tejpas. ²³ Bejnreni scree sa'csi caj lo guijtz xten Dios: "Guiraa rexingangaloo xten beñ guilia'tu lo sa'reni te gunreni xtzunä", räjp Dios. ²⁴ Bidzujñreni ro'c ca'reni te gojn si'cni rñibee rexquijtz Dios: "Tio'p gugue' o tio'p palombáz."

²⁵ Neñ redxejga, neñ guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzñi jääd te beñ ni guslaa rexpejñ Israel. Rbäjz Sprit Dxan xten Dios neñ lastoo Simeón. ²⁶ Sprit Dxan abejñ gacbeeni dini guet ansde fiini loj Crist ni guxhal Dios. ²⁷ Dxejcti räjp Sprit Dxan xten Dios lojni chääni

guidoro. Lañi yu'ni neñ guidoo, bidzujñ José con Marii, biädna'reni báz Jesús, te gunnäjreni Jesús nani rñibee xtidx Dios gunreni. ²⁸ Dxej gudääz Simeón baze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yälrbecdxilajz, sa'csi abasooblu nani bia'n diidx gunnäjlu xmoslu.

³⁰ Sa'csi abahuiloä nani siädguslaa nuurnu neñ dojl, ³¹ ni abasujlu nez loj guiraa rebeñ guedxliuj.

³² Laani najc bianij ni susanij loj rebejñ ni di gac xpejñ Israel,

näjza nani gac xpala'n rexpejñlu guedx Israel, lajdxlu.

³³ Bidxeloj José näjza xnan Jesús rediidx ni canii Simeón xcuent baze'ga. ³⁴ Dxej benle' Simeón yejcreni, dxej räjpni lo Marii xnan Jesús:

—Bahuii gan; baze're biäd te loj rexpejñ Israel churenibälaz xtiidxni, te chuza reni sililajz xtiidxni. Laani gacni te seen nani sibälaz beñ, ³⁵ te si'c jienloj xhi xhigab rujñ cade tej rexpejñ Israel neñ lastooreni. Dxejcti par luj sajçni asdoo chääz te spaad lastoolu, sa'csi gac-huinduxh lastoolu.

³⁶ Suga'za te nane' ni laa Ana ro'c, rñiini xtidx Dios xcuent recos ni churu gac. Najcni xindxa'p Fanuel, ni najc famiil xten Aser. Anajcni bengolduxh. Bachñaani che najcni dxaphuin, luxh gajdztis ijz guläznäjni chäälni che bia'nni biuud. ³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbecdx-rniab lo Dios. ³⁸ Che gubigni lojreni lagajc dxej, badeedni xquixtios lo Dios sa'csi abidzujñ tej ni guslaa rebejñ lo dojl. Dxej gusloj caniini diidx xcuent báz Jesús loj guiraa renani cabäjz yälruslaa xten Jerusalén.

Che gubi'reni guedx Nazare't

³⁹ Che gulujx beñ xcuazajni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. ⁴⁰ Gunís biuxe'ga, guc nadaanni, guc nasinruzani sa'csi cayacnäj Diosni.

Che biu' Jesús guidoro

⁴¹ Casob ijz rij rexuczajñ Jesús guedx Jerusalén te rinäreni te gojn xten lanij pascw. ⁴² Che basa' Jesús tzu-bitio'p ijz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnan ni niclaza José direni niacbee bia'nni. ⁴⁴ Bejnreni xhigab pet siäd-sanäjni rebeñsa'ni. Si'c guzajreni tebdxej, dxej gudiilrenini loj resa'reni, näjza loj reni rumbeerreni, ⁴⁵ direni nidxälni. Dxej gubisacreni guedx Jerusalén te huitiilrenini ro'c.

⁴⁶ Choñ dxej gudiilrenini dxej bidxälrenini neñ guidoro, sobga'ni nez galäi rebejñ ni najñ lei, cacuadi-ajgñi xtiidxreni, cayujnzani yälgunabdiidx lojreni.

⁴⁷ Luxh guiraareni cacuadijgñ xtiidxni, cadxeloduxhrene yälñajñ xtenni, näjza rediidx ni cagudzu'ni lojreni.

⁴⁸ Che bahuii rexuczajñni lojni, bidxelojreni. Dxej räjp xnan lojni:

—Xi'nä, ¿xhicuent bennäjlu nuurnu scree? Narä näjza xtaclu cayunduxhnu xhigab caguilnu luj nezree, nezre'c.

⁴⁹ Dxejcti räjp Jesús lojreni:

—¿Xhicuent caguilnu narä? ¿La ditu gan riäjł gunä xtzun Xtaclä, ä?

⁵⁰ Luxh laareni direni niacbee rediidx ni guniini lojreni.

⁵¹ Dxejcti gubinäjnireni guedx Nazare't, sanuuni ru-soobni xtiidxreni. Luxh Marii gulucheetisni guiraa recosre neñ lastooni. ⁵² Duurtis gunís Jesús, caroobruza xcälñajnni. Sanälajz Diosni, sanälajzza guiraa rebejñni.

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

3 Neñ redxej cheni agujc tzuun ijz najc Tiberio César řei, Poncio Pila't najc gobernadoo xten Judea; Herodes najc gobernadoo xten Galilee; Felipe, bejtz Herodes najc gobernadoo xten Iturea näjza Tracnite; Lisnias najc gobernadoo xten Abilinia. ² Lagajc neñ redxejga Anás näjza Caifás najc rebixhojzro xten guidoro guedx Jerusalén. Neñ redxejga biääd xtidx Dios lo Juan, xi'n Zacaríi cheni rbäjzni nez lo reyubijdz.

³ Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechlajz, yälrobnis ni nanab gunreni te gudzucaj Dios xtojłreni. ⁴ Si'cni caj lo xquijtz Isaías, dade' ni gunii xtidx Dios, cadro räjpni:

Riejn xse' te ni rbedxa' nez loj reyubijdz:
"Colyunsa'c xnezyuj Dad, colslíi rexnezyulajzni."

⁵ Guiraa cadro sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, saccsa'creni.

⁶ Dxejcti guiralii bejñ suhuii loj nani guxhał Dios.

⁷ Che bahuii Juan siääd xhidalduxh bejñ te guirobnisreni, räjpni lojreni:

—¿La'tu benguijdx ni najc si'c bälñialajz! ¿Chuni'c bali-jdxtu guxuñtu loj xcälrdxe'ch Dios ni siädgajxh, ä?

⁸ Colguchaa xmoodtu te si'c fii bejñ guliini abasiechla-jztu. Na'c cuentis rniitu lagajc neñ lastootu "Abram najc xtaclnu", sa'csi narä rniä lojtu, sajz xca' Dios reguijre te con laareni guncheeni bejñ gac rexagdoe to Abram.

⁹ Aguibyajg naga' cuä' xlobaa reyajg; ni'cni guiraa reya-jg nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejñ lojni, räjpreni:

—¿Xhini'c nanab jiennu?

¹¹ Dxejcti badzu' Juan diidxre räjpni:

—Ni rajp tio'p xhajbni, sugudeedni tejni lo bejñ ni xhet rajpdi. Sigajzca gun reni rajp xhi gaureni, quisrenini loj ni xheti xhi gauni.

¹² Näjza gatii bejñ nani rusquijx xcuent reimpuest bidzujñ lojni te guirobnisreni, dxejcti gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejñ maazdi ni nungäjł quiixreni.

¹⁴ Näjza gatii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejcti räjpni lojreni:

—Na'c guchejbtu bejñ; na'c gäbtu chale'ctu xcälquij bejñ ni xhet bejndi parsi guniidxreni meel lojtu; colbal-aznäj nani rujntu gaan.

¹⁵ Cadxeloj rebejñ, cayujnreni xhigabduxh, naareni, "pet Juan najc Crist ni jiääd." ¹⁶ Dxejcti badzu' Juan diidxre, räjpni loj guiraa rebejñ:

—Gullipac rutiobnisä la'tu con nis, luxh siääd tej ni sajrcu loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuäazni neñ lastootu näjza con guiboo, sa'csi rajpruni yälñibee loä. ¹⁷ Aca'ni pal te gusiani triuu te cuäani triusa'c lo guijxh te cucheeni triuu neñ ngodx xtenni, dxejcti reguixhtri-uuga suze'cnini lo bajl ni rejz par tejpas.

¹⁸ Rediidxre näjza xhidajł yälřulijdx gunii Juan te basule'ni redidxcoob loj rebejñ. ¹⁹ Näjza lo Herodes ni najc gobernadoo basule' Juan diidx, gudilñajnni sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojł ni bejnni. ²⁰ Di Herodes niu xtidx Juan, alga bejnni stee dojł, basälñi Juan neñ latzguiib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejñ, näjza Jesús birobnis. Cheni cabedx-canabni lo Dios, bixal xhaguibaa, ²² dxejcti biäjł Sprit Dxan xten Dios si'c te palom, bidzujñni cadro suga' Jesús. Dxejcti xhaguibaali biejn xse' te ni räjp:

—Luj, najclu xi'nä ni sanälazä. Rbanälazduhxhä luj.

Resa' Jesús

(Mt. 1:1-17)

²³ Yu' Jesús galbitzuu ijz che gusloj cayujnni dzuun ni badeed Dios gunni. Rchalo rebejñ najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José.

²⁵ José gujc xi'n Matatías. Matatías gujc xi'n Amós.

Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n

Abraham. Abraham gujc xi'n Taré. Taré gujc xi'n Nacor.
³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala.
³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec.
³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán.
³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

Che biricaj beñdxab loj Jesús

(Mt. 4:1-11; Mr. 1:12-13)

4 Jesús, sa'csi rbäjz Sprit Dxañ xten Dios lastooni, biunejzni gueu Jordán, dxejc huiñä Sprit Dxañ xten Diosni lo reyubijdz. ² Ro'c bia'nni tiuu gubijdx, tiuu guxhijñ. Ro'c bidzujñ beñdxab ni rnibee te rlajzñi gunni gusoob Jesús xtiidxiñ. Luxh calaan Jesús, sa'csi gajdñi gau guiraa neñ redxejga. ³ Dxejc räjp beñdxab lojni: —Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxi lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajñ beñ, näjza guiraa diidxi nani rñii Dios sujn guibajñ beñ.”

⁵ Dxejcti huiñä beñdxab Jesús jiaa yejc te dajñ. Teratbäztis baluilojni guiraa reguedxro ni tre' lo guedxliuj.

⁶ Dxejc räjp beñdxab lojni:

—Narä sunidxä guiraa yälrnibee näjza reyälñasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä. ⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidxi, räjpni lojni:

—Acaj loj xquijtz Dios: “Dad Xtiostislu gañlu, luxh lojtisni chulu gunlu dzuun.”

⁹ Dxejcti huiñä beñdxabni lo guedx Jerusalén, huiñänini jiaa yejc xques guidoro. Dxejc räjp beñdxab lojni:

—Palga guliilu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

Suxhañ Dios rexangñi te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidxi lojni, räjpni:

—Cajza lo rexquijtz Dios: “Na'c fañlu Dad ni najc Xtioozlu.”

¹³ Che baluux beñdxab rextiidxiñ, gubicajni lo Jesús sa'csi dini niujñ gaan nusoob Jesús xtiidxiñ. Guläjzñi guidzujñ stee dxej te gusacsiruni Jesús.

Gusloj Jesús cayujñ xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpni yälrnibee xten Sprit Dxañ. Bire'ch diidxi xcuentni guiraa neñ reguejdx ni tre' nejzga. ¹⁵ Ruluiini neñ reguidobäz luxh guiraa rebeñ rliä'p xpala'nñi.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejñ Israel, biu'ni neñ guidobäz sigajc ni rujñpacni, dxejc huisuliini te biñni ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxälñi cadro rñii scree:

¹⁸ Sprit Dxañ xten Dios suganäj narä, sa'csi agule Dios narä te gusule'ä xtidxcoobni lo rebeñproob.

Baxhañni narä te gusiaca lastoo renani di lastooreni cuedxi,

te gusule'ä yälruslaa lo rebeñ ni yu' lo dojl, te gusiaca baloj rebeñ lotiä'p, te guslaä rebeñ ni cadejd trabajw,

¹⁹ te gusule'ä abiu' ijzsa'c che rulaslajz Dios rebeñ.

²⁰ Dxejc basäu Jesús reguijtzga, badeednini loj beñ ni cayacñä neñ guidooga, dxejc gurejñi. Sa'csi guiraa rebeñ ni sobga' neñ guidooga cahuidzu'tzreni lojni,

²¹ gusloj guniini, räjpni lojreni:

—Lagajc nadxej guzobj rediidxi ni caj lo reguijtzre nez loj guiraatu.

²² Guiraareni sarú guniireni xcuent Jesús, bedxelo-duxhzareni redidxsaruduxh ni guniini lojreni. Gunabdiidxiñi loj sa'reni, räjpni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxiñ loä: “Doctoor, basiajc lagajc luj”; siniizatu loä: “Recos ni bieñ diajgnu beñlu nez guedx Capernaum, lagajc recosga beñ nez ree cadro najc lajdxlu.”

²⁴ Dxejc huinuu xtiidxiñ, räjpni lojreni:

—Rñiliäpac lojtu, nicla tej redade' ni rñii xtidxiñ Dios, di rebeñ lajdxreni jiu xtiidxiñ. ²⁵ Luxh rñiliä lojtu, che gubajñ Elías lo guedxliuj, guyu' xhidajñ gunabiuid guedx Israel che di nisguijñ niajb choñ ijz garol, dxejc guyu' yälrianduxh guideb guejdxga. ²⁶ Luxh di Dios nuxhañ Elías rolijz nicla tej regunabiuid ni guläjz guedx Israel, alga baxhañni lo beñzijñ, rolijz te gunabiuid ni rbäjz Sarepta, gajx guedx Sidón. ²⁷ Sigajcza che gubajñ Eliseo lo guedxliuj, guyu' xhidajñ beñ racxhuu ni rañ tiejxhrene guedx Israel, luxh dini nusajc nicla tejreni, alga basiajñi dade' ni laa Naamán, ni siääd te guedxzijñ ni laa Siria.

²⁸ Che bieñ diajg reni sobga' neñ guidoo rextidxiñ Jesús, bidxechduxhrene, ²⁹ huisulireni, guläärenini neñ guejdxga. Dxejc huinärenini yejc dajñ cadro tre' guejdxga cadro yu' te balaro, te ro'c rlajzreni nustejbreni. ³⁰ Dxejc Jesús sigaj gudejdñi galäiireni, sä'tini ste'ca lajt.

Gulää Jesús beñdxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidxi loj rebeñ che gojl

dxej ni rusilajz rexpejn Israel. ³² Bidxeloduxhrene xti-idxni sa'csi rusule'ni si'c te bejnajn, si'c te ni rnibee.

³³ Neñ guidooga suga' te dade' ni rbäjz te beñdxab neñ lastooni. Guredxa'ni ³⁴ räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxan Dios.

³⁵ Gudidxa' Jesús lo beñdxabga, räjpni lojni:

—Basäu ro'lu, birii lastoo niguiire.

Dxejcti beñdxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga. ³⁶ Bidxeloduxh rebejnnga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeñdxab con yälrnibee, luxh rusoob rebeñdxab xti-idxni, riireni lastoo bejn.

³⁷ Dxejc gusäab xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni rolizj Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrene lojni te gusiajcnini. ³⁹ Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujjni mandaad, cahuiinireni.

Rusiajc Jesús xhidajl yälracxhuu

(Mt. 8:16-17; Mr. 1:32-34)

⁴⁰ Lañ ni cayäz gubijdx, guiraa reni rajp beñracxhuu ni rajc garen garen yälracxhuu biädnäreni rebejnnga lo Jesús. Dxejc laani batzuubni ñaani yejc teygareni, dxejc bjaic rebeñracxhuuga. ⁴¹ Loj rebeñracxhuuga, yu'reni birii rebeñdxab neñ lastooreni, rbedxa'reni räjpreni:

—Luj najclu Xi'n Dios.

Luxh Jesús gudiñäjni rebeñdxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios

(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil rebejnni, dxejc bidzujñreni cadro suga'ni. Rlajzreni nuscuääzrenini te di nuiini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruga guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios neñ guiraa reguidobäz neñ reguejdx xten Galilee.

Che gunaazreni xhidajl bäjl

(Mt. 4:18-22; Mr. 1:16-20)

5 Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' nisga, rud yu'di neñreni sa'csi rebejn ni rniaaz bäjl abiriireni neñ rebarcw te caguiibreni xquijxhrene ro' nisga. ³ Dxejc biu' Jesús neñ te barcw ni najc xten Simón, dxejc gunab

Jesús chää barcwga lo nis te la', te guibicajni ro' yuj. Dxejc gurej Jesús neñ barcwga, ro'cli guslojni caguluii-ni rebejn. ⁴ Che gulujx xtiidxni, räjpni loj Simón:

—Huinä barcw cadro jäätro, colcuaa xquijxhtu lo nis te guiniaaztu bäjl.

⁵ Räjp Simón lojni:

—Mastr, guideb yääl biennu dzuun, luxh dinu nini-aaz nicla tej bäjl, niluxh ñaj agunibeelu gusäl'sacnu guijxh lo nis.

⁶ Cheni basäl'reni xquijxhrene lo nis, gunaazreni xhidalduxh bäjl, dxejc guslojli caräjs xquijxhrene. ⁷ Dxejc bejnreni seen loj resa'reni ni yu' neñ stee barcwga te jiädyaacñajreni. Bidzujñtirenireni, bachajreni guiro'p barcw. Gudxaduxh rebarcw, ameer niääzreni neñ nis. ⁸ Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te beñdojl.

⁹ Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäjl.

¹⁰ Näjza Jacoob näjza Juan, rexi'n Zebedeo, ni runnäj Simón dzuun, näjzarenireni bidxejbreni. Per Jesús räjp lo Simón:

—Na'c guidxejblu, ñajli guisloj cueedxlu bejn lacuaa ni guiniaazlu bäjl.

¹¹ Dxejc, che bidzujñajreni rebarcw ro' nis, basa'nreni guiraa xhixtenreni, te sanajl'reni Jesús.

Basiajc Jesús te bejn ni rañ tiejxhni

(Mt. 8:1-4; Mr. 1:40-45)

¹² Cheni guyu' Jesús tej reguejdx, bidzujñ te bejn lojni ni rajc lepra te yälguidxduxh ni rañ tiejxhni. Che bahuii-ni loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

¹³ Dxejc batzuub Jesús ñaani yejcnireni räjpni lojni:

—Rlazä jiajclu. Susiacälu.

Che guniini rediidxre, biacgajc beñ racxhuuga. ¹⁴ Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni bjaiclu si'cni rnibee xleii Moisés, te filoj rebejn abiajclu.

¹⁵ Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpa xhidalduxh bejn te gcuadiajgreni xtidx Jesús näjza te gusiajcnireni yälracxhuu xtenreni. ¹⁶ Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtradni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

¹⁷ Te dxej lañni caguluiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siäädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluiloj suganäj xcälrnibee Dios Jesús te rajc rusiajcnireni rebeñracxhuu. ¹⁸ Dxejc bidzujñ gaii dade' nuurenireni lo te lonbäz te bejn ni di gacdi guiniib, rlajzreni gusiurenireni neñ yu' te quixhrene nez loj Jesús. ¹⁹ Niluxh direni

nidxäl canejz niu'reni sa'csi nadäduhx ro'c sa'csi tre' xhidajl rebejn. Dxejc huäpnärenini yejc yu'ga, badzucajreni gaii tej, dxejc basajbreni xloon beņracxhuuga yejcli yu'ga te gujc bidzujņni nez loj Jesús. ²⁰ Che bahuii Jesús yälřirilajz xtenreni, räjpni loj beņracxhuuga:

—Dade', agubicaj xtojllu.

²¹ Dxejc rebejn ni ruluii leii näjza refarisee gusloj cayujņreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtojł rebejn, Diostis rudzucaj dojl.”

²² Dxejc gucbee Jesús xhi xhigab cayujņreni, ni'c räjpni lojreni:

—¿Xhicuent rujntu xhigab si'c neņ lastootu? ²³ ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? ²⁴ Mbaj ņaj, suluiä nez lojtu Xi'n Dios ni gujc Xi'n Niguii rajp yälřnibee, yälřnadip lo guedxliujre te gudzucajni xtojł rebejn.

Dxejc räjpni lo bejņga ni digacdi guiniib:

—Lojlu rniä, řhuistie, guläs xloonlu, huij rolijzlu!

²⁵ Lagajc dxejc nez lojreni huistiegajc bejn ni digacdi guiniib, guläsni xlooni cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhrenei recosga, dxejc guslojreni calä'preni xpala'n Dios, rdxejblieni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huiisu Leví, basa'nni guiraa recosga, dxejc sanajlni Jesús.

²⁹ Dxejc bejn Leví te lanij rolijzni par Jesús. Biääd xhidajl bejn ni rusquijx xcuent impuest näjza sgaii bejn; sobganäjnireni lo mex. ³⁰ Dxejcti refarisee näjza rebejn ni ruluii leii guslojreni cayeinäjreni rexpejnřpac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebeņdojl, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor. ³² Dina niädtedxä rebeņsa'c, narä biädtedxä rebeņdojl te gusiechłajzreni.

Gunabdiidxreni loj Jesús xcuent yälřrucua'n

(Mt. 9:14-17; Mr. 2:18-22)

³³ Dxejc gunabdiidx rebejņga loj Jesús, räjpreni:

—¿Xhicuent lacti rucua'n rexpejn Juan näjza rexpeņ refarisee, lacti rbedx-rniabreni loj Dios; niluxh rexpejņpaclu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' lałni yunäjreni bi'n, ä? ³⁵ Niluxh sidzujņ dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhi-roobruni guiräjs, luxh diza ladcoob guchaag lo ladyujxh. ³⁷ Di gacdi gusälni bincoob neņ te guidbiejw sa'csi bincoobga sutiäsyani guidbiejwga dxejc sixe' binga, sixijņza guidbiejwga. ³⁸ Ni'cni nanab gusälni bincoob neņ guidcoob si'c sigucheeza guiro'preni. ³⁹ Luxh nicla tej bejn ni agu' bin ni yu' agujc xchej řłajz yä bincoob, sa'csi säjbni: “Bin ni yu' agujc xchej najc huenru.”

Rutie' rexpejn Jesús triuu dxej nani rusilajzreni

(Mt. 12:1-8; Mr. 2:23-28)

6 Te dxej ni rusilajz rexpejn Israel sasaj Jesús näjza rexpejņpacni nez loj reyuj cadro naga' triuu. Dxejc, sa'csi calaanreni gusloj caläädxreni dojl lo triuu te caya-jwreni. ² Dxejc gunabdiidx gaii refarisee ni najc beņguidoo, räjpreni lojreni:

—¿Xhicuent rujntu dzuun ni di nungäjł guntu che rajl dxej ni rusilajznu?

³ Dxejc räjp Jesús lojreni:

—¿La gajdtu goł loj reguijtz xhi bejn toDavid cheni calannäjni rebejn nani sanäni, ä? ⁴ Biu'ni neņ xquidoo Dios, gudajwni yätxtiil nani di nungäjł gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz ņaani

(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn Israel, biu'ni neņ te guidobäz, dxejc guslojni caguluiini rebejn. Lagajc ro'c sobga' te dade' ni nabijdz ņaani ladbee. ⁷ Dxejc remastr xten leii näjza refarisee cagula'tzreni te don la susiajčni bejņga dxej ni rusilajzreni, sa'csi caguiilreni xho gucuaquijreni Jesús. ⁸ Niluxh laani najnni xhi xhigab cayujņreni, dxejc guniini lo dade' ni nabijdz ņaani, räjpni:

—řHuisulii! řGudaa nez galäiire!

Dxejc huisulii bejņga, gubigni lojni. ⁹ Dxejc räjp Jesús lojreni:

—Řłazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcälřnabajņni o la gudzucajnu yälřnabajņni, ä?

¹⁰ Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz ņaani:

—řBaslii ņaalu!

Dxejc bejnni si'c, luxh biacgajc ņaani. ¹¹ Dxejc bidx-echduhx rebejn ni tre' ro'c, gusloj canabdiidxreni lo sa'reni xhi gunnäjreni Jesús.

Gule Jesús guitzubitio'p rexpejņpacni

(Mt. 10:1-4; Mr. 3:13-19)

¹² Neņ redxejga, huij Jesús loj te dajn te huininäjni Xtadni Dios. Ro'c gudejdni yälř cabedx-canabni lo Dios.

¹³ Che bianij lo yuj, gurejdxni rexpejn. Ro'c guleni tzu-bitio'preni te gacreni xpejn pacni. Gulälajni reipost.
¹⁴ Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; ¹⁵ Mateo; Tomás; Jacob xi'n Alfeo; Simón ni nagab loj rexpen cananista; ¹⁶ Judas, bejtz Jacob; najza Judas Iscariote ni guto' Jesús loj rebixhojz.

Ruluu Jesús xhidajl bejn

(Mt. 4:23-25)

¹⁷ Che biätnäj Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siädreni guiraa nez reguedx Judea, najza guedx Jerusalén najza reguejdx ni tre' gajx nisdoo Tiro con Sidón. Rebejn ga bidzujnreni te gucuadijgreni xtidx Jesús, te gusia-jczanireni xcälracxhuureni. ¹⁸ Guiraa ni rdejzda trabajw yu' bejdxab neñ lastooreni najza reni'c biajc. ¹⁹ Guiraa rebejn rlaz caan Jesús, sa'csi rusiajcn i guiraareni con xcälrnibeeni.

Balijdx Jesús rebejn

(Mt. 5:1-12)

²⁰ Dxejc bahuii Jesús loj rexpejn pacni räjpni lojreni: —Chicbaatu, bejn nani xheti xhixtentu, sa'csi xtentu najc cadro nibee Dios xhaguibaa.
²¹ 'Chicbaatu, bejn nani calaan naj, sa'csi suniidx Dios lojtu nani rniabtu.
 'Chicbaatu, bejn nani roon naj sa'csi susiäj l Dios lajz-tu dxejru suxhijztu.
²² 'Chicbaatu, bejn nani rdexchlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii.
²³ Colguibalajz neñ redxejga, na'c gac-huin lastootu sa'csi sunidxdxh Dios xhi xtentu xhaguibaa. Sigajcza basacsí retoxtadgoldooreni rebejn nani gunii xtidx Dios galoo.
²⁴ 'Probe'zatu, la'tu beñrajp, sa'csi agojptu xcäl-nasa'ctu, xcälrbalajztu lo guedxliujre.
²⁵ 'Probe'tu nani rajp guiralajz xhixtentu naj, sa'csi sidejdtu yälrliaan.
 'Proobzatu ni ruxhijztu naj, sa'csi sonduxhtu sidejdtu yälhuinduxh, yälrnalas.
²⁶ 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

Chanälajzni rebejn nani rdxe'ch lojni

(Mt. 5:38-48; 7:12)

²⁷ Räjzpazani:
 —La'tu ni cacuadijgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdexchlajz lojtu. ²⁸ Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu.
²⁹ Palga yu' chu rlaz quiin te laad lojlu, badeedza ste-laad quiinni. Palga yu' chu gudzucaj xhablojaalu, badeedza naj xcamangwlu xca'ni. ³⁰ Xhitis ni guiniabreni lojlu, badeedni; ni gudzucaj te xhi xtenlu

lojlu, na'c guiniabsacluni lojni. ³¹ Sigajc ni rlazzlu gunnäj bejn la'tu, si'cza la'tu colyennäj bejn.

³² 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebejdojl. ³³ Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajñ neñ dojl.
³⁴ Palga gudedlaatu lojtis reni rujntu xhigab gu-nidxsacni lojtu, ¿xhi cos hueen rchalotu rujntu? Ni rebejdojl rudedlaazareni loj rebejn ni najnreni siguixsac ni nasääbreni. ³⁵ La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajñ xhaguibaa. Sa'csi si'cza najc Dios huenduxh loj reni di gudeed xquixtios lojni, najza loj rebejdojl. ³⁶ Colgulaslajz resa'tu si'c rulaslajz Xtdnu Dios guiraa rebejn.

Colgulaslajz sa'tu

(Mt. 7:1-5)

³⁷ Räjzpazani:

—Na'c guntu yälguixhtis nani rujn bejn, naatu xhet laadi rujnni; te na'cza gun Dios yälguixhtis rextojltu. Na'c gucuajijtu bejn te sigajcza di Dios gucuajij la'tu. Colgusiäj-lajz dojl ni rujn sa'tu, te si'cza gusiäj-lajz Dios rextojltu. ³⁸ Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' nenni, cupe'tlini gusalreni neñ xpolstu. Dios suniidx lojtu lagajc con mediid ni rudeedtu loj rebejn.
³⁹ Guniiza Jesús stee cuent räjpni:
 —¿La sajc guluii te beñ lotiä'p nez yuj lo stee beñ lotiä'p, ä? ¿La di guiro'preni guitejb neñ te gueed, ä?
⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcni si'cni najc mastr xtenni.
⁴¹ '¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴² O, ¿xho mood gäblu lo bejtzlu: "Guidon cuää guixhe' ni yu' balojlu"; luxh dilu gacbee yu' te yagro balojlu, ä? ¡Beñguijdx! Guläxgaa yagro ni yu' balojlu, dxejc sajc fisa'clu te cuäalu guixh-bäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg

(Mt. 7:17-20; 12:34-35)

⁴³ Räjzpazani:

—Xheti te yagsa'c ni rudeed ninejxh ni xhet sajcni, xheta te yajg ni xhet sajcni ni rudeed ninexhsa'c.
⁴⁴ Sa'csi tebgaj reyajg ruseñlojni xhi yajgn xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejñ. ⁴⁵ Rebeñsa'c rnii didxsa'c, sa'csi xhigabsa'c yu' neñ lastooni. Niluxh rebeñguijdx rnii ganax didxguijdx sa'csi xhigabguijdx yu' neñ lastooni, sa'csi ro'ni rnii nani yu' neñ lastooni.

Tio'p bejn ni benchee tio'p yu'

(Mt. 7:24-27)

⁴⁶ Räjzpazani:

—¿Xhicuent rniitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä. ⁴⁸ Najcni si'c te bejn ni benchee rolijzni, ganid gudäänni jiat, dx-ejcti bejnni cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. ⁴⁹ Niluxh reni rcua diajg xtidxä, dxejc direni guzoob xtidxä, najczeni si'c te bejn ni bejn xyu'ni loj yujxh, dini niujn cimient xten yu'ga. Dxejcti biäjt nisro, bidijnni cuä' yu'ga, dxejc li gurebän yu'ga, gunitlojtini.

Basiajc Jesús xmos te bejn roman ni rnibee
(Mt. 8:5-13)

7 Che gulujx gunii Jesús loj rebejn, huijni te guejdx ni laa Capernaum. ² Ro'c yu' te bejn roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusä'treni Jesús, baxhałgajcni gaii bejn-gool lo rexpejn Israel te chagajreni Jesús jiaädni te gusiajcti xmos dade'ga. ⁴ Che gubigreni loj Jesús, gus-loj gunabduxhreni lojni, räjpreni lojni:

—Dade're najc bejsa'c, nungäjł gacnäjluni ⁵ sa'csi sanälajzni lajdx rexpejn Israel, luxh lagajc laani gu-nibee guc-chee xquidobäznu.

⁶ Dxejcti huinä Jesúsreni. Cheni siäddzungajxhreni royu', baxhał capitán gaai xamiigwni, gäbreni loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, run-gajcni.”

⁹ Che biejn diajg Jesús rediidxre, bidxeloduxhni, gu-biréni loj rebejn ni siädnałni, räjpni lojreni:

—Rniliápac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús roliz capitán, bahuiireni abiajc xmosni.

Baspañsac Jesús xi'n te gunabiuud

¹¹ Nen redxejga, huij Jesús te guejdx ni laa Naín. Huinäni rexpejn pacni näjza xhidajł bejn ni sanajłni.

¹² Che bidzujłni gajxh ro' guejdxga, bahuiini sacua'tzreni te bejn-gut, te bi'n ni najc xtebtis xi'n te gunabiuud. Xhidalduxh bejn sacua'tzni. ¹³ Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

¹⁴ Dxejc gubig Jesús lo rebejn ni sanä bejn-gutga, dxejc guzudxi reni nuu bejn-gutga. Dxejc räjp Jesús loj bejn-gutga:

—¡Bi'n!, narä rniä lojlu; ¡Huistie!

¹⁵ Dxejc huistie bejn-gutga, sobga'ni guslojni caniiini. Dxejc badeed Jesúsni lo xnanni. ¹⁶ Che bahuiireni xhi-

ni'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rniit xtidx Dios abidzujł nez loonu.

Caniizareni:

—Lagajc Guejb Dios abiädhuui rexpejnni.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús
(Mt. 11:2-19)

¹⁸ Rexpejn pac Juan ni rutiobnis bij rediidxga lojni che yu'ni latzguib. ¹⁹ Dxejc baxhałni gaiireni lo Jesús te sanabdiidxreni: “¿La guliipac najclu Crist ni jiaäd o sibäjznu chu stee bejn, ä?” ²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhał nuurnu te guiniabdiidxnu lojlu: “¿La luj najc Crist ni jiaäd o la sibäjznu chu stee bejn?”

²¹ Lagajc dxejc che bidzujłreni, basiajc Jesús xhidajł bejn ni rajc garen-garen yälgujdx, ni yu'za rebejdxab lastooreni, basiajczani baloj ni di fii. ²² Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebej-coj rsiasa'c; rebejn ni rał guejdx tiejxhni, abiajc tiejxhni; rediagcua't riensac diajgreni; rebejn-gut, agubañsacreni; luxh loj rebejn-proob nani cabäjz xcälracnäł Dios riejn diajgreni rsiule' xtidx Dios xcuent xho laa bejn lo dojl. ²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniiini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? ²⁵ ¿Xhini'c huihuiitu? ¿Te bejn ni sucheduxh näjza reni nabañsa'c, rolizj re'reii yu'reni. ²⁶ ¿Chuxhni'c biriitu huihuiitu? ¿Te niguii ni rniit xtidx Dios, ä? O'n, rniliä lojtu, luxh te ni sacduxhru loj guiraa reniguii ni rniit xtidx Dios. ²⁷ Juan najc niguii ni ruzä't rexquijtzt Dios cadre caj scree:

Narä guxhałä te niguii nani guinii xtidxä, te nidni lojlu, te laani guzucheeni xnezyujlu nez lojlu. ²⁸ Rniliápac, loj guiraa rexingaan regunaa, nicla tejni gajd guiricajł ni najc te bejnsacduxhru nez loj Dios si'c najc Juan ni rutiobnis. Niluxh nani guxiiru sajč lo xcälrnibee Dios ni jiaäd, sajcruni loj Juan.

²⁹ Che biejn diajg rebejn näjza reni rusquijx impuest rextidxni xcuent Juan, gucbeereni rujn Dios yälgujhtissa'c, sa'csi abatiobnis Juanreni. ³⁰ Niluxh refarisee näjza rebejn ni ruluii leii gulälazreni nani niujn Dios par laareni, sa'csi direni nicäjb nutiobnis Juanreni.

³¹ Räjpza Jesús lojreni:

—¿Xhocha guiniä najc rebejn nani tre' naj? ³² Najczeni si'c rebixbäz nani rguijt nez lo guii cadre rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” ³³ Sa'csi che biääd Juan, dini ni-

auxha't, dizani niä' bin, luxh räjpju: "Yu' bendxab lastooni." ³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc räjpju: "Bahuilaaare, dade're rauxha't, rä'zani, najcni xamiigw rebeñdojl näjza rebejn ni rusquijx reimpuet xten gubier." ³⁵ Ni'cni xcäl'najn Dios huenliisi rienloj loj dzuun ni rujn rebejn ni najn.

Jesús huij rolizj Simón ni najc farisee

³⁶ Dxejc tej refarisee gunii loj Jesús, räjpni:

—Jiäadlu rolizä te guidaunu.

Dxejc huij Jesús rolizjni, ro'c gurejni lo mex. ³⁷ Rbäjz te gunagubejx lo guejdxga. Che biejn diajgni satajw Jesús rolizj fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. ³⁸ Che biu' gunaaga, bidzujjni lo ni' Jesús, guslojni cayoonni. Con nisbee caguiibni ni' Jesús, dxejc caguspijdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús. ³⁹ Che bahuii farisee ni gurejdx Jesús rolizjni, recosre, bejn ni xhigab: "Palga gulii najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunadojduxh." ⁴⁰ Dxejc gunii Jesús loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad mastr.

⁴¹ Dxejc räjp Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel. ⁴² Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidre lojni, räjpni:

—Rchaloä bejn ni nazäabru lojni.

Dxejc räjp Jesús:

—Laaca rniilu.

⁴⁴ Dxejc gubiré Jesús, bahuiini loj gunaaga. Dxejc räjpni loj Simón:

—Bahuii loj gunaare! Che biu'ä rolizjlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcti.

⁴⁵ Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. ⁴⁶ Dilu nusäl se't yecä, niluxh laani basäljni se't ni rlianexhduxh ni'ä. ⁴⁷ Ni'cni rniä lojlu, dojl xten gunaare, luxh xhidalduxh najczeni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojlni, guxiiza sanälajzreni Dios.

⁴⁸ Dxejcti räjpni loj gunaaga:

—Agubicaj rextojllu.

⁴⁹ Dxejc rebejn ni sobga' lo mex con laani, che biejn diajgredi rediidxre, gusloj canii lo sa'reni, räjpni:

—¿Chuchani'c najc niguiire, ni'cni rudzucajlini xtojlni bejn, ä?

⁵⁰ Räjp Jesús loj gunaaga:

—Agujaalu lo xtojllu sa'csi ahuililajzlu; huij naj, bas-cuedxi lajzlu.

Regunaa ni gucnäj Jesús

8 Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcäl'nibee Dios loj rebejn. Sanäni rexpejn pacni ² näjza gatii gunaa ni abasiajcti, agulääni rebeñxab lastooreni, näjza basiajcti xcäl'guijdxreni. Tejni laa Marii ni laaza Magdalen, ni gulää Jesús gajdz bendxab neñ lastooni. ³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquiinreni.

Xcuent bejn ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

⁵ —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudaajwreni. ⁶ Yu'za lajt bitejb binijga neñ reguij cadro xheti xhidajl yuj. Che gulejn binijga, gubidzgjajcti sa'csi xheti xcojp ro'c. ⁷ Yu'za lajt bitejbni nez neñ reyaguejch. Che gulejn, di reyaguejch nusaan niroob gäjlgä. ⁸ Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

—Che gulujx guniini scree, dxejc guniini dip räjpni:

—Palga sajc gucuadijgtu rediidxga, colcuadi-agsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejn pacni lojni räjpni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yäl'najn te gacbeetu reyäl'xhiga'tz xten xcäl'nibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadijgredi, direni gacbesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Räjpzani:

—Scree säloj cuentre, rebini najc si'c xtidx Dios.

¹² Binij ni biajb lo nezyuj najc si'c rebejn ni rucadijg xtidx Dios. Dxejc riääd bendxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³ Binij ni biajb neñ reguij najc si'c rebejn ni rucadijg xtidx Dios, rbaalajzreni; per sa'csi xheti xlobaareni, näljznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. ¹⁴ Binij ni biajb neñ reyaguejch najc si'c rebejn ni rucadijg xtidx Dios, per laj ni sanuureni xnejzreni, rijia'nreni lo recos guedxliuj, lo yäl'nasa'c ni ruhuiireni, näjza rujnreni si'ctis ni rlazj tiejxhreni. Reni'c

rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵ Binij ni riabj lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yálnasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas

(Mr. 4:21-25)

¹⁶ Rájpzani:

—Ruti te bejn ni rucuaguuj te bajl dxejc rusäuni te caj yejc bajlga, dizani gusuynini dejt te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. ¹⁷ Xhet yu'di ni yuchet-zu'tzdi ni di guidzujñ dxej guiluini; xhet yu'diza ni naga'tz naj ni di guidzujñ dxej gacbee bejnñi.

¹⁸ Ni'cni colcuadiagsa'c diidx; sa'csi guiraa rebejn ni rajp yälracbee, sajprureni yälrajn. Luxh reni di ninuu nucuadiajg xtidx Dios, lojni sibicaj naj ni abacuadiajg-ni, ni rchaloni najñni.

Xnan Jesús con rebejtzn

(Mt. 12:46-50; Mr. 3:31-35)

¹⁹ Dxejc bidzujñ xnan Jesús näjza rebejtzn cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. ²⁰ Dxejcti huisa'n te bejn diidx loj Jesús, rájpni:

—Xnan guejblu näjza rebejtz guejblu suga' rolä', luxh rlajzreni fiireni lo guejblu.

²¹ Badzu' Jesús diidxre lojreni, rájpni:

—Xnanä näjza rebetzä najc rebejn ni rucuadiajg, ni ruzoobza xtidx Dios.

Basiacdx Jesús te beduxh

(Mt. 8:23-27; Mr. 4:35-41)

²² Te dxej biu' Jesús näjza rexpejn pacni neñ te barcw. Dxejc rájpni lojreni:

—Colcho' stelaad ro' nisre.

Basyu'reni barcw lo nis, sä'tireni. ²³ Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jääz barcwga lo nis. ²⁴ Dxejcti huicuäänreni Jesús, rájpreni lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga näjza lo nis ni cayäsjaa. Dxejc guläjz bejga, guredxiza nisga. ²⁵ Dxejc rájpni lojreni:

—¿Con xcälrlililajztu, ä?

Per laareni bidxejbreni, bidxeloduxhreni, canabdi-dixreni lo sa'reni:

—¿Chuni'c najc niguiire te rnibeeni bej näjza nis, luxh rusobdiajg bej näjza nis xtiidxni?

Te beñ Gadara ni guyu' rexsprit beñdxab lastooni

(Mt. 8:28-34; Mr. 5:1-20)

²⁶ Bidzujñtirenini lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús neñ barcw baläjni lo yuj, gubig te bejn ni siääd guejdxga

lojni. Agujc xchej yu' rebeñdxab neñ lastooni. Dini gacw xhajbni, dizani cuääz neñ yu', alga rbäjzni cadro yu' rebaa. ²⁸ Che bahuiini loj Jesús bazuxhijbni nez lojni, guredxa'ni rájpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebeñdxabga neñ lastoo bejnre. Agujc xchero cazob rni-aaz rebeñdxabga bejnnga ruliib rebejn ni'ni, ñaani con cadenguiib te guilibdzu'tzni, te xhet gundini bejn. Niluxh laani rutiugya'ni recaden, dxejc rebeñdxabga rinärenini nez lo reyubijdz. ³⁰ Jesús gunabdiidx lojni, rájpni:

—¿Chu laalu?

Dxejc badzu'ni diidxre loj Jesús rájpni:

—Legión najc laä.

Si'c guniini sa'csi xhidalduxh najc rebeñdxab ni yu' neñ lastooni. ³¹ Dxejc gunabduxhreni loj Jesús na'c guxhalsacnirenini cadro biriireni. ³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebeñdxabga loj Jesús te gusaanni jiu'reni neñ recuchga. Che cuäjb Jesús, ³³ birii rebeñdxabga neñ lastoo dade'ga, biugajcreni neñ recuchga. Che biu'reni neñ recuch, baxuñ recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxuñ reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo rebeñ rench. ³⁵ Dxejc biädhuui rebejn xhini'c gujc ro'c. Che bidzujñreni cadro suga' Jesús, bahuiireni loj bejn ni birii beñdxab lastooni. Sobga'ni cuä' ni' Jesús, najcwni xhajbni, luxh xhetru rajcdi yejcn; dxejc bidxeb-duxh rebejnnga. ³⁶ Sas reni bahuijloj xho gujcn, bijreni diidx xho basiajc Jesús bejn ni guyu' rebeñdxabre lastooni. ³⁷ Dxejc guiraa rebeñ Gadara näjza reguejdx ni tre' nejzga, gunabreni jiunejz Jesús ro'c sa'csi cadxeb-duxhreni. Ni'cni biu' Jesús neñ barcw te gubisacni nejz cadro siäädni. ³⁸ Dade' ni birii rebeñdxab lastooni gunabni lo Jesús gusaanni chanajlnini, niluxh Jesús gubibee jia'nni, rájpni lojni:

³⁹ —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo näjza te gunaa ni gudajn xhajb Jesús

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni. ⁴¹ Dxejc bidzujñ te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴² sa'csi yu' tejtis xindxa'pni. Yu'ni tzubito'p ijz, luxh cayacxhuuni, ameerli guetni. Lałsi sää Jesús rolijzni, birinajl xhidalduxh bejnñi, cataälirenini.

⁴³ Loj rebejnnga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtñi guiraa xhixtenni cua' renani rujn remeed. ⁴⁴ Gubig gu-

naaga dejt Jesus te gudajni ro' xhajbni. Lagajc dxejc biacgajcni.

⁴⁵ Dxejcti gunabdiidx Jesus rajpni:

—¿Chuni'c najc ni gudajn narä, ä?

Guiraa rebejn rajp:

—Dinu gan.

Rajpza Pedr:

—Mastr, ni yu'lu galäi reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶ Rajppac Jesus lojni:

—Yu' chu gudajn narä, sa'csi gucbeä yu' chu basiajc xcälrnibeä.

⁴⁷ Che gucbee gunaaga anajn Jesus gudajni xhajbni, bidxejbni, racsejlini gubigni loj Jesus, bazuxhijbni lojni. nez loj guiraa rebejn rajpni xhicuent gudajni xhajbni näjza xho biacgajcni.

⁴⁸ Dxejc rajp Jesus lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ Lañi canii Jesus si'c bidzujn te bejn ni siääd rolijz Jairo, ni rnibee te guidobäz. Rajpni loj Jairo:

—Agujt xindxa'plu. Na'cru gutajllu xtzuun Dad Mastr.

⁵⁰ Che biejn diajg Jesus rediidxga, rajpni loj Jairo:

—Na'c guidxejblu. Huililajzti te jiac xindxa'plu.

⁵¹ Che bidzujnreni rolijzni, xtebtis Pedr, Jacobo, Juan näjza xczujn dxape'ga biunäjni neñ yu'ga. Peta rebejn ni siädnañni bia'nreni rolä'. ⁵² Cayonduxh guiraa rebejn ni sobga' neñ yu'. Dxejc Jesus rajp lojreni:

—Na'c roontu, gajd dxape're guet, nagayejstisni.

⁵³ Alga baxhiznäjnreni, sa'csi anajnreni agujt dxape'ga. ⁵⁴ Dxejcti gunaaz Jesus naa dxape'ga, dip guini, rajpni lojni:

—¿Dxape', huistie!

⁵⁵ Dxejc gubañsac dxape'ga, huistiegajcni. Dxejc gunibee Jesus gudeedreni xhi gauni.

⁵⁶ Bidxeloduxh rexuczajni. Per gunibee Jesus na'c güireni diidx xhini'c gujc ro'c.

Ruxhal Jesus guitzubitio'p rexpejnacni

(Mt. 10:5-15; Mr. 6:7-13)

9 Batie' Jesus guitzubitio'p rexpejnacni te badeedni yälrnibee lojreni te cuääreni reben dxab lastoo rebejn, näjza te gusiajcreni reben racxhuu. ² Baxhajñireni te gusule'reni diidx xcuent xcälrnibee Dios näjza te gusiajcreni reben racxhuu. ³ Dxejc rajpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. ⁴ Chutis rolijz bejn cadre guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolijzreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni reben racxhuu cadrotis rdzujnreni.

Xho gujt Juan ni rutiobnis

(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesus, guyu'ni yärsia', dini gan xho gunni xhigab, sa'csi yu' reni canii laa Juan ni agubañsac lo reben gut. ⁸ Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubañsac. ⁹ Per rajp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

Bayaan Jesus gaii miñ bejn

(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejnacni, bijreni diidx loj Jesus xhini'c bejnreni. Sas huinä Jesusreni te lajt cadre ruti bejn, gajxh te guejdx ni laa Betsaida. ¹¹ Che gucbee rebejn caro sääreni, huinajlnreni bidxälreni. Che siädreni lojni huichaglojnreni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

¹² Che gusloj cayäaz gubijdx, gubig rexpejnacni loj Jesus, rajpreni lojni:

—Gojs loj rebejnre, agojl jiiireni te chatiilreni xhi gaureni, näjza cadre tedreni guxhijñ lo rerench, neñ reguedxbäz, sa'csi ree xhet yu'di.

¹³ Dxejcti rajp Jesus loj rexpejnacni:

—¿La'tu colgudeed xhi gaureni!

Dxejc rajpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau reben xhidajlre.

¹⁴ Luxh najc rebejn ga si'cti gaii miñ niguii. Dxejc rajp Jesus loj rexpejnacni:

—Colyejtz lojreni cuereni xcua-xcuareni, si'cti tiubitzugajreni te cuaa.

¹⁵ Si'c bejnreni, sas gurej guiraa rebejn ga si'c. ¹⁶ Dxejc cua' Jesus gaii yätxtiilga näjza tio'p bäjlga, guläsn lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlga, dxejc sanuutis badeedni loj rexpejnacni te gudisreni loj rebejn ga. ¹⁷ Guiraa reben xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

Gunii Pedr Jesus najc Crist

(Mt. 16:13-19; Mr. 8:27-29)

¹⁸ Te dxej lañi cabedx-canab Jesus lo Dios, xtebni näjza rexpejnacni, gunabdiidxni lojreni, rajpni:

—¿Chuni'c rnii rebejn nacä?

¹⁹ Dxejc rajpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubañsac.

²⁰ Dxejc gunabdiidxni lojreni, rajpni:

—¿La'tu a? ¿Chuni'c rniitu nacä?

Dxejc räjp Pedr lojni:
—Luj najclu Crist Xi'n Dios ni cabääznu.

Jesús rnixгаа xho guetni
(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpni:

—Na'c gäbtu si'c lo rebejn.

²² Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibansacä ni riojn dxej.

²³ Dxejc räjpni loj guiraareni:

—Palga chu tejtü rlaiz guirinajl narä, nanab jällajzni xhixtenni, te guixe-guixee guntisni nani gudedä gunni.

²⁴ Sa'csi nani rlaiz guiniazdzu'tzni xcäl'nabajnni, sunijtni yäl'nabajñ lo Dios; luxh nani runijt xcäl'nabajnni xcuent xtidä, sica'ni yäl'nabajñ par tejpas. ²⁵ Sa'csi çxhi gaan gun te bejn palga xca'ni guideb guedxliuj, luxh gunijtni xcäl'nabajnni lo Dios? ²⁶ Niluxh nani guituinäj narä näjza xtidä, sigajcza narä, Xi'n Dios ni gujc Niguii, situinääzani cheni jäälä si'c reii guideb yäl'rdimbicha' xten Xtadä näjza rexanglni. ²⁷ Guliiipac rniä lojtu, yu' gaii reni suga' ree, ni di guet, suhuixgaareni xcäl'rnibee Dios.

Bachaa xho rluijoj Jesús
(Mt. 17:1-8; Mr. 9:2-8)

²⁸ Gudejdti xhujñ dxej gunii Jesús diidxre, dxejcru huinä Jesús Pedr näjza Jacoob näjza Juan, huijreni jiaa yejc te dajn te guredx-gunabni loj Dios. ²⁹ Lałni cabedx-canab Jesús lo Dios, bidxaa xho ruluii lojni; dxejc xhabjni gujc nolbäj, rdimbicha'lini. ³⁰ Biricajza tio'p dade' caninäjrenini. Redade'ga najc toMoisés näjza Elías.

³¹ Rdimbicha'za redade'ga. Caninäjreni Jesús xcuent xho guetni guedx Jerusalén. ³² Luxh Pedr näjza resa'ni guyuduxh bacał lojreni; che bire'ch bacał lojreni bahuiireni lo yäl'rdimbicha' xten Jesús näjza loj guiro'p redade' ni caninäjni. ³³ Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lałni caniini si'c, bire' te za gusloj cayäjt yejcreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bi-jreni diidx xcuent ni bahuiireni ro'c.

Basiajc Jesús te biuux ni guyu' beñdxab lastooni
(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejn cabäjz Jesús. ³⁸ Dxejcti te dade' ni nadxaag rebejn-ga guredxa'ni, räjpni loj Jesús:

—Mastr, balaslajz narä, gudahuui xi'nä, sa'csi xtebtis-ni najcni xinganä. ³⁹ Luxh beñdxab rniaazni, sas rus-cuedxa'nini, rajcni si'c yäl'guidxbej, rbääni bitzuñ ro'ni, rusacsíduxhnini, luxh dini gusaanni. ⁴⁰ Agunabä loj rex-pejñpaclu nibääreni beñdxabga, luxh di niajcdini.

⁴¹ Dxejc badzu' Jesús diidxre, räjpni:

—ıBejn ni di chalilajz, beñguijdx! ¿Gucli chunäätu, gucli gunä huant la'tu? ıGudanä xi'nlu ree!

⁴² Dxejc che cabig biuuxga lojni, basäl'ta' beñdxabga biuuxga lo yuj, sas gusloj cayajcni si'c yäl'guidxbeduxh. Dxejc gudidxa' Jesús loj beñdxabga, basiacgajcni biuuxga, dxejc badeednini lo xtadni. ⁴³ Guiraa rebejn bidx-eloduxh yäl'rnibeduxh xten Dios.

Rnii Jesús stehuält xho guetni
(Mt. 17:22-23; Mr. 9:30-32)

Lałni cadxeloj rebejn lo recos ni bejn Jesús, räjpni loj rexpejñpacni:

⁴⁴ —Colcuadiajgsa'c rediidxre, na'cza jällajztureni, sa'csi sutedreni narä Xi'n Dios ni gujc Niguii ladzñaa rebejn.

⁴⁵ Niluxh di rexpejñpacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzarenini niniabdiidxreni loj Jesús xhi säloj rediidxga.

Chuni'c sajcru
(Mt. 18:1-5; Mr. 9:33-37)

⁴⁶ Guslojza rexpejñ Jesús canabdiidx lo sa'reni:

—¿Chuchani'c sajcru loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸ räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhał narä. Ni najc maazru nadolajz lojtu, ni'c najc ni sajcru.

Nani di guiniyay nuurnu, xladnu yu'ni
(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpendxab neñ lastoo bejn con xcäl'rnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxojtuni, sa'csi nani di guiniyay nuurnu, xlaadnu yu'ni.

Jesús gudidxa' loj Jacoob näjza Juan

⁵¹ Che siäddzujñ redxej ni chää Jesús xhaguibaa, bejni xhigab chääpacni guedx Jerusalén. ⁵² Baxhałni gaii bejn gunijd lojni chääreni te guejdx xten Samaria te satiilreni cadro jia'nreni ro'c. ⁵³ Luxh rebejn samaritan di rlaizreni gudedlaareni te lajt cadro jia'nreni, sa'csi najnreni chääreni guedx Jerusalén. ⁵⁴ Che biejn diajg Jacoob näj Juan, tio'p xpejñpacni, si'c, sas räjpreni loj Jesús:

—Dad, ¿La rlaizlu guinibeenu jiäjt guiboo xh-aguibaali te guze'cni guiraa rebeñguedxga si'cni bejn Elías?

⁵⁵ Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c nibee lastootu. ⁵⁶ Sa'csi narä Xi'n Dios ni gujc Niguii dina niälä te gudzucaä xcälñabajn rebejn. Narä biälä te guslaäreni lo dojl.

Dxejcti huijreni garenca guejdx.

Reni rlaiz nirinajl Jesús

(Mt. 8:19-22)

⁵⁷ Lañi sääreni lo nezyuj, biääd te bejn gunii loj Jesús, räjpni:

—Dad, narä rlaizä jiädnaälä guejblu cadrotis cháä guejblu.

⁵⁸ Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpi-tiääreni, niluxh narä Xi'n Dios ni gujc Niguii, dina gapä nicla te lajt cadro guscugä yecä.

⁵⁹ Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxaä xtaädä, dxejcru jiädnaälä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c beñgut, resabengutreni. Per luj, huij, huisule' diidx xcuent xcälñabee Dios.

⁶¹ Dxejc räjp steeni lojni:

—Dad, rlaizä jiädnaälä, niluxh basanxgaä chasadixä resa'ä ni tre' rolizä.

⁶² Dxejc räjp Jesús lojni:

—Nani ruzuj ñaani yejc garaad, dxejc rudzuré lojni ruhuiini nez dejtzní di gacdi gunni dzuun lo xcälñabee Dios.

Ruxhal Jesús regayonbitzoo

10 Che gulujx reni'c, gule Jesús gayonbitzoo bejn, baxhalñireni tio'pgajreni te basnijdñireni lojni loj reguejdx cadro nanab tedni. ² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuan xten cose'ch te guxhalñi xhidajlru bejn ni gun dzuun gutie' xcose'chni. ³ Colchäj la'tu; colhuii xho ruxhalä la'tu si'c xiil galäi recuyo't sa'csi sunnäjreni la'tu si'ctisni rlaizreni. ⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. ⁵ Cheni jiu'tu roliz te bejn, ganiddoo colye'tz: "Sucedxilajz reni rbäjz ree." ⁶ Palga najcni te bejn ni rdxaglajz yälrbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu.

⁷ Coljia'n lagajc roliz bejn cadro guidzujntu. Ro'c coltajw, colyá'za xhitis ni guniidxreni, sa'csi nani rujn dzuun, riäl xca'ni xcuent dzuunga. Coljia'n tejtis lajt dxejtis ni chutu lo guejdxga. ⁸ Xhitis te guejdx ni jiu'tu, palga jiu'ureni la'tu, colgajw xhitis ni guniidxreni lojtu. ⁹ Colgusi-ajc rebeñracxhuu ni yu' ro'c, colye'tz lojreni: "Abidzujngajx xcälñabee Dios." ¹⁰ Palga jiu'tu te guejdx cadro

di rlaizreni gucuadiajgreni xtiidxtu, colrii lo nezyuj, ro'c colye'tz lojreni: ¹¹ "Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxtu. Colgacbee dee, abidzungajxh xcälñabee Dios lojtu." ¹² Ni'cni nñiliápac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist

(Mt. 11:20-24)

¹³ Räjzpni:

—¡Probe'tu beñ guedx Corazín! ¡Probe'zatu beñ guedx Betsaida! Paru nuhuii rebeñzajt ni gubajñ guedx Tiro näjza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzarení lo cobdäj si'c te seen abasiechlajzreni. ¹⁴ Che gun Dios fis rextolj rebejn guedxliuj, guxiiru gac xfis Dios lo rebeñzajt ni gubajñ guedx Tiro näjza Sidón. Fisroru gun Dios reguedx Corazín näjza Betsaida. ¹⁵ Luxh luj guedx Capernaum, rchalolu siäjslu xhaguibaa, alga siajblu gabijlli, cadro gaclu fisro xten Dios.

¹⁶ Räjzpni lo rexpejñpacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

Rbi' regayonbitzoo

¹⁷ Che gubi' regayonbitzoo bejn nani baxhal Jesús, rbaduxh lajzreni, räjpreni:

—Dad, näjza rebeñdxab rusobdiajg xtiidxtu che rusä'tnu lajlu.

¹⁸ Räjp Jesús lojreni:

—O'n. Ni'cni narä bahuiä che gunijt xcälñabee beñdxab, bitejbni xhaguibaa si'c bianij xten guzii.

¹⁹ Colgacbee. Narä runidxä yälñabee lojtu te guläjtu yejc bäl näjza yejc naxejb; runidxäza yälñabee te guntu gaan lo xcälñabee beñdxab. Xhetliidi gun daan la'tu. ²⁰ Na'c guibalajztistu sa'csi rusobdiajg rebeñdxab xtiidxtu; colguibalajzru sa'csi acuaj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznäj Jesús Sprit Dxañ xten Dios, dxejc räjpni lo Dios:

—Rliä'pä xpala'nlu Xtaädä ni nibee xhaguibaa näjza guedxliuj, sa'csi bacua'tzlu xnezyujlu lo rebeñ nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtaädä, sa'csi si'c rlaizlu gunlu.

²² 'Guiraa recosre abaniidxtu loä Xtaädä. Dadtis najñ chuni'c najc Xi'nñni, rutru najñdi chu najcni. Rutza najñdi chuni'c najc Guejblu Xtaädä, xtebtis narä ni najc Xi'nlu, con rebejn ni rlaizä gumbee luj.

²³ Dxejc bahuii Jesús loj rexpejñpacni, räjpni lojtisreni:

—Chicbaa la'tu näjza renani ruhuii guiraa nani cahuioltojtu. ²⁴ Sa'csi nñiliä lojtu, balti redade' ni gunii xtidx Dios galoo, baltiza rereii rlaiz nuhuiireni guiraa ni

cahuilojtu, niluxh direni nuhuiini. Rlajzreni niejn diajgreni rediidxre ni cayejn diajgtu, luxh di diajgreni niejnni.

Xcuent te beḡhuen ni siääd Samaria

²⁵ Dxejc huisulii te mastr xten leii, huininäjni Jesús, rlajzni nuxhiidni Jesús lo xtiidxni, gunabdiidxni lojni:
—Dad, Mastr, ¿xhini'c nanab gunä te guibaḡnää Dios par tejpas?

²⁶ Sas räjp Jesús lojni:

—¿Xhini'c caj lo guijtz xten leii? ¿Xho roḷḷuni?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinäälajzza resa'lu si'ctis ni sanälajzlu lagajc luj.

²⁸ Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yälḡnabajḡre.

²⁹ Per mastr xten leii, rlajzni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

³⁰ Dxejc räjp Jesús lojni:

—Te beḡ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajḡreni guiraa xhixtenni, näjli xhajbni ni najcwni. Sas gudijḡrenini, basa'nrenini ro'c, guxii cayäädx nugu'trenini.
³¹ Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. ³² Gudejdza te levita, bejḡ ni rujnza dzuun neḡ guidoo. Che bidzujḡni cadro naga' bejḡga, gudejdni stelaad, sä'tini. ³³ Dxejcti te beḡ Samaria, laḷni sääni bi-aj, gudejdni nezyujga, bidzujḡni cadro naga' bejḡga. Che bahuiini lojni, balaslajznini. ³⁴ Gubigni loj bejḡga, basälḡni se't näjza bin loj bejḡ ni nadxälguijdx, dxejc batejbnini te la' lajd. Dxejc bascuijbnini dejtz lagajc xmanni, huinänini cadro rudedlaareni yu', ro'c cuanäjnini. ³⁵ Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanäläa bejḡre; palga gunijtrulu, siguixätini lojlu che guibi'ä.”

Sä'tini.

³⁶ Dxejc räjp Jesús lo mastr xten leii:

—¿Chu tej lo guidxoḡ rebejḡga najc si'c sa' xten dade' ni biajb ladzḡnaa gubaan?

³⁷ Dxejc räjpni loj Jesús:

—Ni balaslajz bejḡga.

Dxejc räjp Jesús lojni:

—Huij te sigajcza chayejnlu.

Bidzujḡ Jesús rolizj Mart näjza Marii

³⁸ Laḷni huinuu xnezyujni, bidzujḡni te guejdx. Ro'c bidxaagni te gunaa ni laa Mart ni huinänini rolizjni.

³⁹ Yu' te bäjl Mart ni laa Marii, luxh laani gurejni cuä' ni' Jesús te cacuadiajḡni xtiidxni. ⁴⁰ Mart cagusquejḡni cayujḡni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä re-mandaad? ¿Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, ⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

Rului Jesús xho guiniabni lo Dios

(Mt. 6:9-15; 7:7-11)

11 Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejḡpacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejḡpacni.

² Dxejc räjp Jesús lojreni:

—Che cuedx-guiniabtu lo Dios, scree coḷḷni: Xtadnu ni yu' xhaguibaa, suchä'p xpala'nlu, sujiaäd xcälḡrnibeelu. Sugac si'ctisni rlajzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni rquiinnuni.

⁴ Basiälḷ lajzlu redoḷḷ xtenu si'cni riälḷ lajznu redoḷḷ ni rujn rebejḡ loonu.

Na'c gusaanlu jiajbnu lo xcälḡrnibee beḡdxab.

Basḷaa nuurnu lo doḷḷ.

⁵ Dxejc räjpza Jesús lojreni:

—Paru tejt yu' te xamiigwni, luxh guidzujḡni rolizjni garol yääl, gäbni: “Xamigwä, banidxlaa choḡ yätxtiil, ⁶ sa'csi bidzujḡ te xamigwä rolizä ni bazaj biaj, luxh xhet ra'pädi te gudedä xhi gauni.” ⁷ Xhixh sinii ni naga' neḡ xyu'ni, gäbni: “Na'c riädte'chlu bacaḷ loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.” ⁸ Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacaḷni. ⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. ¹⁰ Sa'csi chutis ni rniab, rca'ni nani rniabni; chutis ni rguuil xhi cos, rdxälḡnini; nani rusejz rolä', suxhalzarenini lojni.

¹¹ 'Paru tejt yu' ni najc dad, jiaäd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäjl, ¿la sudeedtu te bäl, ä? ¹² O palga guiniabni te tzutbejt, ¿la sudeedtu te naxejb, ä? ¹³ Palga la'tu, ni najc beḡdoḷḷ, rajc rudeedtu cosa'c loj rexi'ntu, aticaxh Dios ni yu' xhaguibaa sudeedni Sprit Dxan xtenu loj renani rniabni lojni.

Rucuaquijreni Jesús, rniireni rajpni yälḡrnibee xten beḡdxab

(Mt. 12:22-30; Mr. 3:19-27)

¹⁴ Gulää Jesús te beḡdxabgop lastoo te bejḡ. Che birii beḡdxabga lastoo bejḡga, guslogajc canii bejḡga, dxejc bidxeloduxh rebeḡ xhidaalga. ¹⁵ Dxejc yu' reni räjp:

—Niguiire rbää rebeḡdxab con yälḡrnibee xten Beelzebú ni rnibee loj rebeḡdxab.

¹⁶ Sgaiireni rlajz guquiilrenini, ni'c canabreni gunni te seen ni siääd xhaguibaali. ¹⁷ Niluxh laani gucbeeni xhi xhigab cayujḡreni dxejc räjpni lojreni:

—Xhitis gubieer ni rlia' sa'ni lo sa'ni, luxh tiḷḷnäj te cuaani stee cuaaga, di gaḷḷaa sinijt gubierga lo

guedxliuj. Palga te famiļ rdilnāj lagajc sa'ni, di gačļaa sinitloj famiļga. ¹⁸ Palga guiliä' sa' rebeņdxab, ģho mood chanuu xcäļrnibeereni? Dee rniä sa'csi la'tu rniitu narä rbää rebeņdxab con lagajc yäļrnibee xten Beelzebú. ¹⁹ Palga si'c najcni, ģchuni'c rudeed yäļrnibee loj rexepeņtu te rbääreni beņdxab? Lagajc laareni ruluui xhet laadi rujntu xhigab. ²⁰ Palga narä rbää rebeņdxab con xcäļrnibee Dios, ni'cni ruluiloj abidzujņ xcäļrnibee Dios lojtu.

²¹ 'Cheni suga' te beņdaan, ca'ni guuib, canājni roli-jzni, rutliidi ruhualdi rehxixtēni. ²² Niluxh che jiaäd stee ni nadipru lo beņdaanga, rudxagdijņnini, rujņni gaanni, dxejc rudzucajni xquibni ni badeed yäļbeņdaan lojni, dxejc sajc chanāni guiraa rehxixtēni.

²³ Reni xhet yu'di xladä, rdxe'chreni loä. Ni di gutopņāj narä, rutie'chni.

²⁴ Rājzani:

—Cheni rii te beņdxab neņ lastoo te bejņ, ricansajni nez lo reyubijdz, caguilni cadro gusilajzni. Che cad rdxäldini, rujņni xhigab, naani: "Guibisacä rolizä cadro biriä." ²⁵ Cheni guibi'ni, rdxälni lastoo bejņga si'c te yu' ni entis gulujx bilioobni, suchesa'cni. ²⁶ Dxejcti rixiini sgajdz beņdxab ni rujnrū latsiaj lojni. Dxejc riu'reni neņ lastoo bejņga, dxejc nalasru ria'n bejņga loj ni gujčni galoo.

Chicbaa renani riu xtidx Dios

²⁷ Laļ ni canii Jesús rediidxre, te nane' ni yu' lo rebeņ xhidaalga dipli guniini, rājņni:

—ĶChicbaa nan ni biädñälu guedxliuj! Chicbaaza nani basļaa ļuj.

²⁸ Luxh laani rājņni:

—Xhet si'cni najcni; chicbaaru rebejņ ni rucuadiajg xtidx Dios, ni ruzoobza xtiidxni.

Rebeņguijdx rniab te milagwr si'c te seen

(Mt. 12:38-42; Mr. 8:12)

²⁹ Sanuutis cadojņ rebejņ gabi Jesús, dxejc guslojni caniini, rājņni:

—Rebejņ ni yu' ņaj beņguidxduxhreni, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰ Lagajc si'c ni gujč Jonás te seen loj rebejņ guedx Nínive, si'cza narä, Xi'n Dios ni gujč Niguii, gacä te seen lo rebejņ ni nabajņ ņaj. ³¹ Cheni guidzujņ dxej ni gac fis sistie te nane' ni gujč rein lo reyuj ni tre' lad-bājgw, sucuaquijni rebejņ ni tre' guedxliuj ņaj sa'csi laani biriini zitduxh te bacuadiajgpacni yäļnajn xten Salomón. Ree suga' galäiitu tej ni sacduxhru lo Salomón, ³² luxh ditu chalilajz xtiidxni. Rebejņ ni gulājz guedx Nínive sisiunāj rebejņ ni nabajņ ņaj neņ redxej ni gac fis. Dxejc sucuaquijreni rebejņ ni nabajņ ņaj sa'csi laareni, che huināli Jonás xtidx Dios lojreni, basiechļajzreni, basa'nreni xtojļreni. Ni suga' lojtu ņaj sajcruni lo Jonás, niluxh ditu jiu xtiidxni.

Ni rusanij xcäriejņ bejņ

(Mt. 5:15; 6:22-23)

³³ Rājzani:

—Rut rucuaguījdi te bajļ, te gusujņni te lat xhiga'tz, niclaza neņ te caļ. Susujņni bajļga jiaa te rajč ruhuisa'c chutis ni riu' neņ yu'. ³⁴ Baloļlu najc si'c bajļ xten xcäriejņlu. Palga ruhuisa'c baloļlu, guideb xcäriejņlu yu' si'c bianij. Palga rajč baloļlu dilu fisa'c, guideb xcäriejņlu yu' si'c lo nacājy. ³⁵ Gunatiro te di gac xpiani-jlu yäļnacājy. ³⁶ Palga guideb xcäriejņlu yu' bianijtis, xheti te lajt nacājy, sajc fisa'clu guira'ti, si'c najc che rusanij te bajļ neņ yu'.

Rucuauj Jesús refarisee nājza rebejņ ni najn leii

(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajņ te farisee Jesús chääni rolijzni te chatajwñi. Sä'tireni. Che biu' Jesús, gurejņi lo mex. ³⁸ Bidxelōj fariseega sa'csi dini niguiib ņaani si'c pac caļ lo xleii Moisés gunreni te gaureni, sa'csi rujņreni xhigab si'c racnayareni lo Dios. ³⁹ Dxejcti rājņ Jesús lojni:

—La'tu ni najc refarisee, rguibtu nez dejtz te bas nājza te pla't, niluxh la'tu guidxa lastootu yäļgubaan nājza yäļlatsiaj. ⁴⁰ ĶBeņ nadduxh! ĶLa ditu gacbee? Nani benchee dejtzni, bencheeza neņni. ⁴¹ Coļyajc nadolajz, coļyacnāj rebejņ con ni rniitu, dxejc guiraa recos sajc naya par la'tu.

⁴² 'ĶProbe'zatu, beņ farisee! Rudeedtu lo Dios tej lo teja tzuu ni rajptu: rudeedtu bedzxtiil nājza ruud, nāj guiraa recuane' ni rajptu lo le', niluxh ditu jiu xcäļguxhtis Dios nājza xcäļrinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ 'ĶProobza la'tu rebeņ farisee! Rchagļajztu rbejtu lo reyagxhil xten rebejņ ni sajc neņ reguidobäz; rchagļajztu saru rñii rebejņ "xchan Dad" lojtu che rijtu lo guii.

⁴⁴ 'ĶProbe'zatu! La'tu najctu si'c rebaa ni di guzeņ, rsiaj rebejņ yejc cadro naga'reni luxh direni gan.

⁴⁵ Dxejcti badzu' tej rebejņ ni ruluui leii diidxre lojni, rājņni:

—Dad mastr, che rñiilu rediidxre, rniyajlu nuurnu.

⁴⁶ Dxejc rājņ Jesús lojreni:

—ĶProbe'za la'tu rebejņ ni ruluui leii! Sa'csi rñibeetu gun rebejņ recos naganduxh ni najc si'c te cargw naduxh ni di gacdi guu bejņ. Luxh la'tu di rļajztu fal'tu-ni nicla con te bicueņabäztu.

⁴⁷ 'ĶProobzatu! Sa'csi runcheetu xpaā redade' ni gunii xtidx Dios galoo, luxh najctu rexajg renani bagu't redade'ga. ⁴⁸ Ni'cni najnpactu xhi gusajcreni, rchagļajz-zatu redzuun ni bejņ rextotadgoldootu; si'cza gunnājtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ 'Ni'cni gunii Dios, sa'csi yuduxh xcäļnajņni, rājņni: "Suxhalä reniguii ni guinii xtidxä nājza reapost, luxh sugu'treni gaiireni, susacsizareni sgaiireni." ⁵⁰ Loj rebejņ ni nabajņ ņaj siniab Dios gudeedreni cuent xcuent

xtiejn guiraa redade' ni gunii xtidx Dios ni bagu'treni cheni guc-cheeli guedxliuj. ⁵¹ Guislojni xtiejn toAbel, näjza xtiejnli Zacarías ni bagu'treni galäii nez lodxan neñ guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'Probe'za la'tu, rebejn ni ruluu lei! Sa'csi rniitu la'tistu rajptu yäl'najn, luxh di rrajztu chalilajztu xtidx Dios, dizatu gusaan chalilajz rebejn ni rrajz chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluu leii näjza refarisee lojni. Dxejc guslojreni canabdi-idxreni xhidalduxh diidx, ⁵⁴ te cagula'tzreni don la sajc guiga'ni lo xhitis te diidx ni guiniini.

Jesús ruluu xcuent levaduur

12 La! ni caniini, bidojp xhidajl mi! bejn ro'c, calaro'li sa'reni. Dxejc gusloj canixgaa Jesús loj rexpejn pacni, räjpni lojreni:

—Colnati levaduur xten refarisee, rusgueereni rniitisreni xhidajl diidx luxh direni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu neñ reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjzpzeni:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Colguidxejb nani che abadzucajni yäl'nabajn rajpni yäl'rniabee gusalni la'tu gabijl lo bajl ni cayejc par tejpas. Ni'csii colguidxejb.

⁶ Anajntu sajc jio' gaii mane' tio'p melbäz, luxh di Dios jiiälajz nicla tej remane'ga. ⁷ Rexquidxejcti abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjzpzeni:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹ Luxh reni di guicäjp rililajzni xtidxä nez loj rebejn, sigajcza sunnäani nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiälajz Dios laani. Niluxh chutis ni guiniyaj Sprit Dxan xten Dios, di Dios gusiälajz xtojlni.

¹¹ 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzujn or ni guiniitu, Sprit Dxan xten Dios suluiini xhini'c guiniitu.

Reyäl'nasa'c rusajb bejn neñ dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yäl'guxhtis o gacä abogaad lojlu, ä?

¹⁵ Dxejc räjpsac Jesús lojreni:

—Colnatiro, colgantzu' te di rrajztistu ga'ptu yäl'nasa'ctis sa'csi xcäl'nabajn bejn dini gac yäl'rajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te beñ rapduxh. Racduxh cose'ch lo rexcäjl-ni. ¹⁷ Dxejcti gusloj bejn xhigab: "¿Xhocha gunä? Dina gapä cadro cucheä recose'ch." ¹⁸ Sas bejn xhigab: "Ananä xhini'c gunä. Gudzulä reyu' cadro rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä." ¹⁹ Dxejcti siniä lo lastoä: "Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz." ²⁰ Dxejc räjp Dios lojni: "¿Beñ najd! Lagajc guxhijre siniabä xaimlu. ¿Dxejca'ca'? ¿Chu xca' guiraa recos ni gulucheelu?" ²¹ Si'c sisiajc guiraa rebejn ni rguiltis xcäl'nasa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

²² Che gojl stera't, räjp Jesús loj rexpejn pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu. ²³ Yäl'nabajn sajcruni lo yäl'rajw; tiejxhni sajcruni lo lajd ni rajcw bejn. ²⁴ ¿Colhuiu rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä? ²⁵ Luxh ¿Chu tejtü palga runduxhni xhigab sajc tioobruni sgarol metr? ²⁶ Palga di gacdi guntu nicla te cosbäz, ¿xhicient ru'tu yärsia' xcuent xhi stee cos?

²⁷ ¿Colhuiu xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Sa-lomón con guiraa xcäl'nasa'cni, dini nisiuchee si'c rsi-uchee reguiiga. ²⁸ Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubi-jdzni, rejcn lo däj, aticaxh Dios suniidx xhi gacw la'tu, i'bejn nani guxii rililajz! ²⁹ Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'. ³⁰ Si'ctis rujn rebenguedxliuj guideb xtijpreni rguilreni rehxicosre. Niluxh xtadtu ni yu' xh-aguibaa anajnni xhini'c rquiintu. ³¹ La'tu colquiiltis xcäl'rniabee Dios, dxejcti laani suniidxzani guiraa recos ni rquiintu.

Yäl'nasa'c ni yu' xhaguibaa

(Mt. 6:19-21)

³² Räjzpzeni:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl'guxhtis lo xcäl'rniabeeni. ³³ Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuixh, te chu yäl'nasa'c neñni xhaguibaa cadro di gubaan jiu'

niclaza xcabäj rexhicos. ³⁴ Sa'csi cadro rajptu xcäl-nasa'ctu, ro'cza yu' lastootu.

Nanab susiṅtu

³⁵ Räjpzani:

—İCol̄susin! İCol̄hualguij rebaj! ³⁶ Col̄yujn si'c remos ni cabäjz guibi' xlam̄reni ni sää te sa', te cheni guibi'ni guxhalgajcreni rolä'. ³⁷ Chicbaa remos ni susiṅ che guibi' xlam̄reni. Rniliápac lojtu, lagajc xlam̄reni sajcwni xhajn sibe'cni rexmosni lo mex, dxejc lagajc laani sudeedni xhi gaureni. ³⁸ Mase guidzujṅni garol yääl, mase guidzujṅni cäyru, palga guidxälni arexmosni susiṅ, İchicbaa remosga! ³⁹ Col̄yacbeepac, paru gacbee baxhuaan xten yu' xhi or̄ guidzujṅ gubaan rolizni, dini gusaan guxhalreni rolizni te cuanreni xhixteni. ⁴⁰ Näjza la'tu col̄susin, sa'csi or̄ ni ditu gun xhigab jiaädni, sidzujṅ Xi'n Dios ni gujc Niguii.

Te mos guijdx

(Mt. 24:45-51)

⁴¹ Dxejc gunabdiidx Pedr lojni, räjpni:

—Dad, İla lootisnu rujylu cuentre o la najcni par guiraa rebejn?

⁴² Dxejc räjp Jesús lojreni:

—İChuni'c najc mos hueen, mos nasin, ni rusannäj xlam̄ni guiraa rexmosni te gudeedni xhi gaureni che gal oor, ä? ⁴³ Chicbaa mosga palga laaca cayujṅni che guibi' xlam̄ni. ⁴⁴ Rniliápac lojtu, lam̄ga sudeed guiraa rexhixteni te xcanäj mosgani. ⁴⁵ Per palga gun mosga xhigab neṅ lastooni: "Saclaa guibi' xlam̄ä", sas guislojni gusacsini resamosni, gunaa sigajc niguii, dxejc guisloj gauni, yäni, soozni; ⁴⁶ sibi' xlam̄ni te dxej ni xhet cabäjzdinini, or̄ ni dini gun xhigab guidzujṅni. Dxejc sii sudeedni te castigwro lojni, sutiäjlni te duu dejtznı dxejc sinibeeni jiini, guidxaagni rebejn ni di gusobdiajg diidx.

⁴⁷ Mosga ni najn xhini'c rıajz xlam̄ni gac, luxh dini susiṅ, dizani guzoob xtiidxni, sutiälduxhrene duu dejtznı. ⁴⁸ Niluxh mos ni di gan xhi rıajz xlam̄ni gac, ni'c rujṅni redzuun ni di xlam̄ni guidxagıajz gac, guxiiru castiigw gacni. Reni rca' xhidajl, xhidajlza riäjı gudeedreni; loj reni rca' yäl̄rnıbeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹ Räjpa Jesús:

—Narä biälä te gucuaguıä guedxliujre; İmalaii alagusloj cayejcni! ⁵⁰ Niluxh nanab tedä te yäl̄robnis ni säloj te trabajwduxh, ni'c cayuduxhä yärsia' cheni chale'lini. ⁵¹ İLa rujntu xhigab biälä te jiaädnaä yäl̄rbeduxh loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. ⁵² Silia' sa' te famil; loj gaiireni, sidxe'ch choṅreni loj tio'preni, luxh tio'preni sidxe'chza lo choṅreni. ⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni;

nansuegr sidxe'chni lo xculijzni, luxh gulijzga sidxe'ch lo xnansuegrni.

Reseen xten retiemp

(Mt. 16:1-4; Mr. 8:11-13)

⁵⁴ Caniiza Jesús lo reben̄ xhidajlga, räjpni:

—Cheni rhuiitu räjs reza nez lad jıät, rniitu: "Sıajb nisguıj." Luxh riajbni. ⁵⁵ Che rbi' bej nez lad danbägw, rniitu: "Sacnalaa nadxej", luxh si'c rajcni. ⁵⁶ İBejn ni rusguee! La'tu racbeetu xhi säloj reseem ni riṅ lo guedxliuj näjza xhaguıbaa, İxhicuent ditu gan xhi säloj retiemp ni dxunnu ṅaj, ä?

Basiäjı diidx con rebejn ni rdxe'ch lojlu

(Mt. 5:25-26)

⁵⁷ Räjpzani:

—İXhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸ Sa'csi palga yu' chuni'c chale'c xquejlu lo guxhtis, laıni sanäni luj ro jusgaad, basiäjı diidx con laani lo nejz, te na'c chanäni luj lo reguxhtis, sa'csi dxejc reguxhtis sutedreni luj lo reguıxhajg te gusaureni luj neṅ latzguııb. ⁵⁹ Luxh rniä lojlu, dilu guirıi ro'c hasta gusa'lu quiıxlu guiraa lojreni.

Colgusiejch lajztu te di guettu

13 Lagajc dxejc, gubig gaii reni huisa'nreni diidx loj Jesús xcuent gaii beṅ Galilee ni bagu't Pıla't neṅ guidoo, bagu'chni xtiejnreni con xtiejn reman ni siäd-näreni si'c gojn lo Dios. ² Sas räjp Jesús lojreni:

—İLa rujntu xhigab si'c gusajc reben̄ Galileega sa'csi najrcurenı beṅdojı lo rebejn lajdxreni? ³ Narä rniä, dini gac si'c. Palga di'tu gusiechlajz sigajcza sejt guiragajctu. ⁴ O xcuent guitzunbichon̄ rebejn nani gujt che gubixh te or̄ ni laa Siloé yejcreni, İLa rujntu xhigab najrcurenı beṅ dojı lo rebejn ni rbäjz guedx Jerusalén, ä? ⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huıhuıini don la caj ninejxh lojni. Luxh xhet ninejxhdi bidxälni. ⁷ Dxejc räjpni loj bejn ni canäj xyujni, agujc choṅ ijz siädtilä ninejxh lo yajgre, luxh xhetini. Batin yajgre. İXlia'si sujni lo yuj! ⁸ Luxh xmosni räjp lojni: "Dad, basaanni steb ijz, guslaä yuj ni'ni, gusälä aboṅni. ⁹ Palga xcaj ninejxh lojni steb ijz, laaca, palga dini xcaj, dxejc guitinnuni."

Rusiajc Jesús te gunaa

¹⁰ Te dxej ni rusıajz rexejn̄ Israel caguluii Jesús neṅ te guidobäz. ¹¹ Ro'c suga' te nane' ni agujc tzunbichon̄ ijz racxhuuni. Beṅdxab caguscoodni, niluxh di gacdi suliini. ¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yäl̄guııdxga luj.

¹³ Che basujni naani yejčni, lagajc dxejc gujc gusulii nane'ga. Dxejc guslojni calä'pni xpala'n Dios. ¹⁴ Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; neñ redxejga sajc jiäädte te jiajctu, per na'c jiäädte dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—iBen rusguee! ¿La di chutis tejtü guxhec xconni o xpurni te chanänini yäni nis, mase najcni dxej ni rusilajz bejn, ä? ¹⁶ Luxh nane're najc te xagdoo toAbram, nani numbee Dios, ni agujc tzunbichon ijz ballib beñdxabni, ¿la digacdi guixecni lo xcälguijdxni mase najcni dxej ni rusilajz bejn, ä?

¹⁷ Che gunii Jesús rediidxre, bianxtujy rebejn ni rdxe'ch loj Jesús, luxh rebeñ xhidaalga cabalazduxhrene sa'csi cayujn Dios redzunro nez lojreni.

Xcuent bedz muxhtas

(Mt. 13:31-32; Mr. 4:30-32)

¹⁸ Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? ¹⁹ Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhajcwni.

Xcuent cojb ni rusaguij

(Mt. 13:33)

²⁰ Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios? ²¹ Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

Dää rolä' cadre jiu'ni xhaguibaa

(Mt. 7:13-14, 21-23)

²² Huinuu Jesús xnejzni sääni guedx Jerusalén. Lañi sadejdni reguejdx näza rerench caguluiini rebejn.

²³ Dxejc gunabdiidx te bejn lojni, räjpni:

—Dad, ¿la guxii najc rebejn ni caläa loj rextoljreni, ä? Dxejc räjpni lojreni:

²⁴ —Dää rolä' cadre jiu' bejn xhaguibaa. Ni'cni coltip lajzta te jiu'tu ro'c, sa'csi xhidajl bejn rlajz jiu'reni ro'c, niluxh direni gun gaan. ²⁵ Cheni abasäu baxhuan xten yu' rolä', dxejc la'tu ni suga' detz yu' guisloj gusejstu rolä', guiniitu: "Dad, baxhal-laa rolä'", dxejc laani sudzu'ni diidx, siniini: "Dina ganä caro siäädte." ²⁶ Dxejc guislojtu guiniitu: "Bidunnäänu, bidaunäänu, bidunnäänu luj, baseedlu nuurnu lo xnezyuunu." ²⁷ Dxejc siniini lojtu: "Rniliä lojtu, dipacnä gumbeä la'tu. Collij guiraatu, beñlatsiaj." ²⁸ Dxejcti sonduxhtu, chubeljli läjytu che fiitu abiu' toAbram, con toIsaac, con toJacoob, näza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. ²⁹ Dxejga sidzujn xhidajl beñzijt ni siääd ladjaä, ladjiät, ladbäjgw, näza ladbee, te jiu'reni lo

xcälrnibee Dios xhaguibaa, ro'c sibejzareni lo mex.

³⁰ Luxh yu' reni rujntu xhigab guxii sajczeni naj, sacduxhrene dxejc. Yu'za reni rchalotu sacduxh naj, xhet sajcdirereni dxejc.

Jesús biin xcuent guedx Jerusalén

(Mt. 23:37-39)

³¹ Lagajc dxejga, bidzujn gaii refarisee, räjpreni lojni:

—Huij, biunejz ree, sa'csi Herodes rlajz ju'tlu.

³² Dxejc laani badzu'ni diidxre lojreni, räjpni:

—Gojz lo bäjzga, beñ rusguee: "iBahuii! cabää rebeñdxab lastoo rebejn, cagusiäcä rebejn ni racxhuu nadxej näjza guixee, luxh huijdxli guluxä xtzunä."

³³ Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxits Jerusalén sajc guetni.

³⁴ iProbe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhañ Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp. ³⁵ Bahuii xho bianxteb xquidootu. Ni'cni arnixgää lojtu, dirutu fii loä cheni guidzujnli dxej ni guiniitu loä: "Chicbaa ni siääd xcuent Dios."

Rusiajc Jesús te bejn ni guidxa guij

14 Che gojl te dxej ni rusilajz rexpejn Israel, huitajw Jesús roliz tej ni rnibee loj refarisee.

Cagula'tz gaii refarisee, guidon xhini'c gun Jesús, ² sa'csi nez loj Jesús suga' te dade' ni guidxa guij tiejxhni. ³ Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajc gusiajčni te beñracxhuu dxej ni rusilajz bejn o la di gacdiini?

⁴ Per laareni dxtis suga'reni, niäutis ro'reni. Dxejc cua' Jesús beñracxhuuga, basiajcnini, gunibeezani biunejzni. ⁵ Dxejc räjpni loj refarisee:

—Chu la'tu ni rajp te bur o te gon, palga jiajbni neñ te bisie, ¿la ditu chalägajcni mase najcni dxej ni rusilajz bejn, ä?

⁶ Dxejc di niajčni nudzu'reni diidx lojni.

Reni bidon chää sa'

⁷ Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

⁸ —Cheni guidonlu chäätu te sa', na'c guntu te cuetu cuä' rebejnro, te di guidzujn te beñroru lojlu, ⁹ dxejc jiääd bejn ni cayujn lanij, naani lojlu: "Badeed cue dade're ro'c." Dxejc situjylilu chacuelu ste'ca lajt lo le'li.

¹⁰ Maazru hueen, cheni guidonlu chäälu te sa', huicue lo mex ni zuj lo le' te che guidzujn bejn ni cayujn lanij, naani lojlu: "Xamigwä, gudaa cuelu neñ yu' cadre rbej rebejnro." Si'c sä'p xpala'nlu nez loj guiraa rebejn ni sobganäjlu lo mex. ¹¹ Sa'csi ni rlajz chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

¹² Räj pzani loj bejn ni cagudeed xhi gaureni:

—Cheni gunlu te lanij o gutedlu bejn lo xmexlu, na'c cueedxtislu reexamigwlu con rebejtzu, con resa'lu, niclaza rexpisijnlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. ¹³ Che gunlu te lanij, alga gurejdx rebenproob, rebencoj, näjza rebenlotiä'p, ¹⁴ dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibañsac rebejn loj rebenqut.

Xcuent te laniro

¹⁵ Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadro rnibee Dios.

¹⁶ Dxejcti räjp Jesús lojni:

—Guyu' te dade' ni bejn te laniro rolijzni. Gunibeeni bidoñ xhidajl bejn te jiädtaunäjreneni. ¹⁷ Che bidzujñ or ni gaureni, baxhañ dade'ga te xmosni chatejdxni rebejn ni abidoñ, räjpni lojreni: “Coñchäj, asuchee lo mex.”

¹⁸ Dxejcti guiragajczeni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” ¹⁹ Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” ²⁰ Steeni räjp: “Entis bachñaä ni'cni di gacdi jiälä.” ²¹ Che gubi' mosga, badeedni diidx lo xlamni xhi räjp rebejn ga lojni. Dxejcti bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebenñatiujñc.” ²² Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” ²³ Dxejcti räjp lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä.” ²⁴ Rniliä lojtu, nicla tej reni bidoñ ganid di gau xhuej nani benä.”

Ni nanab gunni te chanajlni Crist

²⁵ Lañ sasaj Jesús lo nejz, xhidalduxh bejn sanajlni. Dxejcti gubiréni, gusloj cayäjpni lojreni:

²⁶ —Palga yu' chu tej ni jiäd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnni, nägajcza xcälñabajñni, di gacdi gacni te rexpənä. ²⁷ Palga yu' chutis tej ni di rlajz tedni trabajw te jiädna-jlni narä, di gacdi gacni te rexpənäpac. ²⁸ Chu tejtü ni rlajz gun te yuro, ni di gunxgaa xhigab lacti meel chanä yu'ga, te guidon la sajc guluuxnini. ²⁹ Didi cheni abejñni recimient, di gacdi guluuxnini, dxejcti guiraa reni fii lojni suxhizñajreneni, ³⁰ säjpreni: “ñBahuilaa! Bejnre gusloj bencheeni te yu' per di niajcdi nuluuxni-ni.” ³¹ ¿Chu te reii ni gun xhigab chachagdijñni stee reii, ni di gunxgaa xhigab don laa sajc gunni gaan con tzuu miñ soldaad loj stee reii ni siäd con gajñ miñ soldaad, ä? ³² Palga di gacdi gucuanäjñni, che gacbeeni zijtli siäd stee reii, suxhañni te xpejñni chanab yälñbedxi lojni. ³³ Ni'cni palga chutis tejtü di gusaan rexhixtenni te jiädna-jlni narä, di gacdi gacni te rexpənäpac.

Che diru sejd gac nadzujy

(Mt. 5:13; Mr. 9:50)

³⁴ Räj pzani:

—Huen najc sejd. Per cheni diruni gac nadzujy, ¿xho gacru gac nadzujyni? ³⁵ Xhetru sajc dini, nicla te chääni loj yuj, niclaza te chääni lo abon. Gusältis bejn sejdga. Reni rlajz gucua diajg xtidxä, sucua diajgsa'czeni.

Xcuent xiil ni gunijt

(Mt. 18:10-14)

15 Guiraa reni rusquijx impuest näjza rebencoj cabigreni loj Jesús, te cuadiajgzeni rextiidxni.

² Refarisee näjza rebejn ni ruluii leii gusloj camojñreni, räjpreni:

—Bejnre rusaan rbig rebencoj lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴ —Chutejtü ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chati-ilni xile' ni gunijt, hasta guidxällinini, ä? ⁵ Luxh che guidxällinini sibaduxh lajzni, dxejcti sutzuubnini ro xhajcwni. ⁶ Che guidzujñni rolijzni sutojñni rexiimigwni näjza rexpisijnni te gäbni lojreni: “Coñguibalazñä narä sa'csi abidxälä xile' ni gunijt.” ⁷ Rniä lojtu, sigajcza su'ru yälñbalajz xhaguibaa xcuent tejtis bejn ni guibig lo Dios ni gusiechlajz xtojñni quela xcuent tapbitzuubigaa bejn ni di guiquiini gusiechlazreni xtojñreni.

Xcuent meel ni gunijt

⁸ Räj pzani:

—Sigajcza te gunaa ni rajp tzuu meel, palga chasälñni tejni, ¿la dini gusanij te bajl te guloobni neñ yu' hasta guidxällinini, ä? ⁹ Luxh che guidxällinini, sutojñni rexiimigwni näjza rexpisijnni, säjñni lojreni: “Coñguibalazñä narä sa'csi abidxälä meel ni gunijt.” ¹⁰ Rniäza lojtu, sigajcza sibalajz rexangl Dios xhaguibaa xcuent te ben-cojñni ni rusiechlajzni.

Te bejn ni baxuñ te xi'nni

¹¹ Dxejcti bijza Jesús cuentre lojreni:

—Guyu' te dade' ni yu' tio'p xingaanni. ¹² Dxejcti xi'nni ni najc huinruga, räjpni lo xtadni: “Dad, baniidx yäl-nasa'c nani nungäjñ xca'a.” Sas badeed xtadni xerensni. ¹³ Di niaclaa, balsi dxej gudejd, chela bato' xinhuinni guiraa xhixtenni, dxejcti sääni, bidzujñni te guedxziyt. Ro'c banijtni guiraa xmeelni lo recosguijdx. ¹⁴ Che abanijtni guiraa xhixtenni, biäd te gubinduxh guedxziytga cadro yu'ni. Sas guslojzani calaanni. ¹⁵ Dxejcti huiti-ilni dzuun lo te benquejdxga. Baxhañ bejn gani te huigajñni cuch lo xyuj dade'ga. ¹⁶ Luxh calanduxhni bejnni xhigab malaii sajc gauni recuaan ni najc si'c lia ni cayajw recuch, niluxh rut badeeddi xhi niajwni. ¹⁷ Lañ ni cadejdni trabajwga, bianij xcäriejñni bejnni xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä.” ¹⁸ Guibi'älis ladxä, rolijz xtadä, gäpä lojni, Dad, banitä lo Dios näjza

lojlu. ¹⁹ Diru nungäjł guirilaä xi'nlu. Cua' narä si'c te xmoslu." ²⁰ Dxejc gunazgajcni nejz te gubi'ni rolizj xtdadni.

'Cheni zijtru siäädni, bahuüi xtdadni lojni. Dxejc balsalajznini, ruxuñlini, huichaglojnini, sas gudäznini, bachagro'ni lojni. ²¹ Dxejc räjp xi'nni lojni: "Dad, abanitä lo Dios näjza lojlu. Diru nungäjł guirilaä xi'nlu." ²² Per räjp xtdadni loj rexmosni: "Coltanä te ladsa'c, colshuajcwnini xi'nä, colgusäl te niil bicueñaani, xcajza te gura'ch ni'ni. ²³ Coltanä te biseř ni guro' colgu'tni. ;Colsquejn te guidauunu, jienu te lanij! ²⁴ Sa'csi xi'näre abenä xhigab gujtñi, luxh naj si'cni agubañsacni, gunijtni niluxh naj abidxäjłni." Dxejc guslojreni bejnreni te lanij.

²⁵ Lał ni cayajc dee, xingangalooni cayujñ dzuun lo niaa. Che gubi'ni, siäddzujgajxhni rolizjni, che biejn dijgnı cayel rolizjni, caguya'zareni. ²⁶ Dxejcti gurejdxni te mos, gunabdiidxni lojni xhi cayajc royu'. ²⁷ Dxejc räjp mosga lojni: "Gubisac bejtzlu, luxh xtdadlu gunibee gujt te biseř guro' te gac lanij sa'csi nadaanni gubi'ni." ²⁸ Dxejc bidxe'ch xingangalooni. Naadtini jiu'ni rolizjni. Che gubcee xtdadni naadtini jiu'ni, bihuüi xtdadnini te gunabni jiu'gani. ²⁹ Dxejc räjpni lo xtdadni: "¡Bahulaare! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con rexamigwä. ³⁰ Luxh naj ni abidzujñ xi'nlu, ni baniñt xmeellu con regu-nadxab, xhoxh bagu'tlu te biseř guro' te cayujñlu xlanijni." ³¹ Dxejc räjp xtdadni lojni: "Xi'nä, sugagajdlu loä, luxh guiraa ni rapä najc xtenlu. ³² Niluxh naj riäjłpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubañsacni; gunijtni, naj abidxäjłni."

Xcuent te ni rnibee loj remos

16 Dxejc cayujyza Jesús stee cuent loj rexpejnıpacni, räjpni:

—Guyu' te beñrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: "Bejn ni rnibee loj rexmoslu xhetlaadi cayujñni cagunijtni rexhixtenlu." ² Dxejcti gurejdx xlamñini, räjpni lojni: "¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuumu, sa'csi dirulu chanuu guinibeelu lo rexmosä." ³ Dxejc bejnıga bejn xhigab: "¿Xhichani'c gunä naj ni gudzucaj xlamä dzuun loä? Dina ga'pä yälřstijp te gunä dzuun lo niaa, luxh situjyä chanabä gojn. ⁴ Ananä xhini'c gunä te che dirunä ga'pä dzuun, sibejdx rexamigwä narä rolizjreni." ⁵ Dxejcti gurejdxni tebgajreni rebejn ni nazäab lo xlamñi, dxejc räjpni loj ni bidzujxgaa: "¿Lac nazääblu lo xlamä?" ⁶ Dxejc räjpni: "Nazäbä si'c te gayuu barıl se't." Dxejc räjpni lojni: "Basquejn, cua' guijtze, bacuaa tiubitzuutis barıl nazääblu lojni." ⁷ Dxejc gunabdiidxni loj steeni, räjpni: "¿Luj a'? ¿Lac nazääblu lo xlamä?" Dxejc räjpni lojni: "Te gayuu dximro triuu." Dxejc räjpzani: "Aree xquijtzu; bacuaa tajtis dximro." ⁸ Bidxeloj xlamñi, gulä'pni xpala'n beñguijdxga ni gunibee sa'csi bisiñni bejnıni recosga. Dxejc räjpza Jesús,

rebejn ni di gumbee xtidx Dios nadxällajzreni lo rextzuunreni con sa'reni loj rebejn ni arumbee xtidx Dios.

⁹ Rniä lojtu, colquii rexamiigwtu con reyälñasa'c ni räjpıtu loj guedxliujre, te che abaraj xhixtentu, sica' Diostu xhaguibaa cadre yu' rolizıtu par tejpas.

¹⁰ Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdi gunsa'cni dzuun lo te dzunro. ¹¹ Ni'cni palga xhetlaadi cuarälñajtu reyälñasa'c xten xtidx liuj, jıxo guniidx Dios reyälñasa'c xtenı lojtu! ¹² Palga xhetlaadi cuarälñajtu xhixten bejn, ¿chu guniidx lojtu ni gac xtenpactu, ä?

¹³ Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzıni o susobdiagıpacni xtidx tejni, sibälazıni steeni. Di gacdi gun bejn xtzun Dios lał ni sanälajzıni xcälñasa'cni.

¹⁴ Mbaj naj, refarisee, sa'csi rchaglazduxhıni meel, cacuadiagdu'ızreni xtiidxni, dxejc caguxhisnäjreni Jesús. ¹⁵ Dxejcti räjp Jesús lojreni:

—La'tu najctı bejn ni ruhuüi rebejn lojtu, naareni beñsacduxhtı, niluxh acanajñ Dios xhi xhigab rujntı neñ lastootı. Sa'csi guiraa ni rchalojtu najc yälñasacduxh, guiraa ni'c rbixhlajz Diosni.

Xleii Moisés con xcälřnıbee Dios

¹⁶ Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcälřnıbee Dios, ni'cni xhidajł bejn cagusutijp lajzıni te jiu'reni loj yälřnıbeega.

¹⁷ Per guyasıru nitloj xhaguibaa näjza guedxliuj quela di jalıoj guiralıi rediidx ni bacuaa Moisés; nicla tej diidxga di nitloj.

Ruluı Jesús xcuent ruřo'n sa' bejn

(Mt. 19:1-12; Mr. 10:1-12)

¹⁸ Räjpzani:

—Palga guřo'n te bejn chäälñi, dxejc guchñaani stee gunaa, rujñni dojł, luxh nani ruchña te gunaa ni abarõ'n chäälñini, niguiıga rujnzani dojł.

Te beñrajp näjza Lázaro

¹⁹ Räjpzani:

—Guyu' te beñrajp ni rchaglajz rajcwni ganax relad-sacduxh, luxh guixe-guıxee rujñni lanıro. ²⁰ Guyu'za te beñproob ni laa Lázaro ni rniab gojn, ricueni ro xlä' beñrajpıga, yu' guejdx ni rgaadz tiejxhni. ²¹ Rıajzıni maläıi xho gunni gauni nani rtejb loj xmex beñrajpıga, luxh direni gusaan. Dxejc rebä'cw siääd rılejı loj reguejdx ni rgaadz ni guidxa tiejxhni. ²² Guyu'ti te dxej gujt beñproobıga, biädläs rexangı Dios xaimni, huınärenıni cadre yu' Abram xhaguibaa. Dxejcti näjza beñrajpıga gujt, huıcuatztırenıni. ²³ Che yu'ni gabıjł cadre rij guiraa rebeñdojł, ro'c cadejđni trabajwduxh. Dxejcti guläsni lojni, bahuııni zitduxh cadre suganäj Abram Lázaro. ²⁴ Dxejcti guredxaduxh beñrajpıga, räjpni lo

Abram: “iXtadä Abram! Balazlajz narä, baxha! Lázaro guhuajdxni yejc bicueñaani nis te gusiälyujni ludxä, sa'csi ree cadedä trabajwduxh lo guiboo.”²⁵ Luxh räjp Abram lojni: “Xi'nä, basaa lajzlu che gubajñlu lo guedxliuj gojplu guira'ti xhixtenlu, luxh sigajcza Lázaro gudejndi trabajwduxh. Per ñaj ree casilajzni, ñaj luj cadejndlu trabajwduxh.”²⁶ Luxh di gacdi jiääd Lázaro ro'c, sa'csi yu' te baladuxh ni rlia' sa'nu, te mase rñajz bejn guirii ree te tedreni lojlu ro'c, di gacdi. Di gacdi ted reni yu' ro'c te jiäädreni loonu.”²⁷ Dxejcti räjp beñrajpga lojni: “Rniabduxhä lojlu, xtadä, baxha! Lázaro chääni roliz xtadä,”²⁸ sa'csi ro'c yu' gaii betzä, te chaliidxni laareni, te gusiechlajzreni, te di ñajza laareni jiäädreni ree cadro rdej bejn trabajwduxh.”²⁹ Dxejc räjp Abram lojni: “Arajpreni guijt cadro caj xleii Moisés ñajza xtidx redade' ni gunii xtidx Dios, sugusobdiajgredi rediidxga.”³⁰ Luxh beñrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechlajzreni.”³¹ Dxejc räjp Abram lojni: “Palga direni gusobdiajg xtidx to Moisés ñajza xtidx redade' ni gunii xtidx Dios, dizareni chalilajz xtidx te bejn ni guibañsac loj rebengut.”

Riesgw jiajbni lo dojl

(Mt. 18:6-7, 21-22; Mr. 9:42)

17 Räjp Jesús loj rexpejñpacni:

—Siäädpac recos ni gun jiajb bejn lo dojl.

Proobza bejn ni rujñ riajb bejn lo dojl.² Maaz guliibni te guij xten molin guejñni, gusäl bejñni lo nisdoo cadro jiätro quela gunni jiajb rexi'nä ni ahuililajz xtidxä.³ ¡Colsusin!

'Palga gun bejtzlu dojl lojlu, balijdxni. Palga gusiechlajzni, basiäjil diidx con laani.⁴ Masque gajdz huält neñ teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäjil lajzlu”, basiäjil lajz con laani.

Bastioob xcälirililaaznu

⁵ Gunii rexpejñpacni lo Jesús, räjpreni:

—Dad, baniidxru yälirililajz loonu.

⁶ Dxejc räjp Jesús lojreni:

—Palga rajptu yälirililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxä' ro'c, guzuj galäii nisdoo”, susobdiajg yajgga xtiidxtu.

Ni riäjil gun te mos

⁷ Räjpzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”?⁸ Dini gäb si'c. Niluxh säjpn lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu.”⁹ Dini gudeed xquixtios lo mosga sa'csi rujñni recos ni gunibeeni sa'csi si'c riäjil gunni.¹⁰ Sigajcza la'tu, che luux guntu guiraa redzuun ni guniä guntu, riäjil guiniitu lo

Dios: “Najcnu mos ni xhet sajcni, nani riäjil jiennu, ni'ctis biennu.”

Basiajc Jesús tzuu bejn ni ra! tiejxhrene

¹¹ La! ni sasaj Jesús nez guedx Jerusalén, gudejndi loj región Samaria ñajza región Galilee.¹² Che biu'ni tej reguejdxga, huichagloj Jesús tzuu bejn ni rajc te yälgujdx ni ra! tiejxhrene, niluxh zijtru guzujreni.¹³ Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴ Che bahuii Jesús lojreni, räjpni lojreni:

—Colchäj, te fii rebixhojz abiajctu.

La! ni sääreni, bia tiejxhrene.¹⁵ Dxejc tejreni, che bahuiini abiajcti, gubiguxuñni, cabedxa'ni calä'pni xpala'n Dios.¹⁶ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejñre najc te beñzijt, te beñ Samaria.¹⁷ Dxejcti räjp Jesús lojni:

—¿La et tzuudi najc reni biajc, ä? ¿Con sgaareni?

¹⁸ ¿La rutru gubi'di loä te guiliä'preni xpala'n Dios, xtebtis beñzijtre, ä?

¹⁹ Dxejc räjp Jesús loj bejñre:

—¡Huisulii, huij! Abiajctu sa'csi huililajzlu.

Xho guidzujñ xcälñibee Dios

(Mt. 24:23-28, 36-41)

²⁰ Dxejc, sa'csi agunabdiidx refarisee loj Jesús guc guidzujñ xcälñibee Dios, badzu'ni diidxre, räjpni lojreni:

—Di xcälñibee Dios guidzujñ con seen ni sajc fiitu.

²¹ Diza bejn naa: “Bahuii, aniree”, o “Anirec”, sa'csi abidzujñ xcälñibee Dios lojtu.

²² Dxejc räjp Jesús lo rexpejñpacni:

—Sidzujñ dxej rñajzgatü fiitu te dxej sa' ni chu che jiädsac Xi'n Dios ni gujc Niguii, luxh ditu fiini.²³ Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii.²⁴ Sa'csi sigajc ni rieñ che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal dxej guibi'ä.²⁵ Luxh ganiddoo sidedä trabajwduxh, sa'csi sibälaz reben guedxliuj ni tre' ñaj narä.²⁶ Si'cni gujc neñ redxej cheni gubajñ toNoé, si'cza gac neñ redxej che jiälä narä, Xi'n Dios ni gujc Niguii.²⁷ Neñ redxej ni gubajñ toNoé gudajwreni, gu'reni, bachñaareni, badeedzaren i xindxä'preni guchña bejn, bidzujñli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis.²⁸ Sigajcza gujc neñ redxej ni gubajñ toLo't: gudajwreni, gu'reni, gusiireni, bato'reni, gule'creni binij, bencheezaren i rolizreni.²⁹ Niluxh cheni birii Lo't lo guedx Sodoma, biajb guiboo xhaguibaali, ñajza te däj ni rudxuii, gunitlojti guiraa reben dojl, huejcreni.³⁰ Sigajcza gac neñ redxej cheni jiälä narä, Xi'n Dios ni gujc Niguii.

³¹ 'Dxejga, palga yu' chu niä'p yejc yu', diru galädi jiäjt-ni te chalääni rexhixtinni ni yuchee neñ yu'; palga yu' chu suga' nezjiät, di galdiruni guibi'ni rolizni.³² Colgusnaj lajztu xhi gujc chäälo toLo't.³³ Ni rñajz ga'p xcälñabajñni lo guedxliujre, sunijtnini, nani gunijñ xcälñaba-

jñni lo guedxliujre xcuent rextidxä, xcälñabajñni rajpni xhaguibaa.

³⁴ Rniä lojtu, guxhijnga ni jialä lo tio'p reni naga' lo te da', chää tejni, steeni jia'n. ³⁵ Lo tio'p gunaa ni cayo't, chää tejni, steeni jia'n. ³⁶ Lo tio'p bejn ni yu' lo niaa, chää tejni, steeni jia'n.

³⁷ Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

Xcuent te gunabiuud con te juejz

18 Bijza Jesús te cuent ni rului lojreni, te guisieedreni xho riagl cuedx-guiniabreni lo Dios lacuaa gac-huin lajzreni, ² räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. ³ Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. ⁴ Balti dxej naadti juejzga gun yälguxhtisga. Dxejcti bejn ni xhigab, naani: “Mase dina guidxebä Dios, dizana jiuä rebejn, ⁵ sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riäd-gusieedni narä.”

⁶ Dxej räjp Jesús lojreni:

—Riejn diajgtu xtidx juezguijdxa, ⁷ Naj ¿xho di Dios, ni najc hueen, gucuadijg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni. ⁸ Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälni bejn ni rililajz xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni rului loj rebejn ni rluiisi najc beñsa'c, ni rchalo xhet sajcdi resabejnreni. Räjpni:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega lañ ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc beñdojl, dizana gacä si'c najc bejnre ni rusquijx impuest. ¹² Rucua'nä tio'p huält neñ te xmaan, luxh rud-edä te tzuu lo te beex loj guiraa ni runä gaan.”

¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälñaatisni lastooni, caniini lo Dios, räjpni: “Dad, Dios, ¡balaslajz narä, nacä te beñdojl!” ¹⁴ Rniliäpac lojtu, ni rusquijx impuest rbaali lajzni gubi'ni rolizni sa'csi badzucaj Dios rextojlñi, niluxh di Dios nudzucaj rextojl beñ farisee. Sa'csi guiraa rebejn ni rlajz guiliäp lagajc xpala'nni, susanxtiujy Diosreni, dxej reni di rlajz guiliäp lagajc xpala'nreni, siliäp Dios xpala'nreni.

Benle' Jesús yej rebiuxbäz

(Mt. 19:13-15; Mr. 10:13-16)

¹⁵ Yu'reni siädna rexpiuxbäzreni loj Jesús te guzujni naani yejcreni. Che bahuii rexpejn pacni si'c, gusloj cadilidiidxreni con rebejn te na'c jädnäreni rebiuxe'.

¹⁶ Dxej gurejdx Jesúsreni, räjpni lojreni:

—Colgusaan jääd rebiuxe' loä, na'c gudxojtreni, sa'csi xcälñabee Dios najc xten reni najc nadolajz si'c rebiuxbäze're. ¹⁷ Rniliäpac lojtu, chutis ni rlajz jiu' lo xcälñabee Dios nanab gusobdiajgreni xtidx Dios si'c rusobdiajg rebiuxe' xtidx xtdadreni. Palga dini gun si'c, dini jiu' lo xcälñabee Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yälñabajñ par tejpas?

¹⁹ Dxej räjp Jesús lojni:

—¿Xhicuent rniilu narä: “Mastrsa'c”? Rutru najcdi beñsa'c, xtebtis Dios. ²⁰ Anajnlxho najc remandamient ni caj lo xleii Moisés: “Na'c guesnäjlx gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtdadu, xnanlu, bahuiizaren.”

²¹ Dxej räjp bi'nga lojni:

—Guiraa remandamientre rusobä cheni gucäli biuux.

²² Che biejn diajg Jesús xtiidxni, räjpni lojni:

—Tejtis cayäädx gunlu. Bato' guiraa rehxixtenlu, gudisni loj rebejn ni xhet rajpdi dxej sajplu xcälñasa'clu xhaguibaa. Dxej gudanajl narä.

²³ Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh. ²⁴ Dxej rdxelojtis Jesús lojni, guc-huinza lajzni räjpni:

—Naganduxh jiu' rebenrajp lo xcälñabee Dios.

²⁵ Guyasiru ted te cameii ni' te guux lo ni jiu' rebenrajp lo xcälñabee Dios.

²⁶ Reni biejn diajg rediidxre, räjpreni:

—¿Chuxhni'c sajç laa lo dojl, palga si'c najcni?

²⁷ Dxej räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸ Dxej räjp Pedr lojni:

—Dad, nuurnu abasa'nnu guiraa rehxixtenu te siopnalnu luj.

²⁹ Dxej badzu' Jesús diidxre lojni, räjpni:

—Rniliäpac lojtu, chutis ni gusaan rolizni näjza rex-cuzajñni, rebejzñi, chäälni, xi'nni xcuent xcälñabee Dios, ³⁰ sica'ni xhiroobru lo guedxliujre, luxh sica'ni yälñabajñ par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

³¹ Gurejdx Jesús rexpejn pacni te laad, te räjpni lojreni:

—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli

xcuent Xi'n Dios ni gujc Niguii. ³² Sutedrenini ladznaa rebenzijt, suxhiznäjrenini, susacsírenini, sutiobxhejn-lireni lojni, ³³ luxh che luux quiinrenini, dxejc sugu'trenini, luxh ni riojñ dxej sibañsacni loj rebeñgut. ³⁴ Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacbeereni.

Rusiajc Jesús te beñ lotiä'p

(Mt. 20:29-34; Mr. 10:46-52)

³⁵ Cheni sadzujñ Jesús te guejdx ni laa Jericó, sobga' te beñ lotiä'p ro' nezyuj, canabni gojn. ³⁶ Che biejn diajgni cadejd xhidajñ beñ lo nezyujga, gunabdiidx beñ lotiä'pga xhini'c cayajc. ³⁷ Dxejc räjpreni:

—Jesús ni siääd Nazare't cadejdni nezga.

³⁸ Dxejc guredxa'ni räjpni:

—Jesús, xi'n toDavid, balaslajz narä!

³⁹ Rebejn ni nijd lojreni gudilñäjreni beñ lotiä'pga te jiäu ro'ni, niluxh laani dipru guredxa'ni, räjpni:

—Xi'n toDavid, balaslajz narä!

⁴⁰ Dxejc guzudxi Jesús ro'c, gunibeeni jädnäreni beñ-lojna. Che bidzujñni lojni, gunabdiidx Jesús lojni, räjpni:

⁴¹ —¿Xhini'c rlanjzlu gunnäá luj?

Badzu' beñ lotiä'pga diidxre, räjpni:

—Dad, rlazä jien loä.

⁴² Dxejc räjp Jesús lojni:

—Sujien balojlu! Abiajclü sa'csi huililajzlu.

⁴³ Lagajc dxej, biengajc lojni, calä'pni xpala'n Dios, huinajlñi Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

Huij Jesús rolizj te bejn ni laa Zaqueo

19 Dxejc biu' Jesús guedx Jericó, sadejdzani guejdxga. ² Ro'c rbäjz te beñrapduxh, ni laa Zaqueo, ni nibeel lo reni rusquijx xcuent impuest. ³ Rlanj Zaqueo fiini loj Jesús te gumbeenini, per digacdi fiini lojni sa'csi najcni te beñxhate', luxh xhidajñ beñ siädsaj guideb gabi Jesús. ⁴ Ni'c baxujñni gunijdni lojreni, huä'pni lo te yajgro ni suga' gajxh nez cadro ted Jesús te si'c sajç fiini loj Jesús. ⁵ Che gudejd Jesús nejzga, guläsni lojni jiaa, bahuiini cadro sobga' beñre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolizjzlu.

⁶ Dxejcti biätguxuñ Zaqueo lo yajgga, rbalazduxhni huinäni Jesús rolizjzlu. ⁷ Che bahuii guiraa rebejn xhi gujc, gusloj camojmreni, direni jiuñlajz, räjpreni:

—Jesús sajjia'n rolizj te beñdojñ.

⁸ Dxejcti huilulii Zaqueo, räjpni loj Jesús:

—Bahuilaa, Dad, gala' xhixtenä gudedä loj rebeñproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

⁹ Räjp Jesús lojni:

—Lagajc nadxej gubicaj xtojñlu näjza xtojñ reni rbäjz rolizjzlu, sa'csi guliipac najclü te xagdoo toAbram.

¹⁰ Pues Xi'n Dios ni gujc Niguii biädtiil rebeñdojñ te guslaani rebejnğa ni gunijñ neñ dojñ.

Xcuent tzuu meel

¹¹ Lañ ni cagucuardiajgreni xtidx Jesús, bijzani te cuent ni ruluii, sa'csi asiäddzujñgajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzujñni guejdxga. ¹² Dxejc räjpni lojreni:

—Guyu' te bejn, beñrajpní, huijñi te guejdx zijtro te gacni reii, dxejc guibisacni. ¹³ Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: "Colujñ dzuun con meelre che guibisacäli." Sä'tini. ¹⁴ Per rebeñ lajdxni dipacreni guichaglajz bejnğa, ni'c baxhañreni gaii bejn te saye'tzreni: "Di rlanjzinu gacni xreinu." ¹⁵ Luxh empac gujñni reii, dxejc gubisacni lajdxni. Che bidzujñni gurejdxni rexmosni ni badeedni meel cua'reni, te gacbeeni lac bejn tejgareni gaan. ¹⁶ Ni bidzujñ ganid räjpni lojni: "Dad, xmeellu bejn gaan stzuu meel." ¹⁷ Dxejc räjp reii lojni: "Hueenca, luj najclü te mossac, sa'csi laaca bejnlu dzuun lo te dzunbäz, naj sunidxä guinibeelu loj tzuu guejdx." ¹⁸ Bidzujñ stee mos lojni, räjpni: "Dad, xmeellu bejn gaan gaii meel." ¹⁹ Dxejcti räjpni lojni: "Luj guinibeelu loj gaii guejdx." ²⁰ Bidzujñti stee mos lojni, räjpni: "Dad, aree xmeellu, guluchedzu'tzäni neñ te baii ²¹ sa'csi bidxebä guejblü, sa'csi najc guejblü te beñ nadiplajz, rutojñ guejblü cadro di guejblü nuzuj, luxh rliäs guejblü cose'ch cadro di guejblü nibe'c." ²² Dxejcti räjp reii lojni: "¿Mosguijdx! lagajc ro'lu birii diidx ni gunälu yälgujxhtis. Palga najnlu nacä te beñ nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, ²³ ¿xhicuent dilu nisa'n xmelä neñ te bancw te che nibi'ä nica'a xmelä nägajc xi'n meelga?" ²⁴ Dxejc räjpni loj reni suga' ro'c: "Colgudzucaj meelga lojni, colgudeedni loj ni rajp tzuu meel."

²⁵ Laareni räjpreni: "Dad, per laani arajpní tzuu meel." ²⁶ Dxejc badzu' reii diidxre lojreni, räjpni: "Ni'cni riä, reni rajp, sica'rureni, niluxh reni di ga'p lojreni sibicaj guiraa recosbäz ni rajpreni. ²⁷ Luxh xcuent reni rdxe'ch loä, ni di rlanj niacä reii lojreni, coltanäreni ree, colgugu'treni nez loä."

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸ Che gulujx guniini guiraa rediidxre, huinuuni xnezjñi, sääni nez lo guejdx Jerusalén. ²⁹ Che asadzujñgajxhni reguejdx ni laa Betfagé näjza Betania, gajxh lo dajn ni laa Oliib, baxhañni tio'p rexpejñpacni, ³⁰ räjpni lojreni:

—Colchäj lo guejdx' ni suga' lad rec. Che guidzujñtu, guidxältu caduu te bur huin ni gajd bejn cuib. Colguxhecni, coltanäni ree. ³¹ Palga yu' chu guiniabdiidx lojtu: "¿Xhicuent caguxhectuni?" colye'tz lojni: "Dad caquiinnini."

³² Sä'ti rexpejñpacni nani baxhañni, bidxälreni manga sigajctisni räjp Jesús. ³³ Cheni caguxhecreni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhabreni dejtzni, te gubijb Jesúsni. ³⁶ Guideb cadro gudej Jesús gudixhreni xhabreni lo nezyuj cadro tedni.

³⁷ Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejni. ³⁸ Räjpreni:

Chicbaa reii ni siääd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädnaillu te na'cru guiniireni si'c.

⁴⁰ Dxejc Jesús räjpreni lojreni:

—Rniliä lojtu, palga redde gusa' ro'reni, sibedxa' reguijre.

⁴¹ Che bidzujñni gajxh, che bahuiini guedx Jerusalén, biin Jesús xcuent guejdxga, ⁴² räjpreni:

—Maläii gacbeelu, masque neñ redxjre, xhini'c sajc guniidx yälrbexilajz lojlu! Per naj naga'tzni, luxh digacdi fiilu lojni. ⁴³ Sidzujñ dxejga lojlu, cheni jääd reni rdxe'ch lojlu sujnreni si'c te guralyuj guideb gabilu, nez lojlu sigajc nez dejtzu sisiujreni. ⁴⁴ Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuiilu.

Rusia Jesús neñ guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús neñ guidoro, guslojni cabääni rebejn ni caguto' näjza reni casii. ⁴⁶ Dxejc räjpreni lojreni:

—Loj rexquijtz Dios caj rediidxre: "Rolizä sajc te yu' cadro jädnabtu lo Dios", niluxh la'tu abejntuni si'c te biliää xte gubaan.

⁴⁷ Guixee-guixee caguluii Jesús neñ guidoro, luxh reni rnibee loj rebixhojz näjza rebejn ni ruluii leii, näjza rebejngool xte guejdxga caguiilreni mood te ju'treni, ⁴⁸ luxh direni nidxäl xho niujnreni sa'csi guiraa rebejn cacuadiagdu'tzreni xtiidxni.

Xcälrbibee Jesús

(Mt. 21:23-27; Mr. 11:27-33)

20 Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojlreni, che bidzujñ reni rnibee loj rebixhojz näjza rebejn ni ruluii leii näjza rebejngool, ² räjpreni lojni:

—¿Xhi yälrbibee rujnlu recosre? ¿Chu baniidx yälrbibeeega lojlu?

³ Dxejcti räjpreni Jesús lojreni:

—Narä sigajca gunä te yälgunabdiidx lojtu, colgudzu' diidxre loä, ⁴ ¿chuni'c baxhal Juan te gutiobnisi rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: "¿Xhixhcuent ditu ninilajz xtiidxni?"

⁶ Palga jie'tznu: "Rebejn baxhalni", guiraa rebejn sucuua guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisi.

⁸ Dxejc räjpreni Jesús lojreni:

—Dizana guiniä xhi yälrbibee rapä te runä recosre.

Xcuent remosguijdx

(Mt. 21:33-44; Mr. 12:1-11)

⁹ Dxejc gusloj canii Jesús loj rebejn, bijni cuentre lojreni, räjpreni:

—Guyu' te bejn bazuj yaguub lo xyujni. Dxejc bade-laani lo gaii bejn chääreni meed, sä'tnini zijt, gucladuxhni ro'c. ¹⁰ Che bidzujñ dxej ni guidojp cose'ch, baxhalni te xmosni sanab cose'ch ni riäjil xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. ¹¹ Dxejcti baxhalni stee mos lojreni. Dxejc sigajca gudijnreni, gudijnreni, luxh xhetza badeedireni lojni, ganaxni gubi'ni lo xlamni.

¹² Dxejcti baxhalni ni riojn mos lojreni, per sigajca gudinduxhreni, barilaagwreni.

¹³ Dxejc bejn baxhuaanga xhigab, naani: "¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni." ¹⁴ Dxejc che bahuii reni go'n-meed lo xi'nni, dxejc räjpreni lo sa'reni: "Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu." ¹⁵ Dxejcti barilaagwreni lo yujga, sas bagu'treni.

Dxejc gunabdiidx Jesús lojreni, räjpreni:

—¿Xhichani'c gunnä xpaxhuaan yujga rebejn guijdxre, ä? ¹⁶ Sidzujñni, sugu'tni guiraa reni cayujñ dzunmeed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—Na'c gusaan Dios gacni si'c!

¹⁷ Bahuii Jesús lojreni, dxejc räjpreni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcnii siujypacni, li däj gacni.

Xcuent reimpuest

(Mt. 21:45-46; 22:15-22; Mr. 12:12-17)

¹⁹ Reni rnibee loj rebixhojz, näjza reni ruluii leii rla-jzreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn. ²⁰ Dxejc cagula'tztisreni, baxhalreni gaii bejn te gunsireni si'c ni najceni bendxan, te gcuadiajgreni xtiidxni don gaxäjssi guiga'ni lo te diidx te gutedreni lo yälguhxthi, yälrbibee xte gubernadoor. ²¹ Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu' chu najc bejn, ruluisa'c guejblu xnez lo Dios. ²² Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtü narä scree? ²⁴ Baluui loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

Rniabdiidxreni xcuent yälrbansac lo rebengut

(Mt. 22:23-33; Mr. 12:18-27)

²⁷ Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, ²⁸ räjpreni:

—Dad, Mastr, basa'n Moisés guijtz loonu, lojga caj: "Palga guet te bejn, gusaanni chäälni ruti xi'nni, nan-abpac xca' bejtzni gunaaga te chu xi'nni con laani xcuent tobejtzni." ²⁹ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni.

³⁰ Dxejcti cua' ni rojppga gunaaga. Che gujtni, rutiza xi'nni. ³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. ³² Dxejcti näj gunaaga gujt. ³³ Guigajdzreni guläsnäjreni gunaare, ni'cni, che guibansacreni lo rebengut, ¿chu chäälni gacni, ä?

³⁴ Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxa'preni ruchnaa. ³⁵ Niluxh rebejn ni agule Dios te chääreni xhaguibaa, näjza te guibansacreni loj rebengut, di reni'c guchnaa, dizaren i gudeed xindxa'preni guchnaa, ³⁶ sa'csi diru gac guetreni, ana-jcreni si'c najc rexangl Dios. Laaren i najc xi'n Dios sa'csi abaspañsac Diosreni. ³⁷ Moisésli basule' xcuent ni rbansac reben loj rebengut che bacuaani diidx xcuent yajng ni gurebajl. Ro'c gurejdxni Dios räjpni: "Xtios Abram, Xtios Isaac, näjza Xtios Jacob", ni'cni nabajnpacreni lo Dios. ³⁸ Sa'csi di Dios gac Xtios rebengut; najcni Xtios rebejn ni nabajng par tejpas, sa'csi par laani guiraa rebejn nabajng.

³⁹ Dxejc gaii reni ruluui leii badzu'reni diidxre, räjpreni lojni:

—Mastr, laaca guniilu.

⁴⁰ Sa'csi diruren i najx niniabdiidxruren i lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—¿Xho mood nriireni Crist najc xi'n toDavid, ä? ⁴² Ni lagajc toDavid bacuaa lo reguijtz ni laa reSalmo:

Dad Dios räjp lo Xtaä:

⁴³ "Gurej xladbeä cheni guidzujngli dxej ni gudzugä guiraa ni rdxe'ch lojlu te gacbeeren i luj rnibeelu guira'ti."

⁴⁴ ¿Xho mood gacni xi'nni palga rni toDavid lojni "Dad"?

Rucuaquij Jesús reni ruluui leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebejn cagucuadiajg che räjp Jesús loj rexpejngpacni:

⁴⁶ —Colyajp cuidaad reni ruluui leii, sa'csi rdxagljazreni rajcwreni lajd siool, rljazreni saru guinii guiraa rebejn "xchan" lojreni, rljazreni jiu bejnreni nez loguii, rljazreni cuereni lo reyagxhilsa'c nen reguidobäz, näjza cadro rajc lanij. ⁴⁷ Rudzucjazaren i rexhixten regunabiuud, dxejc rojreni rele' siolduxh che rniabreni lo Dios te fii rebejn, te naa bejn najcreni benjdxan, luxh lojreni suxha! Dios te castigwroru.

Gojn xten te gunabiuud

(Mr. 12:41-44)

21 Nen guidoro bahuii Jesús cagusäl rebenrajng gojn nen te guijn cadro rdojng gojn. ² Bahuiizani lo te gunabiuud, lacti proobni. Basälni xcojnni nen guijn-ga, tio'ptis melbäz basälni. ³ Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, ⁴ sa'csi guiraa reddec ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵ Yu' reni cayujy diidx xcuent guidoro, räjpreni:

—Lacti sacruduxh riengni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

⁶ —Sidzujng dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

Reseen ni chu che nitloj guedxliuj

(Mt. 24:3-28; Mr. 13:3-23)

⁷ Dxejc gunabdiidx rexpejngpacni lojni, räjpreni:

—Dad, Mastr, ¿guc gacni? ¿Xhi seen chu che gac resosga?

⁸ Räjp Jesús lojreni:

—iColjsusin te na'c gusgueereni la'tu! Sa'csi xhidajl reni jiääd sinii: "Narä nacä Crist", o "Asiädgajxh redxej che jiäädni", per na'c chalilajztu xtiidxreni, na'cza chanajlturen i. ⁹ Luxh che jiejn diajgtu cayajc guer cadilnäjä sa' bejn, na'c guidxejbtu, sa'csi ganid recosga gac, luxh gad galädi nitloj guedxliuj.

¹⁰ Dxejc sanuu cayajpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn. ¹¹ Sajcza xuro, su' gubijng, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

¹² 'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzaren i la'tu nen latzguuib, sinäzaren i la'tu nez loj reii näjza gubernador sa'csi

rinälajztu xtidxä. ¹³ Luxh guiraa dee sajctu te gac gusule'tu xtidxä lojreni. ¹⁴ Na'c gunxgaatu xhigab neñ lastootu xhini'c guiniitu lojreni, ¹⁵ sa'csi narä sunidxä diidx guiniitu, sunidxäza yäl'najn lojtu te digac gudzu'reni diidx lojtu niclaza gacdi guiniyajreni xtiidx-tu. ¹⁶ Näjza rexcuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷ Guiraa rebejn guedxliuj sibälaz la'tu sa'csi rinälajztu xtidxä. ¹⁸ Niluxh ni'cla tej xquidxejctu di nit-loj. ¹⁹ Luxh palga sutijtpis lajztu, sajptu yäl'nabajn par tejpas.

²⁰ 'Che fiitu tre' xhidajl soldaad guideb gabi guedx Jerusalén colyacbee abidzujn dxej ni guibijl'ni. ²¹ Dxejct reni yu' guedx Judea, nanab guxuñreni chacuatzlojreni neñ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²² sa'csi neñ redxejga sujñ Dios fis lo guejdxga te soob rediidx ni caj lo reguijtz xten Dios. ²³ Probe'za regunaa ni nuu báz neñ redxejga, näjza regunaa ni ca' báz, sa'csi su' yäl'huinduxh lo guedxliuj, näjza fis ni gun Dios loj rebejn'ga. ²⁴ Yu'reni guet lo guer, yu'zaren chää pres, sijreni balti guedxzijt. Dxejct rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

Cheni jiaäd Xi'n Niguui

(Mt. 24:29-35, 42-44; Mr. 13:24-37)

²⁵ Räjzani:

—Dxejct su' seen lo gubijdx näjza lo bäii, näjza loj re-bajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgrenti chubeduxh lo nisdoo, säsduxh nis ni räjs lo nisdoo. ²⁶ Sitio' rebejn xcuent yäl'rdxebduxh che gunreni xhigab xhicharuni'c gac lo guedxliuj, sa'csi näj guideb guibaa sinibsejs. ²⁷ Dxejcti suhuiireni lo Xi'n Dios ni gujc Niguui, siäädni lo te za guideb xcäl'rnibeeni, näjza yäl'rdimbichaduxh. ²⁸ Che guisloj gac recosre, col'sutijp lajztu, col'guiliäs yejctu, col'guibalajz sa'csi asadzujn dxej gusilajztu.

²⁹ Guniizani stee cuent lojreni, räjpni:

—Col'huii lo yagiigw näjza lo guiraa reyajg! ³⁰ Che fiitu acabääni be'n, col'yacbee lagajc la'tu, abidzungajxh bäii nisguuj. ³¹ Sigajcza che fiitu agusloj cayajc recosre, col'yacbee asiäddzujn xcäl'rnibee Dios.

³² 'Rniliäpac lojtu, guiraa recosre sajct ansde guet re-bejn ni yu' naj. ³³ Guibaa näjza guedxliuj sinitloj, rextidxä dini nitloj.

³⁴ 'Col'susinj lagajc la'tu! Na'c gusaantu cha lajztu yäl'rausa'c, yäl'rä', yäl'ga'ptu xhixtentu, dxejct ditu gacbee che bidzujn dxejga. ³⁵ Sa'csi si'c sidzujn dxejga loj guiraa reben guedxliuj. ³⁶ Col'susinj, col'bejdx, col'guiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguui.

³⁷ Rdxee ruluui Jesús neñ guidoro dxejct guxhijñ sajia'nni yejct dan Oliib. ³⁸ Rsilru ristie rebejn te rdzujnreni lo Jesús neñ guidoro casob rsil, te gucuadijgrenti rextiidxni.

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

22 Siäddzungajxh dxe lanij che rajwreni yätxtiil ni di säguuj, laaza lanijga pascw. ² Dxejct reni rnibee loj rebixhojz näjza rebejn ni ruluui leii caguuilreni xho gunreni te ju'treni Jesús, sa'csi rdxejbreni reben'guejdx.

³ Dxejct biu' ben'xab lastoo Judas ni laaza Iscariote, ni najc tej retzubitio'p xpejn'pacni. ⁴ Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te gutedni Jesús ladzñaareni. ⁵ Dxejct bibalajzreni, bia'nreni diidx gudeedreni meel lojni. ⁶ Cuäjbti Judas, dxejctni guslojni caguuilni xho gunni gutedni Jesús ladzñaareni che rut bejn'di suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzujn dxe lanij che rajwreni yätxtiil ni di säguuj, che rugu'tzaren te xiil si'c ni caj lo xleii toMoisés. ⁸ Dxejct baxhal Jesús Pedr näjza Juan, räjpni lojreni:

—Col'chayejn xchej xten pascw te guidaununi.

⁹ Dxejct laareni gunabdiidxreni lojni, räjpreni:

—¿Caro rlazlu choyennuni?

¹⁰ Räj'p Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Col'chanajl'ni, col'jiu' rolijz bejn cadro jiu'ni laani.

¹¹ Dxejct col'ye'tz lo bejn ni najc rolijzni ro'c: "Si'c naj Dad Mastr: ¿Con yu' cadro sajct gauxchenää rexpeneñ naj pascw?" ¹² Dxejct guluiini lojtu te yu' ni sojb jiaa yejct stee yu'. Asuchexгаа yu'ga. Ro'c col'yejn xhi guidaunu.

¹³ Sä'tireni. Si'tctis ni räjp Jesús lojreni, si'cpac bidxälreni. Dxejct bejnreni xchej xte lanij pascw gauren.

¹⁴ Che bidzujn or, gurenäj Jesús rexpejn'pacni lo mex.

¹⁵ Dxejct räjpni lojreni:

—Guyuduxhä gaan gaunääpactu xchej xten pascw ansde tedä trabajwduxh. ¹⁶ Sa'csi rniä lojtu, diruna gaunää la'tu pascw cheni guidzujn'li dxejct ni gacni lo xcäl'rnibee Dios.

¹⁷ Dxejct cua'ni te co'p, badeedni xquixtios lo Dios, räjpni:

—Col'yä' dee, col'gudeedni lo sa'tu. ¹⁸ Sa'csi rniä lojtu, diruna yä'ä nis ni rii yejct uub stehuält cheni guidzujn'li xcäl'rnibee Dios.

¹⁹ Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Col'yejn screeza te ginalajztu narä.

²⁰ Si'cza bennäjni co'p che gulujx gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

²¹ 'Per bahuilaare, bejn ni guto' narä sobganäj narä lo mexre. ²² Gului'pacni, Xi'n Dios ni gujc Niguui sinuu tedni loj nezuyj ni abaluu Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guibee gac beñro lojreni.

²⁵ Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga nni lacti hueen najc rereiiiga.

²⁶ Per la'tu na'c gactu si'c. Nani najc beñgoolru lojtu, ni'c riäjl gacni si'c najc ni huinru lojtu. Luxh nani rnibee riäjl gacni si'c mos. ²⁷ ¿Chuni'c sajcru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ La'tu najctu ni gusunäj narä guideb ni gudedä re-trabajw ni gudedä. ²⁹ Ni'cni narä runidxä yälrnibee lojtu sigajc ni baniidx xtd yälrnibee loä, ³⁰ te gautu, yätu lo xmexä xhaguibaa, te cuezatu lo yagxhil cadro guntu yälguxhtis loj rexpejn guitzubitio'p rexagdoo Israel.

Räpxgaa Jesús di Pedr guicäjp numbeeni

(Mt. 26:31-35; Mr. 14:27-31; Jn. 13:36-38)

³¹ Räjp Jesús loj Simón:

—Simón, Simón, agunab beñdxab ni laa Satanás luj te gusniibni luj si'c rusniib bejn xob te jiani. ³² Narä agunabä lo Dios xcuentlu te na'c jäädx xcälrrililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räjp Simón lojni:

—Dad, narä sirinalälu; mase gusäureni luj latzguiib, näjza narä siänäälu; mase ju'treni luj, näjza narä set-näälu.

³⁴ Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu choñli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanäta, nicla carteerdi, niclaza stee gura'chdi, ¿la yu' xhi biqui-intu, xhi biäädx lojtu, ä?

Dxejc räjpreni:

—Xheti.

³⁶ Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. ³⁷ Sa'csi rniä lojtu, sisiojb rediidx ni caj lo requijtz Dios xcuentä, cadro caj: "Bigabnäjni reben lat-siaj." Guiraa ni caj lo reguijtz xten Dios xcuentä nanab soobpacni.

³⁸ Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

Rbedx-rniab Jesús loj Dios

(Mt. 26:36-46; Mr. 14:32-42)

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejn pacni. ⁴⁰ Che bidzujñreni ro'c, räjpni lojreni:

—Colcuedx, colnab lo Dios te na'c jiajbtu lo dojl.

⁴¹ Dxejc gubicaj Jesús lojreni, huijni te lajt zite' cadro suga'reni, si'cti cadro rdzujñ te guij che rucuaanini. Ro'c bazuxhijbni, gurejdx-gunabni lo Dios, ⁴² räjpni: —Xtdä, palga rlajzlu, basläa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejc biricaj te xangl Dios lojni te badeedni yälrutiplajzni. ⁴⁴ Lañi cadejñni trabajwduxh, cayac-huinduxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadro suga' rexpejn pacni. Ro'c bidxälñireni nagayejs guiraareni sa'csi cayac-huin lajzreni. ⁴⁶ Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn. 18:2-11)

⁴⁷ Lañi ni canii Jesús lojreni, bidzujñ xhidajl bejn. Tej rexpejn pacni ni laa Judas, nijdñi nez loj rebejn ga. Dxejcti gubigni loj Jesús, te bachagro'ni loj Jesús. ⁴⁸ Dxejc räjp Jesús lojni:

—Judas, ¿la con te yälrchagro' ruteedlu Xi'n Dios ni gujc Niguii ladzñaa rebejnre, ä?

⁴⁹ Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn Jesús gudiñäj te mos xten ni rnibee loj rebixhojz, batiu'ni diajñi ladbee. ⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. ⁵² Guni-gajc Jesús loj reni rnibee loj rebixhojz näjza reni najc guixhajg xten guidoo näjza rebengool, guiraa reni siädxiinini, räjpni:

—¿La siädñäta spaad näjza garo't, astoocanu siädxi-itu te gubaan, ä? ⁵³ Cheni suga'a lojtu guixe-guixee nen guidoo, ditu nuhuañ narä. Per dee najc xortu, luxh arnibee yälñacäy la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädñäj Pedrni zit-zijt.

⁵⁵ Che bidzujñreni gule'creni guiboo galäi lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. ⁵⁶ Dxejc te gunaa ni rujn dzuun ro'c, che bahuiini sobga' Pedr ro'c, rdxelojtsini lojni, räjpni:

—Näj niguiire gyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuü stee bejn lojni, räjpni lojni:

—Näj luj najclu te rexpejnü.

Per Pedr räjp lojni:

—Gurniälojlu, Dad, dina gacä xpejnü.

⁵⁹ Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te bejn Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lajni canii Pedr rediidxre, guredxa' te guidgäi,
⁶¹ luxh gubiréza Jesús, bahuidzu'tzni lo Pedr, dxejc balajz Pedr nani gunii Jesús lojni, räjpni: "Che gajd guidgäi cuedxa', abazuni'lu chojn huält, räjpnu dilu gumbee najrä." ⁶² Dxejcti guc-huin lajz Pedr, biriini ro'c, ronduxhni.

Rniyajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj caguxhisnäjrenini, caguijnzarenini. ⁶⁴ Dxejc basäurenini lojni, gudajpreni lojni, räjpreni lojni:

—iGunii chuni'c gudijnlu!

⁶⁵ Luxh guiraloj cayäjbreni lojni, caniyaduxhrenini.

Bidzunäjreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidoj rebengool ni rnibee, näjza reni rnibee loj rebixhojz, näjza rebejn ni rulüi leii, huinäreni Jesús te suuni nez lojreni nen yu' cadro rujnreni yälguhtis. Dxejcti räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga loä. ⁶⁹ Per najli sibej Xi'n Dios ni gujc Niguii xladbee Gueb Dios ni yu' xhaguibaa.

⁷⁰ Dxejc gunabdiidx guiraareni lojni, räjpreni:

—Mbaj pues, äla luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—ÄXhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

23 Dxejc huisu guiraareni, huinäreni Jesús nez loj Pila't. ² Ro'c guslojreni cabe'creni xquejni, räjpreni:

—Bidxälnu bejnre cayujnni biey lo rexpejnü.

Räjpzani xhet nanabdi quiixnu impuest lo reiü César.

Caniizani laani najcni Crist, nalajznu najczani reiü.

³ Dxejc gunabdiidx Pila't lojni, räjpni:

—ÄLa luj ni najc reiü xten rexpejnü Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru caniireni, räjpreni:

—Guiraa rebejn Judea cayu' yärsia' xcuent xcäljruüi-ni. Guslojni guedx Galilee, luxh reeli sanuu caguluüi-ni.

Jesús nez loj Herodes

⁶ Che biejn diajg Pila't rediidxre, gunabdiidxni: "ÄLa Galilee siääd bejnnga?" ⁷ Cheni räjpreni ro'c siädni, baxhálnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén. ⁸ Che bahuü Herodes loj Jesús, bibalajzni sa'csi agujc xhej rlajzni fiini lojni, sa'csi abiejn diajni diidx xcuent ni cayujnni. Luxh rlajzni fiini gunni te mi-laagwr. ⁹ Xhidajl yälgunabdiidx bejn Herodes, luxh xhet guniidi Jesús. ¹⁰ Ro'c suga'za reni rnibee loj rebixhojz näjza rebejn ni rulüi leii, cabecduxhurenini xquejni. ¹¹ Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reiü, dxejcti baxhalsacrenini loj Pila't. ¹² Lagajc dx-ejga, Pila't näjza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dxejc gurejdx Pila't reni rnibee loj bixhojz, näjza rebengool ni najc guxhtis, näjza rebenguejdx. ¹⁴ Dxejc räjpni lojreni:

—La'tu biädna'tu bejnre loä, najtu caguquüni rebejn gunreni biey, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni. ¹⁵ Niclaza Herodes di nidxälä nicla tej dojl, ni'cni baxhalsacnini loonu, luxh abahuiitu xhet dojldi bejnne te guetni. ¹⁶ Ni'cni quinäni, dxjecti guslääni.

¹⁷ Najc costumbr rusläa Pila't te bejn ni yu' nen latzguiib casob rajc lanijre. ¹⁸ Per guiraareni guredxa'reni si'c tejsi bejn, räjpreni:

—iBagu't bejnre, basläa Barrabás!

¹⁹ Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. ²⁰ Rlajzpac Pila't gusläani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—iBacuaani lo cruz, bacuaani lo cruz!

²² Riojn gunisac Pila't lojreni, räjpni:

—ÄXhi dojlduxh bejnne? Xhetlidi dojl rdxälä bejnne te guetni. Ni'cni siguinäni dxejc suslääni.

²³ Luxh laareni sanuutis guredxa'reni, gunabreni xcajni lo cruz. Luxh sa'csi guredxa'tisreni, bejntireni gaan gujc si'c ni rlajzreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc basläani bejn ni yu' latzguiib

sa'csi bejn ni bieje, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

Che cuaj Jesús lo cruzj

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo cruzj, gunaazreni te bejn ni laa Simón ni siääd guedx Cirene; basaj bejnğa lo niaa. Dxejc basguurenini cruzj, siädnaajtini dejt Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon la-gajc xcuenttu näjza xcuent rexi'ntu. ²⁹ Sa'csi sidzujñ dx-ej gäbreni: "Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz." ³⁰ Dxejc guisloj rebejn gäb loj redajn: "Coljiajb yejcnu", säjzbazreni loj relom: "Colgucua'tz nuurnu." ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzarenini tio'p benguijdx xcajzarenini loj recruzj, guetnäjreni Jesús. ³³ Che bidzujñreni te lajt ni laa Calabeer, ro'c bacuaarenini Jesús lo te cruzj, bacuaazarenini guiro'p rebenguijdxga lo stio'p cruzj, tejni xladbee, steeni xladbägwini. ³⁴ Cheni cagucuaa rebejn reni lo cruzj, gunii Jesús, räjpni:

—Xtadä, badzucaj xtojñ rebejnre, sa'csi direni gan xh-ni'c cayujñreni.

Dxejc gudzujt resoldaad daad yejc xhajbni, te gudisreni xhajbni cua'renini. ³⁵ Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badeedreni bin-nii yäni. ³⁷ Dxejc räjpreni lojni:

—Palga guliini najclu reii xten rexejn Israel, baslaa la-gajc luj.

³⁸ Luxh bacuaarenini gaii diidx loj te baräjd ni cuaj yejc cruzj. Con didx griegw, con didx latin, näjza didx hebreo, bacuaarenini scree: "Dee najc Reii xten rexejn Israel."

³⁹ Te rebejn guijdx ni najl lo te cruzj ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

⁴⁰ Per benguijdx ni najl lo cruzj stelaadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? Ni cayajczalu tejsi castiigw!

⁴¹ Per nuurnu cayajcnu castiigw ni riäjñ gacnu te guidixnu redojl ni biennu. Luxh laani xhet dojl di bejnini.

⁴² Dxejc räjpni loj Jesús:

—Bazalajzlu narä che guidzujñlu lo xcälñibeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xh-aguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäy guideb guedxliuj, si'c bianxcäy si'cti rcachonti. ⁴⁵ Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'. ⁴⁶ Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojl di bejn bejnre.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayäzreni lagajc lastooreni.

⁴⁹ Luxh guiraa reni rumbee Jesús, näjza regunaa ni biädnajlñi che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laa-ca rujñni guira'ti. Siäädni guedx Arimatea, región Judea. Nadxaagzani loj reni rnibee neñ guidoro xten rexejn Israel. ⁵¹ Cabäzza José jääd yälñibee xten Dios, ni'cni dini nidxaglaiz nani bejn resa'ni. ⁵² Dxejcti huijni lo Pila't, gunabni tiejxh Jesús. ⁵³ Che gulätñini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. ⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhrenei togoolga neñ baa. ⁵⁶ Che gubi'reni rolizreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaarenini retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

Che gubansac Jesús lo rebengut

(Mt. 28:1-10; Mr. 16:1-8; Jn. 20:1-10)

24 Dxej ni gusloj xmaanga, rsildooru huinä regunaa robaa recuaan ni rlianejxh ni bencheereni. ² Che bidzujñreni, bahuiireni agubicaj guij ni rusäu ro' baa. ³ Dxejc che biu'reni neñ baaga, direni nidxäl tiejxh Jesús. ⁴ Lañ ni cadxelojreni, di jien xhi gunreni, biricaj tio'p dade' gusuj cuä'reni. Rdim-bichaduxh xhajbreni. ⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni: —¿Xhicuent siädtiiltu te bejn ni nabajñ lo rebengut, ä? ⁶ Rutini ree. Agubansacni. Colgusnaj lajztu rediidx ni guniini cheni guyusijcni Galilee, ⁷ che najni lojtu: "Riäjñ jiajb Xi'n Dios ni gujc Niguii ladzña rebendojl, xcajzani lo cruzj, dxejcti ni riojn dxejga sibansacni loj rebengut."

⁸ Dxejc banaj lajz regunaa xtidx Jesús, ⁹ biriireni robaa, gubi'tireni te bijreni diidx lo retzubiteeb rexejñpacni näjza loj rebejn ni yunäjreni. ¹⁰ Reni huisa'n diidx loj rexejñpac Jesús najc redee: Marii Magdalen, näjza Xuan, näjza Marii xnan Jacob, näjza sgaii gunaa.

¹¹ Niluxh rexpejn pacni bejn xhigab didxnayäälni, direni nililajz xtidx regunaaga.

¹² Dxejç huisu Pedr, ruxunlini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejç gubi'ni rolizni, rdxelojtisni xcuent ni gujç.

Ni guzajç lo nezyuj ni sii guedx Emaús

(Mr. 16:12-13)

¹³ Lagajç dxejga, tio'p rexpejn pacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. ¹⁴ Lał ni sasajreni lo nezyujga, cayuyreni diidx xcuent reni gujç ro'c. ¹⁵ Lał ni caniireni gubig Jesús lojreni, gusloj sasanäjnireni. ¹⁶ Luxh mase cahuiireni lojni, yu' xhi badxojn niembeerreni. ¹⁷ Dxejç gunabdiidx Jesús lojreni, räjpni:

—¿Xhini'c ruytu lał ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpni:

—Guiraasi bejn najn xhi gujç neñ guedx Jerusalén. ¿La lujtis bia'nlu neñ guejdxga ni di gan xhi gujç ro'c, ä?

¹⁹ Dxejcti räjp Jesús lojreni:

—¿Xhini'c gujç ro'c?

Dxejç räjpreni lojni:

—Recos xcuent Jesús ni siääd guedx Nazare't, ni gujç te niguii ni gunii xtidx Dios, rajpni yälrnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn. ²⁰ Näjza xho bejn reni rnibee loj rebixhojz näjza rexcuxhtisnu, bateedreneni ladzñaä reni gunibee guetni, dxejç bacuaarenini lo cruzj. ²¹ Niluxh nuurnu cabääznu laani gacni nani nuslaa rexpejn Israel ladzñaä rebenzajt. Naj agujç choñ dxej ni gujç recosre. ²² Luxh yu' gatii gunaa ni nadxaag loonu ni baschelojreni nuurnu. Barsil, che huijreni robaa xtenni, ²³ direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebeñgut. ²⁴ Dxejcti huihuii gatii sa'nu robaa, bahuiizarenini najcni si'ctis ni naj regunaaga loonu, niluxh direni nuhuii loj Jesús.

²⁵ Dxejç räjp Jesús lojreni:

—Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist. ²⁶ ¿La di nungäjł tedxgaa Crist retrabajwduxhre dxejcti jiu'ni lo xcälrdimbicha' Dios, ä?

²⁷ Dxejç gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejç huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzujnreni guejdx cadre sääreni, bejn Jesús si'cni chanuuni chääni lo nezyuj. ²⁹ Dxejç laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajç gudxej, agojł jiu' guxhijn.

Dxejcti biu' Jesús te jiannäjnireni. ³⁰ Cheni sobganäjnireni lo mex, cua'ni yätxtiil, benle'nini, dxejç gula'nini, gudisnini lojni. ³¹ Lagajç dxejç, baxhal Dios

balojreni, biembeerreni Jesús, dxejç laani gunitlojni lojreni. ³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejç dirurenini nibäjz ro'c, alga gunasgajçreni nez, gubi'reni guedx Jerusalén. Ro'c bidxälreni abidojç xpejn pac Jesús näjza sgaii bejn. ³⁴ Dxejcti bijreni diidx loj guiro'preni bidzujn, räjpreni:

—Gulliipac gubansac Jesucrist, luxh baluilojni loj Simón.

³⁵ Dxejç guiro'p reni bidzujn bijzarenini diidx ni gusajçreni lo nezyuj, näj xho biembeezarenini Jesús che gula'ni yätxtiil.

Baluiloj Jesús loj rexpejn pacni

(Mt. 28:16-20; Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajç Jesús galäiireni, guniini xchan lojreni, räjpni:

—¿Colçuecdxi lajztu!

³⁷ Per laareni rdxelojreni bidxejbreni, naareni cahuiireni lo te sprit. ³⁸ Dxejç räjp Jesús lojreni:

—¿Xhicuent cadxejbtu? ¿Xhicuent rac tio'p lastootu?

³⁹ ¿Colçhuii reñaä, näjza reni'ä! Lagajç naräni. Colçajñ narä te fiipactu laa naräni, sa'csi anajntu di te sprit ga'p bääł niclaza tzuajt si'c rapä narä.

⁴⁰ Che guniini rediidxga, baluigajçni reñaani näjza reni'ni. ⁴¹ Lał ni cadxelojreni, di gacdi chalilajçreni, sa'csi cabaduxh lajçreni, räjpni lojni:

—¿La yu' xhi rajptu gauä ree, ä?

⁴² Dxejç badeedreni te la' bälbigue', näjza te la' seer ni yu' tzuñ. ⁴³ Ni'c cua'ni gudajwnini nez lojreni. ⁴⁴ Dxejç räjpni lojni:

—Dee najç xtidxä ni rniä lojtu cheni yusicä lojtu, rniä riäjł soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucbeerreni xhi säloj rediidx ni caj lo rexquijtz Dios xcuentni. ⁴⁶ Dxejç räjpni lojni:

—Scree caj lo reguijtz: Nanab guet Crist, dxejç ni riojñ dxej, guibansacni loj rebeñgut. ⁴⁷ Sire'chza diidx xcuent xho ruslaa Crist rebejn neñ dojł che rusiejchreni lajçreni, che rililajçreni xtiidxni. Guedx Jerusalén guislojni, dxejç sire'ch diidx guideb guedxliuj. ⁴⁸ La'tu najctu testiigw guiraa recosre. ⁴⁹ Narä suxhałä Sprit Dxan xten Dios lojtu, ni'c colçia'n guedx Jerusalén cheni jädläjzlini neñ lastootu, guniidxni yälrnibee ni siääd xhaguibaali.

Huäjç Jesús xhaguibaa

(Mr. 16:19-20)

⁵⁰ Dxejç huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ñaani, benle'ni yejçreni. ⁵¹ Lał ni cayujnni si'c, gubicajni lojreni, huäjçni xhaguibaa. ⁵² Peta laareni gulujç gojnrenini, dxejç cabalazduxhreni gubi'reni guedx Jerusalén.

⁵³ Ro'c guixe-guixee guyu'reni neñ guidoro, calä'preni xpala'n Dios. Sugacni si'c.

San Juan

Xtidx Dios najc te Niguii

1 Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gac-cheeli guedxliuj, yunäjni Dios. ³ Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru ruti-ni. ⁴ Laani gojp yäl'nabajn. Yäl'nabajnga najc bianij xten rebejn. ⁵ Luxh bianijga rdimbicha' nez lo yäl'cäy, niluxh yäl'cäyga di niajcdi nusuiinini.

⁶ Guyu' te niguii birilaj Juan, ni baxhał Dios. ⁷ Laani biäädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij. ⁸ Laani dini gac bianij, laani biädsule'ni diidx xcuent bianij. ⁹ Laa bianijpacga ni rusanij lastoo guiraa rebejn, luxh najc abiäädni lo guedxliujre.

¹⁰ Nani najc Diidxga guyu' lo guedxliujre, xcuent laazani gac-chee guedxliujre, luxh di rebejn guedxliujre nililajz chu najni najcni. ¹¹ Biäädni loj rexpejn Israel, niluxh rexpejnni direni nicäjb niu'ni lojreni. ¹² Dxejc loj guiraa reni cuäjb guyu'ni lojreni, loj renani huililajz xti-idxn, loj reni'c badeedni yäl'nibee gacreni xi'n Dios.

¹³ Laa reni'c ni di gac si'c xi'n bejn guedxliuj, ni gojl sa'csi rlaiz te biniet chu xi'nni, dee najcpacreni Xi'n Dios sa'csi sudeedni yäl'nabajn par tejpas lojreni.

¹⁴ Diidxga gujc te bejn guedxliuj. Guläjzni lo guedxliujre, bahuilojzanu xcäl'rdimbicha'ni, si'c yäl'rdimbicha' xten xingan xteb xtadni, laani najcpacni nani sanälajz nuurnu, nani rnii didxlii loonu. ¹⁵ Juan gunii xcuent Jesús. Guredxa'ni, räjpni:

—Laa dee ni rniä, nani siääd detzä sajcruni loä, sa'csi laani ganidni nabajnni loä.

¹⁶ Sa'csi guiraanu cua'nu xcäl'nasacduxhni, yäl'racnäj detz yäl'racnäj. ¹⁷ Leii xten Dios biädna toMoisés, niluxh yäl'racnäj näjza redidxlii biädna Jesucrist. ¹⁸ Rut chu tejdi abahuii lo Dios, xinxtetni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist

(Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxhał rexpejn Israel rebixhojz näjza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jääd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäaznu jääd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhał nuure. ¿Xhi rniilu, chuxhni'c najclu?

²³ Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: "Colyensa'c xnezyuj Dad."

²⁴ Rebejn ni baxhał redee najc reni rniireni "farisee".

²⁵ Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jääd niclaza Elías niclaza stee niguii ni rnii xtidx Dios ni cabäaznu jääd, ä?

²⁶ Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee. ²⁷ Laa dee ni siääd detzä niluxh di nungäjł nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuui Juan siääd Jesús lojni. Dxejc räjpni:

—¿Col'huii! Aree Xile' xten Dios nani rudzucaj xtojł rebejn guedxliuj. ³⁰ Lagajc xcuent dee ni rniä cheni guniä lojtu: "Detzä siääd te niguii ni sajcruni loä, sa'csi ganidli narä agac nabajnni." ³¹ Luxh dina niembeäni, per biäd-tiobnisä con nis te guluiä lo rexpejn Israel chu najcni.

³² Guniiza Juan stee diidx xcuentni, räjpni:

—Narä bahuiä biäjt Sprit Dxi' xten Dios xhaguibaa si'c te palom guzudxini yejcn. ³³ Dina niembeäni, per nani baxhał narä gutiobnisä con nis, laani najni loä:

"Cheni fiilu jäjt Sprit Dxi' xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxi' xten Dios." ³⁴ Narä abahuiä lojni, ni'cni rniliä: "Dee ni najc Xi'n Dios."

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejn. ³⁶ Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

³⁷ Biejn diajg guiro'p rexpejn pac Juan diidxga, dxejc sanajlreni Jesús. ³⁸ Che gubiré Jesús bahuiini siädnajlreni, dxejc räjpni:

—¿Xhi caguilltu?

Räjp rebejn ga:

—Mastr, ¿caro rbäjzlu?

³⁹ Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Bianäjreni ro'c sa'csi agojl si'cti rcatajp gudxaj.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjlni Jesús. ⁴¹ Ganiddoo huitiilni bejtzni, dxejc räjpni lojni:

—Abidxälnu Mesías nani sälojza Crist ni cabääznu jiaäd.

⁴² Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälga rlajz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

⁴⁴ Felipe siääd guedx Betsaida, guedxro ni najcza lajdx Andrés näjza Pedr. ⁴⁵ Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶ Räjp Natanael:

—¿La sajz guirii te bejsa'c guedx Nazare't, ä?

Räjp Felipe lojni:

—Gudaa, te fiilu.

⁴⁷ Che bahuii Jesús siääd Natanael nez lojni, räjpni:

—Colhuii te bejn Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpejn Israel.

⁵⁰ Räjp Jesús lojni:

—Sa'csi rniä lojlu, "bahuiä suga'lu ni' yagiigw", ¿ni' rililajzlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

Te sa' ni guyu' guedx Caná xten Galilee

² Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús. ² Huijza Jesús näjza rexpejn pacni, sa'csi bidonreni chääreni lo sa'ga.

³ Gubijdz bin. Dxejc räjp xnan Jesús lojni:

—Dirureni ga'p bin.

⁴ Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujn.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejn Israel te racnayareni te si'c guisa' xleii toMoisés. Neñ tejga guesguijga ru' si'cti te gayuu litr nis. ⁷ Räjp Jesús loj remos:

—Colguchaj reguesguijre nis.

Dxejcti bachadoo rebejn gani. ⁸ Dxejcti räjp Jesús lojreni:

—Colca' che'nni naj te colchanäni lo nani cahuii caya-jc sa're.

Dxejc huinä remosga che'n bin lojni. ⁹ Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räjpni:

—Guiraa rebejn rudeedreni binsa'c räxгаа rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazäbdiidx yälrnibee xtenni luxh ni'cni huililajz rexpejn pacni xtiidxni.

¹² Che gudejd sa'ga, huijni guedx Capernaum con xnanni, rebejtzni näjza rexpejn pacni. Ro'c bia'nreni tio'p-choñ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzungajxh lanij pascw xten rexpejn Israel cheni rnalajzreni guxhijñ ni gudejd guixhajx xten yälgujt neñ Egipto, ni'c sää Jesús guedx Jerusalén.

¹⁴ Neñ guidoro bidxälni xhidajl bejn nani ruto' gon, xiil, palom näjza reni sobga' caguchaa melzijt. ¹⁵ Dxejc bejnni te chico't con gaii duu, gulääni regon con rexiil neñ guidoo. Batie'chni xcoobr rebejn nani ruchaa melzijt, barexh-xhätni rexmexreni. ¹⁶ Räjpzani loj reni caguto' repalom:

—Colcuää redee, na'c rujntu rolizj xtaä si'c te guii cadro rdo' guiralaj.

¹⁷ Dxejcti banajlajz rexpejn pacni xhi caj lo reguijtz ni bacuaa redade' ni gunii xtidx Dios: "Gucnaj lazä xcuent ni runnäjreni rolizjlu."

¹⁸ Dxejcti gunabdiidx reni najc xpejn Israel lojni, räjpreni:

—¿Xhi seen guluiilu loonu naj te fiinu arajplu yälrnibee te abejnlu recosre?

¹⁹ Badzu' Jesús diidxre räjpni:

—Colgutzujl guidoore, luxh narä neḡ choḡtis dxej sunchesacäni.

²⁰ Räjḡ rexpejḡ Israel lojni:

—Tiubixho'p ijz guclaa ni guc-chee guidoore, ¿xhixh sajč gunchesacluni neḡ choḡtis dxej, ä?

²¹ Niluxh laani caniini xcuent guidoo ni najč lagajč tiejxhni. ²² Ni'cni cheni gubansacni loj rebeḡgut, bana-
jlajč rexpejḡpacni rediidxre ni guniini, dxejč huilila-
jzreni nani caj lo rexquijtz Dios näjza rediidx ni gunii
Jesús.

Numbee Jesús guiraa rebejḡ

²³ Cheni guyu' Jesús guedx Jerusalén cadro cayajč lanij pascw, laḡ ni cayajč lanijga, xhidajl rebejḡ huililajč xtiidxni, bahuiizareni remilagwr ni bejnni. ²⁴ Luxh di Jesús nililajč xtidx rebejḡga, sa'csi arumbeeni xho najč rebejḡ. ²⁵ Niluxh dini niquiin chu gäb lojni xho najč be-
jḡ, sa'csi lagajč laani anancheeni xho najč lastoo tejga
bejḡ.

Jesús con Nicodem

3 Guyu' te niguii lo rexpejḡ refarisee ni laa Nicodem, najcni te beḡroru loj reni rnibee rexpejḡ Israel. ² Te guxhijḡ biädxhiga'tzni nez loj Jesús, räjpni lojni:

—Mastr, nadonnu lo Dios siäädlu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

³ Dxejcti räjp Jesús lojni:

—Rniliápac lojlu, nani di gaal stehuält, di gacdi fiini xcälrnibee Dios xhaguibaa.

⁴ Dxejcti räjp Nicodem lojni:

—¿Xho gac gaal te bejḡ stehuält niluxh anajcni beḡ-
gool? ¿Xhixh sajč chusacni xque' xnanni stehuält te
galsacni, ä?

⁵ Badzu' Jesús diidxre räjpni:

—Rniliápac lojlu, nani di gaal con nis, näjza con Sprit Dxan xten Dios, di gacdi jiu'ni lo xcälrnibee Dios xh-
aguibaa. ⁶ Nani rajl xi'n beḡ guedxliujre, ni'c najctisni
bejḡ guedxliuj, luxh nani rajl por Sprit Dxan xten Dios,
Spritzta najcni. ⁷ Na'c rdxelojlu sa'csi rniä: “Nanabpac
gaallu stehuält.” ⁸ Rbi' bej cadrotis rlajzni; riejn diajglu
rubejni niluxh dilu gan caro siäädni, dizalu gan caro
säáni. Si'cza rebejḡ guedxliuj direni gan xho rajl rexe-
jḡ Dios stehuält con Sprit Dxan xten Dios.

⁹ Badzu' Nicodem diidxre, räjpni:

—¿Xho mood sajč gac recosre?

¹⁰ Räjḡ Jesús lojni:

—¿La najclu te maestr xten rexpejḡ Israel luxh dilu
gan recosre, ä? ¹¹ Rniliápac lojlu, aguniinu xcuent recos
ni nadonnu, abasule'nu recos ni abahuiloonu, niluxh
la'tu ditu nililajč xtiidxnu. ¹² Palga ditu chalilajč xtiidxnu
che guniinu xcuent recos guedxliuj nani rniinu: ¿Xho
chalilajzta xtiidxnu palga guiniinu xcuent recos xh-
aguibaa?

¹³ Rut chutejdi ahuä'p xhaguibaa, xtebtis nani biäjḡ
xhaguibaa, lagajč Xi'n Dios ni gujč Niguii. ¹⁴ Lagajč

si'cni guläsjiiaa toMoisés bäl guiib lo yajḡ neḡ reyubi-
jdz, sigajcza nanab chäs Xi'n Dios ni gujč Niguii jiaa;
¹⁵ te guiraa renani chalilajč xtiidxni direni nit lo Dios,
sica'reni yäl'nabajḡ par tejpas.

Xho huinälajz Dios rebeḡ guedxliuj

¹⁶ Sa'csi huinälazduxh Dios rebejḡ guedxliuj, ni'cni
badeedni biäd Xinxtebni lo guedxliuj, te guiraa renani
chalilajč xtiidxni direni nit lo Dios, sa'csi sajpreni yäl'n-
abajḡ par tejpas. ¹⁷ Sa'csi di Dios nuxhaḡ xi'nni te gusni-
jtni rebejḡ guedxliuj, alga baxhaḡnini te laa rebejḡ neḡ
xtojḡreni xcuentni.

¹⁸ Nani chalilajč xtiidxni näjza chalilajč najcni chu na-
jni najcni dini nit, luxh nani di chalilajč xtiidxni agunijt-
ni sa'csi dini nililajč xtidx Xinxteb Dios. ¹⁹ Ni'cni dee najč
yäl'nijḡga: abiäd bianijga loj guedxliuj, biädnä Xi'n
Diosni, niluxh rebejḡ guedxliuj bidxagljazruren yäl-
nacäy cadro tre'reni, gulälazreni bianijga sa'csi xhet
laadi najč xtzuunreni. ²⁰ Guiraa reni rujḡ dzunguijdx,
rbälaz bianijga, dizareni guibig loj bianijga, didi gu-
luiloj bianijga rextzunguijdxreni. ²¹ Luxh reni rusoo-
bidxlii, rbigreni loj bianijga, te bianijga ruluiloj najč
rextzuunreni redzunsac'c xten Dios.

Rnisac Juan ni rutiobnis xcuent Jesús

²² Dxejcti biäd Jesús näjza rexpejḡpacni nez lo reyuj
xten Judea. Ro'c guyunäjnireni, batiobnisza rexpejḡ-
pacni rebejḡ. ²³ Juan ni Rutiobnis cagutiobniszani bejḡ
te lajt ni laa Enón ni tre' gajxh Salim, sa'csi ro'c yu' sijn
nis. Ro'c sää rebejḡ lojni te cagutiobnisniren. ²⁴ Dxejč
gajdreni gusäu Juan neḡ latzguiib.

²⁵ Dxejcti gusloj rexpejḡ Juan cayujy diidx con gaii
xpejḡ Israel xcuent yäl'rđiib ḡaaren ni najč xcostumb-
rexpejḡ Israel. ²⁶ Dxejč biädreni lo Juan, räjpreni:

—Mastr, dade' nani guyunäjlu stelaad gueu Jordán,
nani basule'lu xcuentni, adade'ga cagutiobnis, luxh
guiraa rebejḡ asää lojni.

²⁷ Dxejč badzu' Juan diidxre, räjpni lojreni:

—Nicla tej bejḡ digacdi ga'p te xhi cos palga di Dios
gudeedni lojni. ²⁸ Lagajč la'tu nancheetu guniliä: “Dina
gacä Crist ni cabäjzta jiäd.” Guniäza: “Narä nacä nani
biädnijd lojni.” ²⁹ Che rajč sa', nani sobganäj dxa'p, ni'c
najč bi'n ni gac chäälni, luxh xamigw bi'n nani suga'
ro'c, riejn diajgni rniini, rbalazduxhni sa'csi riejn diajgni
xse' bi'n. Sigajcza abibaduxh lazä xcuentni. ³⁰ Nanab
gacni laani beḡroru, beḡsajcru, biädla narä riajḡ gacä
beḡhuinru, ni guxiiru sajč lojni.

Nani siäd Xhaguibaa

³¹ Nani siäd jiaali, ni'c rnibee guirali, niluxh nani na-
jč beḡ guedxliuj ni'c rnii xcuent recos guedxliuj. Nani
siäd xhaguibaa ni'c rnibee guirali. ³² Nani bahuiini,
nani biejn diajgni, ni'c rusule'ni niluxh guxii rililajzreni
xtiidxni. ³³ Nani rililajč diidx ni rusule'ni, bejḡga ruluiloj
guliipac najč xtidx Dios. ³⁴ Nani baxhaḡ Dios, ni'c rnii
xtidx Dios sa'csi che rudeed Dios Sprit xtenni, dini
gudeed guxiini. ³⁵ Dad Dios sanälajzta xingaanni,

abadeedzani guiraliiti chu ladzņaani. ³⁶ Nani rililajz xtidx xingaanni arajp yālnabajņ par tejpas, luxh ni di chalilajz xtidx xi'nni, dini fii yālnabajņ, siāād xcārldxe'ch Dios yejci, sujn Dios castiigwni.

Rdxaag Jesús te gunaa Samaria

⁴ Che gucbee Jesús abiejn diajg refarisee xhidajlru bejņ sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexpejņni ni catiobnis), dxejc ³ biriini Judea gubisacni nez Galilee.

⁴ Laļ ni sasajni, nanab tedni nez Samaria. ⁵ Ni'c bidzujņni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé. ⁶ Ro'c sojb te bisie ni rniireni "xpisie Jacoob". Sa'csi abadxajz Jesús siādsajni, gurejni ro bisiega. Agojļ laidxej. ⁷ Bidzujņ te gunaa siādlā'pni nis, dxejc rājņ Jesús lojni:

—Baniidx che'n nis yā'ā.

⁸ Sa'csi rexpejņpacni asāāreni guejdxga sasiireni xhi gaureni.

⁹ Rājpti guna samaritaņa lo Jesús:

—¿Xho mood rniablu nis loā, luj ni najc te beņ Israel luxh narā nacā gunaa samaritaņ?

(Sa'csi di rexpejņ Israel chanā sa'reni rebejņ Samaria.) ¹⁰ Rājņ Jesús lojni:

—Paru najnlu xhini'c najc yālrunaslajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajņ lojlu.

¹¹ Rājpti gunaaga lojni:

—Dad, xhet ca'dilu te guiliā'plu nis, luxh bisiere najc jiatduxh. ¿Caxh chacalu nisnabajņga, ā? ¹² ¿La beņrorulu lo toxtadgoldoonu Jacoob ni basa'n bisiere cadro huā'p nis gu'ni, gu'za rexi'nni, nājza rexquidxaani, ā?

¹³ Badzu' Jesús diidxre lojni, rājņni:

—Guiraa reni rā' nis bisiere, siojlenei stehuālt. ¹⁴ Luxh nani yā nis nani gudedā, diruni jiojļ, sa'csi nis nani gudedā neņ lastooni sajci si'c te bisie nani rdatis nisni te gudeedni yālnabajņ par tejpas.

¹⁵ Dxejcti rājņ gunaaga lojni:

—Dad, baniidx nisga yā'ā, te na'cru jiojļ, te na'cruza guibi'ā jiādlā'pā nis ree.

¹⁶ Rājņ Jesús:

—Huij, huitejdx chāālu gudanāni ree.

¹⁷ Rājņ gunaa loj Jesús:

—Ruti chālā.

Rājņ Jesús lojni:

—Laaca guniilu, ¹⁸ sa'csi aguyu' gaiili chāāllu. Luxh nani rbāznājlu ņaj dini gac chāāllu; guliica najlu.

¹⁹ Che biejn diajg gunaaga si'c, rājņni:

—Dad, rchaloā najclu te niguii ni rnii xtidx Dios. ²⁰ Re-toxtadgoldoonu gojņreni Dios lo dajņre, luxh la'tu rniitu guedx Jerusalén najc cadro nanab ganni Dios.

²¹ Rājņ Jesús lojni:

—Gunaa, huililajz xtidxā, sidzujņ or cheni nicla lo dajņre, niclaza guedx Jerusalén ditu chagajņ Dad Dios.

²² La'tu rajņtu Dios nani ditu gumbēe, nuunu rajņnu Dios nani rumbeenu; sa'csi yālrušļaa bejņ lo dojl siāād

xcuent rexpejņ Israel. ²³ Niluxh sidzujņ or, luxh al-abidzujņni, che reni guliipac rajņ Dad, reni'c neņ lastooreni, lo xcāriejņreni sajņreni Dios. Sa'csi sa' bejņre rguiil Dad Dios te gaņrenini. ²⁴ Dios najc te Sprit. Reni rajņ Dios nanab gaņrenini neņ lastooreni, lo xcāriejņreni, guideb xtijņreni sa'csi rumbeerenini.

²⁵ Rājņ gunaa lojni:

—Ananā siāād Mesías ni laaza Crist. Cheni jiāadni, laani susule'ni guiraliiti loonu.

²⁶ Rājņ Jesús lojni:

—Narā ni caniā lojlu, nacā laani.

²⁷ Dxejc bidzujņ rexpejņpacni, bidxelojreni sa'csi gunii Jesús lo gunaaga, niluxh rut gunabdiidxdi xhi rļajzni, niclaza rut gunabdiidxdi xhini'c caninājņni gunaaga.

²⁸ Dxejcti basa'n gunaaga xtie'ni, sā'tini guedxroga. Dxejcti rājņni loj rebejņ:

²⁹ —Coļtaa, fiitu te niguii ni gunii loā guira'ti nani abenā. ¿La et laadi dee Crist ni cabāāznu jiāād, ā?

³⁰ Dxejc birii rebejņguejdxga, bidzujņtireni lojni.

³¹ Reni najc rexpejņpacni canabduxhrenei gau Jesús, rājņreni:

—Mastr, gudajw.

³² Laani rājņni:

—Narā rapā xhi gauā nani ditu gumbēe.

³³ Dxejcti rājņ rexpejņpacni lo sa'reni:

—¿Xhaa yu' chu abiādñā xhi gudajwmi, ā?

³⁴ Rājņ Jesús:

—Yālrajw xtenā najc gunā si'cni rļajz nani baxhal narā, nāj guluxā xtzuunni. ³⁵ La'tu rniitu riāādx tajp bāii te guire' cose'ch. Narā rniā colguiliās lojtu, colfisa'c loniaa, abiquiijz regājļ, agojļ guire' cose'ch. ³⁶ Nani rujņ dzuun rutie' cose'ch rca'ni xcuentni, luxh ni caca'ni najc par yālnabajņ par tejpas, te tejsi guibalaznāj nani gule'c binij nāj nani batie' cose'ch. ³⁷ Sa'csi guli najc diidx nani rnii bejņ, rniireni: "Tejni rbe'c binij, ste'cani rutie'ni." ³⁸ Narā abaxhalā la'tu gutie'tu cose'ch nani ditu nibe'c; ste'ca najc nani bejņ dzuun gule'cni binij, dxejc la'tu jiu'tu gutie'tu cose'ch loj xtzuunni.

³⁹ Xhidajl rebeņ Samaria huililajz xtidx Jesús xcuent rediidx ni rājņ gunaaga lojreni che rājņni: "Guniini loā guiralii nani abenā." ⁴⁰ Ni'cni, che biāād rebeņ guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. ⁴¹ Dxejc xhidajlrureni huililajz xtiidxni ni guniini lojpacreni. ⁴² Dxejcti rājņreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajņnu xtiidxni, ni'c nancheenu dee najcpac ni rušļaa rebejņ guedxliuj loj dojl. Laani najc Crist ni cabāāznu jiāād.

Basiajc Jesús xi'n te bejņ ni rujņ xtzuun gubier

⁴³ Che gudejđ tio'p dxej, biriini guedx Samaria, huinuuni xnezyujņi nez Galilee. ⁴⁴ Sa'csi lagajc Jesús gunii, rājņni: Te bejņ nani rnii xtidx Dios di rebeņ lajdxpacni chanālajz xtiidxni. ⁴⁵ Che bidzujņni rexyuj Galilee, rebeņ Galilee huichaglojrenini sa'csi nāj laareni huijreni lanij pascw guedx Jerusalén, ro'c bahuiireni guiraa redzuun nani bejņni.

⁴⁶ Gubisacni, bidzujñni guedx Caná xten Galilee cadro bejn ni bidxaa nis gujñni bin. Dxejcti guyu' te dade' nani rujñ xtzuum reii. Guedx Capernaum naga' te xi'nni cayacxhuu. ⁴⁷ Che bejn diajg dade'ga abirii Jesús Judea, abidzujñni nez Galilee, huijni lo Jesús, gunabduxhni lojni chááni te gusiajñni xi'nni nani naga' cuentro, ameerli guetni. ⁴⁸ Dxejcti rájp Jesús lojni:

—Paru ditu fii reseen, remilagwr, ditu chalilajz chuni'c nacä narä.

⁴⁹ Dade' ni rujñ xtzuum reii, gunii lojni, rájpni:

—Do'o Dad, te di guet xi'nä.

⁵⁰ Rájp Jesús lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni rolizjni, birii rexmosni, huichaglojni, badeedreni diidx nabajñ xi'nni.

⁵² Dxejcti gunabdiidxni:

—¿Corti gusloj cayajñni?

Rájpreni lojni:

—Naii si'cti rcatej gudxer biriini xliaa.

⁵³ Dxejcti gucbee dade'ga lagajc orga ni rájp Jesús lojni: “Di xi'nlu guet.” Dxej dade'ga näjza guiraa rebejn ni yu' rolizjni huililajzreni Jesús najc ni cabájzreni jääd.

⁵⁴ Dee barojp seen ni bejn Jesús cheni biriini Judea, biu'ni Galilee.

Bejn Betesda nani naxu'n

5 Che gujcti recosre, guyu' te lanij xten rexpejn Israel, dxej huij Jesús guedx Jerusalén. ² Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³ Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabájzreni guiniib nisga ⁴ sa'csi gucti-guc riääd te xangl Dios rusniib nisga. Dxej bejn nani gun gaan chachu' lo nis ganiddoo che guiniibni, riajñni lo xhitis yälgujdx ni rajñni. ⁵ Ro'c guyu' te beñ racxhuu nani agujc galbitzubixuhujñ ijz cayacxhuuni. ⁶ Cheni bahuii Jesús naga'ni, badeedzani cuent lacti xchero raxchuuni, rájpni lojni:

—¿La rlajzlu jiajclu?

⁷ —Dad —rájp beñ racxhuuga lojni—, dina gapä chu gusal narä neñ nis cheni rniib nisre. Cheni rlazä chachu'ä lo nis, stee bejn rujñ gaan narä, ganidni richu'ni lo nisga.

⁸ Rájp Jesús lojni:

—Huistie, guläs xta'lu, guzaj, huij.

⁹ Lagajc dxej biaj bejnnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, ¹⁰ ni'c rájp rexpejn Israel lo bejn ni biajcgä:

—Nadxej najc dxej ni rusilajz bejn. Di gacdi guulu xta'lu.

¹¹ Laani rájpni:

—Nani basiaj narä, laani naj loä: “Guläs xta'lu, gusaj.”

¹² Dxej gunabdiidxreni lojni:

—¿Chuni'c naj lojlu “Guläs xta'lu, gusaj”?

¹³ Dxejcti beñ racxhuu ni biajcgä dini gaan, sa'csi gunitloj Jesús, biriini ro'c lañ ni tre' xhidajl bejn lajtga.

¹⁴ Che bidxaagni Jesús stehuält neñ guidoro, rájp Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuentroru.

¹⁵ Sä'ti bejnnga, huiye'tzni loj rexpejn Israel laa Jesús ni basiajñni. ¹⁶ Ni'cni gusloj rexpejn Israel carinajlreni Jesús, rlajzreni guiga'ni te ju'trenini, sa'csi rujñni redzuinga dxej ni rusilajzreni. ¹⁷ Luxh rájp Jesús lojreni:

—Xtadä Dios najli cayujñni dzuun, ni'cni näjza narä cayunä dzuun.

¹⁸ Ni'cni rlajzru rexpejn Israel ju'tni, xhet ganaxdi sa'csi rujñni dzuun dxej ni rusilajzreni, per näjza sa'csi rájpni Dios najc Xtadni, rniizani tebloj najñni con Dios.

Yälrnibee xten Xi'n Dios

¹⁹ Badzu' Jesús diidxre rájpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujñ Xtadni dzuunga, sa'csi guira'tis dzuun ni rujñ Xtadni, dzuunga rujñza Xi'nni sigajc rujñ Xtadni. ²⁰ Sa'csi rinälajz Dad xi'nni, ruluini lo xi'nni guiraa redzuun nani rujñni, luxh dzunroruza suluiini lojni gunni, te guidxelojtu. ²¹ Sigajc ni rliäs Dios rebengut, rudeedni yäl nabajñ lojreni, sigajc sudeed xi'nni yäl nabajñ lo renani rlajztisni. ²² Nicla Dad di gun yäl guxhtis, alga badeedni guiralii yäl guxhtis gun Xi'nni, ²³ te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhañni biäädni.

²⁴ Rniliä, rniliäpac lojtu, nani rucudiajg xtidxä, ni chalilajzani nani baxhañ narä, ni'c rajpni yäl nabajñ par tejpas; niluxh dini ted lo yäl guxhtis, alga abiriini lo yäl gujt, agudejdni lo yäl nabajñ. ²⁵ Rniliä, rniliäpac, sidzujñ or, luxh alabidzujñni, cheni siejn diajg rebengut xse' Xi'n Dios, luxh reni riejñ diajg diidxga sibansacreni lo rebengut. ²⁶ Si'cni rajp Dad Dios yäl nabajñ lagajcsi laani, sigajc badeedni lo Xi'nni ga'pni yäl nabajñ lagajcsi laazani. ²⁷ Badeedzani lojni yälrnibee te gunni yäl guxhtis, sa'csi najñni Xi'n Dios ni gujñ Niguii. ²⁸ Na'c rdxelojtu rediidxre, sa'csi sidzujñ or cheni guiraa reni yu' neñ baa siejn diajg reni xse'ni ²⁹ siriizarenini neñ baa. Reni bejn dzunsa'c siriireni te guibansacreni lo yäl nabansa'c, niluxh reni bejn dzunguijdx, siriireni te guibansacreni te tedreni lo xcäl guxhtis Dios.

Nani rululoj yälrnibee ni rajp Jesús

³⁰ Xhet rajc di runä lagajcsi narä. Sigajc ni riejñ diagä, sigajc runä yäl guxhtis. Luxh yäl guxhtis ni runä laaca najñni sa'csi dina quilä gunä nani rlazätis, rguilätis gunä si'c ni rlajz Dad nani baxhañ narä. ³¹ Palga narätis rniä diidx lagajc xcuentä, xhet sajcdi diidxga. ³² Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. ³³ La'tu abaxhañtu chu huij loj Juan, huinabdiidxreni lojni “chu najc bejnnga”, niluxh badzu'ni diidx lojreni guniini diidx guliipac xcuent chu nacä. ³⁴ Narä dina jiuä diidx nani rni rebejn xcuentä luxh canisacä rediidxre te laatu lo xtojltu.

³⁵ Juan gujc si'c te bajl ni ralguij, basaniizani. Luxh la'tu huihuiituni bibalajztu lo xpianiini balsi dxej. ³⁶ Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtaä gunä, lagajc redzuun ni runä, huenliisi ruluilojreni Xtaä Dios baxhaļ narä. ³⁷ Xtaä ni baxhaļ narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸ Dizatu ga'p xtiidxni neņ lastootu, sa'csi di lajztu chalii xtiidx nani baxhaļ narä. ³⁹ La'tu roļduxhtu reguijtz xten Dios sa'csi rchalotu si'c sidxältu yäl'nabajņ par tejpas, luxh lagajc reguijtzga rusule' chu narä. ⁴⁰ Naadditu jiäädte loä te ga'ptu yäl'nabajņ par tejpas. ⁴¹ 'Narä dina quilä chu bejņ guiliä'p xpala'nä nez loä. ⁴² Luxh narä anumbeätu, ananä ditu chanälajz Dios neņ lastootu. ⁴³ Narä biälä xcuent Xtaä, luxh ditu gucuadiajg xtidxä; paru jiääd chu stee bejņ xcuentcani, ni'c sii sucuadiajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quill xho gac guiliä'p Gueb Dios xpala'ntu. ⁴⁵ Di naatu pet narä ni chale'cä xquejtu lo Xtaä. ToMoisés ni chale'c xquejtu, luxh rujntu xhigab lagajc xleiini gacnäj la'tu. ⁴⁶ Paru la'tu nililajzactu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. ⁴⁷ Palga ditu chalilajz nani bacuaani lo reguijtz, ¿xho chalilajztu rediidx nani cania lojtu, ä?

Bayaan Jesús gaii miļ niguii

(Mt. 14:13-21; Mr. 6:30-44; Lc. 9:10-17)

6 Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. ² Sanajl xhidajl bejņni sa'csi rhuireni remilagwr ni rujņni lo rebeņracxhuu. ³ Dxejcti huä'p Jesús yejc te dajņ, ro'c gurenäjni rexpejņpacni. ⁴ Niluxh ameer gac lanij pascw xten rexpejņ Israel, cheni ruedeedreni xquixhtios lo Dios xcuent dxej ni biriireni Egiptu. ⁵ Cheni guläs Jesús lojni, bahuiini siääd xhidalduxh bejņ, siäädreni nez lojni, dxejcti räjpni loj Felipe: —¿Caro guisiinu yätxtiil te gau rebejņre? ⁶ Dxejc räjpzani si'c te don xhi xhigab gun Felipe, luxh laani anajņni xho gunni. ⁷ Räjp Felipe lojni: —Di tio'p gayuu beex yätxtiil gaļ te gaureni tlagaj. ⁸ Tej rexpejņpacni ni laa Andrés, bejtz Simón Pedr, räjp lojni: ⁹ —Ree suga' te biuux ca' gaii yätxtiil con tio'p bajl, ¿xhixh sajl ni'c gau rebeņ xhidajlre? ¹⁰ Dxejcti räjp Jesús: —Colyejtz loj rebejņre cuereni. Yuduxh guixa' ro'c. Dxejcti gurej reniguii. Si'cti gaii miļ najc reniguii. ¹¹ Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejņpacni. Dxejcti rexpejņpacni gudisrenini loj rebejņ nani sobga'. Sigajcza gudisreni rebajl si'ctisni rlaizreni gaureni. ¹² Che gulujx gudajwreni, gudxaj xque'reni, dxejcti räjp Jesús loj rexpejņpacni: —Colgutie' guiraa reyätxtilbiujy nani bia'n te xhet nit-di. ¹³ Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaii yätxtiilga nani gula' guda-

—jwreni. ¹⁴ Che bahuii rebejņga resean, remilagwr nani bejņ Jesús, dxejc räjpreni:

—Guluiipacni, laa dee ni najc niguii ni rni xtidx Dios nani cabääznu jiääd lo guedxliuj.

¹⁵ Sas che gucbee Jesús cayujņreni xhigab jiäd-naazrenini te niujņreni gacni rei te guinibeeni lojreni, biriini ro'c, xtebni gubisacni neņ dajņ.

Gusaj Jesús lo nisdoo

(Mt. 14:22-27; Mr. 6:45-52)

¹⁶ Che gojł guxhijņ, bidzujņ rexpejņpacni lo nisdoo. ¹⁷ Biu'reni neņ te barcw te tedreni lo nisdoo nez guedx Capernaum. Abicäy lo yuj niluxh gajd Jesús guibi' lojreni te chääni. ¹⁸ Gusloj cayäjs nisdoo xcuent te beduxh nani cabi'. ¹⁹ Ni'cni che gusajreni si'cti gaii o xho'p kilómetro, bahuiireni siäddzungajxh Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni: —Naräni. Na'c guidxexjbtu. ²¹ Dxejcru cuäjbreni biu'ni neņ barcw. Dxejcti bidzujgajceni stelaad lo yuj cadro sääreni.

Caguiil rebejņ Jesús

²² Che bara yääl, rebejņ nani bia'n stelaad ro' nisdoo, bahuiireni asanä rexpejņpacni barcwbäz nani suga' ro'c, niluxh di Jesús nij, xtebsireni sääreni. ²³ Luxh bidzujgajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixhtios lo Dad. ²⁴ Che bahuii rebejņ ruti Jesús ro'c, niclaza rexpejņni, biu'reni neņ rebarcw, sääreni guedx Capernaum satiilreni Jesús.

Jesús najc yätxtiil xten yäl'nabajņ

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujņlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. ²⁷ Na'c guntu dzuun ganax par yäl'rajw nani rnit-loj. Colyejņ dzuun par yäl'rajw nani di nitloj, ni runiidx yäl'nabajņ par tejpas. Yäl'rajwre suniidx Xi'n Niguii, sa'csi loj rebejņ baluii Xtaäni, Diospac, laani najc Xi'npacni.

²⁸ Dxejcti räjpreni:

—¿Xhini'c jienu te gac jienpacnu dzuun ni rlaiz Dios?

²⁹ Räjp Jesús lojreni:

—Dee najc ni rlaiz Dios guntu: chalilajztu xtidx narä, nani baxhaļni.

³⁰ Räjpreni lojni:

—¿Xhi seen gunlu te guihuiinu xcäl'rnibeelu te cholilajznu xtiidxlu? ¿Xhi dzuun rujņlu? ³¹ Retoxtdanu gudajwreni yätxtiil ni laa mana loj reyubijdz si'cni caj loj reguijtz: "Badeedni yätxtiil ni białx xhaguibaa gudajwreni."

³² Räjpza Jesús:

—Rniliá, rniliápac lojtu, xhet toMoisésdi ni badeed yätxtiil ni biajb xhaguibaa. Xtradä ni suniidx yätxtiil nani siäädpcac xhaguibaa. ³³ Sa'csi yätxtiil xten Dios najc bejn ni siääd xhaguibaa, niluxh laani rudeedni yälñabajn par tejpas loj reben guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yälñabajn nani riäjł jiaäd; chutis ni jiaäd loä diruni guiliaan, niluxh chutis ni rililajz xtidxä diruni jiojł par tejpas. ³⁶ Aguniä lojtu, la'tu ditu chalilajz, luxh abahuitu loä. ³⁷ Guiraa renani abaniidx Xtradä loä, siäädni loä, niluxh chutis ni jiaäd loä dina cuälazäni. ³⁸ Sa'csi narä siälä xhaguibaali te gunä si'c ni rlanj Xtradä, xhet si'c di ni rlazädi. ³⁹ Dee najc ni rlanj Xtradä nani baxhał narä: na'c nit nicla tej renani baniidxni loä, te guspañsacä guiragajczeni che gał dxej lult ni riäjł jiaäd. ⁴⁰ Scree rlanj nani baxhał narä: guiraa renani fii lo Xi'n Dios, näj chalilajzreni xtiidxni, xca'reni yälñabajn par tejpas niluxh narä suspañsacäreni che gał dxej lult ni riäjł jiaäd.

⁴¹ Rediidxre bejn gusloj casiey rexpejn Israel xcuent Jesús sa'csi räjpni: “Narä nacä yätxtiil ni biäjt xhaguibaa.” ⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtradni, xnanni, ¿xhoxh rniini xhaguibaa biäjtñi?

⁴³ Dxejcti räjp Jesús lojreni:

—Na'c rusieinäj sa'tu. ⁴⁴ Rut rajc di riääd loä palga di Xtradä ni baxhał narä jiaädni loä, te guspañsacäni che gał dxej lult ni riäjł jiaäd. ⁴⁵ Loj reguijtz ni bacuaa redade' ni gunii xtidx Dios caj scree: “Sului Dios guiraareni.” Ni'cni guiraa reni rucua diajg xtidx Xtradä, reni rsieed lojni, reni'c ni jiaäd loä.

⁴⁶ ‘Dinä guiniä yu' chu abahuii lo Dios; tejtis ni abahuii lojni: nani baxhał Dios, ni'ctis abahuii lojni.

⁴⁷ Rniliä lojtu che rniä: nani chalilajz xtidxä, ni'c rajp yälñabajn par tejpas. ⁴⁸ Narä nacä yätxtiil nani rudeed yälñabajn. ⁴⁹ Retoxtadt gudajw mana ni bastejb Dios lo reyubijdz, dxejcti gujtzareni. ⁵⁰ Dee najc yätxtiil ni siääd xhaguibaa, te chutis ni gau yätxtiilga dini guet. ⁵¹ Narä nacä yätxtiil bajn ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' reben guedxliuj yälñabajn najc la-gajc bältiexhä.

⁵² Dxejcti gusloj casiey rexpejn Israel räjpreni:

—¿Xho gac guniidx dee bältiejxhni guidaunu, ä?

⁵³ Räj Jesús:

—Rniliá, rniliápac lojtu, palga ditu gau bältiejx Xi'n Dios ni gujc Niguii, palga dizatu yä xtiejñni, digacdi ga'ptu yälñabajn. ⁵⁴ Nani gau bältiexhä, nani yäza xtienä, ni'c rajp yälñabajn par tejpas, niluxh suspañsacäni che gał redxej lult. ⁵⁵ Sa'csi bältiexhä najc te yälrausa'cpac, xtienä najcza te yälräsa'cpac. ⁵⁶ Nani gau bältiexhä, nani yäza xtienä, ni'c yu'pac con narä, luxh narä yu'äza con laani. ⁵⁷ Xtradä ni baxhał narä rajp yälñabajn par tejpas. Narä nabañä xcuent laani. Sigajcza nani rajw narä, sibajñzani xcuent narä. ⁵⁸ Dee najc yätxtiil nani biääd xhaguibaali; dini gac si'c mana ni

gudajw xtadt dxej empac gujtreni, sa'csi nani gau yätxtiilre sibajñni par tejpas.

⁵⁹ Recosre baluii Jesús nen te guidobäz lał ni guyu'ni guedx Capernaum.

Diidx xten yälñabajn par tejpas

⁶⁰ Che biejn diajgzeni si'c, xhidajl rexpejn pacni räjp:

—Naganduxh najc rextiidxni. ¿Chu laa nani gac cuadiazgñi?

⁶¹ Dxejcti gucbee Jesús cagusiejyreni xcuent rediidxga, dxejcti gunabdiidxni räjpni:

—¿La rusieed rediidxre la'tu, ä? ⁶² ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo?

⁶³ Sprit xten Dios najc ni rudeed yälñabajn; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälñabajn par tejpas. ⁶⁴ Luxh lałtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, gutedni laani ladzñaa reben dojl. ⁶⁵ Dxejcti räjpni:

—Ni'cni rniä lojtu, nicla tej rut sajcdi jiaäd loä palga di Xtradä jiaädni loä.

⁶⁶ Lagajc dxejcti gusloj cabicaj xhidajl rebejn ni agujc xchej gusanäj Jesús, dirureni nisianäj Jesús. ⁶⁷ Dxejcti räjp Jesús loj guidzubitio'p rexpejn pacni:

—¿La nägajcza la'tu rlanjtu jiiitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yälñabajn par tejpas. ⁶⁹ Nuure abiolilaznu, anajñnu najclu Crist Xi'n Dios nani nabajn.

⁷⁰ Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtu najc bendxab.

⁷¹ Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejn pac Jesús.

Di rebejtz Jesús chalilajz

7 Che gujcti recosre, cansaj Jesús nez reyuj xten Galilee, di rlanjni jia'nni nez reguedx Judea sa'csi rlanj reben ro'c ju'tni. ² Luxh ameer gał lanij xten cose'ch xten guidoguijdz, te relanj xten rexpejn Israel. ³ Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejn pacu fii redzunro nani rujnlu. ⁴ Sa'csi rut rujndi xtzunni xhiga'tz palga rlanjni gacbee bejn xhi dzuun rujñni, te gumbee bejñni. Palga rujnpacu redzuunre, baluiini lo guiraa reben guedxliuj.

⁵ Guniireni si'c lojni sa'csi nicla rebejtzni di chalilajz xtiidxni. ⁶ Dxejcti räjp Jesús lojreni:

—Gajd xhorä guidzujñ, niluxh par la'tu xhitis or najc hueen. ⁷ Di gacdi guidxe'ch reben guedxliuj lojtu, luxh rdxe'chreni loä sa'csi narä rniliä xcuentreni: dzunguijdx najc xtzunreni. ⁸ La'tu colchäj lanij; narä dina cha'a lanijga sa'csi gajd xhorä gał.

⁹ Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰ Dxejcti che asää rebejtni lanij, dxejc näjza laani sääni lanij, luxh dini nusäbdiidx, si'c xhiga'tz sääni.

¹¹ Dxejcti caguil rexpejn Israelni lo lanijga, räjpreni: —¿Concha niguiiga?

¹² Lo rebejn xhidaalga yu' xhidajl bejn ni cagusejyreni xcuentni. Yu'reni räjp: "Hueen najcni", per sgaiireni räjp: "Dini gac hueen. Cagusgueeni re-benguejdx."

¹³ Nicla tejreni xhet casäbdiidxireni xhini'c caniiireni. Direni guinii dip sa'csi rdxejbreni rexpejn Israel nani rnibee.

¹⁴ Agurojl lanij, che biu' Jesús nejn guidoro. Dxejcti gusloj caguluiini. ¹⁵ Dxejcti rdxelox rexpejn Israel nani rnibee, räjpreni:

—¿Xho najn dee guiraloj, niluxh dini nisieed xleii to-Moisés?

¹⁶ Badzu' Jesús diidxre, räjpni:

—Yälrlulii nani caluiyá et xtenädini, xten nani baxhal naräni. ¹⁷ Palga yu' chu rlanj gun nani rlanj Dios, sacbeeni la xten Dios najc reyälrlulii xtenä, o la lagajcsi narä rbää diidx ni caguluiä. ¹⁸ Nani rusule'ni diidx nani lagajc laani rbääni, ni'c rniini diidxga te guiliä'p rebejn xpala'nni, luxh nani rguuil chä'p xpala'n nani baxhalni, ni'c ni rni diidxlii, xheti yälrusguee nejn lastooni.

¹⁹ ¿La di toMoises nuniidx leii lojtu, ä? Niluxh nicla tejtü di gusoob xtidx leiga. ¿Xhicuent rlanjtu ju'ttu narä, pes?

²⁰ Badzu' rebejn xhidajlga diidxre, räjpreni:

—¿Xpriet bejdxab yu' lastoolu! ¿Chuni'c rlanj ju'tlu?

²¹ Badzu' Jesús diidxre lojreni, räjpni:

—Tejtis dzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu. ²² Ni'cni baniidx toMoisés lojtu yälru'tu bee, luxh etlaadini guläx-tiejnini, agac guläx-tiej retoxtagdootuni. La'tu rusäl-tu bee rebiuux mase najcni dxej nani rusilajztu. ²³ Mbaj pes, palga rajc rusäl-tu bee bejn te dxej nani rusilajztu didi nit xleii Moisés, ¿xhicuent rdxe'chtu loä sa'csi basi-acäpac te bejn te dxej nani rusilajztu, ä? ²⁴ Na'c rujntu yälguxhtis si'ctis ni rlanjtu. Coljejn yälguxhtis con yälguxhtis xten Dios.

Rusule' Jesús casiädni

²⁵ Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguilreni te ju'trenini, ä? ²⁶ Ani asuga', caniini nez loj guiraa rebenquejdx, niluxh rut rudxoindini. ¿Xhaa ahuililajz reguxhtis, regubier laani najcpacni Crist, ä? ²⁷ Niluxh nuure nadoncheenu caro siäd niguiire, niluxh che jäd Crist, rut gacbeedi caro siädni.

²⁸ Caguluii Jesús nejn guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajjni,

luxh la'tu ditu gumbeeni. ²⁹ Luxh narä numbeäni, sa'csi lojni biriä, laani baxhalzani narä.

³⁰ Dxejc rlanjreni niniaazrenini, niluxh rut gunaazdini, sa'csi gajd xhorni gal. ³¹ Xhidajl bejn lo rebejn xhidajlga huililajz xtiidxni, dxejcti räjpreni:

—Cheni jäd Crist, ¿xhixh sujnrni milagwr loj nani rujn dee, ä?

Ruxhal refarisee guixhajg guiniaaz Jesús te jäuuni

³² Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jäuuni.

³³ Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. ³⁴ Siguiiltu narä, niluxh ditu guidxäl narä, sa'csi cadro cha'ä digacdi jädädu.

³⁵ Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxäl nuni? ¿Xhaa sijni loj rexpejn Israel nani nare'ch nez lajdx regriegos te guluiini regriegos? ³⁶ ¿Xhi säloj diidxre nani guniini loonu: "Siguiiltu narä, niluxh ditu guidxäl narä, sa'csi cadro cha'ä di gacdi jädädu"?

Regueu nisabajn

³⁷ Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiädni loä te yäni. ³⁸ Nani chalilajz xtidxä si'cni caj lo rexquijtz Dios nejn lastoolini siliejn nisabajn.

³⁹ Rediidxre guniini xcuent Sprit Dxan nani churu jädälajz nejn lastoo reni rililajz xtiidxni, sa'csi gajd Sprit Dxan jäd, sa'csi gajd Jesús guibañsac lo rebenjut.

Gucgala' rebejn

⁴⁰ Lo rebejn xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siäd, si'c ni rni xtidx Dios.

⁴¹ Yu'zarenini räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jäd Crist nez Galilee. ⁴² Ni loj rexquijtz Dios caj riäjpac gac Crist te rexagdoo torei David, jädzani guedx Belén, lagajc guejdx cadro siäd torei David.

⁴³ Dxejcti guc gala' rebejn xcuent Jesús. ⁴⁴ Yu'reni rlanj chääni pres luxh rut bjaxdi gunaazni.

Di reguxhtis chalilajz biäd Crist

⁴⁵ Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädni?

⁴⁶ Badzu' reguixhajg diidxre, räjpreni:

—¿Gajdpac te bejn guinii si'cni rni bejn ga!

⁴⁷ Dxejc räjp refarisee:

—¿La näj la'tu abasgueeni, ä? ⁴⁸ ¿Xhixh loj regubier o loj refarisee yu' chu tej ni ahuililajz xtiidxni, ä? ⁴⁹ Reben xhidajlre ni di gan xleii toMoisés, reni'c agunijtpac.

⁵⁰ Nicodem, nani huij lojni te guxhijñ, najc te refarisee. Laani räjpni lojreni:

⁵¹ —Lo xleiiu caj: digacdi guntu yälguixhtis te bejn palga gajdtu gucuadiagxgaa xtiidxni, te don xhi bejni.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Bilsa'c xhi caj lo xquijtz Dios, suhuilu nicla tej niguii nani rnii xtidx Dios di jiaäd nez Galilee.

Gunaa nani biga' carälguixh con te niguii

⁵³ Dxejc cade tejreni sii rolizjreni.

8 Dxejcti huij Jesús nez dan Oliib. ² Rsilru gubi'ni, bui'ni neñ guidoo. Luxh sanuutis siääd guiraa rebenquejdx lojni. Dxejc ro'c gurejni, gusloj cagului-inireni. ³ Dxejcti biääd refarisee näjza reben najn, biäd-näreni te gunaa nani biga' carälguixh con te niguii. Basujrenini galäi reni suga' ro'c. ⁴ Räjpreni loj Jesús:

—Mastr, gunaare biganäj te niguii carälguixh'reni, niluxh yu' chäälni. ⁵ Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶ Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani. ⁷ Dxejc sanuutis'reni canabdiidx'reni, huisutini, räjpni:

—Nani yu' lojtu ni xhettipac xtojñni, ni'c ganiddoo sugucuaani guij yejc gunaare.

⁸ Basabsac lojni lo yuj sanuutis cagucuaani con bicueñaani lo yuj. ⁹ Luxh laareni che biejn diajgreni diidxga, sa'csi yu' xtojñreni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni suga' galäiireni. ¹⁰ Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquijdiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹² Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiaädnañ narä dini sa lo yälñacäy, sica'ni bianij ni rudeedpac yälñabajñ.

¹³ Dxejcti räjp refarisee lojni:

—Luj caniiilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä.

¹⁵ La'tu rujntu yälguixhtis si'c najctis rehxigab xten beñ guedxliuj. Narä rut lojdi runä yälguixhtis. ¹⁶ Palga gunä yälguixhtis, yälguixhtis xtenä laaca najcni, sa'csi et xtebädi runä yälguixhtis, sa'csi narä näj Xtaädä ni baxhañ narä rienñuni. ¹⁷ Luxh lo xleiiu caj diidxre: "Che rnii tio'p bejn tejsi diidx, didxliini, colchalilajzni." ¹⁸ Narä rniliäpac diidx lagajc xcuentä, dxejcti Xtaädä nani baxhañ narä rniliizani diidx xcuentä.

¹⁹ Räjpreni loj Jesús:

—¿Caro yu' xtadlu?

Räjp Jesús lojreni:

—Ditu gumbee nicla narä, niclaza Xtaädä; paru niem-beetu narä, niembeezatu Xtaädä.

²⁰ Rediidxre gunii Jesús cadre re' gojn, lañ ni caguluiini neñ guidoro niluxh rut gunaazdini sa'csi gajd xhoñni guidzujñ.

Cadro cha'ä, la'tu digacdi jiaädto

²¹ Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojñtu sejtto. Cadro cha'ä di gacdi jiaädto.

²² Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadre chääni?

²³ Räjp Jesús lojreni:

—La'tu najctu beñ lo yuj. Narä nacä beñ ni siääd jiaa. La'tu najctu beñ guedxliujre. Luxh narä dina gacätis beñ guedxliujre. ²⁴ Ni'cni guniä lojtu, sejtto lo xtojñtu sa'csi palga ditu chalilajz nacä chu nacä, sejtpectu lo xtojñtu.

²⁵ Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶ Xhidajl diidx rlazä guiniä, xhidajlza yälguixhtis rlazä gunä xcuenttu sa'csi ditu chalilajz, per nani baxhañ narä najc beñ guliipac; nani biejn diagä guniini, rediidxga rniä loj reben guedxliuj.

²⁷ Luxh laareni direni niacbee la xcuent Dad Dios ni caniini. ²⁸ Ni'cni räjp Jesús lojreni:

—Cheni guiliästu Xi'n Niguii jiaa, dxejc sacbeetu laa narä ni baxhañni, luxh xhetliidi runä lagajcsi xcuentä. Si'cni baluii Dad narä, si'ctis rniä. ²⁹ Nani baxhañ narä suganäjni narä. Gajd Dad gusanxteb narä, sa'csi runätis ganax redzuun nani rchaglajzni.

³⁰ Lañ ni caniini si'c, xhidajlreni huililajz xtiidxni.

Rexi'n Dios con remos xten dojl

³¹ Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpeñä. ³² Sumbeezatu nani najc didxguli, niluxh didx guliiga suslaa la'tu lo xtojñtu.

³³ Räjpreni lojni:

—Rexagdoo toAbraham najcnu, rut chu lojdi gu-do'nu si'c mos. ¿Xho mood naalu "siñiaatu"?

³⁴ Räjp Jesús:

—Riniliá, rniliápac lojtu, chutis ni rujn dojl najc mos xten dojl. ³⁵ Nani najc mos, dini jia'n rolizj xlamni guideb guibajjni, niluxh nani najc xi'n lamga, ni'c sii sia'n rolizj xtadni guideb guibajjni. ³⁶ Ni'cni, palga ruslaa xi'nni la'tu lo dojl, dxejcsii apac gułaatu. ³⁷ Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu. ³⁸ Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.

³⁹ Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham. ⁴⁰ Luxh naj rlanjtu ju'ttu narä, sa'csi rniliä rediidx nani baluii Dios loä. ¡Di toAbraham niujn si'c! ⁴¹ La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejnđi; nuure tejtis xtadnu yu', laani najc Dios.

⁴² Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhał narä. ⁴³ ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidxä.

⁴⁴ Xtadtu najc beñdxab. La'tu najctu xi'nni, rlanjtu guntu nani rlanjztisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neñ las-tooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtad didx-xhii.

⁴⁵ Niluxh narä rniä didxlii, ni'c ditu chalilajz xtidxä.

⁴⁶ ¿Chu tejtu sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä? ⁴⁷ Nani najc xpejn Dios, ni'c rucuardiajg xtidx Dios. Sa'csi la'tu ditu gac xpejn Dios, ni'cni ditu gucuadiajg xtidxä.

Ansde toAbraham, agac nabajn Crist

⁴⁸ Dxejcti badzu' rexpejn Israel diidxre, räjpreni lojni:

—Laaca rniinu luj najclu te bejn ni siääd Samaria, beñdxab yu' lastoolu.

⁴⁹ Räjp Jesús lojreni:

—Xhet beñdxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä. ⁵⁰ Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani rujnni yalguxhtis. ⁵¹ Rniliápac lojtu, nani riu, nani rusoob xtidxä, dipacni guet.

⁵² Dxejcti räjp rexpejn Israel lojni:

—Naj agucbeepacnu yu' beñdxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.” ⁵³ ¿Xhixh sajcrulu lo toxtadnu Abraham, ä? Ni laani gujtni, gujtzta reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcđi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtioistu. ⁵⁵ Niluxh la'tu ditu gum-beeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, num-

beäpacni, luxh riuä ni rniini, rusobä xtiidxni. ⁵⁶ ToAbraham toxtadgoldootu, bibalajzni sa'csi nuhuiini dxej nani jialä, niluxh bahuiinini dxejc bibalazduxhni.

⁵⁷ Dxejcti räjp rexpejn Israel lojni:

—Nicla gajdlu chu tiubituu ijz, ¿xho naalu abahuiilu lo toAbraham?

⁵⁸ Räjp Jesús lojreni:

—Rniliápac lojtu, che gajdli guibajn toAbraham, agac nabañä narä.

⁵⁹ Dxejcti cua'reni guij te nucuaareni yejc Jesús, per di Jesús niga', biriini neñ guidoro, gudejđni galäiireni. Sä'tini.

Basiajc Jesús te bejn ni natiä'p balojni che gojllini

9 Che cadejd Jesús te lajt, bahuiini sobga' te bejn ni che gojlli bejnğa agajc natiä'p balojni. ² Dxejc gun-abdiidx rexpejn pacni lojni, räjpreni:

—Mastr, ¿chuni'c bejn dojl, la bejnre o la xcuzajnni, ni'c natiä'p balojni che gojlni, ä?

³ Räjp Jesús:

—Nicla laani, niclaza xcuzajnni di niujn dojl. Si'c gojlni te xcuent ni sajc bejnre suhii bejn xho najc xtzuun Dios. ⁴ Nanab gunä xtzuun nani baxhał narä naj ni najc rdxee, sa'csi cheni guidzujn guxhijn rut gacđi gun dzuun. ⁵ Lałni yu'ä lo rebejn guedxliuj, nacä xpianij guedxliuj.

⁶ Che gulujx guniini si'c, batiobxhejnni lo yuj, bejnni bajn con xhejnni, gudääbnini con bicuenaani lo rebaloj lotiä'pga. ⁷ Dxejcti räjpni:

—Huij, huitiib lojlu neñ nis ni laa Siloé. Laj nisga sälojza “baxhałni”.

Dxejcti huijni. Huitiibni lojni. Che gubi'ni, aruhuiini.

⁸ Dxejcti rexpisij lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arieñ balojlu?

¹¹ Dxejcti räjp dade'ga nani gujc lotiä'p:

—Dade' ni laa Jesús bejn bajn, gudääbnini baloä, dxejcti najni: “Huitiib lojlu neñ te nis ni laa Siloé”, dxejcti che huitibä loä, lagajc dxejc bieñ loä.

¹² Dxejcti räjpreni lojni:

—¿Con dade'ga naj?

Räjpni bejnğa:

—Dina ganä.

Rebeñ farisee bejn yälgunabdiidx lo dad lotiä'p nani bi-ajc lojni

¹³ Huiinäreni nani gujc lotiä'pga nez loj refarisee.

¹⁴ Luxh sa'csi najcni dxej ni rusilajzreni che bejn Jesús bajn ni gudääbni loj lotiä'pga te bjajc balojni, ¹⁵ gunab-

diidxsac refarisee loj dade' nani biajc balojni, xho mood arien balojni naj.

Laani räjpni lojreni:

—Bajñ gudäabni loä, dxejc gudibä loä, naj aruhuiä.

¹⁶ Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni beñ dojl?

Ni'cni gula' sa'reni, gujcreni tio'p gala'. ¹⁷ Dxejcti gun-abdidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn nani rnii xtidx Dios.

¹⁸ Luxh rexpejn Israel naaddireni chalii lajzreni gujc-pacni te lotiä'p ni abien balojni, dxejcti gurejdxreni xcuzajn dade' ni gujc lotiä'pga. ¹⁹ Dxejcti gunabdi-idxreni lojreni, räjpreni:

—¿Laa xi'ntu dee nani najtu cheni gojllini natiä'p loj- jni? ¿Xhoxh arien lojni naj?

²⁰ Badzu' rexuczajnni diidxre, räjpreni:

—Nadonnu laa xi'nnuni, luxh che gojlni natiä'p lojni.

²¹ Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, anajc- ni beñgool, lagajc laani sajz guiniini xhi gusajcni.

²² Si'c gunii xcuzajnni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' neñ guidoo chutis te bejn ni naa Jesús najc Crist nani abiääd. ²³ Ni'cni räjp rexuczajnni:

—Anajcni bi'n ni ayu' xcäriejnni. Lojni colguiniabdi- idx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu beñ dojl najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni beñ dojl o la dini gac. Tejtis nanä: gucä lotiä'p, luxh naj arien baloä.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejnni basiajcni balojlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh näj la'tu rlanjtu gactu xpejnpacni, ä?

²⁸ Dxejc gudiñajrenini, räjpreni:

—Luj najclu xpejnni, per nuure najcnu xpejn to- Moisés. ²⁹ Anadonnu guninäj Dios to Moisés, niluxh dade're dinu guidon casiäädni.

³⁰ Dxejcti räjp dade' lojreni:

—Dee najc te cos ni guidxeloj bejn: la'tu ditu gan casiäädni, ñiluxh laani basiajcni baloä!

³¹ Nadoncheenu di Dios cuadiajg xtidx rebeñ dojl; pal- ga yu' chu rajñ Dios, ni rusoobza xtiidxni, rucudiajg Dios xtidx sa' bejnga. ³² Che guslojli guedxliuj gajd dia- jgnu jieñ xcuent te bejn nani rusiajc baloj te beñ lotiä'p nani natiä'p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluilu nuure? Dxejcti guläärenini neñ guidoro, barilaagwrenini.

³⁵ Bieñ diajg Jesús guläärenini neñ guidoro, che bidxälhini, räjpni lojni:

—¿La rililajzlu xtidx ni najc Xi'n Dios ni gujc Niguii, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷ Räjp Jesús:

—Abahuiilu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojnnini.

³⁹ Räjp Jesús:

—Par yälguxhtis biälä lo guedxliujre, te fii renani di lojni jieñ, niluxh reni rien lojni sajcreni lotiä'p.

⁴⁰ Refarisee nani suganäjreni, che bieñ diajgreni di- idxre, räjpreni:

—¿Xhixh najczanu beñ lotiä'p, ä?

⁴¹ Räjp Jesús:

—Paru najctu lotiä'p, rut gucuaquijditu xtojltu, naj sa'csi rniitu rien lojtu, sicaquijtu rextojltu.

Jesús najc te baxtorsa'c

10 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan. ² Nani riu' nez ro' gurajl xten rexiil, laani najc xpaxtoorreni. ³ Che guidzujñ baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbejdxni rexiilga, tebgaj xiilga yu' lajni, rinäzanireni cadro naga' guixasa'c. ⁴ Che rii rexiilga neñ gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga. ⁵ Luxh di- pacreni chanä te baxtoor nani direni gumbee, ruxu- ñreni lojni sa'csi direni gumbee xse' garenca bejn. ⁶ Bij Jesús rediidxga lojreni, niluxh direni niacbee xhi säloj ni guniini.

⁷ Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil. ⁸ Guiraa reni abiääd galoo, najcreni ganax gubaan luxh di rexiil nucuadiajg xse'ni. ⁹ Narä nacä si'c rolä' xten gurajl, nani jiu' nejzga, siñlaani loj xtojlni, siu'ni, siriini te guidxälñi guixasa'c gauni.

¹⁰ Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yälñabañsa'c, yälñabajñ par tejpas. ¹¹ Narä nacä baxtorsa'c; luxh bax- torsa'c sudeed lagajc xcälñabajñni xcuent rexiilni.

¹² Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxuñni, li rbälazni rexiil. Dxejc rniaaz cuyo't rexiil, rutie'chzani rexiil. ¹³ Mosga ruxuñ sa'csi najcni mostis, luxh dini jiu xhi rsiajc rexiil.

¹⁴ Narä nacä baxtorsa'c; numbeä reni najcpac rexilä; rexilä numbeezareni narä ¹⁵ sigajc numbee Xtaädä narä, sigajc numbeäza Xtaädä; luxh sudedä xcälñabañä xcuent rexiilga. ¹⁶ Rapäza ste cuaa xiil, ni di gac xten gurajlre; näjza laareni nanab chaxiä, te gusbodijgreni

xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

¹⁷ Narä siguixäza xcäl'nabañä, guetä, te dxejcro siliäs-sacä xcäl'nabañä, guibañsacä, ni'cni sanälajz Xtradä narä. ¹⁸ Rut sajcdi ju't narä, lagajc narä gudedä xcäl'nabañä, guetä. Rapä yäl'rnibee te gudedä xcäl'nabañä, guetä, rapäza yäl'rnibee te xcasacä xcäl'nabañä te guibañsacä, sa'csi dee najc yäl'rnibee ni baniidx Xtradä loä.

¹⁹ Xcuent rediidxre gula' sa' rexpejn Israel, gujcreni tio'p gala'. ²⁰ Xhidajlreni canii:

—¿Xhicuent riutuni? ¿La ditu gan te beñdxab yu' las-tooni? Yejcni rajc. Xhigac rcuadiajgtu xtiidxni.

²¹ Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotiä'p, ä?

Rdxech rebejn loj Jesucrist

²² Lagajc neñ redxejga gujc lanij xten xquidoo rexpejn Israel guedx Jerusalén. ²³ Najcni bäi najl. Biu' Jesús guidoro, sasajni nez neñ cordoor ni laa xten Salomón.

²⁴ Gubig rexpejn Israel guideb gabi Jesús, räjpreni lojni: —¿Gucli gucua'tzlu loonu chu najclu? Palga luj najclu Crist ni cabääznu jiääd, guiniliini loonu tejpas.

²⁵ Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcüent xcäl'rnibee Xtradä, huenliisi rululojreni chuni'c nacä. ²⁶ La'tu ditu chalilajz sa'csi ditu gac rexilä. ²⁷ Rexilä numbee xse'ä, luxh narä numbeäzaren, riäd-najlzaren narä. ²⁸ Narä rudedä yäl'nabajn par tejpas loj rexilä, luxh direni nitloj par tejpas. Rutza laadi nani sajcdi gudzucajreni ladzñaä. ²⁹ Xtradä baniidxreni loä, laani najcni guroobru, nadipru loj guiraareni. Rut laadi nani sajcdi gudzucajreni ladzñaä Xtradä. ³⁰ Narä näjza Xtradä najcnu tejsi.

³¹ Dxejc gulässac rexpejn Israel guij, te nucuaareni yejc Jesús. ³² Dxejcti räjp Jesús lojreni:

—Xhidajl dzuun xten Xtradä abaluiä lojtu, ¿lo redzu-unga, xhi tej dzuun rujn gucuaatu guij yecä?

³³ Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

³⁴ Badzu' Jesús diidxre, räjpni lojreni:

—¿La et loj xleiiditu caj rediidxre: "Narä rniä, la'tu najc redios"? ³⁵ Nancheenu digacdi guidxaa xquijtz Dios. Palga gulalajni redios rebejn nani bejn yäl'guxhtis loj rexpejn Israel, dxejc ³⁶ naj ¿Xhicuent guniitu loä: "Caniyajlu Dios", sa'csi guniä lojtu narä nacä Xi'n Dios? Ni gule Dios narä, baxhal'ni narä lo guedxliujre. ³⁷ Palga dina gunä redzuun xten Xtradä, na'c chalilajztu xtidxä. ³⁸ Luxh palga runnani, mascä ditu chalilajz xtidxä, colchalilajz ni ruluii reyäl'milagwr nani runä, te gacbeetu par tejpas, Xtradä yunäj narä, narä yunääza laani.

³⁹ Che rlanjreni niniaazrenini stehuält, laani biriini ladzñaareni.

⁴⁰ Dxejcti sääni, gubisacni nez stelaad gueu Jordán, nejzga huijia'nni, cadro gusloj batiobnis Juan. ⁴¹ Xhidajl bejn bidzujn lojni ro'c, räjpreni:

—Di Juan niujn nicla tej yäl'milagwr luxh guiraa rediidx ni gunii Juan xcuent dade're najc didxliipac.

⁴² Xhidalduxhrene huililajz xtiidxni ro'c.

Gujt Larz

11 Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. ² Mariire, bisiajn Larz, najc nane' ni basäl setne-jxh ni' Jesús, batiaazani ni'ni con xquidxejcn. ³ Ni'cni baxhal' guiro'p bäljre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yäl'racxhuure ju'tni, sa'csi yäl'racxhuure najc te gululojlojni xcäl'rnibee Dios. Te gululojza yäl'racxhuure xcäl'rnibee Xi'n Dios.

⁵ Sanälajz Jesús Mart, bäljni, näjza Larz, ⁶ che räjpreni lojni cayacxhuu Larz, bia'nni stio'p dxej cadro yu'ni.

⁷ Dxejcti räjpni loj rexpejnpacni:

—Colcho', chonnu stehuält región Judea.

⁸ Räjp rexpejnni lojni:

—Mastr, gajd gac xchej rlanj rexpejn Israel ni rnibee nucuaa guij yejclu te nugu'treni luj, luxh naj rlanjlu chäsaclu ro'c.

⁹ Dxejcti räjp Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. ¹⁰ Palga chasajni guxhijn, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejc räjp rexpejnpacni lojni:

—Dad, palga agudiesni, pet siajcn.

¹³ Jesús canii lojreni agujt Larz, niluxh rexpejnpacni bejn xhigab caniiini xcuent yäl'rejs xten bacaltis.

¹⁴ Ni'cni guniliipac Jesús räjpni lojreni:

—Agujt Larz. ¹⁵ Rbalazä sa'csi rutinu ro'c, te chalilajz-tu xtidxä. Colcho' te chohuiinuni.

¹⁶ Dxejcti Tomás ni rniizareni "cua'ch", räjpni loj re-sa'ni:

—Colcho' te guetnāzanuni.

Jesús najc yäl'rbañsac lo yäl'gujt

¹⁷ Che bidzujn Jesús lo guejdxga, agujc tajp dxej biga'tz Larz. ¹⁸ Guedx Betania tre' gajxh lo guedx Jerusalén, si'cti tio'p garol kilómetro. ¹⁹ Xhidajl rexpejn Israel abidzujn, siadhuiireni Mart, näjza Marii, te di gac-huin lajzreni sa'csi gujt bisiajreni. ²⁰ Che gucbee Mart abidzujn Jesús, biriini huichaglojnini; niluxh Marii bia'n rolizreni. ²¹ Dxejcti räjp Mart lo Jesús:

—Dad, paru suga'lu ree, di bisianä niejt. ²² Narä nanä suniidx Dios guiraa nani guiniablu lojni.

²³ Jesús räjpni lojni:

—Sibañsac bisiajnlu.

²⁴ Räjp Mart lojni:

—Acananä sibansacni che guidzujñ dxej ni guibansac bejn loj rebengut dxej lult che gun Dios yäl̄guxhtis.

²⁵ Dxejc räjp Jesús lojni:

—Narä nacä yäl̄ruspansac bejn loj rebengut, näjza yäl̄nabajn par tejpas. Nani rililajz rextidxä, masä agujt-ni, sibansacni. ²⁶ Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

²⁷ Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhaḷ Dios lo guedxliujre.

Biin Jesús cuä' xpaä Larz

²⁸ Che guluux gunii Mart, huitejdxni bäl̄jni Marii, xhiga'tz räjpni lojni:

—Abidzujñ Mastr. Cabejdxzani luj.

²⁹ Che biejn diajg Marii rediidxga, huisugajcni, sahuui-ni Jesús. ³⁰ Gajd Jesús jiu' guejdxga, lajtis suga'ni cadro bidxaagni Mart. ³¹ Rexpejn Israel nani biädcuenäj Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

³² Ni'cni che bidzujñ Marii cadro suga' Jesús, bazuxhi-jbni lojni, räjpni:

—Dad, paru suga'lu ree, di bisianä niejt.

³³ Che bahuii Jesús cayoon Marii, näjza rexpejn Israel ni siädnajl Marii, guc-huin lastooni, biääd te rsliajz lastooni. ³⁴ Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

³⁵ Dxejcti biin Jesús. ³⁶ Ni'cni cayäjp rexpejn Israel:

—Col̄huiu, lacti sanälajznini.

³⁷ Yu'zareni räjp:

—Dade're basiajc beñ lotiä'p. ¿Xha di niajcdi nusiajnci bejnre te di niejtni, ä?

Gubansac Larz

³⁸ Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni.

³⁹ Dxejcti räjp Jesús lojreni:

—Col̄gudzucaj guijga.

Mart, ni najc bisiajn beñgutga, räjpni lojni:

—Dad, pet acaladxuudxni, sa'csi agujc tajp dxej gujt-ni.

⁴⁰ Dxejc räjp Jesús lojni:

—¿Et rniä lojlu, palga rililajztu, suhuuilu xcäl̄rnibee Dios, ä?

⁴¹ Dxejcti badzucajreni guijga. Guläs Jesús lojni xh-aguibaa, räjpni loj Xtdadni:

—Xtdä, runidxä xquixtios lojlu sa'csi abiejn diajglu xtidxä. ⁴² Narä nanä guliica rucudiajglu xtidxä, luxh naj caniani xcuent rebejn ni tre' ree, te chalilajzreni luj baxhallu narä.

⁴³ Che gulujx guniini rediidxga, guredxa'ni räjpni:

—¡Larz! ¡Gudaa ree!

⁴⁴ Dxejc birii beñgutga neñ biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Col̄guslaani, col̄gusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

⁴⁵ Xcuent dzunrore huililajz rextidx Jesús xhidajl rex-pejn Israel nani huinajl Marii, che bahuiireni xhi bejn Jesús. ⁴⁶ Yu' reni huihuui loj rexpejn Israel ni laa farisee, bijreni diidx xhi bejn Jesús. ⁴⁷ Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzareni:

—¿Xho jiennu? Niguiire cayujñ xhidajl milagwr. ⁴⁸ Palga guisaannuni si'c, guiralii bejn sililajz xtiidxni, sinajl-renini. Dxejcti jiääd rebeñ roman ni rnibee, gudzucajreni xcäl̄rnibeenu, sudzujlzareni lajdxnu.

⁴⁹ Dxejc Caifás, bixhojzro ni riäj̄l gunibeenu lo rebixhojz ijzga, räjpni lojreni:

—La'tu xhetliidi najnditu. ⁵⁰ Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹ Niluxh Caifás dini ninii diidxre xcuentcani. Sa'csi ijzga rnibeenu lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel. ⁵² Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre. ⁵³ Ni'cni dxejliga bachaag rebejnğa diidx te don xho gunreni gugu'treni Jesús.

⁵⁴ Ni'cni diru Jesús nisij nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejn pacni.

⁵⁵ Guxii dxej cayäädx guidzujñ lanij ni laa pascw ni ru-jn rexpejn Israel. Xhidalduxh rebeñguejdx huig guedx Jerusalén te gusiareni lastooni, te gac gunreni lanij xten pascw. ⁵⁶ Cansajreni caguillreni Jesús; che yu'zareni neñ guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷ Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

Gudäáb te gunaa se't ni' Jesús

(Mt. 26:6-13; Mr. 14:3-9)

12 Che riäädx xho'p dxej gal lanij pascw, huig Jesús guedx Betania cadro rbäjz Larz nani baspansac Jesús loj rebengut. ² Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex. ³ Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäábni se'tga lo reni' Jesús, baspijdzni ni'ni con xquidxejcn. Guideb neñ yu'ga gulanejxh se'tga. ⁴ Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, räjpni:

⁵ —¿Xhicuent di se'tre nido' choñ gayuu denar te n-dis meelga loj rebeñproob? (Choñ gayuuga najc si'cti ni xca' te niguii paru gunni dzuun tzubiteb bäii.)

⁶ Guniiini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadro

ruchee meel, luxh rbääni meel lojga te rca'nini. ⁷ Ni'cni räjp Jesús lojni:

—Na'c gudxojnuni; subasälxgaanini, che gajd guidzujñ dxej nani guiga'tzä. ⁸ Dxej-yääl yu' rebeñproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejc che gucbee xhidajl xpejn Israel yu' Jesús rolijz Larz ni gubañsac lo rebeñgut, bidzujñreni, xhet xcuentis Jesús. Biäädreni te fiizareni loj Larz nani baspañsacni lo rebeñgut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yääl, rebejn xhidajl ni bidzujñ lanij biejn diajgreni asiäddzujñ Jesús guedx Jerusalén, ¹³ dxejcti batiu'reni ñaa reyagziñ, biriireni neñ guejdx, sachaglojreni. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc reii lo rexpejn Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejn ni rbäjz neñ guedx Sión. ¡Colhuii! Reii xtentu asiääd, bijbni dejtz te burbäz.

¹⁶ Di rexpejn pacni niacbee recosga che gujcreni, niluxh che gubañsacni loj rebeñgut, dxejc banaj lajzreni recos nani caj lo guijtz xcuentni, näjza guiraa recos ni bejn rebejn lo Jesús te guzojb rediidxga.

¹⁷ Rebeñ xhidajl ni suganäjni che gurejdxni Larz te biriini neñ baa che baspañsacni lo rebeñgut, biizareni diidx xcuent guiraa ni bahuiireni. ¹⁸ Ni'cni biädchagloj rebeñ xhidajlgani, sa'csi abiejn diajgreni laani bejnmi milagwre. ¹⁹ Ni'cni räjp refarisee lo sa'reni:

—Aruhuitu xhet sajcdi jienñu. ¡Colhuii! Empac sanajl guideb guedxliujni.

Riädtiil regriegw Jesús

²⁰ Yu' gaii beñriegw nadxaag lo rebejn ni biädted lanij guedx Jerusalén. ²¹ Rebejnre bidzujñ loj Felipe nani siääd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biääd Felipe, räjpni loj Andrés, dxejcti guiro'preni huiye'tzreni lo Jesús. ²³ Dxejcti räjp Jesús lojreni:

—Abidzujñ or ni chä'p xpala'n Xi'n Dios ni gujc Niguii. ²⁴ Rniliäpac lojtu, palga di te xob binij jiajb lo yuj, neñ xhurc cadre cueni, te rianxtebni, guetni, dini guiliejn. Luxh palga guetni, siliejñni, rajcza te nisro lojni, rajc xhidajl xob binij. ²⁵ Nani sanälajz xcälñabajñni, sunijtni, luxh nani rbälaz xcälñabajñni lo guedxliujre, sica'ni yälñabajñ par tejpas. ²⁶ Palga yu' chu tej ni rlajz chu loä, sujiädñajñni xnezyuä, te cadre yu'ä, ro'cza cuäz ni ru' loä. Palga yu' chu gun xtzunä, siliä'pza Xtadä xpala'nni.

Rnixgaa Jesús guetni

²⁷ Räjpzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre. ²⁸ Xtadä, bejn si'cni riäjñ gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

³⁰ Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guiniini. ³¹ Naj abiääd xcälñguxhtis Dios lo guedxliuj. Naj sibicaj xcälñribee nani rnibee lo guedxliujre. ³² Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni.

³⁴ Räjp rebejn lojni:

—Nuure biejn diajgnu bilreni lo leii, Crist ni jiääd sibajñ par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵ Dxejcti räjp Jesús lojreni:

—Stera'tsi yu' bianij lojtu. Colñaj lañ ni rajptu bianijga, te di guiniaaz yälñcäy la'tu, sa'csi ni rsiaj loj nacäy, dini gan caro chääni. ³⁶ Lañ ni rajptu bianij, colñchalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzojni.

Xhicuent di rexpejn Israel nililajz xtidx Jesús

³⁷ Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhañ Dios lojreni. ³⁸ Ni'cni guzojb diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluulu xcälñribeduxhlu, ä?

³⁹ Ni'cni di niajcdi nililajzreni, sa'csi guniiza Isaías, räjpni:

⁴⁰ Abascäjyñ lojreni, abennajdñi lastooreni, te di rebalojreni fii, te di lastooreni gacbee, te di gusiejch lajzreni, te di gusiäcäreni.

⁴¹ Rediidxre gunii Isaías, sa'csi bahuiini xcälñrdimbicha' Jesús xhaguibaa, dxejc guniini xcuentni.

⁴² Dxejcti gaii rebejn ni rnibee huililajz xtiidxni che räjpni abaxhañ Diosni, niluxh bidxejbreni rebeñ farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni neñ guidoo. ⁴³ Sa'csi rdxaglañzreni guiliä'p rebejn xpala'nreni luxh guxiiru rlajzreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni cania rililajzni, näjza xtidx Xtradä nani baxha| narä rililajzni. ⁴⁵ Nani ruhuii loä, ruhuiizani loj ni baxha| narä. ⁴⁶ Narä biälä si'c bajl lo guedxliujre, te guiraa renani chalilajz xtidxä, dirureni chu lo yäl|cäy. ⁴⁷ Nani riendiajg xtidxä, luxh di ni gusoob rediidxga, dina gunä yäl|guxhtis lojni, sa'csi dina niälä te gunä yäl|guxhtis rebeñguedxliuj, biälä te guslaä rebeñ guedxliuj lo dojl. ⁴⁸ Nani rbälaz narä, ni di gusoob xtidxä, yu' chu gun yäl|guxhtis xtoj|ni; lagajc rediidx nani guniä gun yäl|guxhtis xtoj|reni che ga| lult dxej. ⁴⁹ Sa'csi narä dina niädniä lagajc xcuentä, lagajc Dad ni baxha| narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl|nabajn par tejpas. Ni'cni rediidx nani rniä, rniäreni si'cpacni gunii Xtradäni loä.

Jesús gudiibni ni' rexpejñpacni

13 Che gajd ga| dxe lanij ni laa pascw, najn Jesús asiäddzongajxh xorni, or ni jiunejzni lo guedxliujre te chääni lo Xtradni. Luxh sa'csi agajc sanälajzni rexpejñpacni nani yu' lo guedxliujre, sinälajznanireni par tejpas.

² Ni'cni la| ni cayauxchejreni biu' beñdxab neñ lastoo Judas Iscariote, xi'n Simón, te guto'ni Jesús. ³ Sa'csi agucbee Jesús abateed Xtradni guira'ti ladzñaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojjaani, gudojbni te tuäi, batejbnini xque'ni. ⁵ Dxejcti cua'ni nis neñ te chaa, guslojni gudiibni ni' rexpejñpacni, baspijdzni ni'reni con tuäiiga. ⁶ Che bidzujñni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷ Dxejcti räjp Jesús lojni:

—Nani cayunä dilu gacbeeni ñaj, guixee-huijdx sacbeeluni.

⁸ Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpeñä.

⁹ Räjp Pedr lojni:

—Dad, na'c quiiblu ni'ätis näjza ñää näjza yecä gudiib.

¹⁰ Räjp Jesús lojni:

—Nani agojz di guiquiin gazzacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajñni chu guto'ni, ni'cni guniini: "Xhet guiraaditu naya."

¹² Ni'cni che gulujx gudiibni ni' rexpejñni, gotsacni xhajibni, guresacni lo mex, räjpni:

—¿La najntu xhini'c benä lojtu, ä? ¹³ La'tu rniitu narä, Mastr näjza Dad. Luxh laaca rniitu sa'csi nacäni.

¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäl| quiibtu ni' resa'tu. ¹⁵ Sa'csi

abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac beñroru lo xlamñi; diza te ni rij xmandaad beñ gac beñroru loj nani baxha|ni. ¹⁷ Palga najntu recosre, chicbaazatu palga si'c guntu.

¹⁸ 'Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijzni. Scree najc rediidxga: "Nani rajw xcuxtilä, ni'c agubiréni, agulälazni narä." ¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuazani xtidxä; luxh nani riu xtidxä, riuazani xtidx nani baxha| narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guc-huinuxh lastooni, dxejcti guniliini:

—Rniliä, rniliäpac lojtu, tejtuto' narä.

²² Dxejcti gusloj cadxeloj rexpejñni lo sa'reni, di jien chuchani'c cagusa'tni. ²³ Tej rexpejñni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniabdiidxni loj Jesús chu xcuent caniini. ²⁵ Dxejcti nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuaxä te la' yätxtiil. Loj nani gudedäni, ni'c najcni.

Dxejcti bahujdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlaizlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c. ²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj rebeñ ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijñ.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcäl|rnibee Xi'n Dios ni gujc Niguii, luxh lojni sienloj xcäl|rnibee Dios. ³² Palga sululoj Xi'n Dios ni gujc Niguii xcäl|rnibee Dios, dxejcti sululojza Dios xcäl|rnibee Xi'n Dios ni gujc Niguii, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejñ Israel si'cza rniä lojtu ñaj: Di gacdi jäädto cadro cha'a. ³⁴ Te didxcoob rnibeä guntu: Col|chanälajz sa'tu. Sigajc ni sanälazä la'tu, sigajcza col|chanälajz sa'tu. ³⁵ Palga rinälajz sa'tu, si'c sacbee guiraa beñguedxliuj najcpactu xpeñä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro cháálu?
 Räj́p Jesús lojni:
 —Cadro cha'ä digacdi jiädnaǰllu narä ǰaj; niluxh sidzujǰ dxej jiädldu ro'c.
³⁷ Räj́p Pedr lojni:
 —Dad, ¿xhicuent digacdi jiälä ǰaj? Palga rquiin guetä xcuentlu, suguetä.
³⁸ Räj́p Jesús lojni:
 —¿La guliilu guetlu xcuentä, ä? Rniliápac lojlu, nicla gajd guidgái cuedxa' choǰ huält, säjblu dilu gumbee najrä.

Jesús najc nezyuj lo Dad

14 Dxejcti räj́p Jesucrist lojreni:
 —Na'c chutu yärsia'. Rililajztu xtidx Dios, colchalilajza xtidxä. ² Yu' xhidalduxh yu' cadro rbäj́z Xtradä. Palga xhet si'c di najcni, dizana niniä lojtu si'c. Sia'ä chasucheä reyu' par la'tu. ³ Luxh palga chasucheä cadro cuääztu, che guluxäni, sibusacä, te chanäätu ro'c, te cadro yu'ä, ro'cza chutu. ⁴ La'tu anajntu caro cha'ä, anajnzatu nezyuj ni cháätu.
⁵ Dxejcti räj́p Tomás loj Jesús:
 —Dad, dinu guidon caro cháálu, ¿xho guidonnu nezyujga, ä?
⁶ Räj́p Jesús lojni:
 —Narä nacä nezyuj. Narä nacä didxliipac, nacäza yäl'nabajǰ. Por narätis saj́c cháä bejǰ cadro rbäj́z Xtradä. ⁷ Palga la'tu niembeetu chuni'c nacä, niem-beezatu Xtradä. Luxh ǰajli abiembeepactuni sa'csi ac-ahuiitu lojni.
⁸ Räj́p Felipe loj Jesús:
 —Dad, basaan guihuiinu loj Xtradlu; ni'ctis rlaaznu.
⁹ Dxejcti räj́p Jesús lojni:
 —Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtradä. ¿Xhicuent rniablu fiilu lo Xtradä, ä? ¹⁰ ¿La dilu chalilajz najrä yunää Xtradä, luxh Xtradä yunäjzani narä, ä? Rediidx nani rniä dina guiniäni lagajc xcuentä, sa'csi Xtradä ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtradä, luxh Xtradä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹² Rniliápac lojtu, nani chalilajz xtidxä, saj́c gunni redzuun nani runä, luxh su-jjni dzunroru sa'csi sia'a cadro yu' Xtradä. ¹³ Luxh guiraa ni guiniablu lo Xtradä xcuentä, narä sunäni, te gululoä xcäl'rniabee Xtradä. ¹⁴ Narä sunä xhitis ni guini-abtu por laä.

Ria'n diidx guxhaǰ Jesús Sprit Dxan

¹⁵ Räj́pzani:
 —Palga sanälajztu narä, susoobtu xtidxä. ¹⁶ Dxejcti siniabä lo Xtradä, te guniidxni stee nani gacnäjtu te chunäjni la'tu par tejpas. ¹⁷ Nalajznu, Xprip Dxan xten Dios, ni rnili. Di gacdi xca' rebeǰ guedxliujni, sa'csi direni fii lojni, niclaza gumbeerenini. Niluxh la'tu num-beetuni sa'csi yunäjni la'tu, yu'ni neǰ lastootu. ¹⁸ Dina gusanbisiabä la'tu; sibusacä jiädhuiä la'tu. ¹⁹ Diru gac

xchej, dxejcti diru rebeǰ guedxliuj fii loä, niluxh la'tu suhuiitu loä. Sa'csi nabaǰä, la'tu nabajnzatu. ²⁰ Neǰ redxejga, dxejcti sacbeetu yunää Xtradä, la'tu yunäjtu narä, luxh narä yunääza la'tu. ²¹ Nani numbee Xtradä, nani rusoobza xtidxä, ni'c ruluiini sanälajzpacni narä. Luxh Xtradä sinälajza nani sanälajz narä, najza narä chanälazä bejǰga, luxh sululoä lagajc narä lojreni.
²² Dxejcti räj́p Judas (xhet Iscariótedi) lojni:
 —Dad, ¿xhini'c gunlu te gululojlu lojtisnu, xhet najdi loj rebeǰ guedxliujdi, ä?
²³ Dxejcti räj́p Jesús lojni:
 —Nani sanälajz narä, ni'c riu xtidxä. Ni'c chanälajz Xtradä, dxejcti jiopläznäänuni guiro'pnu Xtradä. ²⁴ Nani di chanälajz narä, dini jiu xtidxä. Luxh rediidx nani bejǰ diajtu, et xtidxädini; xtidx Xtradäni ni baxhaǰ narä.
²⁵ 'Caniä guiraa rediidxre lojtu laǰni yu'ä lojtu, ²⁶ per Sprit Dxan xten Dios nani jiädyaacnäjtu, nani guxhaǰ Xtradä xcuentä, laani suluiini lojtu guira'ti, najza susna-jni lajztu guiraa rediidx nani aguniä lojtu. ²⁷ Yäl'rbecdxilajz rusa'nä lojtu, xcäl'rbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajtu ni gu-niä lojtu: Sia'ä luxh siälsacä lojtu. Paru ninälajzpacu narä, sibalajztu xcuentä che guniä sia'ä lo Xtradä, sa'csi Xtradä najc beǰroru loä. ²⁹ Scree agunixgääni lojtu, te che soobni, dxejcti chalilajztu xtidxä.
³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäl' gac recosre te gacbee rebeǰ guedxliuj sanälazä Xtradä, ru-sobäza xtidx Xtradä, runä nani gunibeeni. Colchastie, colcho' jiunejznu ree.

Jesús najc si'c te yaguub

15 Räj́pzani:
 —Narä nacä si'c te yaguub. Xtradä najc si'c nani rusuj yajgga. ² Rebeǰ najc si'c reǰaa yajgga. Guiraa reǰaa yajgga nani xhet cajdi lojni rutiugnini. Luxh guiraa reǰaa yajgga ni caj ninejx lojni, rusianini te xcajru ninejx lojreni. ³ La'tu anajcti beǰnaya xcuent rediidx nani aguniä lojtu. ⁴ Colguibannäj narä, sigajc ni nabaǰnää la'tu. Digacdi xcaj ninejx lo te ǰaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.
⁵ 'Narä nacä si'c yaguub. La'tu najcti si'c reǰaa yajg-ga. Nani riannäj narä, naräza riannäänäni, ni'c saj́c run-duxhni xtzunä, sa'csi che guibicajni loä, xhet saj́c di gunni. ⁶ Nani di chupac loä, sibicajni si'c reǰaa yajg nani rdin sa'csi xhetru rcajdi lojni, dxejcti rbiǰdzni, rusäl' bejǰreni lo däj te checni.
⁷ 'Palga chupactu loä, palgaza chupac xtidxä las-tootu, col'nab nani rlaǰztistu, luxh narä sunidxäpacni. ⁸ Che gunpactu xtzun Dios, dxejcti fii bejǰ najcpactu xpeǰä, siliä'p bejǰ xpala'n Xtradä, Dios. ⁹ Si'cpacni sanälajz Xtradä narä, sigajcza sanälazä la'tu. Colchanuu lo xcäl'rinälazä. ¹⁰ Palga jiutu rextidxä, sinuutu lo xcäl'rinälazä, sigajc ni abasobä xtidx Xtradä, luxh rinuä lo xcäl'rinälajz Xtradä.

¹¹ 'Rniä rediidxre lojtu te guibalaznäjtu narä, te si'c guibalazduxhpactu. ¹² Dee najc diidx ni rnibeä guntu: colchanälajz sa'tu si'cni sanälazätu. ¹³ Xheti te yälšanälajz ni guroobru lo yälšanälajzre, gudeed te bejn xcäl'nabajnñi, guetni lacuaa resa'ni. ¹⁴ La'tu najctu resä'a palga gusoobtu diidx nani guinibeä guntu. ¹⁵ Diruna cuälää "mos" la'tu, sa'csi di remos gan xhi rujn xlamreni. Luxh narä agulälää la'tu "rexamigwä", sa'csi guira'ti rediidx ni bejn diagä lo Xtadä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtadä, te na'cza nitloj dzuunga. Te guira'tiza nani guiniabtu lo Xtadä por laä, ni'cza guniidxni lojtu. ¹⁷ Dee rnibeä guntu: colchanälajz sa'tu.

Rbälaz rebejn guedxliuj Jesús näjza rexpejnñi

¹⁸ 'Palga cuälaz rebejn guedxliuj la'tu, anajntu agulälazxgaareni narä. ¹⁹ Paru najctu bejn guedxliujre, sinälajzreni la'tu. Per ditu gac bejn guedxliuj, sa'csi narä guleä la'tu te jiuu xtidx Xtadä, ni'cni rbälaz rebejn guedxliuj la'tu. ²⁰ Colsnaj lajztu diidx nani guniä lojtu, 'di te mos gac bejroru lo xlamni'. Palga basacsíreni narä, susacsízareni la'tu. Palga rusoobreni xtidxä, susoobzareni xtiidxtu. ²¹ Guiraa recosre sunnäjreni la'tu xcentä sa'csi direni gumbee nani baxha| narä.

²² 'Paru dina niädniä lojreni direni niujn dojl xten xcäl'rdxechlajzreni loä, per naj di gacdi guiniireni direni gacbee yu' xtojlreni. ²³ Nani rbälaz narä, rbälazzani Xtadä. ²⁴ Palga dina niunä nez lojreni remilagwro, sa' nani rutru rajcni rujn, direni niajp dojlgä; sa'csi abahuiireni redzuunga, ni'c agulälazreni narä, näjza Xtadä. ²⁵ Bejnreni si'c te guzojb diidx nani cuaj lo guijtz agujc xchero: "Gulälazreni narä, luxh xhetliä benä."

²⁶ 'Che jiaäd nani gacnä j la'tu, laani sinii xcentä, chu nacä. Laani najc Sprit ni yu' lo Xtadä, siniini didxlii. Narä suxha|äni lojtu; lo Xtadä guiriini jiaädni lojtu. ²⁷ Näjza la'tu siniitu diidx xcentä, chu nacä, sa'csi guyu'tu loä cheni gusloäli cagusule'ä diidxga.

16 'Rediidxre rnixgä lojtu, te didi yu' xhi gun jiajbtu te gunijttu lo xtidxä. ² Sidzujn dxej sibääreni la'tu dirureni gusaan jiu'tu nejn guidoro. Sidzujn or chutis ju't tejtü, suchaloni cayacnäjni Dios. ³ Guiraa recosre sujnreni sa'csi direni gumbeepac Xtadä, niclaza narä. ⁴ Agunixgä rediidxre lojtu, te che guidzujn orga sinaj lajztu xcent rediidx ni guniä lojtu.

Redzuun ni rujn Sprit Dxan xten Dios

'Dina niniä rediidxre lojtu che gusloä cagusule'ä diidx, sa'csi suganää la'tu. ⁵ Naj agojl guibi'ä loj nani baxha| narä, luxh nicla tejtü di guiniabdiidx: "¿Caro chäälu?" ⁶ Dxej sa'csi aguniä recosre lojtu, ni'c cayac-huin lastootu. ⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiaäd lojtu nani racnä j. Niluxh palga cha'ä, suxha|äni lojtu. ⁸ Luxh laani, che jiaädni lo guedxliujre, susanijni xcäriejn rebejn te gacbeereni xcent dojl, näjza xcent xcäl'nabañnaya Dios, näjza xcent yäl'guxhtis xten Dios. ⁹ Guluiizani

xcent dojl lojreni sa'csi direni chalilajz xtidxä. ¹⁰ Guluiini xcäl'nabañnaya Dios lojreni sa'csi sibusacä lo Xtadä, luxh dirutu fii loä. ¹¹ Guluiini xcent yäl'guxhtis xten Dios lojreni sa'csi abejn Dios yäl'guxhtis loj bejndxab nani rnibeä lo guedxliujre.

¹² 'Yu' xhidajlru diidx rläzä guiniä lojtu, niluxh digacdi gacbeetureni naj. ¹³ Che jiaäd Sprit xten didxlii xten Dios, laani susanijni xcäriejntu te gacbeetu guiraa redidxgului, sa'csi dini guinii diidx xcentceni, siniitisni ganax rediidx nani gudeed Dios lojni te guiniini. Siniizani xcent recos nani churu gac. ¹⁴ Laani siliä'pni xpala'nä sa'csi sica'ni xhixtenä, suluiinini lojtu. ¹⁵ Guiraa ni rajp Xtadä najc xtenä, ni'cni rniä suluiini xhixtenä lojtu.

Xcäl'rac-huin lajztu sibixloj ni yäl'rbalajz

¹⁶ 'Sbale'si dxej, dxej c dirutu fii loä; dxejctiru sgaii dxej suhuisactu loä sa'csi narä sia'a lo Xtadä.

¹⁷ Dxejcti räjp rexpejnñacni lo sa'reni:

—¿Xhini'c caniiini loonu? Sbale'si dxej, dxej c dirutu fii loä, dxejctiru sgaii dxej suhuisactu loä, näjza: sa'csi sia'a lo Xtadä. ¹⁸ Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniiini.

¹⁹ Gucebe Jesús xhini'c rläjzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxej c dirutu fii loä; dxejcru sbale'si dxej, suhuisactu loä. ²⁰ Rniliäpac lojtu, la'tu soontu, niluxh rebejn guedxliujre sibalazduxhrene. Sac-huinduxh lastootu niluxh yäl'rac-huinre sibixhlojni yäl'rbalajz. ²¹ Te gunaa che gaal xi'nni, rdejndi trabajw, dxejcti che aguyu' xi'nni, riäl' lajzni gudejndi trabajw, dxej c arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu naj, dxejcti che jiaädhuisacätu, dxej c sii sibalajztu nejn lastootu, luxh rut gacdi gudzucajdi yäl'rbalajzga.

²³ 'Nejn redxejga xhetiru xhi yäl'guiniabdiidxdi guntu loä. Rniliäpac lojtu, nani guiniabtu lo xtidxä xcentä, laani suniidxniini lojtu. ²⁴ Naj xhet canabditu xcentä. Col'nabni, te xca'tuni, te guibalajztu.

Jesús, nani abejn gaan lo guedxliujre

²⁵ 'Aguniä guiralaj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcent Xtadä. ²⁶ Nejn redxejga guiniabtu por laä. Luxh dizana guiniä siniabä narä loj Xtadä par la'tu, ²⁷ sa'csi lagajcza Xtadä sanälajzni la'tu, sa'csi la'tu sanälajztu narä, luxh ahuililajzatu loj Dios biriä biälä lo guedxliuj. ²⁸ Biriä lo Xtadä xhaguibaa, biälä lo guedxliujre, siunezäza lo guedxliujre, sibusacä lo Xtadä xhaguibaa.

²⁹ Räjp rexpejnñacni lojni:

—Naj sii caniiilu guyasi, dini gac si'c redidx-xhiga'tz xten cuent ni ruluii. ³⁰ Naj sii gucebeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjp Jesús lojreni:

—¿La rililajzpacku naj, ä? ³² Asiäddzungajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtradä suganäj narä. ³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejd-packu trabajw, colgusutijp lastootu sa'csi narä abenä gan loj guedxliujre.

Gunab Jesús lo Dios xcuent rexpejn pacni

17 Che guluix guniini loj rexpejn pacni rediidxga, guläsni lojni xhaguibaa, räjpni lo Dios:

—Xtradä, abidzujn or; gulä'p xpala'n xi'nlu te guil-ia'pza xi'nlu xpala'nlu, ² sigajc ni badeedlu lojni yälrnibee loj guiraa reben guedxliuj, te gac gudeedni yäl nabajn par tejpas lo guiraa renani badeedlu lojni. ³ Redee räjp yäl nabajn par tejpas; numbeereni luj ni najc tejtis GuebDios, näjza narä Jesucrist nani baxha||u lo guedxliujre.

⁴ Narä gulä'pä xpala'nlu lo guedxliujre, abaluxä dzu-un nani baniidxlu gunä ree. ⁵ Naj Xtradä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ Loj rebejn nani baniidxlu loä, ni gulelu lo reben guedxliujre, loj reni'c abasule'a, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu. ⁷ Naj agucbeereni guiraa rediidx ni guniä lojreni lojpaclu siäädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxha|| narä.

⁹ Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ Narä diruna jia'nä lo guedxliujre, laareni sia'nruereni lo guedxliujre. Luxh narä siälä lojlu. Xtradä ni najc Dxfanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab. ¹² Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

¹³ Luxh naj sibilasä lojlu. Caniä rediidxre la|| ni yu'ä lo guedxliujre, sa'csi rlazä guibaa lajzreni si'c ni rbaa lazä.

¹⁴ Abasule'a xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. ¹⁵ Dina guiniabä cuäälureni lo guedxliujre, rniabä gudzucajlureni loj bejdxab. ¹⁶ Direni gac bejn guedxliuj, sigajc ni dizana gacä narä bejn guedxliuj. ¹⁷ Basyareni con xtiidxlu, sa'csi xtiidxlu najc didxguliipac. ¹⁸ Sigajc ni baxha||u narä lo guedxliujre, sigajcza ruxhaläreni te chääreni guideb guedxliuj. ¹⁹ Xcuentreni rudedä lagajc narä, te näj laareni gacnayareni con xtidxguliipaclu. ²⁰ Dina guiniabä xcuent laatisreni, rniabäza xcuent guiraa renani churu challilajz xtidxä ni gusule'reni. ²¹ Rlazä gun guiraareni tejsi xhigab, sigajc ni rujnlu, Xtradä, si'c

runäza; te sigajc ni yu'äza con luj, sigajcza chureni con nuurnu, te gacbee reben guedxliuj luj baxha||u narä.

²² Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. ²³ Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxha||u narä, luxh sanälajzlureni si'cni sanälajzalu narä.

²⁴ Xtradä, guiraa renani baniidxlu loä, rlazäza chureni cadro chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajdli guirixtiej guedxliujre. ²⁵ Xtradä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxha||u narä. ²⁶ Aräpä lojreni chu najclu; säpazaru lojreni te chu yäl sanälajz sa' ni rajplu par narä neñ lastooreni, te cuäzäza neñ lastooreni.

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

18 Che guluix gunii Jesús rediidxga, huinäni rexpejn pacni dejtz gueu Cedron. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejn pacni. ² Anajn Judas, nani guto' Jesús, caro rij Jesús con rexpejn pacni sa'csi si'csi-si'c rdxaa sa'reni ro'c.

³ Dxejcti Judas, che biääd lojni te cuaa soldad roman, näj rebixhojz ni rnibee, näjza referisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguiltu?

⁵ Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. ⁶ Che gunii Jesús lojreni: "Laa naräni", biäxhanreni, bialjbreni lo yuj.

⁷ Dxejcti gunabdidxsac Jesús lojreni:

—¿Chu rguiltu?

Dxejc räjpzareni stehuält:

—Jesús nani siääd guedx Nazare't.

⁸ Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

⁹ Guniiini rediidxga te gusojb rediidx nani guniini che räjpni: "Loj guiraa ni baniidxlu, nicla tejni di ninijt."

¹⁰ Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj moga najc Malco. ¹¹ Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtradä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza reguxhtis ni rnibee rexpejn Israel, guñaazreni Jesús bali-ibrenini. ¹³ Dxejcti ganid huinärenini lo Anás, sa'csi najcni xtadsueegr Caifás, luxh ijzga biäj|| najc Caifás bixhojzro ni rnibee lo rebixhojz. ¹⁴ Caifás najc nani balijdx

rexpejn Israel nanab guet te niguii xcuent rebeņgue-jdxga.

Cadro gunii Pedr dini gumbee Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedr nájza stee xpejn pacni huinajl dejtz Jesús. Luxh numbee bixhojzro bejn ga, biunájzani Jesús lo xle' bixhojzro. ¹⁶ Bia'nti Pedr rolä'ga. Dxejc birii xpejn pac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. ¹⁷ Dxejcti räjp mos gunaa ni rcanäj rolä', räjpni lo Pedr:

—¿La et nájdi luj najclu te xpejn pac Jesús, ä?

Räjp Pedr loj gunaaga:

—¡Xho gacäni!

¹⁸ Dxejcti sa'csi cayacnalduxh, caguse'creni boo te cagucha'lajzreni. Nájza Pedr suganäjreni, cagucha'lajzni ro guibooga.

Bixhojzro cayujn yälgunabdiidx lo Jesús

(Mt. 26:59-66; Mr. 14:55-64; Lc. 22:66-71)

¹⁹ Dxejcti gusloj cayujn bixhojzro yälgunabdiidx loj Jesús xcuent chuni'c najc rexpejn pacni nájza xcuent xhini'c ruluini.

²⁰ Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neņ rexquidobäztu nájza neņ guidoro cadro re' guiraa rexpejn Israel, nicla tej diidx dina ninixhiga'tzädi. ²¹ ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

²² Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

²⁴ Dxejcti guideb naliibni baxhaĴ Anásni lo bixhojzro lo ni laa Caifás.

Gunisac Pedr dini gumbee Jesús

(Mt. 26:71-75; Mr. 14:69-72; Lc. 22:58-62)

²⁵ Sugasijc Pedr ro' guiboo, cagucha'lajzni, che räjpreni lojni:

—¿La et nájdi luj najclu te xpejn pac niguiiga, ä?

Badzu'ni diidxga räjpni:

—¡Xho gacäni!

²⁶ Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neņ huert con laani, ä?

²⁷ Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸ Dxejc birinäreni Jesús rolijz Caifás, huiärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. ²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰ Dxejcti räjpreni lojni:

—Paru di niguiire niajc te beņ latsiaj, dinu niopnani ladzņaa guebju.

³¹ Räjp Pila't lojreni:

—Colchanäni, colhuii xho gunnäjtuni yälguhtis con lagajc xleitu.

Dxejc räjp rexpejn Israel lojni:

—Di xleitu gusaan ju'tnu te bejn.

³² Guniireni si'c te guzojb diidx nani gunii Jesús xcuent xho guetni.

³³ Ni'cni biusac Pila't neņ Pretorio, gurejdxni Jesús räjpni lojni:

—¿La luj najclu reii xten rexpejn Israel, ä?

³⁴ Dxejcti räjp Jesús lojni:

—¿La lagajc luj rniilu si'c, ä? O ¿laa yu' churenic'c naj lojlu si'c?

³⁵ Dxejcti räjp Pila't lojni:

—¿Xhixh náj narä nacä te xpejn Israel? Lagajc rebeņ lajdxlu nájza rebixhojz bateedlu ladzņaä. ¿Xhi bejnlu?

³⁶ Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpeñä te di tedä ladzņaa rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

³⁷ Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxli- ipac. Guiraa renani najn didxlii, reni'c rucuaiajgreni xtidxä.

³⁸ Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtojĴ bejnre. ³⁹ Niluxh la'tu rajptu te costumbr, casob lani pascw, ruslaanu te bejn ni yu' neņ latzguiib. ¿Xhi najtu? ¿La rlajztu guslaä ni najc reii xten rexpejn Israel, ä?

⁴⁰ Dxejcti guiragajreni guredxa', räjpreni:

—¡Na'c guslaalu niguiiga! ¡BasĴaa Barrabás!

Niluxh Barrabás najc te gubaan.

19 Ni'cni gunibee Pila't gudijnreni Jesús con duu ni yu' guechguiib lojni. ² Bejn resoldaad te coronguejch, bazalrenini yejc Jesús. Dxejcti bahua-jcwrenini te ladmoraad. ³ Dxejcti gusloj gubigreni lojni, te räjpreni lojni:

—¡GubajĴ par tejpas Reii xten rexpejn Israel!

Dxejc huääzreni lojni.

⁴ Dxejcti birisac Pila't, räjpni lojreni:

—¡Colhuii! Acabääni nez lojtu, te gacbeetu dina guidxäl nicla tej xtojlni.

⁵ Dxejcti birii Jesús nez lojreni, yu' coronguejch yejcti, najcwzani ladmoraadga. Dxejcti räjp Pila't lojreni:

—¡Colhuii! ¡Aree niguiire!

⁶ Ni'cni, che bahuii rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojlni.

⁷ Dxejcti räjp rexpejn Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

⁸ Che bejn diajg Pila't rediidxga, bidxejbruni,

⁹ biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

¹⁰ Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

¹¹ Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

¹² Ni'cni gudiil Pila't xho nuslaani Jesús, niluxh rexpejn Israel rbedxaduxhrureni, räjpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xontraar César.

¹³ Che bejn diajg Pila't rediidxre, gulääni Jesús, dxejcti gurej Pila't lo yagxhiil cadre rujnni yälguxhtis, cadre laa Litóstoros con didx-griegw sälojni naga' guisa'c, con didx-hebreo laani Gabata. ¹⁴ Najcni dxej vispr lani pascw, si'cti läidxej, dxejcti räjpni loj rexpejn Israel:

—Colhuii, aree xreiitu.

¹⁵ Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaä xreiitu lo cruzj, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xreiinu.

¹⁶ Ni'cni bateed Pila't Jesús lojreni te chacuaarenini lo cruzj.

Che bacuaarenini lo cruzj

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nuuni xcruzjni, cheni bidzujnlireni te lajt ni laa lajt xten Calabeer, con didx hebreo laani Gólgota. ¹⁸ Ro'c bacuaarenini lo cruzj. Bacuaazareni tio'p niguii lo stio'p cruzj, tejgani te laad cuä' Jesús. ¹⁹ Dxejcti bacuaa Pila't diidx ni chää yejc xcruzjni; rediidxga najc scree: "Jesús, beñ Nazare't, Reii xten rexpejn Israel." ²⁰ Xhidajl bejn bi' diidx ni caj yejc xcruzjni, sa'csi lajt cadre bacuaarenini lo cruzj najc gajxh ro' guejdxga, luxh didx hebreo, diidx griegw, näjza didx latiñ bacuaarenini rediidxga.

²¹ Dxejcti räjp rebixhojzro xten rexpejn Israel loj Pila't:

—Na'c nucuaalu: "Reii xten rexpejn Israelni", laacaru nacuaalu: "Laani najni, najcni reii xten rexpejn Israel".

²² Dxejcti räjp Pila't lojreni:

—Nani abacuaä, abacuaä. Si'c jia'nni.

²³ Dxejcti resoldaad, che gulujx bacuaareni Jesús lo cruzj, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee xhajbni ni laa tunica, nadibni, guejnni hasta lo yuj guc-cheeni. ²⁴ Ni'cni räjpreni lo sa'reni:

—Na'c guitiäjnuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadre caj scree: "Batiäjsreni xhablojiaä; yejczä xhabä ni bia'n gudzujtni daad."

Ni'cni bejn resoldaad recosre. ²⁵ Niluxh cuä' xcruzj Jesús suga' xnanni, con bäjl xnanni, ni laa Marii chää Cleofas, näjza Marii Magdaleñ. ²⁶ Che bahuii Jesús loj xnanni, dxejcti bahuiizani loj xpejn pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlu!

²⁷ Dxejcti räjp Jesús loj xpejn pacni nani sanälazduxhni:

—¡Bahuii, aro'c xnanlu!

Ni'cni dxejcti sinä nani najc xpejn pacni xnan Jesús rolizpacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

²⁸ Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

²⁹ Ro'c suga' te guejs vinagr, neñga bahuajdxreni te esponj dxejcti bacuaarenini lo te yajg ni laa hisopo, guläsreni esponjga batzugrenini ro'ni. ³⁰ Che gulujx gu' Jesús vinagrga, räjpni:

—Agulujxni.

Dxejcti basajb yejcti, baslaani xaimni.

Xhi bejn te soldaad lo Jesús

³¹ Dxejcti najc dxe vispr xte lani pascw, che ru' mandaad par lanijga. Rexpejn Israel di rlanjreni nia'n rebejnnga lo recruzj, sa'csi dxe sabdga najc dxejcti ni rusilajzreni. Ni'cni gunabreni lo Pila't guxhlañi chu qui'ch ni'reni te guetreni, te jiajtreni loj recruzj. ³² Dxejcti bidzujñ resoldaad, gudi'chreni guiro'p ni' nani caj te laad, sigajcza bennäjreni stee ni caj ste laadga. ³³ Che gubigreni lo Jesús, bahuiireni alagujcti, direni nigui'ch ni'ni. ³⁴ Tej soldaadga baqui'tzni te lans ro' xcustiini, dxejcti bixe' rejn näjza nis. ³⁵ Lagajc narä Juan bahuiä recosga, ni'cni cania rediidxre, luxh diidxga guliipacni. Lagajc narä nanä didxguliipac cania, te chaliiza lajztu xcuentni. ³⁶ Sa'csi si'c gujc guira'ti, te guzojb xtidx Dios cadre caj: "Nicla tej xtzujcti di guech." ³⁷ Sigajcza lo stee guijtz caj diidxre: "Sidxelojreni loj nani biguijtz te lans."

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸ Che gulujx recosga, dxejcti huij José, te beñ Ari-matea, nacxhiga'tzni te xpejñ Jesús, sa'csi rdxejbni rexpejñ Israel, ni'c huijni loj Pila't, gunabni loj Pila't te laani guiliätñi Jesús lo crujz. Cuäjbza Pila't, dxejc biääd José gulätñi Jesús, sanätini togoolga. ³⁹ Näjza Nicodem biääd dxejc, nani galoo huininäj Jesús te guxhijñ. Biäd-näni si'cti tiuu kil te dänejh ni najc si'c yaal ni laa mirra näjza áloes. ⁴⁰ Dxejcti cua'reni Jesús batejbrenini te la' lad lino, basälzarenini däjga ni laa mirra con áloes, sa'csi si'c najc xcostumbr rexpejñ Israel che rucua'tzreni te togool. ⁴¹ Gajxh cadro cuaj Jesús lo crujz, yu' te huert, neñ huertga yu' te bacoob si'c te biliääd, cadro nicla tej bejñ gajd guiga'tz. ⁴² Sa'csi abidzujñ dxej vispr lani pascw xten rexpejñ Israel, luxh gajxh suga' biliääga, nenga gudixhreni Jesús; si'c biga'tztini.

Gubañsac Jesús loj rebengut

(Mt. 28:1-10; Mr. 16:1-8; Lc. 24:1-12)

20 Primer dxej xten xmaanga, cäjyru, gajd lo guedxliuj jianij che huij Marii Magdalen lo baa-ga. Che bidzujñni ro' baaga, bahuiini agubicaj guij ni suga' ro' baaga. ² Dxejcti ruxuñni gubi'ni te huiye'tzni lo Simón Pedr näjza lo stee xpejñpac Jesús ni sanälaz-duxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

³ Dxejc biriguxuñ Pedr näjza stee bejnga, huijreni nez lo baa. ⁴ Ruxuñ guiro'preni. Niluxh stee bejnga ruxuñ-duxhruni loj Pedr. Laani ganid bidzujñni lo baaga. ⁵ Dxejcti guretäñni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. ⁶ Dxejc bidzujñgajc Pedr, biugajcni neñ baaga, bahuiini naga' relajdga te laad. ⁷ Bahuiizani lajd ni guyu' yejcti, ni'c nie'tni saru, naga'ni te laad. ⁸ Dxejcti biu' stee bejnga nani bidzujñ ganid. Che bahuiini neñ baaga, huililajzni gubañsac Jesús. ⁹ Sa'csi gajdreni gacbee ni caj lo reguijtz, cadro caj nanab guibañsacni loj rebengut. ¹⁰ Dxejc gubisac guiro'p rexpejñpacni roli-jzreni.

Baluiloj Jesús loj Marii Magdalen

(Mr. 16:9-11)

¹¹ Laltis suga' Marii cuä' baaga, cayoondi. Ni'cni laj ni cayoondi, basajb lojni te bahuiini neñ baaga. ¹² Dxejcti bahuiini lo tio'p xangl Dios, najcwreni ladnolbäj, sob-ga'reni, tejni nez cadro gojt yejc Jesús, steeni nez cadro gojt ni'ni. ¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴ Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. ¹⁵ Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

¹⁶ Dxejcti räjp Jesús lojni:

—¡Marii!

Dxejc gubiré Marii, räjpni neñ xtidx hebreo:

—¡Raboni!

(Säloj diidxga "Mastr".)

¹⁷ Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xh-aguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

¹⁸ Dxejcti huij Marii Magdalen, bidzujñni loj rexpejñ-pacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejñpacni

(Mt. 28:16-20; Mr. 16:14-18; Lc. 24:36-49)

¹⁹ Che gojl gudxej, najcni dmingw, primer dxej xten xmaan, abiäudzu'tz ro' lä' ro' yu' cadro tre' rexpejñpacni, sa'csi rdxejbreni rexpejñ Israel. Chela bidzujñ Jesús, guzujni nez galäiireni, räjpni lojreni:

—Suchu yälrbexi lastootu.

²⁰ Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejñpacni che bahuiireni lo Dad Jesús. ²¹ Dxejc räjp Jesús lojreni ste-huäl:

—Suchu yälrbexi lastootu. Si'c ni baxhal Xtadä narä, si'cza ruxhalä la'tu.

²² Che gulujx guniini rediidxga, balejbni yejcteni, räjpni, lojreni:

—Suguibajñ Sprit Dxan xten Dios neñ lastootu.

²³ Rextojl rebejñ nani siälajz, sibicajreni. Rextojl re-bejñ nani ditu jialajz, siannäjreni redojlga.

Tomás bahuii lo Jesús ni gubañsac

²⁴ Tomás, ni laaza Didimo, najcni te retzubitio'p xpejñpac Jesús. Rutini che biääd Jesús loj rexpejñpacni.

²⁵ Dxejcti räjp rexpejñpacni lojni:

—Abihuiinu loj Jesús, agubañsacni loj rebengut.

Dxejcti laani räjpni lojreni:

—Palga dina fiä loj reñaani cadro caj seen xten re-claab, palga dina guqui'tzä bicueñaá cadro guyu' claabga, guqui'tzäza naa cadro bixal cuä'ni, di lazä chalii gubañsacni loj rebengut.

²⁶ Che gudejd xhujñ dxej, tresac rexpejñpacni neñ yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yälrbexi lastootu.

²⁷ Dxejcti räjpni loj Tomás:

—Baqi'tz bicueñaalu ree loj patñaä, basälza naalu cuä'äre, na'c ractio'p lajzlu, huililajzpac gubañsacä loj rebengut.

²⁸ Dxejcti räjp Tomás lojni:

—¡Xtadä, Xtioozä!

²⁹ Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

Xhicuent bacuaani reguijtzre

³⁰ Xhidalroduxhru dzuun bejn Jesús nez loj rexpejn-pacni, nani di nicaj lo guijtz. ³¹ Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebejn jiaäd, Xi'n Dios. Luxh che chalilajz te bejn xtiidxni, sajni yälñabajñ par tejpas.

Jesús baluiloj lo gajdz xpejn-pacni

21 Dxejcti baluiloj Jesús loj rexpejñni ro' nisdoo ni laa Tiberias. Scree baluiloj lojreni. ² Nadxaag sa' rebejnre: Simón Pedr, Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejn-pacni. ³ Dxejcti räjp Simón Pedr loj resa'ni:

—Chanazä bäjł.

Räjpreni lojni:

—Näjza nuure chonnu.

Dxejcti sääreni, huä'preni neñ te barcw. Guideb gux-hijnga xhet bäjłdi gunaazreni. ⁴ Che acayanij loj guedxliuj, suga' Jesús ro' nisdoo, di rexpejñni niem-beeni. ⁵ Ni'cni räjp Jesús lojreni:

—Rexi'nä, ¿la xhet bäjłdi rajptu, ä?

Räjpreni lojni:

—Xhet rajpdinu.

⁶ Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäjł. ⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäjł, dxejcti gutiäjsni lo nisdoo. ⁸ Sgail rexpejn-pacni biädnäreni rebarcwga sa'csi ameer guidzujñreni ro' nisdoo, si'cti tegayuu metrtis cayäädx. Siädnäzarenı guijxh guidxa rebäjł. ⁹ Che bidzujñreni ro' nisdoo, bahuiireni re' guiboo, ro'c dzuub te bäjł näjza yätxtiil cague'. ¹⁰ Dxejcti räjp Jesús lojreni:

—Coltanä gail bäjł nani entis gunaaztu.

¹¹ Dxejcti huij Simón Pedr, guläani guijxhga, guidxani bälro. Guyu' si'cti te gayuu garol con choñ bäjł neñ guijxhga, niluxh dini niräsyä' mase guyu' xhidalduxh bäjł neñni. ¹² Dxejcti räjp Jesús lojreni:

—Coltaa te gauxharejntu.

Nicla tej rexpejn-pacni dini niabdiidx lojni: “¿Chu luj?” sa'csi anajñreni laa Jesúsni. ¹³ Dxejcti cua' Jesús yätxtiil, badeedni lojreni, sigajcza rebäjł.

¹⁴ Dee najc ni riojñ huält baluiloj loj rexpejn-pacni, che gubansacni loj rebengut.

Jesús rniñäj Simón Pedr

¹⁵ Che gulujx gudajwreni, räjp Jesús loj Simón Pedr: —Simón xi'n Jonás, ¿la sanälajzru lu narä loj chu stee, ä?

Räjpni lojni:

—O'n, Dad, luj najñlu sanälazä luj.

Räjp Jesús lojni:

—Gojp rexilä'ä.

¹⁶ Räpsacni lojni ni rojp huält:

—Simón, xi'n Jonás, ¿la sanälajzru lu narä, ä?

Räjpni lojni:

—O'n, Dad. Luj najñlu sanälazä luj.

Räjpni lojni:

—Gojp rexilä.

¹⁷ Räpsacni lojni ni riojñ huält:

—Simón xi'n Jonás, ¿la sanälajzru lu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzru lu narä?” Dxejcti räjp Simón lojni:

—Dad, luj najñlu guira'ti. Luj najñlu sanälazä luj.

Räjp Jesús lojni:

—Gojp rexilä. ¹⁸ Rniliápac lojlu, che gujclu bi'nru, la-gajc luj rajcwlu xhajblu, rijlu cadrotis rlajzlu. Che anaj-clu bengool, susgaatislu ñaalu te gushuajcw ste'ca bejn xhajblu, te chanäreni luj cadre di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuiini loj stee xpejñni, nani sanälajzru Jesús, siädnajlni dejtzenı. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” ²¹ Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejnnga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴ Luxh bejnnga najc narä, xpejn Jesús nani bahuiiloj guiraa recosre, nani bacuaazarenı. Anadonnu didxli-ıpac najc recos nani rniini.

²⁵ Yu'ru xhidalduxh dzuun ni bejn Jesús. Palga gu-cuaanu guiraliı redzuun ni bejn Jesús, nicla lo guedxli-ıjre di galı chu reguijtz cadre xcajni.

Hechos

Siääd Sprit Dxan xten Dios te cuääzni neŋ lastootu

1 Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejŋpacni. Sprit Dxan xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubansacni lo rebeŋgut, baluilojni lo rexpejŋpacni. Tiuu dxej baluilojni loj rexpejŋpacni balti huält te gacbeereni agubansacni. Guniizani lojreni xcuent xcälŋnibee Dios.

⁴ Che gudejd tiuu dxejga, batojp Jesucrist rexpejŋpacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjpnj:

—Dee abiejn diajgtu guniä lojtu. ⁵ Juan batiobnis con nis, luxh ŋaj guxii dxej cayäädx dxejcu siääd Sprit Dxan xten Dios te cuääzni neŋ lastootu. Si'c guirobnistu —räjpnj.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La ŋaj gudedsaclu yälŋnibee lo rexpejŋ Israel, ä?

⁷ Dxejcti räjp Jesucrist loj rexpejŋpacni:

—Di riäjŋ gacbeetu xcuent redxej näjza retieŋp nani abasobxgaa Dios con xcälŋnibeeni. ⁸ La'tu sica'tu yälŋnibee che abiääd Sprit Dxan xten Dios neŋ lastootu. Dxejc chatie'chtu xtidxä näjza rextzunä neŋ guedx Jerusalén, neŋ guiraa reguedx Judea, neŋ guiraa reguedx Samaria, näjza neŋ guideb guedxliuj —räjpnj.

⁹ Gulujxtis gunii Jesucrist rediidxga, luxh laŋni cahuii rebejŋ lojni huäjsni xhaguibaa, sa'csi gurejdx Diosni. Dxejc biääd te za, biu'ni neŋ zaga. Ro'cti diru rebejŋ nuhuii lojni. ¹⁰ Laŋni cadxelodxi rebejŋ xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni. ¹¹ Dxejc räjp reangl loj rebejŋ:

—¿Xhi rajctu beŋ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpreni.

Gulereni Matías ni najc apostcoob

¹² Dxejc birii rebejŋ yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajc sareni dxej ni rusilajzreni.

¹³ Che biu'reni Jerusalén, bidzujŋreni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacobo, Juan, Andrés, Felipe, Tomás, Bartolomé, Mateo, Jacobo xi'n Alfeo, Simón nani laaza Zelote, näjza Judas bejtz Jacobo. ¹⁴ Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gajŋ bejŋ. Dxejcti huisulii Pedr galäiireni, räjpni loj rebejŋ:

¹⁶ —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni. ¹⁷ Gujc Judas sa'nu, bejnzani lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejn ni dzunguijdx ni bejn, badesacni meel lojreni. Gusiireni te la' yuj. Dxejcti lagajc Judas basäl duu guejnni, guzäbnajŋni lo bej, gujtni. Gusaguijŋni, dxejcti biräjs xque'ni birii guiraa reziini. ¹⁹ Che biejn diajg rebejŋ Jerusalén si'c, gulälajreni yujre Acéldama, ni säloj yurejŋ. ²⁰ Neŋ guijtz ni laa Salmos abacuaa toDavid rediidxre:

Sujianxteb rolizjni;

na'c cuääzru bejŋ rolizjni;

näjza:

Suxca'za ste'ca niguii xtzuumni.

²¹ Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni gyunäj Jesucrist nuunu, ²² dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäŋ niguiire nuunu gusule'nu diidx gubansacpac Jesucrist lo rebeŋgut.

²³ Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴ Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejŋ, baluui loonu con ni najc niguii ni agulelu loj guiro'p niguiire, ²⁵ te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäŋ Matías stzubitieb reapost te gujcreni tzubitio'p apost.

Biääd Sprit Dxan xten Dios

2 Che bidzujŋ dxej ni rajc lanij xten Pentecostés, tre' guiraareni tejsi lajt neŋ te yu', ² chela gusloj cayubej xhaguibaa si'c te beroduxh, bachajni guideb neŋ yu' cadre suga'reni. ³ Dxejc bahuiireni astoo

carechxteb xhidajl bale' casanij rebajlga yejc tejga reni sojb ro'c. ⁴ Biu'ti Sprit Dxan xten Dios neṅ lastoo guiragajczeni. Dxejc gusloj caniireni garen-garen didxsaj si'tisni badeed Sprit Dxan xten Dios guiniireni.

⁵ Neṅ redxejga, xhidajl rexpejṅ Israel ni sasanäjpac xtidx Dios bidzujṅ guedx Jerusalén. Xhidajl lajt biriireni siädreni. ⁶ Che biejn diajgzeni guyubej beduxhga, bidojp rebeṅ xhidaalga, bachaag sa'reni. Rdxeloduxh rebeṅ xhidalga sa'csi cayejn diajgzeni canii reapost xtidxsajpac cade tejreni. ⁷ Cadxelojreni räjpreni:

—ǃBahuilaaare! ǃLa et beṅ Galileedi renani canii, ä? ⁸ ǃXhoxh riejn diajgnu caniireni xtiidxpacnu si'ctis ni rniinu laadxnu, ä? ⁹ Najcnu beṅ nacióṅ Partia, beṅ nacióṅ Media, beṅ región Elam, beṅ Mesopotamia, beṅ Judea, beṅ estad Capadocia, beṅ región Ponto, näjza beṅ Asia. ¹⁰ Najczanu beṅ distrit Frigia, beṅ estad Panfilia, beṅ nacióṅ Egipto, näjza beṅ ni siäd stelaad Cirene, te estad neṅ Africa. Loj rebejṅ ni siäd Roma yu' reni najc xpejṅ Israel, yu'za reni bazuxhijb lo Dios sa'csi rililajzreni si'cni rililajz rexpejṅ Israel. ¹¹ Yu'za beṅ Creta. Yu'za beṅ nacióṅ Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujṅ Dios.

¹² Bidxeloduxh rebeṅ xhidaalga, dijiejṅ xhi xhigab gunreni. Räjpreni lo sa'reni:

—ǃXhi säloj dee?

¹³ Dxejcti guyu' rebejṅ ni baxhiznäjreni, räjpreni:

—Agusojz redee.

Gunii Pedr loj rebejṅ

¹⁴ Dxejcti gusulii Pedr näjza tzubiteeb sa'ni, guredxa'ni guniini lo rebeṅ xhidaalga:

—Guejbtu, rexpejṅ Israel, nani rbäjz distrit Judea näjza guedx Jerusalén. Coṽcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru ṅaj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Räjp Dios:

Sidzujṅ dxej che guxhaṽä Xsprit Dxanä cuääzni neṅ lastoo guiraa rebejṅ.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcaṽ, rextadgoldootu suluiloj bacaṽ recos nani guluiä lojreni.

¹⁸ Guxhaṽä Xsprit Dxanä loj guiraa reni siädnaṽ narä. Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Resenro ni gac najc rejṅ con guiboo, luxh guxh sire' si'c te za.

²⁰ Sicäjä loj gubijdx, sajc bäii si'c rejṅ.

Sajc guiraa recosre, dxejcru sidzujṅ dxeduxh che jiälsacä narä, Dios.

²¹ Dxejc guiraa rebejṅ nani cueedx guiniab gacnäj Diosreni, reni'c siliaa lo dojl.

²² Räjp Pedr lojreni:

—Rexpejṅ Israel, coṽcuadiajg xtidxä. Dios baluii Jesucrist, beṅ Nazare't, lojtu por recosro, remilagwr, reseen nani bejnni nez lojtu. Lagajc Dios badeed yäṽrnibee loj Jesucrist te bejnni redzunroga. La'tu nancheetu dee. ²³ Galooli ananchee Dios xhi guntu loj Jesucrist Xi'nni. Basanza Dios bateedu Jesucrist ladzṅaa rebeṅguijdx te bacuaareni Jesucrist lo cruz te bagu'treni. ²⁴ Baspaṅsac Dios Jesucrist, basṽaa Diosni ladzṅaa yäṽgajt, sa'csi di niajcdi nica' yäṽgajtṅni par tejpas, sa'csi laani rnibee lo yäṽgajt. ²⁵ Che gubaṅsac Jesucrist, guzobj diidx ni bacuaa David lo guijtz xcuent Jesucrist. Räjp David lo Dios:

Guira dxej ruhuiä lojlu, Dios.

Suga'lu xladbeä cayacnäjlu narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neṅ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibaṅä par tejpas.

Sibalazduxhä sa'csi guibaṅnääṽ luj,

si'c räjp David xcuent Jesucrist.

²⁹ Räjp Pedr:

—Guyasi guiniä lojtu agujc xchero gujt David.

Aguyutzu'tzni neṅ baa. Sajc guihuiinu baa cadro biga'tz David. ³⁰ Gunii David xtidx Dios. Che nabajṅli David bia'n diidx gudeed Dios te xajgni ni guirilaj Crist,

luxh laani gacni rei si'cni gujc David. ³¹ Sa'csi baluixgaa Dios recosre lo David, ni'c räjp David sibaṅsac Crist lo rebeṅgut sa'csi di Dios gusaan jia'n xaimni neṅ baa,

dizani gusaan gudx tiejxhni. ³² Guläs Dios Jesucrist lo rebeṅgut.

Nuure bahuiloonuni, najcnu testiigw gubaṅsacni lo rebeṅgut. ³³ Gurejdx Dios Jesucrist. Naj nabajṅ Jesucrist xhaguibaa, nabejṅni xladbee Dios ro'c canibeeni.

Badeed Dios Xsprit Dxanni loj Jesucrist si'cni bia'n diidx. Naj abaxhaṽ Jesucrist Sprit Dxan lo guedxliuj. Jesucrist cayujṅ guira'ti nani cahuiitu, nani cayejn diajgtu nadxej. ³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä ³⁵ che guidzujṅli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶ ‘Rniliäpac lojtu —räjp Pedr—. La'tu bacuaatu Jesús lo cruz. Ni'cni, coṽgacbee, guiraatu xpeṅ Israel, abejṅ Dios gac Jesúsre Dad nani rnibee loonu.

³⁷ Che biejn diajgzeni laareni bacuaareni Jesús lo cruz, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ǃxhini'c jiennu ṅaj?

³⁸ Dxejcti räjp Pedr lojreni:

—Coṽgusiech lajztu, coṽguirobnisza, sa'csi ni'c najc te seen rlaṽztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neṅ lastootu. ³⁹ Si'c rlaṽz Dios guniidx Xsprit Dxanni lojtu näjza loj rexi'ntu, näjza lo rebejṅ ni rbäjz zijtru, näjza loj guiragajc rebejṅ nani cueedxni —si'c gunii Pedr lo rexpejṅ Israel.

⁴⁰ Dxejcru gunii Pedr xhidajlru diidx, balijdxni rebejṅ:

—Coṽguirii loj rebeṅ latsiaj ni re' lo guedxliuj ṅaj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choṇ miḷ bejn. ⁴² Sanuutis rusobreni diidx ni baluui reapost, bibalazduxhreni sa'csi bidxaag sa'reni con rexpejn Jesucrist, gudaunāj sa'reni si'c gudaunāj Jesucrist rexpejṇpacni, bidojpreni tejsi lajt te guniireni lo Dios.

Xho gubajṇ rexpejṇ Jesucrist galoo

⁴³ Bidxeloduxh guiraa rebejṇ luxh bejn reapost redzunro, remilagwr. ⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni neṇ guidoro xten Israel. Tejsi najc rexhigabreni. Gudaunāj sa'reni rolijz cadetejreni, guiraareni bibalaznāduxh sa'reni. ⁴⁷ Gulä'preni xpala'n Dios. Guiraa rebejṇ gunii rexpejṇ Jesucrist najc beṇsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejṇ Jesucrist.

Biajc niguii nani racxhuu ni'ni

3 Guyu' te dxej sää Pedr näjza Juan nez loj guidoro si'cti rcachon gudxej. ² Guyu' te niguii nani racxhuu ni'ni, digacdi sani che gojllini. Guixe-guixee rile'c bejṇ niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan neṇ guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räjṇ Pedr lojni:

—¡Bahuii loonu!

⁵ Che biejn diajṇ niguiiga xtidx Pedr, bahuiini lojreni sa'csi naani sudeedreni meel lojni.

⁶ Räjṇ Pedr lojni:

—Xhetliidi meeldi rapä, nani rapätis sunidxä lojlu. Xcuent xcälṇribee Jesucrist, beṇ Nazare't, rniä lojlu: ¡Gusulii! ¡Gusaj! —rājṇni.

⁷ Dxejcti gunaaz Pedr ṇaani, guläsnini. Biligajc ni'ni, gusutijp ni'ni. ⁸ Huisuyälṇi, gusajni. Biunājṇi Pedr näjza Juan neṇ guidoro. Rsiājṇi, rtiäsni, calä'pni xpala'n Dios. ⁹ Bahuii xhidajl bejṇ lojni neṇ guidoro, rsiājṇi, calä'pzani xpala'n Dios. ¹⁰ Biembeerreni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

Baluu Pedr xtidx Dios neṇ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga ṇaareni. Ruxuṇ guiraa rebejṇ bidzujṇ neṇ cordoorga. Bidxelojreni sa'csi arsiāj niguii ni gucxhuu ni'ni. ¹² Che bahuii Pedr lo rebejṇ rājṇni lojreni:

—¿Xhicuent rdxelox guejbtu, rexpejṇ Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälṇribee Jesucrist biajc ni' niguiire. ¹³ Xtiooznu, ni najc Xtiooz toxtadgoldoonu Abram, tox-

tadgoldoonu Isaac, näjza toxtadgoldoonu Jacob, lagajc Diosga abadeed yälṇribee loj Xi'nni Jesús. Niluxh la'tu bateedtuni ladzṇaa reguxhtis. Che rlaṇ Pila't ni rribee nusläa Jesucrist, ditu nicäjb niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxaan xten Dios nani rujn ganax dzunsa'c. Alga gunabtu birii te niguii nani bagu't bejṇ. ¹⁵ Jesucrist rudeed yälṇnabajṇ, luxh la'tu gunabtu bacuaareni Jesucrist lo cruzj. Guläsac Dios Jesucrist lo rebeṇgut. Bahuiloonu nabajṇ Jesucrist, najcnu testiigw gubaṇsac Jesucrist lo rebeṇgut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcälṇribee Jesucrist abasiajcniguiire, sa'csi huililajzni. Sa'csi huililajznu xtidx Jesucrist, ni'c bi-ajcni te najcni si'cni rhuiituni ṇaj.

¹⁷ 'Rexpejṇ Israel, narä nanä di'tu niacbee, diza rex-cuxhtistu niacbee laa Xindxaan xten Dios ni bacuaatu lo cruzj. ¹⁸ Scree gujc te guzojb xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni colsiechajztu, colguibi' loj Dios te guibicaj xtojltu. Dxejc susiäluyj Dios lastootu, sujṇni gac nacoob guira'ti, si'cni bia'n diidx gacni. ²⁰ Lojtu suxhaṇza Dios Jesucrist nani rribee, nani aguleni galooli. ²¹ Naj nungäjṇ jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo rextadgoldootu agujc xchero.

²² Scree gunii toMoisés lo rextadgoldoonu, rājṇni: "Xtadnu Dios suxhaṇ te niguii sa' narä nani cueni lo resa'tu. Siniini xtidx Dios. Colgusobdiajṇ guiralii diidx nani guiniini lojtu. ²³ Renani di gusoob rextiidxni, sinitlojreni, direni gac rexpejṇ Dios."

²⁴ Rājṇza Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siädnaṇli, xcuent recos ni cayajc neṇ redxejre. ²⁵ La'tu najc xajṇ reniguii ni gunii xtidx Dios. La'tu biannäjtu diidx nani gunii Dios loj rextadgoldoonu. Bia'n diidx, rājṇ Dios loj toxtadgoldoonu Abram: "Jiädjiajṇ te xajglu ni gupalazduxh rebeṇ guedxliuj, sa'csi susläanireni lo dojl." ²⁶ Dxejcti ganiddoo lojtu baxhaṇ Dios Jesucrist te guibaa lajztu che gusiejch lajztu, te na'cru guntu dojl —rājṇ Pedr.

Baluu Pedr näj Juan xtidx Dios loj reguxhtis

4 Laṇ ni caniireni lo rebejṇ, ro'c bidzujṇ rebixhojz xten Israel näjza nani rribee lo resoldaad xten guidoro näjza resaduceos. ² Bidxe'chduxhreni sa'csi cagulijdxreni rebejṇ, cayājṇpreni:

—Sibaṇsac rebejṇ lo rebeṇgut sa'csi gubaṇsac Jesucrist lo rebeṇgut.

³ Gunaaz reguxhtisreni, biäurenireni sa'csi agudxej luxh abiäu jusgaad. Neṇ latzguib bararenireni yääl. ⁴ Xhidajlreni biejn diajṇ xtiidxreni huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebeṇgool, renani rribee guedx Jerusalén, näjza rebejṇ ni ruluu lei, ⁶ näjza Anás ni rribee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa

reniguii ni najc sa' rebixhozro ni rnibee. ⁷ Gunibeereni biääd Pedr näjza Juan gusuj galäiireni te gunabdi-idxreni lojreni:

—¿Chu xcälrnibee rajptu? ¿Chu laj basä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dhan xten Dios neñ lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel, ⁹ palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basi-ajcnu niguiiga, ¹⁰ gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yälrnibeduxh. Diidxga abasiajcti ni' niguiire, xhet rajcdi-ni suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcäjtu che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'.

¹² Xtebtis Jesucrist ruslaa bejn lo dojl, ruti stee bejn lo guedxliuj nani baxhał Dios te guslaani bejn lo dojl —si'c räjp Pedr.

¹³ Che biejn diajgreni xtidx Pedr, bidxelojreni sa'csi di Pedr näjza Juan guidxelj, dizareni guitujy. Dxejcti räjp rebixhojz ni sajru lo sa'reni:

—Direni ganduxh guijtz, bejntisreni.

Dxejcti gucbeereni gusanäj redee Jesucrist, lojni bisieedreni. ¹⁴ Bahuiiza rebixhojz lo niguii ni abiajcti ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensi-laareni. ¹⁶ Räjpreni lo sa'reni:

—¿Xhi jiennänu reniguiire? Guiraa reben Jerusalén anajn xcuent dzunroduxh ni cayujnreni. Digacdi gucuatzlaaznuni. ¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xti-idxni.

¹⁹ Dxejcti gunii Pedr näjza Juan, räjpreni lojreni:

—¿Colguinii loonu chu xtiidx sajru guicuaadiaagnu? ¿Xtiidx la'tu, o xtiidx Dios? ²⁰ Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejcti baslaa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujct ro'c. ²² Sa'csi niguii ni basiajcti xcuent yälmilagwr agudejdni tiuu ijz.

Guredx-gunab rexpejn Jesucrist lo Dios

²³ Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza rebengool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa näjza guedxliuj näjza nisdoo näjza guira'ti ni yu' lojreni, nenreni, ²⁵ nani bejn basoob toDavid xtidx Sprit Dhan te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' re'reii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhał Dios, si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebenzajt nani di gac xpejn Israel. Bidxechnäjnreni Xi'nlu nani najc Crist ni baxhałlu. ²⁸ Naj abejnreni dzunguijdx si'cni galooli guniilu gac. ²⁹ Naj Guejblu Xtiosnu, bahuii xho cagusacsireni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. ³⁰ Baniidx xcälrnibeelu loonu te guisajcnu re-bejn, te jienzanu redzunro, remilajgwr con xcälrnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsejz yu' cadro tre'reni, cayac si'c te xu. Dxejcti biääd Sprit Dhan xten Dios basutijpruni lastooreni. Dxejcti dirureni nidxelj guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rexhixtenreni te xca' guiraareni nani rquiinreni. ³³ Gucnäj Dios reapost, gusutzu'tzreni birjreni diidx bahuiiojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niäädx xhixtenni sa'csi renani gojx xyujni, rolizni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. La-jdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

Ananías näj chäälni rujn dojl

5 Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejcti sgala' meelga badeedni lo reapost si'c guiraa xcuent yujga luxh chäälni nanchee xhi cayujjni. ³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo rebendxab, ä? ¿Xhicuent rlanjzlu gusgueelu Sprit Dhan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías nen lajd. Dxejcti sanärenini huicua'tzrenini nen baa.

⁷ Pet agujc choŋ or gujtni chela bidzujŋ chääł Ananías. Dini gan agujt chääłni. ⁸ Räjŋ Pedr lojni:

—Gunii, ɛla bato'tu xyujtu si'cni naj chäällu huijni, ä? Räjŋ Safira lojni:

—O'n, si'c huijni.

⁹ Dxejcti räjŋ Pedr lojni:

—ɛXhicuent bejnlu tejsi xhigabguijdx con chäällu? ɛXhicuent rłajztu gusgueetu Sprit Dxan xten Dios? Ro lä' siääd renani huicua'tz chäällu. Naj näjza luj chacua'tzreni nen baa.

¹⁰ Si'ctis biajb Safira, gutgajczani. Dxejcti bidzujŋ re-bi'n, bahuiireni agujtni. Dxejcti guläsrenini, biriireni huicuatgajcneni cuä' baa cadre biga'tz chääłni.

¹¹ Bidxebduxh guiraa rexpejn Jesucrist, näjza guiraa re-bejn nani biejn diajgri recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebeŋuejdx. Nadxaag sa' rexpejn Jesucrist, caguchaa-greni diidx nen cordoor ni laa Salomón. ¹³ Guyu' xhidajl bejn ni di nuchaag lo rexpejn Jesucrist sa'csi bidxeb-jbreni guchaagreni lojreni. Rebeŋuejdxga guläp-duxhrene xpala'n rexpejn Jesucrist. ¹⁴ Nen redxejga xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezyuj rebejn nani cay-acxhuu. Siädnä rebejn beŋracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzujŋ xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' beŋdxab nen lastooreni. Con xcälrnibee Jesucrist basiajc reapost reben racxhuu, gulääzarenini rebeŋdxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebeŋuejdx xpala'n reapost sa'csi basiajcreni reben racxhuu. ¹⁸ Gunaazreni reapost. Basärenini nen latzguiib. ¹⁹ Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost nen latzguiib. Räjŋni lojreni:

²⁰ —Cołchäj guidoro. Ro'c colguinii lo rebejn xho gac guibannäjreni Dios par tejpas.

²¹ Che biejn diajgreni si'c, rsildooru biu'reni nen guidoro, ro'c baluiireni xtidx Dios lo rebejn.

Dxejcti bixhojz nani rnibee, näjza rebeŋgool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jädnä reguixhajg reapost nani biäu nen ladtguiib. ²² Che bidzujŋ reguixhajg latzguiib, bahuii reguixhajg nen latzguiibga, niluxh rut yu'di nen latzguiib. Che gubi'reni biädnäreni diidx, räjŋreni loj reguxhtis:

²³ —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di nen latzguiib.

²⁴ Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjŋ lo sa'reni:

—ɛXhini'c gujc? ɛXhoni gac naj? —räjŋreni.

²⁵ Dxejcti bidzujŋ te niguii, räjŋni lojreni:

—Reniguii ni basäutu nen latzguiib, areni suga' nen guidoro, luxh caguluiireni rebejn —räjŋni.

²⁶ Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejcreni. ²⁷ Che bidzunnäjreni reapost, räjŋreni suurenini nez loj reguxhtis xten Israel, sas gunii bixhojz ni rnibee, ²⁸ räjŋni loj reapost:

—ɛEt agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rłajztu cuaquijtu nuure bagu'tnu Jesucrist.

²⁹ Dxejcti räjŋ Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn. ³⁰ Bagu'ttu Jesucrist che bacuaatuni lo cruz. Niluxh Xtios xtadgoldoonu guläsni lo rebeŋgut. ³¹ Naj agule'c Diosni xladbeeni cadre rnibeeni, abadeedza Dios yälrnibee loj Jesucrist te guslaani nuure, te si'c rłajzni guibicaj xtojł guiraa rexpejn Israel nani gusiechłajzreni. ³² Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios Sprit Dxan xtenni lo guiraa renani susoob xtiidxni.

³³ Che biejn diajg reguxhtis rediidxga, bidxech-duxhrene, rłajzreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh resp'e't dade'ga. Gunibee Gamaliel guirii reapost nen yu'ga.

³⁵ Dxejcti räjŋ Gamaliel lo rebixhojz:

—Guejbtu rexpejn Israel, colyensa'c xhigab xhini'c rłajztu gunnäjtu reniguiire. ³⁶ Colzaa rłajztu gajd gac xchej guyu' tej ni laa Teudas, räjŋni rnibeduxhni. Dxejcti huinajl tajp gayuu bejn. Che bagu'treni, bire'ch guiraa rexpejn, xhetru bejndireni. ³⁷ Nen ijz ni guyu' cens, biriiza Judas ni siääd Galilee. Dxejcti gurejdxni xhidajl bejn ni huinajl. Bagu'tza bejn, dxejcti bire'chza guiraa reni huinajl. ³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni. ³⁹ Palga xtzun Dios ni cayujnreni, digacdi guscuääznu dzuunga, sa'csi guidiłnu guidxe'ch Gueb Dios loonu.

⁴⁰ Bichaglajz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejcti baslaarenini. ⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist.

⁴² Guixe-guixee laltis baluiireni xtidx Jesucrist nen guidoro näjza roliz bejn. Cagusule'reni diidx lo rexpejn Israel:

—Jesús najc Crist nani cabääztu jiääd.

Gulereni reniguii ni gudeed yätxtiil lo rexpejn Jesucrist

6 Neñ redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni. ⁴ Te si'c sajz chanuutis guiniabnu lo Dios, guiluizanu xtidx Dios lo rebejn.

⁵ Guiralii rebejnnga bidxagljazreni diidxga. Dxejcti gulereni Esteban, te niguii ni rlilajzpac xtidx Dios, rbäjzza Sprit Dxan xten Dios neñ lastooni. Gulezaren Felipe, Prócoro, Nicanor, Timón, Parmenas; gulezaren Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶ Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzunreni.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazreni Esteban sanärenini lo rebixhojz nani rnibee

⁸ Gucnäduxh Dios Esteban, bejnii redzunro, remilagwr nez lo rebejn. ⁹ Dxejc reben guidoo ni laa Libertados gusloj cadilñäj Esteban. Lojreni nadxaag beñ Cirene, näjza beñ Alejandría, näjza gaii beñ Cilicia, näjza sgaii bejn ni siääd reguedx Asia. ¹⁰ Reniguiire di niajcdi nuzejreni diidx lo Esteban, sa'csi nasinduxhni, luxh cayacnäjä Sprit Dxan xten Diosni. ¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹² Scree gujc bache'chreni rebejn näjza rebejn ni ruluu leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. ¹³ Dxejcti biädnäreni reniguii nani baquilreni te guniireni didx-xhii. Räjpreni reniguiire:

—Entis rniyaj Esteban leii xten toMoisés näjza guidodxanre. ¹⁴ Abiejnza diaagnu gunii Esteban: "Jesús nazareno sutzujl guidoro, suchaazani leii nani baniidx toMoisés loonu."

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

Diidx ni basule' Esteban lo rebixhojz

7 Dxejcti räjpreni te bixhojz nani rnibee lo Esteban:

—¿La gulii si'c guniilu, ä?

² Räjpreni Esteban lojreni:

—Colgucuardiajg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz neñ guedx Harán. ³ Räjpreni Dios loj toAbram: "Birii lajdxtu, basa'n guiraa resa'lu. Huij cadrotis guluiä lojlu" ⁴ —räjpreni Esteban—. Dxejcti birii toAbram lajdx re-Caldeos. Huiläjzni guedx Harán. Che gujt xtdani, biädnä Dios toAbram nez ree, cadre rbääznu naj. ⁵ Di Dios nuzalajz nicla tla' yuj cadre suu te ni' toAbram. Niluxh räjpreni Dios sudeedni yujga lo rexajg toAbram, jiannäjnreni yujga che guet toAbram. Niluxh nicla gajd xi'n toAbram chu dxejc. ⁶ Stee huält räjpreni Dios lo toAbram: "Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz." ⁷ Räjpreni Dios: "Narä sunä castiigw rebejn ni gusacsíreni che najczeni mos. Narä cuää rexagdoolu ro'c, te ree guzuxhijbreni loä neñ guejdxre", si'c räjpreni Dios ⁸ —räjpreni Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacoob. Sigajcza bennäj Jacoob guitzubitio'p rexi'nni nani najc rexpengoldoo xpeñ Israel.

⁹ Räjpreni Esteban:

—Guitzubiteb rexi'n Jacoob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José. ¹⁰ Che gudejd José trabajwduxh, gucnäj Diosni. Badeed Dios yälñasinduxh lojni. Bejn Dios bichagljaz rei Faraón José. Badeed rei Faraón gujnci gubernadoor xten Egipto. Gunibeeza José guira'ti xhixten reiiga.

¹¹ Räjpreni Esteban:

—Che bidzujn dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn. Xhet guyu'di xhi niajw rextadgoldoonu. ¹² Che biejn diajg xtdadgoldoonu Jacoob yu' xhi gaureni neñ reguejdx xten Egipto, ro'c baxhalni rexi'nni, bica'reni xhi gaureni te huält. ¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José. ¹⁴ Dxejcti baxhal José diidx jiääd xtdani Jacoob, näjza guiraa resa'ni, cuääzreni Egipto. Najc rebejnnga si'cti gayonbitzbigaii bejn. ¹⁵ Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtzta rextadgoldoonu.

¹⁶ Dxejcti huinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

¹⁷ Räjpreni Esteban:

—Che bidzujngajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. ¹⁸ Dxejcti guyu' te xreii Egipto ni di

gan guiraa redzunsac nani bejn toxtadgoldoonu José. ¹⁹ Reiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee rei-iga basälreni guiraa rebáz niguii te di laareni, te guetreni. ²⁰ Neñ redxejga, gojl Moisés. Che gujc Moisés báz, te báz daani, saru rujn lojni, huinälajz Diosni. Guļaani choñ bäii rolizni. ²¹ Dxejc huisälrenini, te guzobj xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni. ²² Bisieed Moisés guiraa ni najn rebeñ Egipto. Gunisa'cni diidx, bensa'cni dzuun.

²³ Räj p Esteban:

—Che guyu'ni tiuu ijz, banaj lajzni resa'ni ni najc xpejñ Israel, huijni cadro rbäjzreni. ²⁴ Dxejc bahuiini casacsi te beñ Egipto te beñ sa'ni. Sas bagu'tni beñ Egipto. ²⁵ Bejn Moisés xhigab pet sacbee resa'ni cayacnäj Diosni te guslaani rexpejñi. Luxh di resa'ni niacbee si'c. ²⁶ Che bara yääl, bahuii Moisés cadiñäj sa'reni tiop xpeñ Israel. Räj p Moisés lojreni: “Colcuedxi, Dad. Lagajc sa'tu cadiñäjtu. ¿Xhicuent rdijltu?” si'c gunii Moisés, te na'cru tiñäj sa'reni. ²⁷ Dxejcti nani cayunniälajzga, balanaani Moisés, räjpni loj Moisés: “¿Chu baniidx yälribee lojlu te jiädnibeelu nuure?” ²⁸ ¿La rälajzlu ju'tlu narä si'c bagu'tlu beñ Egipto nani?” —räjpni—. ²⁹ Che biejn diajg Moisés rediidxga, baxuñni, huijni zijt. Huiläzsijcni guedx Madián. Ro'c bachñaani, guyu' tiop xingaanni.

³⁰ Räj pza Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl neñ te yaguejch. Neñ bajlga baluiloj angl xten Dios lo Moisés. ³¹ Bidxeloduxh Moisés che bahuiini si'c. Dxejcti gubigni te rälajzni nuhuisa'cni yajjga. Dxejc biejn diajgni gunii Dios, räjpni lo Moisés: ³² “Narä nacä Xtiós rextadgoldoolu, narä nacä Dios xten Abram, nájza xten Isaac nájza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajjga. ³³ Dxejcti räjp Dios lojni: “Gulää xcu-ra'chlu. Yuj cadro suga'lu najc dxan, sa'csi narä yu'ä ree. ³⁴ Abahuiä xho cagusacsí rebeñ Egipto rexpeñä. Abiejn diagä xho roonreni. Naj abiälä te guslää rexpeñä. Gudaa naj, suxhalälu chäälü Egipto.”

³⁵ Räj p Esteban:

—Dios badeed yälribee lo Moisés nani baze' rextadgoldoonu che räjpreni: “¿Chu baniidx yälribee lojlu te jiädnibeelu nuure?” Baxhal Dios Moisés te guinibeeni xpejñ Dios, gucnäjza Dios Moisés baslääni rexpejñni neñ nación Egipto si'c gunii angl xten Dios che baluilojni lo Moisés neñ yaguejchga. ³⁶ Gulää Moisés rebejnga. Ganiddoo bejn Moisés redzunro, yälrdxeloj neñ nación Egipto nájza ro' nisdoo ni laa nisdoo xniaa. Tiuu ijz cuansaj rextadgoldoonu neñ yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che räjpni loj rexpejñ Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸ Lagajc Moisés guyunäj rebejñ neñ yubidzro. Xangl Dios guninäj Moisés neñ dajn xten Sinaí. Dxejcti badeed Moisés

rediidx ni gunibee Dios lo rextadgoldoonu. Laareni basa'nreni diidxga loonu.

³⁹ Räj p Esteban:

—Niluxh di rextadgoldoonu nusoob rextidx Moisés. Di rälajzreni guinibee Moisésreni. Canaduxhla-jzreni nación Egipto. ⁴⁰ Che sää Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnureni. Chu gan con Moisésre ni baluii nezyuj che gulääni nuure guejdx reEgipto.” ⁴¹ Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. ⁴² Dxejcti gubicaj Dios loj rexpejñ Israel sa'csi bejnreni si'c. Basaan Dios gojñreni gubijdx, nájza bäii, nájza rebal xhaguibaa. Gujcn ni si'cni caj lo guijtzi ni bejn reniguii nani bacuaa rextidx Dios. Räj p Dios:

La'tu beñ Israel, cheni cuansajtu tiuu ijz nez lo reyubijdz,

¿La par narä bagu'ttu guidxaa, ä?

¿La loä baniidxtu xtiejnreni, ä?

⁴³ Xho gacni si'c, räjp Dios.

Cuansanjtu te yu' najcw guiid cadro chu te banäjb. Neñga guyu' banäjb ni laa Moloc, nani najtu najc xtioostu.

Gojñzatu balbäze' xten xtioostu ni laa Remfán.

Redios ni bencheetistu reni'c gojñtu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjpni lojreni:

—Neñ reyubijdz gojp rextadgoldoonu te yu' najcwni guiid. Gujcn xquidooreni. Ro'c guninäjreni Dios. Benchee rextadgoldoonu yu' najcw guiidga si'cni gunibee Dios che baluiini lo Moisés xhoni gacni. ⁴⁵ Che gujt Moisés, Josué gunibee lacuaa toMoisés, huinäni rextadgoldoonu nación Canaán. Batzujñreni yuro ni najcw guiid te näj ni'c huinäreni Canaán. Gulää Dios rebejñ ni guläjz neñ reguedx Canaán. Dxejcti bia'n rextadgoldoonu neñ reguejdxga. Bazuxhijbreni lo Dios neñ yuguiid ni najc xquidooreni che gojlli xtiemp reii David. ⁴⁶ Huinälajz Dios David. Räj p David lo Dios:

“Rläzä gunä te guidoo par guejblu, Dios xten nuure, rexpejñ Israel.” ⁴⁷ Dxejcti di Dios nusoob xtidx David.

Alga Salomón, xi'n David, ni'c benchee xquidoro Dios.

⁴⁸ Naj di Dios guiquiin te yu' nani runchee bejñ. Scree bacuaa te niguii nani gunii xtidx Dios. Räj p Dios:

⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

⁵⁰ ¿La et ñaädi benchee guiraa nani ruhuiitu?, räjp Dios.

⁵¹ Räj p Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuzä diajgtu. Di'tu chanälajz xtzuum Sprit Djan xten Dios, dizani cuääz neñ lastootu. Si'c bejñ re-

toxtadgoldootu, si'cza rujntu. ⁵² Basacsí rextad-goldootu guiralii reniguii nani gunii xtidx Dios. Nicla tejni direni niu. Bagu't rextadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätu-ni lo guxhtis te gunibeetu gujtni. ⁵³ La'tu biannäjtü lei nani gunii reangl xten Dios loj Moisés, luxh la'tu ditu nuquadiagj rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhrene, rauya' läijreni sa'csi rdxe'chrene lo Esteban. ⁵⁵ Rbäjz Sprit Dxaan xten Dios neñ lastoo Esteban, ni'cni bahuiztu'tzni xhaguibaa, ro'c bahuuini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjz Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhrene basäuzareni diajgreni. Dxejcti baxunreni bixa'treni yejc Esteban. ⁵⁸ Dxejc gudobyurenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejcti, guläyälreni xhajbreni; te niguii ni laa Saulo biannäj xhajbreni. ⁵⁹ La' ni cagucuaareni guij yejcti, gunii Esteban loj Jesucrist räjzni:

—Guejblu, Dad Jesucrist, cua' narä.

⁶⁰ Dxejcti białb Esteban, bazuxhibni, guredxa'ni räjzni:

—Dad Jesucrist, na'c gudzuublu dojlre yejc rebejnre, na'c gucuaijlureni.

Gulujxsi guniini si'c, gujtni.

Saulo basacsí rexpejn Jesucrist

8 Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhrene sa'csi riareni gujt Esteban. ³ Biäädza Saulo, guixe-guixee basacsini rebejn nani huililajz xtidx Dios. Biu'ni rolizjreni, gunaazni reniguii näjza regunaa te basäunireni neñ latzguuib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjzni:

—Jesús najc Crist nani cabäjztu jääd.

⁶ Ro'c bachagsa' rebejn bacuadijgreni rextidx Felipe, bahuizareni redzunro, remilagwr nani bejn Felipe.

⁷ Gaii bejn yu' bejdxab neñ lastooreni. Che gunibee Felipe guirii rebejdxab lastoo rebejnnga, guredxa' rebejdxabga, dxejcti biriireni neñ lastoo rebejnnga. Yu'za

xhidajl bejn nani digacdiru guiniib, yu'za reni rajc ni'reni, naareni. Con xcälrnibee Jesucrist basiajc Felipe guiraa rebejnnga. ⁸ Sa'csi gujc si'c, bibalazduxh guiraa rebejn neñ guejdxga.

⁹ Guyu' te niguii ni laa Simón neñ guejdxga. Bisieedni bejnxi xhidajl redzuun yälbidxaa, basqueeni rebejnnguejdxga. Bidxeloduxh rebejnnguejdx lojni. Räjzni lo rebejn rutru chu stee bejn ni najc maazru bejnro lojni. ¹⁰ Luxh guiraa rebejn, rebuuux, rebejnngool, rebejnrajp, rebejnproob bacuadijgreni xtidx bidxaaga, räjzreni: —Laani rajzni yälrnibee xten Dios.

¹¹ Xchero basqueeni rebejn, bidxelojreni rextzun-yälbidxaani. Guiraa rebejn huililajz xtiidxni. ¹² Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebejnnguejdxga huililajz rediidx nani gunii Felipe. Dxejcti birobnisrene, niguii näjza gunaa. ¹³ Nägajcza Simón huililajz rediidxga dxejc gurobnisrene. Dxejc guyunäj Simón Felipe. Che bahuu Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz rebejn Samaria xtidx Dios, baxhajreni Pedr näjza Juan ro'c. ¹⁵ Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxaan xtenni lojreni, ¹⁶ sa'csi gajd Sprit Dxaan xten Dios jädläjz neñ lastooreni. Che huililajzreni, gurobnisrene te gucbee rebejn chuni'c najc rexpejn Jesucrist. ¹⁷ Dxejc batzuub Pedr näjza Juan naareni yejc tejga renani ahuililajz xtidx Dios, dxejc badeed Dios Sprit Dxaan xtenni biädläjzni neñ lastooreni.

¹⁸ Che bahuu Simón biädläjz Sprit Dxaan xten Dios lastoo rebejn ni batzuub reapost naani yejcreni, rlajz Simón nudeedni meel loj reapost, ¹⁹ räjzni lojreni:

—Colguniidx yälrnibee loä te si'cza gudzubä naä yejc rebejn, te jiu' Sprit Dxaan xten Dios neñ lastooreni.

²⁰ Dxejcti räjz Pedr lojni:

—iSunitloj xmeellu con luj! Xho gunlu xhigab siilu Sprit Dxaan xten Dios nani rudedxlia' Dios. ²¹ Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu. ²² Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäjäl lajz Dios xtojllu ni bejnlu neñ lastoolu. ²³ Naj narä nanä ruguilazduxhlu, luxh runduxhlu xhigabguijdx.

²⁴ Dxejcti räjz Simón lo guiro'preni:

—Colnab loj Dios xcuentä te na'c sacä si'cni caniitu.

²⁵ Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj rebejn Samaria, gubisacreni Jerusalén.

Felipe näjza te dade' ni siääd nación Etiopía

²⁶ Dxejcti biääd te xangl Dios, räjzni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejz lo reyubijdz.

²⁷ Sä'ti Felipe. Che bidzujzni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa

xmeel reinaga. Biääd dade'ga guedx Jerusalén te saga-jñni Dios. ²⁸ Siädbisacni lajdxni. Sobga'ni neñ te gare't saruduxh, cayolñi xtidx Isaiás, nani bacuaa xtidx Dios agujc xchero. ²⁹ Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaiás. Dxejcti räjp Felipe lojni:

—¿La racbeelu ni caj lo guijtz nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijtz ni caj xtidx Dios rniü scree:

Di xiil cuedxa' che rinä bejñni cadro guetni;

dxitis raa xiil che ruhuajrenini.

Si'c te xiil najc niguii,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujñ yälguxhtisni xhet laliidi bejnreni.

Xhet si'cti nunyäj gunreni.

¿Xho guiniinu yu' xpejñni?

Ni abagu'trenini. Diruni guibajñ lo guedxliuj.

³⁴ Dxejcti gunabdiidx beñ Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

³⁵ Gusloj basule' Felipe rediidx nani abij dade'ga. Dxejcti basule'ni rediidx xcuent Jesucrist. ³⁶ Lañ ni sääreni lo nezyuj, bidzujreni te lajt cadro yu' nis. Dxejc räjp dade'ga lo Felipe:

—¿Bahuii, ree yu' nis! ¿Xhi rudxojñ tiobnisä?

³⁷ Dxejc räjp Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga. ³⁹ Che biriireni neñ nis, huinä Sprit Dxan xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. ⁴⁰ Dxejcti chela gucbee Felipe abidzujñni guedx Azoto. Baluizani xtidx Dios neñ guiraa reguejdx che bidzujñni guedx Cesarea.

Huililajz Saulo rextidx Jesucrist

(Hch. 22:6-16; 26:12-18)

9 Lañtis cagusacsí Saulo rexpejñ Jesucrist. Rlajzni ju'tni guiraareni, ni'c huijni lo bixhojz nani rnibee, ² gunabni gac te guijtz chanäni lo reguidoo neñ guedx Damasco te palga guidxälni reni najc xpejñ Jesucrist neñ reguidooga, niguii sigac gunaa, guliibnireni, jiadnänireni guedx Jerusalén te jiaüreni. ³ Lañ sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadro siädsaj Saulo. ⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpeña?

⁵ Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní yejc caru'ch.

⁶ Bidxebduxh Saulo, racsejsni räjpni:

—Dad, ¿xhini'c rlajzlu gunä?

Dxejc räjp Jesús lo Saulo:

—Huistie, biu' guedx Damasco. Ro'c suluü te niguii xhini'c gunlu.

⁷ Rebejñ ni siädnä Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni. ⁸ Che huistie Saulo lo yuj, baxhalni lojni, niluxh di lojni jien. Dxejc gunaazreni ñaani, sanäreni guedx Damasco. ⁹ Ro'c guyu'ni choñ dxej, natiä'p balojni, dini niä', dizani niaw.

¹⁰ Guedx Damasco rbäjz te xpejñ Jesucrist ni laa Ananías. Baluiloj Jesucrist loj Ananías lo te bacañ, räjp Jesucrist lojni:

—Ananías.

Dxejc räjp Ananías lojni:

—Anaree Dad.

¹¹ Räjp Jesucrist lojni:

—Huistie te chäálu lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, beñ Tarso. Cabejdx, canabni loä naj. ¹² Lo bacañ abahuiini siääd te niguii ni laa Ananías te gutzuubni ñaani yejcni te fiini stehuält.

¹³ Dxejcti räjp Ananías lojni:

—Dad, abiejñ diagä xho basacsí niguiiga rexpejñlu neñ guedx Jerusalén. ¹⁴ Luxh rebixhojz ni rnibee abadeed guijtz lojni te guiniaazni ree guiraa rebejñ nani rbedx-rniab lojlu, chanänireni jiaüreni.

¹⁵ Dxejcti räjp Jesucrist lojni:

—Huij, narä aguleäni te gunni xtzunä. Suluüni xtidxä loj rebenzajt nani digac xpeñ Israel, näjza loj reni rnibee renacion, näjza loj rexpejñ Israel. ¹⁶ Narä suluü lo Saulo trabajwduxh ni tedni te jiadnajñni narä.

¹⁷ Dxejcti säa Ananías, bidzujñni ro yu' cadro rbäzlaa Saulo. Batzuubni ñaani yejc Saulo. Dxejcti räjp Ananías lo Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siäädlu, lagajc laani baxhalñni narä te fiilu stehuält, te jiadlajzsa Sprit Dxan xten Dios neñ lastoolu.

¹⁸ Lagajc dxejc bitejb si'c xmelbäjñ yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹ Dxejc gudajwñi, guc nadaanni stehuält. Xchej gyunäj Saulo rexpejñ Jesucrist neñ guedx Damasco.

Gusloj basule' Saulo xtidx Dios neñ guedx Damasco

²⁰ Dxejcti gusloj basule' Saulo xtidx Dios neñ reguidoo xten rexpejñ Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist neñ latzguiib guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutz'u'tz Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxujñ Saulo guedx Damasco

²³ Che gudejd xhidajl dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujñ guejdxga te ju'treni. ²⁵ Dxejcti che gojl te yääl basäl rexpejn Jesucrist Saulo neñ te dximro, basiäjtreni dximjga nez ro' te padeer ni dejd gabi guejdxga. Basiäjtreni nez dejtz padeerga, te si'c baxujñ guedjdxga.

Bidzujñ Saulo guedx Jerusalén

²⁶ Che bidzujñ Saulo guedx Jerusalén, rlajzni nuchaagni loj reni rililajz xtidx Jesucrist, niluxh guiraaeni bidxejbreni sa'csi direni gan ahuililajzni xtidx Dios. ²⁷ Dxejcti huiinä Bernabéni lo reapost, bijni diidx xcuent Saulo. Räjñ Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutz'u'tz Saulo basule'ni xtidx Jesucrist guedx Damasco.

²⁸ Dxejcti bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutz'u'tz Saulo gusloj bijni xtidx Jesucrist lo rebejn. Dxejcti gudijnäj Saulo rexpejn Israel nani rnii didx griegw. Laareni rdexchduxhrene, rlajzreni nugu'treni Saulo sa'csi direni nichagljaz xtidx Jesucrist. ³⁰ Che gucbee rexpejn Jesucrist si'c, huiinäreni Saulo guedx Cesarea, ro'c gulääreni Saulo, baxhaljreni ni guedx Tarso.

³¹ Dxejcti guredxi lajz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxan xten Diosreni.

Biajñ Eneas

³² Che gusloj sahuu Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälni te niguii ni laa Eneas. Agujc xhujñ ijz naga' niguiiga cayacxhuuni. Abixu'ñ tiejxhni, digacdiru guiliini.

³⁴ Dxejcti räjñ Pedr lo Eneas:

—Eneas, cagusiajñ Jesucrist guejblu. Huistie, guläs xta'lu.

Lagajc dxejcti biajñni, huistietini.

³⁵ Guiraa rebejn ni rbäjz guedx Lida, näjza rebejn ni rbäjz guedx Sarón, bahuiireni abiajñ niguii ni cayacxhuu. Dxejcti xhidajlrureni neñ reguejdxga huililajz xtidx Dios.

Gubañsac Dorcas

³⁶ Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷ Gucxhuu gunaaga, dxejcti gujñni. Che gulujñ bahuajz rebejn togoolga, huitixhrene neñ te yu' ni najc jiaa yejñ sa'ni. ³⁸ Sa'csi gajxh guedx Jope tre' guedx Lida, luxh biejn diajñ rexpejn Jesucrist ro'c yu' Pedr, baxhaljreni tiop dade' saxii Pedr. Räjñ redade'ga loj Pedr:

—Bejn huen salu chonnu Jope nanajga.

³⁹ Dxejcti sanägajñ Pedr redade'ga. Che bidzujñreni, huiinäreni Pedr neñ yu' cadre naga' togunaaga. Ro'c cayonduxh guiraa regunabiud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajñni. ⁴⁰ Dxejcti gunibee Pedr birii guirareni neñ yu'. Dxejcti bazuxhijñni, guredx-gunabni loj Dios. Dxejcti gubiréni bahuiini loj togoolga, räjñni:

—Tabita, huistie.

Dxejcti baxhal gunaaga balojñ; che bahuiini loj Pedr, gurejñni. ⁴¹ Dxejcti gunaaz Pedr naani, basuliini, dxejcti gurejdx Pedr regunabiud näjza sgaii reni najc rexpejn Jesucrist. Baluiini gunaaga lojreni te bahuilojreni agubañsacni. ⁴² Gucbegajñ reben guedx Jope xhini'c gujñ, dxejcti xhidajl rebejnğa huililajz xtidx Jesucrist. ⁴³ Xchejza guyu' Pedr ro'c, guläjzni roliz dade' ni laa Simón, nani ruscoodz guijñ.

Pedr con Cornel

10 Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijñ, dini gac beñ Israel.

² Beñsacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojñ lo rebenproob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuiini loj xangl Dios, räjñni loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidxelojñi, räjñni lojñi:

—¿Xhini'c, Dad?

Dxejcti räjñ angl xten Dios lojñi:

—Che rniilu lo Dios, riejn diajñ Dios xtiidxlu, che rudeedlu meel lo rebenproob, ruhuii Dios ni rujñlu, ni'cni rnalajz Dios luj. ⁵ Naj baxhal tiop niguii chää guedx Jope te chaxiireni Simón Pedr. ⁶ Rbäjzni roliz te dade' ni laa Simón nani ruscoodz guijñ. Roliz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni näjza te xsoldaadni nani sanälajz Dios. ⁸ Dxejcti bij Cornel diidx lojreni xcuent ni gusajñni, dxejcti baxhaljñni redade'ga guedx Jope.

⁹ Che bara yääl, sääreni lo nezyuj. Asiäddzujñga-jxhrene guedx Jope, pet si'cti läidxejñi. Lagajc orga

huä'p Pedr yecyu' te guininäjni Guejb Dios. ¹⁰ Calanduxh Pedr, rlanjni gauni. Laļ ni cayujnreni xhi gauxhujni, gusloj canixcaļni. ¹¹ Bahuiini bixal xhaguibaa, bahuiizani biäjt te bariadro nani naliib guidap xi'ni. Siäđjiätchäiini gajxh nez loj Pedr. ¹² Neņ bariaadga yu' guiraa reman ni yu' lo guedxliuj nani rsianäj guidap ni'ni, nājza renani rxeeb si'c bäl, nājza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rni xleiilu najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶ Che gujc choņ huält gujc si'c, huä'psac bariaadga xhaguibaa. ¹⁷ Laļ ni cayujn Pedr xhigab xhichani'c säloj nani bahuiini, bidzujņ reniguii ni baxhaļ Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

¹⁸ Che bidzujņreni rolä'ga canabdiidxreni la ro'c rbäjz te dade' ni laa Simón Pedr. ¹⁹ Laļ ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choņ dade' caguiillu. ²⁰ Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaļäreni lojlu.

²¹ Dxejcti biäjt Pedr jiaaga, bidzujņni cadro suga' redade'ga, räjpni lojreni:

—Narä nacä ni caguiiltu. Xhi siäädту?

²² Räjp reniguiiga lo Pedr:

—Cornel, nani rnibee te gayuu soldaad, te beņsa'c, te bejn ni rajņ Dios, te bejn ni sanälajz rexpejņ Israel, laani baxhaļ nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejņga, biu'reni neņ yu'. Ro'c bia'nreni te guxhijņ. Che bara yääl, Pedr nājza sgaii beņ Jope ni najc xpejņ Jesucrist, sanä redade' ni baxhaļ Cornel.

²⁴ Che bara yääl, bidzujņreni guedx Cesarea. Abatojp Cornel resa'ni nājza reexamigwni rolijzni. Cabäjzreni guidzujņ Pedr. ²⁵ Che bidzujņ Pedr ro yu', huichagloj Cornelni, bazuxhijbni lo Pedr. ²⁶ Dxejc gunaaz Pedr ņaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni neņ yu'. Che biu'ni bahuii Pedr nadxagsa' rebejņ neņ yu'. ²⁸ Räjp Pedr lojreni:

—Anajntu xhi caj lo leii xten rexpejņ Israel: digacdi guchaag te xpejņ Israel loj beņzajt nani digac xpejņ Israel, digacdiza jiu'ni rolijzreni. Niluxh agunii Dios loä lo te bacaļ, te gacbeä digacdiru jiuä releiire. Abaluii Dios narä sajc guchagsa'ä chutis bejņ. ²⁹ Ni'cni, che gurejdxtu narä biälgacä. Naj rniabdixä, xhcicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachoņ gudxej, cabedx-canabä lo Dios rolizä chela baluiloj te niguii najcw te ladnol ni rdimbicha'. ³¹ Najni loä: "Cornel, che rbedx-rniablu lo Dios, riejn diajg Dios xtiidxlu, che rudeedlu meel lo re-

beņ proob, racbee Dios, di lajzni jiäl luj. ³² Ni'cni naj baxhaļ tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guijd. Roli-jzni sojb gajxh ro' nisdoo. Che guidzujņni, laani gusule'ni xtidx Dios lojtu." ³³ Dxejc baxhaļä chu biädxilu. Xquixtiostelu biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴ Dxejcti räjp Pedr lojreni:

—Naj gubeliä tebloj rinälajz Dios guiraa bejņ; re-beņzajt sigajc rexpejņ Israel. ³⁵ Niluxh rinälajz Dios chutis beņ guedxliuj nani ruzuxhijb lojni, nani rusoob rextidxni, nani laaca nabajņ. ³⁶ Badeed Dios xtiidxni loj rexpejņ Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. ³⁷ Che gulujx baluii Juan ni ru-tiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neņ reguedx Judea.

³⁸ Nancheetu xho badeed Dios yälrnibee loj Jesucrist, beņ Nazare't. Badeedza Dios Sprit Dxan xtenni te cuääzni neņ lastooni. Nancheetu xho bejnni redzunro, remilagwr, basiajcnii rebejņ nani caguteed beņdxab trabajwduxh. Redzunroga bejnni sa'csi bennäj Diosni dzuun. ³⁹ Bahuiloonu guiraa redzuun ni bejn Jesucrist neņ reguedx Israel nājza guedx Jerusalén. Bacuaa rexpejņ Israel Jesucrist lo cruzj, ro'c gujtni. ⁴⁰ Dxejcti che biojņ dxej, guläs Dios Jesucrist lo rebengut, gubansacni, badeed Dios yälrnibee lojni te gujc biädluiloj Jesucrist loonu. ⁴¹ Di Jesucrist nululoj loj chutis bejņ. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebengut. ⁴² Baxhaļni nuure chatie'chnu diidx loj guiraa rebejņ, chosule'pacnu Dios gule Jesucrist te gacni juejz xte rebeņbajņ nājza xte rebengut. ⁴³ Galooli bacuaa renani gunii xtidx Dios lo guijtz, räjpreni: "Guiraa rebejņ ni chalilajz xtidx Jesucrist sudzucaj Dios xtojłreni."

Biädłajz Sprit Dxan xten Dios neņ lastoo rebeņzajt

⁴⁴ Laļ ni canii Pedr rediidxga, biädłajz Sprit Dxan xten Dios neņ lastoo renani huililajz xtiidxni. ⁴⁵ Bidxeloj guiraa rexpejņ Israel nani huinä Pedr sa'csi biädłajz Sprit Dxan xten Dios neņ lastoo renani najc beņzajt.

⁴⁶ Gucbeereni biu' Sprit Dxan xten Dios lastoo rebeņzajt sa'csi bejn Sprit Dxan guniireni stee didxsaj nani gaj-dreni guisieed, calä'pzareni xpala'n Dios. ⁴⁷ Dxejcti räjp Pedr lo reexamigwni:

—Chu laa ni gudxojn yälrobnis lo rebejņre, ni sigajc biädłajz Sprit Dxan xten Dios neņ lastoonu, abiädłajzni neņ lastoo rebejņre.

⁴⁸ Dxejcti gunibee Pedr gurobnisreni te gacbee bejņ najcreni xpejņ Jesucrist. Dxejcti gunabreni loj Pedr jia'nni ro'c tiop-choņ dxej.

Basule' Pedr xho biädlajz Sprit Dxan xten Dios lastoo rebenzajt lo rexpejn Jesucrist neñ guedx Jerusalén

11 Reapost, näjza renani huililajz xtidx Jesucrist neñ reguedx Judea, biejn diajgrenti huililajz rebenzajt ni digac xpejn Israel xtidx Dios. ² Che bidzujñ Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilñajreni Pedr. ³ Räjpreni lo Pedr:

—¿Xhicuent biu'lu rolijz benzajt nani xhet yu'di bee si'c nuure? ¿Xhicuent gudaunäj'lureni, ä?

⁴ Dxejcti basule' Pedr diidx xho gujc huijni loj rebenzajt:

⁵ —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjijäjt te bariadro, naliib guidap xi'ni. Siädjijätchäini nez loä.

⁶ Che bahuisa'cä, neñga yu' guiralajz reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt. ⁷ Dxejcti biejn diagä naj Dios loä: “Pedr, huisu. Bagu't man gauu.” ⁸ Dxejcti räpä: “Digacdini Dad. Nicla tej gadna gauä te man nani rni leii xtenlu najc mandxuudx.”

⁹ Dxejc gunisac Dios loä: “Na'cru guiniilu nacdxuudx recos nani abasia Dios.” ¹⁰ Che gujc choñ huält gunii Dios si'c, huä'psac bariaadga xhaguibaa. ¹¹ Lagajc orga bidzujñ choñ dade' ro yu' cadro yu'ä. Guedx Cesarea biriireni, biädxiiireni narä. ¹² Dxejc gunii Sprit Dxan xten Dios loä: “Huinä reniguiire. Na'c gun tiop lajzlu.” Dxejcti huinääh xho'p beñ Jope, dade' nani rililajz xtidx Jesucrist. Che bidzujñ guedx Cesarea, biu'nu rolijz Cornel. ¹³ Basule' Cornel diidx loonu xho baluiloj te angl xten Dios lojni lagajc rolijz. Räjpre angl xten Dios lojni: “Baxhañ tiop dade' chää guedx Jope te chaxiireni Simón ni rniireni Pedr. ¹⁴ Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” ¹⁵ Che gusloj cagusule'ä xtidx Dios lojreni, biu' Sprit Dxan xten Dios neñ lastooreni si'c biu'ni lastoonu galooli. ¹⁶ Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhañ Sprit Dxan xten Dios te cuääzni neñ lastootu.”

¹⁷ Dxejc räjpza Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

¹⁸ Che biejn diajg reben Jerusalén rediidxga, biäuu ro'reni, dirureni nidilñaj Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechlaizreni te guibanñajreni Dios par tejpas.

Rexpejn Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni 're' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojts

rexpejn Israel. ²⁰ Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo benzajt nani rni didx griegw. Basule'reni lo rebenzajtga guiraa xcuent Jesucrist. ²¹ Gucnäñ Diosreni caniireni xtiidxni. Xhidajl rebejnnga huililajz xtidx Jesucrist, basoobreni xtiidxni.

²² Che biejn diajg rexpejn Jesucrist ni yu' guedx Jerusalén rililajzreni, baxhañreni Bernabé guedx Antioquía. ²³ Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnnga. Dxejcti balijdx Bernabéreni: gutijp laizreni gusoobreni xtiidxis Jesucrist. ²⁴ Beñsa'c najc Bernabé. Rililazduxhni xtidx Jesucrist. Racnäjduxh Sprit Dxan xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. Ro'c bidxalni Saulo, huinäniini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh beñ. Ganid beñguejdxga gulälaj “Cristianos” renani rililajz xtidx Jesucrist.

²⁷ Neñ redxejga birii gaii dade' nani rni xtidx Dios. Guedx Jerusalén biriireni, bidzujñreni guedx Antioquía.

²⁸ Huisulii te dade'ga ni laa Agabo. Gucnäñ Sprit Dxan xten Diosni te guniini siäd te gubijn guideb guedxliuj. Luxh gujc gubijnnga neñ reijz ni gunibee rei Claudio ni sajrcu. ²⁹ Dxejcti rexpejn Jesucrist ni rbäjz guedx Antioquía beñ xhigab cade tejreni gudeed meel chää lo rexpejn Jesucrist ni rbäjz neñ reguedx Judea. ³⁰ Batojpreni meel, baxhañreniini lo rebeñgool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

Gujt Jacobo, biäu Pedr neñ latzguiib

12 Neñ redxejga, trabajwduxh bateed rei Herodes gaii rexpejn Jesucrist. ² Gunibeeni gujt Jacobo betz Juan, biru' guejni. ³ Che bahuii Herodes bibalazduxh rexpejn Israel sa'csi bagu'tni Jacobo, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij. ⁴ Che gunaazreni Pedr, biäuni neñ latzguiib. Gunibee Herodes biäd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Beñ Herodes xhigab cuääni Pedr te guetni nez loj rexpejn Israel che ted lanij. ⁵ Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr neñ latzguiib

⁶ Bidzujñti dxe bispr dxej ni rlajz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p ñaa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajñni. Räjpreni lo Pedr:

—Basquejnga, huistie.

Dxejcti bixec recaden, bitejbreni ñaa Pedr. ⁸ Räjpre xan- gl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjp xangl Dios lo Pedr:

—Gojt xhablazlu, gudanajl narä —räjpn.

⁹ Biriitini latzguiib sanajlni angl xten Dios. Niluxh dini gun xhigab gulii pac nani bejn xangl Dios. Bejn ni xhigab pet canixca'lni. ¹⁰ Gudejdreni nez loj te soldaad, gudedgajczeni nezloj steeni, dxejc bidzujnreni ro' puertguiib xten latzguiib nani caj lo nezyuj ni rdej galäii guejdxga. Xtebca bixal puertroga, biriireni gusajreni tebezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejc si'cni gubajñ Pedr, bejn ni xhigab:

—Naj sii nanä baxhal Dios te xanglni bas'laa narä ladznäa Herodes te digacdi gun rexpejn Israel nani rla-jzreni gunnäjreni narä.

¹² Che gucbee Pedr xhi gusajcni, huijni roliz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr.

¹³ Cagusejz Pedr rolä', dxejc gubig te dxa'p ni laa Rode, bacuadiajgn ro lä'. ¹⁴ Che biembee Rode xse' Pedr, sa'csi bibalazduxhni, bialajzni nuxhalni ro lä'. Alga bax-uñni busacni neñ yu', räjpni lojreni:

—Pedr suga' ro lä'.

¹⁵ Dxejcti räjpreni lo Rode:

—Yeyclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti lajtis cagusejz Pedr ro lä'. Che baxhalreni ro lä' bidxeloduxhni bahuiireni lo Pedr. ¹⁷ Dxejcti bazäab Pedr naani te na'cru jieyreni. Dxejc bij Pedr didix xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. ¹⁹ Gunibee Herodes huitiireni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh rebeñ Tiro näjza rebeñ Sidón Herodes, ni'cni diruni gusaan guto' rebeñ nez cadro rnibeeni xhi gau rebeñ Tiro näjza rebeñ Sidón. Ni'c biääd xhidajlreni te guiniabreni jäjl lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajru lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebeñga.

²¹ Basoobtini te dxej te guininäjniren. Dxejga gojt Herodes xhajb reii, gurejni lo xyacxhi' reii. Dxejcti gusloj caniini didxsa'c loj rebeñga. ²² Guredxa' rebeñ räjpreni lojni:

—Huenduxh najc diidxre. Guejblu najc te dios, xhet xtiidxi niguii najc diidxre.

²³ Lagajc dxejc biääd te angl xten Dios, bejn ni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebeñ najcni te dios, sa'csi dini niliä'p xpala'n Dios.

²⁴ Xhidajl beñ biejn diajgni xtidx Dios, huililajzreni xtidx Dios.

²⁵ Che gulujx badeed Bernabé näjza Saulo meel ni batojp rebeñ Antioquia lo rebengool, biriireni guedx Jerusalén. Sanäreni Juan ni rniireni Marcw lo guedx Antioquia.

Gule Sprit Dxan xten Dios Bernabé näjza Saulo

13 Lo rexpejn Jesucrist ni rdxaa sa' guedx Antioquia guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujtni si'c bejzn; näjza Saulo. ² Bidzujñ te dxej cagucua'nreni la' ni cabedx-canabreni lo Dios, dxejc räjp Sprit Dxan xten Dios lojreni:

—Colcuc Bernabé näjza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzuubreni naareni yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

Guir'o'preni baluii xtidx Dios lo rebeñ Chipre

⁴ Baxhal Sprit Dxan xten Dios Saulo näjza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre. ⁵ Che bidzujnreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejn Israel. Näj Marcw gucnäjreni. ⁶ Che cuansajreni guideb yuj Chipre, bidzujnreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagugueeni rebeñ guejdxga, räjpni xtidx Dios caniini, niluxh dini gac xtidx Dios. ⁷ Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlanjni jiejn diajgni xtidx Dios. ⁸ Dxejcti Barjesús, ni laaza Elimas, bidxagdijlni guiro'preni sa'csi di rlanjni chalilajz Sergio Paulo xtidx Dios. ⁹ Saulo, nani laaza Pabl, bahuiz'u'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

¹⁰ —Rusgueduxhlu rebeñ, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxehnäjzalu guiraa recossa'c xten Dios. ¿Guc cuäaz guxhiidlu xtidxlii Jesucrist te di chalilajz beñ xtidx Jesucrist? ¹¹ Naj siääd xcastiigw Dios yeyclu. Xhidajl dxej sicäy lojlu, xhetliidi fiilu —räjp Pabl.

Gujcsi räjpni si'c, bicäigajc lojni. Dxejctiru cuansajni caguilni chu guiniaaz naani guluiini canejz chääni.

¹² Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl'ruluii Dios.

Bidzujñ Pabl nájza Bernabé guedx Antioquía xten distrit Pisidia

¹³ Che baluux Pabl nájza resa'ni xtzuunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni rniireni Marcw, Jerusalén. ¹⁴ Dxejcti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejñ Israel, biu'reni neñ xquidoo rexpejñ Israel, ro'c gurejreni. ¹⁵ Che gulujx bil te dade' reguijtz xten Dios ni laa leii nájza reprof'e't, baxhał reguxhtis xten guidoo chu huigajñreni, räjpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejñre, colguiniini.

¹⁶ Dxejc huisulii Pabl, guläsni ñaani bejnii seen lo rebejñ te cuadiajgreni xtiidxni. Räjpp Pabl lojreni:

—Colcuadiajg, la'tu rexpejñ Israel, guiraatu ni rajñ Dios. ¹⁷ Galooli gule Xtios rexpejñ Israel retoxtadgoldoonu. Luxh che guläjzreni naciön Egipto, bidalduxh retoxtadgoldoonu. Gucnäjdexh Diosreni bejnii remilagwr, te guläänireni guedx Egipto. ¹⁸ Tiuu ijz guläjzreni lo reyubijdz. Xhidajł huält direni nusoob xtidx Dios, niluxh empac gucnájza Diosreni. ¹⁹ Guyu' gajtz naciön guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejñ. Tajp gayugarol ijz gunibeereni rexpejñ Israel. Samuel nani gunii xtidx Dios gujc lult juejz. ²¹ Dxejcti gunab rexpejñ Israel te reii lo Dios te guinibee reii lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee to'reii David. Räjpp Dios: “Agucbeä David xi'n Isai rujn tejsi xhigab con narä. Su-soobni xtidxä sujnni guiralii ni rlazä gac.”

²³ Räjppza Pabl:

—Galooli bia'n diidx lo rexagdo David guxhał Dios te bejñ ni gudzucaj xtojłnu, ni gusłaa nuure lo dojl. Naj aguzojb diidxga. Jesucrist najc bejñga, rudzucajni xtojłnu, rusłaaani nuure lo dojl. ²⁴ Che gusloj cagulijdx Juan rebejñ, baluiini nanabpac gusiechłajz rexpejñ Israel, tiobnisreni te jia xtojłreni. ²⁵ Niluxh guxii riäädx guluux Juan dzuun ni badeed Dios gunni che räjppi lo rebejñ: “¿Chu rujntu xhigab nacä narä? Dina gacä Crist nani bia'n diidx guxhał Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

²⁶ Räjppza Pabl:

—Rniä lojtu sa'ä, rexagdo toAbram, nájza lo chutis ni rajñ Dios, loonu baxhał Dios xtiidxni ni rusule' xho rudzucaj Jesucrist xtojłnu, xho rusłaaani nuunu lo dojl. ²⁷ Rebejñ Jerusalén, nájza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rołreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. ²⁸ Balijdxreni Pila't ju'tni Jesucrist, luxh xhet bejndini te guetni. ²⁹ Che bagujc guiraa ni caj lo guijtz

xcuent Jesucrist, gulätreni Jesucrist lo cruzj, bacua'tzrenini neñ baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huält baluiloj Jesucrist lo reexamigwni nani biädnałni nez rexyuj Galilee, renani biädnałzani nez guedx Jerusalén. Bahuilojreni gubañsac Jesucrist lo rebengut, te ñaj rusule'reni diidx xcuent Jesucrist.

³² 'Naj siopnānu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu.

³³ Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjpp Dios: “Luj najclu xi'nä. Nadxej guleälu te guinibeelu.”

³⁴ Räjppza Pabl:

—Dxejrcu stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjpp Dios: “Sunidxä recossa'c lojlu si'c ni bia'nä diidx con toDavid.” ³⁵ Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” ³⁶ Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid. ³⁷ Niluxh guläs Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ä, Jesucristre, bejñ ni cania xcuentni, laani rudzucajni rextojłnu. ³⁹ Chutis ni rililajz xtidx Jesucrist rusłaa Jesucristni loj guiraa rextojłni nani digacdi guibicaj mascä rusoobni guiralii ni caj lo leii xten toMoisés. ⁴⁰ Colsusijñ te na'c sajctu recos ni caj lo guijtz ni bacuaa te niguii nani bacuaa xtidx Dios:

⁴¹ Colhuilaa, la'tu ni ruxhiznäj xtidxä colguidxeloj, colnitloj, sa'csi ñaj ni nabajñtu sunä te dzunro, te milagwr nez lojtu, niluxh dipac lajztu chalii, mascä jiaäd chu gusule'pacni lojtu.

⁴² Gulujxti xtidx Pabl, biunejz rebejñ. Che birinäj Pabl Bernabé biädni rebejñre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejñga, xhidajł rexpejñ Israel, nájza xhidajł rebenzajt nani rusoob xtidx Dios si'c rujn rexpejñ Israel, birinajłreni Pabl nájza Bernabé. Dxejc balijdxreni rebejñ ni siädnałreni, räjpreni lojreni chanutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejñ Israel, xhidalduxh rebenguejdx bire' te gucuadiajgreni guinii Pabl xtidx Dios. ⁴⁵ Che bahuii rexpejñ Israel guiraa rebejñ ni bire', bidxechlajzreni, gucnadareni. Dxejc gusloj cadxagdijł rexpejñ Israel Pabl. Che rniini te diidx, laareni rniireni “didxxhiini”. Caniyajzareni Pabl nájza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejñ:

—Nungäjł ganid lojtu guiniinu xtidx Dios, sa'csi la'tu najctu rexpejñ Israel. Niluxh ditu chalilajz xtidx Dios, lagajc la'tu caniiu digacdi guibañnäjtu Dios par tejpas. Ni'c sibiré loonu, te guiniinu xtidx Dios lo rebenzajt ni digac xpejñ Israel. ⁴⁷ Sa'csi si'c agunibee Xtiosnu. Scree caj xtidx Dios lo guijtz:

Suxhałātu te guluiilu rextidxä lo rebenzajt ni digac xpejñ Israel,

te chalilajz rebejnğa xtidxä, te laareni lo xtojlrëni, cadrotis yu'reni lo guedxliuj, räjp Dios.

⁴⁸ Che biejn diajg rebenzijt rediidxre, bibalaz-duxhreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najczeni.

⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regunaa ni sajcrü, näjza reniguii ni sajcrü neñ guedx Antioquía, te bidxechnäjnreni Pabl näjza Bernabé, barilaagwreni Pabl näjza Bernabé te bi-unejzreni guedx Antioquía. ⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio. ⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

Guyu' Pabl näj Bernabé guedx Iconio

14 Che bidzujñ Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzijt. Xhidajl rebejnğa huililajz xtidx Dios. ² Niluxh sgaii rexpejn Israel nani di chalilajz xtidx Jesucrist balijdx rebenzijt te bidxechnäjnreni rebejn nani huililajz xtidx Jesucrist. ³ Ni'cni bia'n Pabl näjza Bernabé lo guejdxga balti dxej. Gusutzut'z guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäj Diosreni. ⁴ Guyu' tiop cuaa bejn neñ guejdxga. Gala' guejdxga huililajz xtidx Dios nani gunii Pabl näjza Bernabé, ⁵ dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, näjza benzijt, näjza reguxhtis, rlanjreni nidxagdijlrëni reapost, rlanjzarenü nucuaareni guij yejc Pabl näjza Bernabé. ⁶ Dxejc gucbeerëni xhi rlanjreni gunreni, ni'c baxunreni ro'c huijnreni nez reguedx Licao-nia, ro'c bidzujñreni guedx Listra, guedx Derbe, näjza reguejdx ni re' nejzga. ⁷ Che bidzujñreni ro'c, cadrotis huijnreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni. ⁹ Cagucuardiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzani sajz gusiajz Diosni. ¹⁰ Dxejcti dip gunii Pabl lojni, räjpni:

—;Huisulii!

Dxejcti huisuyälñi, gusajni. ¹¹ Che bahuii rexpejn Licao-nia xhi bejn Pabl, lagajc xtiidxreni guniireni, räjpreni lo sa'reni:

—;Redios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoo Júpiter cua' tiop gon najl guii guejnreni. Biädñäni regonga ro' xquidoo Júpiter ni suga' ro' guejdxga. Rebejn näjza bixhojz rlanjreni nugu'treni regon te ganreni Bernabé näjza Pabl si'c rajñreni rextiosreni. ¹⁴ Che biejn diajg reapost xhi cayajc, batiäjsreni tla' xhajbreni si'c te seen direni guichaglaiz xhi cayujñ rebejnğa. Ruxunreni bidzujñreni lo rebejn, räjpreni lo rebejn:

¹⁵ —Colcuadiajg xtiidxnu. ¿Xhicuent cayujñ guejbtu recosre? Ni lagajc sabejñtu najcnu, lagajc beñ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajñ par tejpas, ni benchee xhaguibaa näjza guedxliuj, näjza nisdoo, näjza guirali ni yu' lojnreni, nenreni, ¹⁶ Galoo basaan Diosga gun rebeñ guedxliuj si'ctis ni rlanjreni. ¹⁷ Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te chäii bejnreni gaan guredxi rebejn, sa'csi rlanjzpac rebejn nugu'treni regon.

¹⁹ Dxejcti bidzujñ gaii xpejn Israel siädreni guedx Antioquía näjza guedx Iconio. Baquiilreni rebeñ Listra te gucuaareni guij yejc Pabl. Bacuaareni guij yejc Pabl, gudobxhajxhreni gulääreni ro' guejdxga, sa'csi naareni agujtni. ²⁰ Dxejc lañ ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujñreni guejdxga, basule'reni rextidx Dios lo rebejnğa. Xhidajlreni huililajz xtidx Dios. Dxejc gubi'reni, biu'reni guedx Listra, näjza guedx Iconio, näjza guedx Antioquía. ²² Balijdxreni rebejn nani huililajz xtidx Dios, gucnäjreni rebejnğa te batiplajz rebejnğa, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc beñgool te fireni rexquidoo xpejn Jesucrist. Che guluix bacua'reni, lañ ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl näjza Bernabé distrit Pisidia, bidzujñreni estad Panfilia. ²⁵ Basule'reni xtidx Dios lo rebeñ Perge, dxejcti biriireni ro'c sääreni guedx Atalia. ²⁶ Che bidzujñreni guejdxga, biu'reni neñ barcw, gudejdreni lo nisdoo te bidzujñreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhajreni Pabl näjza Bernabé chasule'reni xtidx Dios neñ guiraa reguejdx. Naj abalux Pabl näjza Bernabé dzuunga. ²⁷ Che bidzujñreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, näjza xho badeed Dios huililajz rebenzijt nani digac rexpejn Israel. ²⁸ Xchej biannäjreni rexpejn Jesucrist ro'c.

Bidxagsa'zarenü neñ guedx Jerusalén

15 Neñ redxejga bidzujñ gaii dade' ni siäd nez Judea, caguluiireni rexpejn Jesucrist, räjpreni lojnreni:

—Palga ditu gusäl bee si'c gunibee toMoisés, di Dios guslaatu lo xtojltu.

² Che biejn diajg Pabl näjza Bernabé rediidxga, bidxagdijlrëni redade'ga. Dxejc gule rexpejn Jesucrist Pabl

näja Bernabé näja sgaii rexpejn Jesucrist chääreni guedx Jerusalén te guininäjreni reapost näja reben-gool te guidon xho gac xcuent beega.

³ Huisunejz rexpejn Jesucrist ni najc bejn Antioquía Pabl näja rebejn ni sanäjreni, sääreni guedx Jerusalén. Gudejdreni reguedx Fenicia, näja reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijt xtidx Dios. Bibalazduxh rexpejn Jesucrist che biejn diajgteni rediidxga.

⁴ Che bidzujnreni guedx Jerusalén, huichagloj rexpejn Jesucristreni. Dxejcti bij Pabl näja Bernabé diidx lo reapost, lo reben-gool nani rnibee rexpejn Jesucrist, näja lo rexpejn Jesucrist, guiraa redzunro nani cayun-näj Diosreni. ⁵ Dxejz huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijt xtidx Dios, nanab chureni bee, nanabza gusoobreni leii xten toMoisés.

⁶ Dxejcti bachagsa' reapost näja reben-gool nani rnibee rexpejn Jesucrist, te don xho gunreni. ⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzijt, te chalilajzreni xtidx Dios. ⁸ Luxh Dios, nani numbechee lastoo guiralii bejn, badeed seen huililajz-pac rebenzijt xtiidxni. Badeed Dios Sprit Dxan xtenni lojreni si'c te seen te gacbee bejn najczeni xpejn. Sigac baniidxni Sprit Dxan xtenni loonu galoo, si'cza badeednini lo rebenzijt. ⁹ Sigajc rinälajz Dios nuunu, sigajcza rinälajzni rebenzijt. Che huililajz rebenzijt xtiidxni, basia Dios lastooreni. ¹⁰ Naj xhicient rusieedu Dios, ä? Di niajcdi nisanäj rextadnu releiiga, digacdziza chosanäjnu releiiga naj. Xhicient rlanjtu chasanäj rebenzijt releiiga? ¹¹ Xhet si'cti gacni sa'csi Dios ruslaa nuure lo xtojnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadi-ajgteni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzijt.

¹³ Che gulujx gunii guiro'preni, xhet guniidi rebejn. Jacoobtis räjp lojreni:

—Sa'ä, colcuadijg xtidxä. ¹⁴ Agunii Simón ni rniireni Pedr lojtu xho ganiddoo baxhaj Dios laani lo rebenzijt te gurejdx Dios rexpejn ni nadxaag lo rebenzijt.

¹⁵ Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid.

Si'c gunä,

¹⁷ te jädgajn rebejn narä te gacä Xtiosreni, näja guiraa rebenzijt nani najc rexpenä jädgajn narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacoob lojreni:

—Dee najc xhigab ni runä. Na'cru gusieednu rebenzijt ni cagusiechljazreni, renani salilajz xtidx Dios. ²⁰ Gu-

cuaanu te guijtz, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bäälni nani gurerejn, na'cza gaureni rejn. ²¹ Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani roj leii xten toMoisés gasob sabd —räjp Jacoob.

²² Che biejn diajg reapost näja reben-gool nani rnibee, näja guiraa rexpejn Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl näja Bernabé guedx Antioquía. Gulereni Judas ni rniireni Barsabás näja Silas. Guiro'preni najc bejn ni sajcru loj rexpejn Jesucrist. ²³ Dxejcti bejnreni guijtz huinäreni. Bacuaareni rediidxre:

“Nuure reapost, näja reben-gool ni rnibee, näja rexpejn xquidoo Jesucrist ruxhajnu xtixtios lojtu, resa'nu nani näjz guedx Antioquía estad Siria näja estad Cilicia. ²⁴ Rucuaanu guijtzre sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rni leii xten toMoisés. Xhet nuudinu gunibeenu jädniireni si'c.

²⁵ Ni'cni biennu xhigab guxhajnu lojtu tiop dade' ni gulenu loj resa'nu te chanäreni Bernabé näja Pabl, nani sanälaznu. ²⁶ Agajc balti huält rlanjzreni nugu'treni Bernabé näja Pabl, luxh direni guidxpejn gusule'reni xtidx Jesucrist. ²⁷ Naj ruxhajnu Judas näja Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releiitis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bäälni nani gurerejn, na'cza guesnäjt nani digac chäältu. Palga gusoobtu recosre, laaca cayujntu. Sacru guibajntu. Sujiannäjtu Dios.”

³⁰ Dxejcti basadiidx rexpejn Jesucrist Judas näja Silas huinäreni Pabl näja Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtzga lojreni. ³¹ Che biejn diajg rexpenziti Jesucrist diidx ni caj lo guijtzga, bibalazduxhreni sa'csi gulecdxi diidxga lastooreni. ³² Dxejcti basule' Judas näja Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcru cuäjb rexpejn Jesucrist gubi'reni te gudeedreni xtixtios loj reni baxhajreni.

³⁴ Dxejz Silas bejn xhigab jia'nni ro'c. ³⁵ Luxh Pabl näja Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist nen guiraa reguejdx

³⁶ Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlanj chanäreni Juan ni laa Marcw. ³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisanäj Pabl nájza Bernabé. ³⁹ Dxejc gudilidiidxreni. Gubicajtireni lo sa'reni. Ni'c sanä Bernabé Marcw, biu'reni neñ barcw, sääreni Chipre ni re' galäii nisdoo. ⁴⁰ Dxejcti Pabl gule Silas te sanänini. Badeed rexpejn Jesucrist xtixios lojreni, räjpreni gacnäj Diosreni. ⁴¹ Laḷ ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'rureni xtidx Jesucrist lojreni.

Huinä Timoteu Pabl náj Silas

16 Bidzunsac Pabl nájza Silas reguedx Derbe nájza Litra. Ro'c bidxaagreni te xpeñ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw. ² Didxsa'ctis rni rexpen Jesucrist ni yu' Litra nájza Iconio xcuent Timoteu. ³ Rlanj Pabl chanäni Timoteu. Dxejcti basäl Pabl bee Timoteu te gujcn si'c xpeñ Israel, te xhet naadi rexpejn Israel, sa'csi guiraareni nanchee xtad Timoteu najc beñ griegw. ⁴ Che bidzujñreni cade tej reguejdx, basule'reni xtidx reapost nájza rebeñgool nani rnibee xpeñ Jesucrist guedx Jeurusalén, te gusoob rexpejn Jesucrist diidx ni bacuaareni lo guijt. ⁵ Bazutijp xtidx Dios lastoo renani huililajz xtidx Jesucrist. Guixe-guixee xhidajlru beñ huililajz xtidx Dios xcuent Jesucrist.

Lo te bacal gunii te niguii lo Pabl

⁶ Che gudejdreni distrit Frigia, nájza estad Galacia, di Sprit Dxan xten Dios nusaan nusule'reni xtidx Jesucrist neñ reguedx Asia. ⁷ Bidzujñtiren gajxh estad Misia. Dxejc rlanjreni nijreni estad Bitinia, niluxh di Sprit Dxan xten Dios nusaan nijreni ro'c. ⁸ Ni'c gudejdtireni stelaad estad Misia, bidzujñreni guedx Troas. ⁹ Te yääl si'c lo te bacal bahuii Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlru nuunu.

¹⁰ Che bara yääl ni gunixcaḷ Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhaḷ nuure te guluiini xtiidxni lo rebeñ Macedonia. Narä, Lucas, ni cagucuaä rediidxre, gusanää Pabl nájza Silas.

Che guyu' Pabl con Silas guedx Filipos

¹¹ Biu'tinu neñ barcw ro' guedx Troas. Bidzujñnu Samotracia, te yuj ni re' neñ nisdoo. Che bara yääl bidzujñnu guedx Neápolis. Ro'c biriinu neñ barcw, ¹² bionnu guedx Filipos, guejdx nani sajcro lo estad Macedonia. Guedx romanni. Ro'c bia'nnu tiop choñ dxej. ¹³ Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiaäd rexpejn Israel te guininäjreni Dios. Ro'c gurejnu, guniinu lo renane' nani bire' ro'c. ¹⁴ Lojreni nadxaag te nane' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmuraad ni saduxh. Rajñ gunaaga Dios si'c rajñ rexpejn Israelni.

Bacuadiajgn xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵ Birobnisni, nájza guiraa reni rbäjz rolizni. Dxejc guniini loonu:

—Palga ruhuiitu guliä rililazä xtidx Dios, colṭaa rolizä te ro'c cuääztu.

Lacti gunab nane'ga nuunu, ni'c huijia'nnu rolizni.

¹⁶ Te dxej cheni sionnu cadro rniñäj beñ Dios, bidxaagnu te dxa'p nani yu' te beñdxab neñ lastooni. Rajp rexpaxhuaanni melduxh sa'csi rusule' dxa'pga recos ni gajd gac. ¹⁷ Birinajl dxa'pga Pabl nájza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸ Balti dxej birinajl dxape'ga nuure, entis caniini rediidxga lo rebeñ. Lacti basieed dxape'ga Pabl, ni'c gubiréni, räjpni lo beñdxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxej birii beñdxab neñ lastoo dxape'ga.

¹⁹ Che bahuii rexpaxhuaan dxape'ga diru dxape'ga gun gaan melro, gunaazreni Pabl nájza Silas. Dxejcti gudobxhaxhreni guiro'preni nez roguii cadro suga' reguxhtis. ²⁰ Che bidzujñreni Pabl nájza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujñreni bieju lo guejdxre. ²¹ Caguluiireni garenca leii nani digacdi gusoobnu sa'csi najcnu beñ roman.

²² Dxejcti bidxehnäj rebeñ Pabl nájza Silas. Gunibee rejuejz gulääreni xhajn Pabl, nájza xhajn Silas, te batiäjñreni baar guideb tiejxh guiro'preni. ²³ Che gulujx gudinduxhreni Pabl nájza Silas, biäuren neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴ Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxujñreni.

²⁵ Garolyääl guninäj Pabl nájza Silas Dios, gusloj cayolreni dij ni rliä'p xpala'n Dios. Biejn diajg guiraa rebeñ ni yu' neñ latzguiib cayolreni. ²⁶ Chela guj te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷ Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rlanjzni nugu'tni lagajc laani, sa'csi naani abadxujñreni niäu neñ latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biääd te bajl te biu'ni neñ latzguiib. Racsejsni biäädni bazuxhijbni nez loj Pabl nájza nez loj Silas. ³⁰ Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade! ¿Xhini'c nanab gunä te guslaa Dios narä lo dojl?

³¹ Räjp Pabl nájza Silas lo guixhajg:

—Huililajztis xtidx Dios xcuent Jesucrist, luj nájza guiraa reni yu' rolizlu, te guslaa Diostu lo dojl.

³² Basule' Pabl nájza Silas rextidx Dios lojni nájza loj guiraa rebeñ ni yu' rolizni. ³³ Lagajc dxej, garol yääl,

huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajg näjza guiraa reni yu' rolizjni. ³⁴ Dxejc huinä guixhajgreni rolizjni, ro'c badeedni xhi gudajwreni. Laani näjza guiraa reni yu' rolizjni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stioip guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaātu. Naj colchäj, gacnäy Dios la'tu, saru chäätu.

³⁷ Niluxh räjp Pabl loj reguixhajg:

—Nuure najczanu beñ roman. Batiäjreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäurenü nuure neñ latzguiib. Leii xten roman di gusaan gac rebeñ roman si'c. Luxh naj rlajzreni guslaarenü nuure xhiga'tz. ¡Dinu guirii si'c! Lagajc laarenü sujiädsläärenü nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas. ³⁹ Dxejcti biääd reguxhtis, gulääreni Pabl näjza Silas, gunabreni jiäjllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neñ latzguiib, huijreni roliz Lidia. Balidjdxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

Cadxechduxh guiraa rebeñ Tesalónica

17 Che gudejdreni reguedx Anfípolis, näjza guedx Apolonia, bidzujñreni guedx Tesalónica cadro yu' te xquidoo rexpejn Israel. ² Ro'c basule' Pabl xtidx Dios si'c ni rujnpacni. Choñ sabd, dxej ni rusilajz rexpejn Israel, basule'ni xtidx Dios lojreni. ³ Basule' Pabl xtidx Dios ni caj lo guijtz ni bacuaa reniguii ni gunii xtidx Dios galooli. Caj lo guijtzga: "Nanab ted Crist trabajwduxh, guetni, niluxh sibañsacni lo rebeñgut."

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani rajñ Dios näjza xhidajl reguna griegw ni sajcro huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii beñploj, beñlatsiaj, bejnreni bieje nez galäii. Biu'reni roliz Jasón caguillreni Pabl näjza Silas te cuääreni guiro'preni nez lo rebejn.

⁶ Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujñreni laadxnu, ⁷ luxh badeed Jasón rolizjni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'. ⁹ Cua' reguxhtis meel lo Jasón näjza lo reexamigwni. Räjp reguxhtis sudedsacreni meelga

che jii Pabl näjza Silas, jiunejzreni lo guejdxga. Dxejcti baslaarenü Jasón näjza reexamigwni.

Che guyu' Pabl con Silas guedx Berea

¹⁰ Che biu' guxhijñ, baxhalgajc rexpejn Jesucrist Pabl näjza Silas ste guejdx ni laa Berea. Che bidzujñreni guejdxga, biugajczeni xquidoo rexpejn Israel.

¹¹ Hueenru najc rebeñ Berea loj rebeñ Tesalónica, sa'csi rbaali lajzreni bacuadijgreni xtidx Pabl ni gunii-xcuent Jesucrist. Guixe-guixee bilreni guijtz cadro caj xtidx Dios te gucbeereni la gullii rextidx Pabl. ¹² Xhidajl rexpejn Israel näjza xhidajl beñ griegw ni sajcro, guna sigajc niguii, huililajz xtidx Dios. ¹³ Che gucbee rexpejn Israel ni rbäjz guedx Tesalónica caguluui Pabl xtidx Dios guedx Berea, biäädreni guedx Berea. Che bidzujñreni lo guejdxga bejnreni bieje ro'c. ¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. ¹⁵ Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jiädgajczeni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Lañ ni guläjz Pabl guedx Atenas, guyuduxhni yärsia' sa'csi bahuiini rajñ guiraa rebejn rebanäjb nani runchee lagajc bejn. ¹⁷ Ni'c neñ xquidooreni gudildiidx Pabl rexpejn Israel näjza rebeñzijt ni rajñ Dios si'c rajñ rexpejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biääd gaii bejn lojni. Yu' reni rolduxh guijtz ni bacuaa epicúreos, yu'za renani rolduxh guijtz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zarenü räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl "Jesús" näjza "Resurreccion", ni säloj yälgubañsac lo rebeñgut.

¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, ²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹ Rebeñ Atenas näjza rebeñzijt ni yu' ro'c ruteedreni redxej miiireni didxcoob lo sa'reni, o rucuadijgreni didxcoob. Ni'cpac rchagljazreni.

²² Galäii Areópago huisulii Pabl, räjpni lojreni:

—Colcuadijg guejbtu, beñ Atenas. Abahuiä xho rañduxhtu xhidajl banäjb. ²³ Che siädsä lo guejdxre, bahuiä lo rexpanäjbtu. Bahuiäza loj te piään cadro caj rediidxre: "Dios ni dinu jiembee." Narä rañä Diosga. Rumbeä Diosga nani rajñtu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi nrubeeni xhaguibaa näjza guedxliuj. Di Diosre cuäaz lo piään niclaza neñ reguidoo ni runchee

bejn. ²⁵ Diza Diosre guiquiin chu gacnäjni sa'csi lagajc Diosre rudeed yäl'nabajn, yäl'nadaan, näjza guiralii nani rquiin reben guedxliuj.

²⁶ Räj pabl:

—Guiralii reben guedxliuj najc rexagdo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga.

²⁷ Benchee Dios guiraa reben guedxliuj te quiilreni Dios te chalilajzreni xtiidxni. Luxh suga' Dios gajxh cadetejnu, ²⁸ sa'csi Dios rujn nabajnnu lo guedxliuj, runiidxni rsiaanu lo guedxliuj, runiidxani rdajlru xcäl'nabañnu lo guedxliuj. Laaca bacuaa rexpennajntu: "Najcnu xi'n Dios, sa'csi benchee Diosnu." ²⁹ Ni'cni, sa'csi najcnu xi'n Dios, di nungäjli jiennu xhigab najc Dios si'c rebanäj b ni nac-chee pla't, o guij, o yajg si'ctis ni runchee bejn rexpänäjbtu. ³⁰ Neñ redxej ni di bejn niembee Dios, diza Dios niujn castiigwreni. Niluxh naj gunibee Dios gusiechajz guiraa rebejn, ³¹ sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc beñgujdx, chuza najc beñsa'c. Rnili Jesucrist rediidx ni najc guliitis. Guläs Dios Jesucrist, baspañsacni lo rebeñgut, te gacbeenu rajp Jesucrist yäl'nibee lo guiraa recos.

³² Che biejn diajg rebejn ga gubañsac Jesucrist lo rebeñgut yu' reni baxhiznäj xtiidxni. Yu'za reni räj p:

—Sucuadijgrunu xcuent ni rusule'lu.

³³ Dxejcti birii pabl lojreni. ³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

Guyu' Pabl guedx Corinto

18 Biriiti pabl guedx Atenas, huijni guedx Corinto. ² Ro'c bidxaagni te dade' ni najc beñ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn Israel guedx Roma. Birinäj Aquila Priscila chäälni. Biriireni Italia, biädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn Israel, basule' pabl xtidx Dios neñ xquidoo rexpejn Israel. Rlajzni chalilajz rexpejn Israel näjza beñ griegw ni digac xpejn Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujñreni guedx Corinto, gusloj rusule'tis pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxha' Dios.

⁶ Dxejcti bidxehnäj rexpejn Israelni, guniyazareni xtiidxni. Dxejcti gubijb pabl xhajbni si'c te seen diruni jiuireni, caguro'nireni. Räjzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räj pni.

⁷ Dxejcti biriini lojreni, huijni roliz Justo, te bejn ni rajn Dios si'c rajn rexpejn Israelni. Rolizni sojb cuä' xquidoo rexpejn Israel. ⁸ Crisp, ni rnibee xquidoo Is-

rael, huililajz xtidx Jesucrist. Huililajzza guiraa reni rbäjz rolizni. Xhidajlza beñ Corinto huililajz xtidx Jesucrist, dxejcti birobnisreni. ⁹ Gojl te yääl gunii Dios lo te bala, räj pni lo Pabl:

—Na'c guidxejblu. Guniitis, na'c gusäulu ro'lu, ¹⁰ sa'csi narä suganää' lu. Rut gacdi gun latsiajlu. Aguleä xhidalduxh bejn lo guejdxre te gacreni xpeñä —räj p Dios.

¹¹ Ni'c bia'n pabl ro'c tebizgarol. Baluiini xtidx Dios lojreni.

¹² Che guj Galion gubernadoor xten Acaya, tejsi xhigab bejn rexpejn Israel bidojpreni te gunaazreni pabl. Sanäreni pabl jusgaad cadro yu' Galion.

¹³ Räjpreni lo Galion:

—Niguiire caguluii rebejn gañreni Dios garenca mood, xhet si'cti ni caj lo xleiiinu —räjpreni.

¹⁴ Agojl ninii pabl, che räj p Galion lo rexpejn Israel:

—Palga gulanni o bagu'tni te bejn, dxejcti yu' xtojlñi te gucuadiagä xtiidxtu. ¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räj p Galion.

¹⁶ Gunibee Galion barilaagw resoldaad rexpejn Israel.

¹⁷ Dxejcti gunaaz reGriegw Sóstenes nani rnibee xquidoo rexpejn Israel. Batiäjñreni baar dejtz Sóstenes nez ro' jusgaad xten Galion. Niluxh nicla niu Galionreni.

Chon huält huihui pabl rexpejn Jesucrist

¹⁸ Bia'nti pabl Corinto xchej. Dxejcti badeed pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejcti ganid gudejdreni guedx Cencrea, cadro bahuaj pabl yejcti si'c te seen yu' xhi diidx bia'nni con Dios. ¹⁹ Che bidzujñreni guedx Éfeso, basa'n pabl Priscila näjza Aquila ro'c. Biu' pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n pabl ro'c xchej, naaddini jia'nni. ²¹ Badeedni xtixtios, räj pni lojreni:

—Nungäjlpac chatedä laniro guedx Jerusalén. Siäl-sacä ree palga gusaan Dios jialä.

²² Che bidzujñni guedx Cesarea, biriini neñ barcw, huijni guedx Jerusalén. Che bidzujñni, guniini xchan lo reapost näjza lo rexpejn Jesucrist. Dxejcti huijni guedx Antioquia xten Siria. ²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpuru lajzreni.

Baluii Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios.

²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcäl'nabajñni rinälajzni Dios. Niluxh xcuent Jesucrist najntisni yäl'robnis xten Juan.

²⁶ Nicla nidxejb Apolos gusloj caniini neņ guidoo xten rexpejñ Israel. Che biejn diajg Priscila nājza Aquila xti-idxni, huinärenini rolijzreni. Ro'c basule'rureni xtidx Dios nani gajdni gan. ²⁷ Dxejc, sa'csi abejñ Apolos xhigab chääni reguejdx ni tre' nez Acaya, bacuaa rexpejñ Jesucrist guijtze lo rexpejñ Jesucrist ni yu' neņ reguejdxga te gacnäjreni Apolos. Gucnădudx Apolos rebejñ nani badeed Dios huililajz xtidx Dios neņ reguejdxga, ²⁸ sa'csi gunilii Apolos nez loj guiraa rebejñ xhet laadi rni rexpejñ Israel. Di niajcdi nuzejc rexpejñ Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: "Jesús najc Crist nani cayunlojtu guxhał Dios."

Guyu' Pabl guedx Éfeso

19 Lał ni guyu' Apolos guedx Corinto, huij Pabl xhidajł reguejdx neņ región Asia, dxejcti bidzujñni guedx Éfeso cadro bidxaagni gaii bejñ nani huililajz xtidx Dios. ² Gunabdiidx Pabl lojreni:

—Che huililajztu xtidx Dios, ¿la biădlajz Sprit Dxañ xten Dios neņ lastootu, ä?

Răjpreni lojni:

—Nicla gajd diajgnu jiejn la yu' te Sprit Dxañ xten Dios.

³ Răjñ Pabl lojreni:

—¿Xho birobnistu, pues?

Răjpreni lojni:

—Birobnisnu si'cni baluii Juan tiobnis bejñ.

⁴ Dxejcti răjñ Pabl lojreni:

—Guliica bastiobnis Juan che basiejch lajz rebejñ xto-łjreni. Răjñza Juan lo rebejñ: "Cołchalilajz xtidx bejñ ni siăăd detzä." Bejñ ni basă'tni najc Jesucrist —răjñ Pabl.

⁵ Che biejn diajgreni rextidx Pabl birobnisreni te gacbee rebejñ najcreni xpejñ Jesucrist. ⁶ Che batzuub Pabl ŋaani yejcreni, biu' Sprit Dxañ xten Dios neņ lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c choñ băii, guixe-guixee gunii Pabl rextidx Dios, basule'ni xcuent xcăłrnibee Dios loj rebejñ neņ xquidoo rexpejñ Israel. Dini nidxejb guniini loj rebejñ.

⁹ Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejñ, biunejz Pabl ro'c sanăni rexpejñni ni rililajz xtidx Jesucrist. Sană Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejñ Pabl si'c, ni'c guiraa rebejñ ni rbăjz Asia biejn diajgreni xtidx Dios. Rexpejñ Israel sigajc reben griegw biejn diajgreni xtidx Dios. ¹¹ Gucnăj Dios Pabl bejñni xhidajł dzunro, remilagwr. ¹² Ni'cni biăăd bejñ ca'reni baii, ca'reni tla' lajd te guxheebreni relajdga lo Pabl. Dxejcti rinăreni relajdga lo rebejñ ni racxhuu, luxh riacgajc rebejñ ni racxhuuga, řigajcza rebejñxab lastoo renani yu' bejñxab.

¹³ Dxejcti guyu' gaii bejñ Israel nani entis rcansaj, direni cuăăz tejsi guejdx. Najcreni bejñ ni rbăă bejñxab lastoo rebejñ. Bejñ redee xhigabcoob,

naareni cuăăreni bejñxab xcuent laj Jesucrist, ni'cni răjpreni lo renani yu' bejñxab neņ lastooni:

—Xcuent xcăłrnibee Jesucrist nani ruluii Pabl rnibeenu guiriilu neņ lastoo bejñga —răjpreni.

¹⁴ Guyu' gajdz xi'n Esceva, te bejñ Israel, nani sajcu lo rebixhojz. Rujñ redee dzuun rbăăreni rebejñxab neņ lastoo rebejñ. ¹⁵ Che gunii rexi'n Esceva loj bejñxabga si'c, răjñ bejñxab ni yu' neņ lastoo bejñga lojreni:

—Rumbeă Jesucrist, rumbeăza Pabl. ¿La'tu, chu la'tu? Dina gumbeă la'tu.

¹⁶ Dxejcti bixa't niguii nani yu' bejñxab neņ lastooni yejcreni rexi'n Esceva, gudinduxhnireni, basăłta'nireni, batiăjsni xhajbreni. Dxejcti baxuñreni biriireni neņ yu'ga, bidxăłgujdxzarenı birăsy'a' xhajbreni. ¹⁷ Dxejcti guiraa reben Éfeso, rexpejñ Israel sigajc bejñ griegw, gucbee xho bennăj bejñxab reniguiiga. Bidxebdudx rebejñga, luxh huă'p xpala'n Jesucrist.

¹⁸ Xhidaldudx reni huililajz xtidx Dios biăăd lo rexpejñ Jesucrist. Cacăjpreni guiraa recos xhet laadi nani rujñreni. ¹⁹ Xhidajł reni najc bidxaa biădnă reguijtz cadro caj yăłnajn xten rebidxaa. Dxejcti base'creni reguijtzga nez loj guiraa rebejñ. Bejñreni cuent lacti meel saj reguijtzga. Sajcreni tiubitzuu mił melpla't. ²⁰ Xhidaldudx rebejñ huililajz xtidx Dios. Batijp Dios lastoo rexpejñni. Gulă'p guiraareni xpala'n Dios.

²¹ Che gulujx recosre, bejñ Pabl xhigab chääni guedx Jerusalén, niluxh tedxgaani reguejdx ni re' nez Macedonia năjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhał Pabl Timoteu năjza Erasto, tio'p renani racnăjni, huijreni Macedonia, luxh laani bia'ni Asia.

Bidxechdudx reben Éfeso

²³ Neņ redxejga, guyududx rebejñ yărsia' sa'csi baluii Pabl xtidx Dios. Direni nichaglañ care'ch xtidx Dios.

²⁴ Te dade' ni laa Demetrio runchee ni'ch pla't xten banăjb ni laa Diana, ni najc banăjb xten guejdxga. Demetrio năjza guiraa replateer ni rujñ ni'ch xten Diana runduxhrene gaan meel ro'c. ²⁵ Gurejdx Demetrio guiraa replateer ni rujñ reni'chga, răjñni lojreni:

—Cołcuadiajg, la'tu resa'ă: najntu rbăănu melro lo dzuun ni riennu. ²⁶ Abahuiitu niguiire ni laa Pabl.

Abiejnza diajgtu xtiidxni. Răjñni lo rebejñ: "Xhet diosdi najc reni racchee con ŋaa bejñ." Guedx Éfeso năjza guideb naciōñ Asia cagusiejchni lajz bejñ, xhidaldudx bejñ salilajz xtiidxni. ²⁷ Ni'c ries nitloj xtuunnu palga diru bejñ sii ni'ch ni riencheenu. Luxh riesza diru bejñ jăădgajñ Diana neņ xquidoro Diana. Naj reben Asia, năjza guiraa reben guedxliuj rañdudx Diana, banăjb ni sajcu, niluxh palga diru rebejñ gañ Diana, pet sinitlojni —răjñni.

²⁸ Che biejn diajg replateer xtiidxni, bidxechdudxhrene, guredxa'reni răjpreni:

—Sacdudx Diana xtios reben Éfeso.

²⁹ Guideb guejdx guyu' biejj. Dxejcti ruxuñreni bidxagsa'reni lo yuj cadro rajc rexjuntreni. Gunaazreni Gayo năjza Aristarco, bejñ Macedonia ni rinajł Pabl.

³⁰ Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäälu cadro nadxagsa' rebejnga —räjpreni.

³² Lo rebejn ni re'ga, yu' reni rbedxa' tej diidx, sgai-ireni rbedxa' garenca diidx. Te bieiduxh cayajc. Xhidalduxh rebejnga nicla gan xhicient bidxagsa'reni. ³³ Dxejcti gulää rexpejn Israel te dade' ni laa Alejandro lo rebejn xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. ³⁴ Niluxh che gucbee rebejn najc Alejandro bejn Israel, tiop or guredxaduxhreni, räjpreni:

—Sacduxh Diana xtios reben Éfeso.

³⁵ Dxejcti biääd secretaar xten guejdxga lo rebejn, gunibeeni gac dxi rebejn, te räjpni lojreni:

—Colcuadiajg, la'tu bejn Éfeso, caguidxäjl te bejn guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj. ³⁶ Sa'csi redidre najc gullii, nungäjl cuedxitu, na'c guntu recos gujdxre. ³⁷ ¿Xhicient gunaaztu reniguii ni siädnätu ree? Direni gac gubaan ni rbajn recos guidoo, dizareni niniyaj xtiosnu. ³⁸ Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gac te junt xte rebejguejdx si'c ni caj lo xleiuu. ⁴⁰ Ries jii xquejnu lo gubier, naareni bidopnu te guidxagdilu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

Huihuisac Pabl rexpejn Jesucrist ni yu' Macedonia näjza Grecia

20 Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtios lojreni. Sä'tini nez reguedx Macedonia. ² Guiraa reguejdxga cadro gudejdni, balijdxni rexpejn Jesucrist, basule'runi xtidx Dios lojreni. Dxejcti sääni reguedx Grecia. ³ Che bidzujnni Grecia, bia'nni ro'c chon bäii. Dxejcti niu' Pabl nejn barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pírios, te bejn guedx Berea; näj Aristarco näjza Secondo, bejn guedx Tesalónica; näj Gayo, bejn guedx Derbe; näj Timoteu; näj Tíquico näjza Trófimo, bejn Asia. ⁵ Guiraa redee gunijd loonu, huiläzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu nejn barcw te sonnu nez guedx Troas. Gaii dxej gusaanu nejn barcw, dxejcti bidzujnnu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷ Che gojl dmingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijjn, gusloj cagusuleduxh Pabl xtidx Dios, huinuuni si'cti garolyäälli. ⁸ Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹ Sobga' te bi'n ni laa Eutico ro' te bentaan. La' ni cagusuleduxh Pabl xtidx Dios lo rebejn, gunaaz baca' bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. ¹⁰ Dxejcti biäjt Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajjn Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejcti biunejzni. ¹² Xhetliidiru rajcni bi'nga nani gubansac, nani guläs Pabl. Bibalazduxhreni, huisa'nrenini rolijzni.

Biu'nu nejn barcw, bionnu guedx Mileto

¹³ Gunijdnu lo Pabl. Biu'nu nejn barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiini guejdxga, ro'cli jiu'ni nejn barcw. ¹⁴ Che bidxaag Pabl nuunu guedx Asón, biu'ni nejn barcw, sonnu lo nisdoo te bidzujnnu guedx Mitilene. ¹⁵ Nejn barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzujnnu guedx Samos. Guedx Trogilio basilaaznu. Che bara stee yääl, bidzujnnu guedx Mileto. ¹⁶ Di rlajz Pabl jiu'nu guedx Éfeso, diza rlajz chunu Asia xchej, sa'csi riojb lajzni guidzujnnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷ Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee.

¹⁸ Che bidzujnni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzujnnu, nabañää Dios. ¹⁹ La'tu najntu xho runä xtzuun Jesucrist guixe-guixee, guideb xcäl'nadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlajz rexpejn Israel nugu't narä, gudedä trabajwduxh. ²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtju huiluiä xtidx Dios lojtu. ²¹ Basule'ä xtidx Dios lo rexpejn Israel näjza lo rebenzijt ni di gac xpejn Israel. Räpä lojreni nanab gusiechljazreni, gusa'nreni xtojreni, nanab chalilajzreni xtidx Jesucrist te gudzucaj Dios xtojreni. ²² Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä

cha'ä guedx Jerusalén. Dina ganä xhi sacä ro'c.

²³ Niluxh nanä cade tej reguejdx cadro rdedä rnii Sprit Dxañ xten Dios loä sidedä trabajwduhx, siäuä neñ latzguiib guedx Jerusalén. ²⁴ Niluxh dina guidxebä, dizana chanälazduhxä xcäl'nabañätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlneni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucbeä dirutu fisac loä, la'tu nani basule'ä xcäl'rnibee Dios lojtu. ²⁶ Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷ Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlanj Dios guibañnu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxañ xten Dios abaniidx dzuungu guntu, ni'cni abixe' xtiejn Jesucrist lo cruz te gac gudzucaj Dios xtojlneni. ²⁹ Anancheä che rutdiru narä, siääd bejn nani rlanj chalilajztu ste'ca diidx, na'c chalilajztu niclaza jiutu rebejnnga. Rusgweetisreni la'tu. Suti'e'chreni la'tu lo sa'tu si'c rutie'ch cuyo't rexiiil. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlneni redee ni rusguee. ³¹ Colhuii te di gusgueereni la'tu. Di jääl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räjzpa Pabl:

—Asia'are, rusa'nätu ladzñaa Dios, gacnäjä Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejnñi. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con ñaä te bio' xhi gudaunää rexiigwä. ³⁵ Si'c benä te filojtu xho guntu dzuun te gacnäjätu sa'tu ni xhet rajpdi, te guinaj lajztu xtidx Jesucrist che najni: "Huenru guideednu lo bejn quela xcaxlia'nu xhi cos" —räjpnj.

³⁶ Che gulujx gunii Pabl rediidxga, bazuxhibnäjni rebejnnga, guredx-gunabni lo Dios. ³⁷ Dxejcti ronduxh guiraareni gudäazreni guejn Pabl, bachagro'renini.

³⁸ Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

Huij Pabl guedx Jerusalén

21 Che basa'ntinu rexpejn Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunnü lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pärtara. ² Che bidzunnü ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c. ³ Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunnü guedx Tiro cadro gule'creni cargw ni nuu barcwga. ⁴ Ro'c bidxälnu rexpejn Jesucrist. Biannäreni gajdz dxej. Baluii Sprit Dxañ xten Diosreni te guniireni lo Pabl, räjpreni:

—Na'c chäälü guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

⁶ Che abazadiidxnu sa'nu, nuure biu'nu neñ barcw, biädla laareni gubisacreni rolizreni.

⁷ Biriitinu guedx Tiro. Che bidzunnü ro' guedx Tolemaida, gulujx xpiajnu biäjtnu neñ barcw. Dxejc biohuiinu rexpejn Jesucrist ni yu' guejdxga, biannäreni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzunnü guejdxga, bionnu roliz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpejn Jesucrist nani xhet rajpdi guedx Jerusalén. Rolizni huijia'nnu. ⁹ Yu' tajp xindxapxte Felipe. Dios badeed diidx guiniireni lo bejn. ¹⁰ Xhidajl dxej guläjznu roliz Felipe. Lañ ni dxunnu ro'c, bidzujñ te niguii ni laa Agabo, biriini nez Judea. Ruzanij Dios xcäriejnñi te guiniini xtidx Dios.

¹¹ Che bidzujñni loonu, cua' Agabo xsindoor Pabl, baliibni lagajc reni'ni näjza reñaani, najni loonu:

—Anaj Sprit Dxañ xten Dios: "Sree suliiib rexpejn Israel ni yu' guedx Jerusalén niguii ni najc xtenni sindoorre te guteedrenini ladzñaa rebenzajt."

¹² Che biejn diaagnu rediidxga, nuure näjza reben ro'c, gunabduhxnu lo Pabl na'c chääni guedx Jerusalén. ¹³ Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jäüä neñ latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴ Che naaddi Pabl gusiechljazni, xhetru guniidinu lojni. Räjptisnu lojni:

—Sugac nani rlanjtis Dios.

¹⁵ Che gudejd redxejga, bilucheenu rexhixtennu, biriinu guejdxga, sontinu guedx Jerusalén. ¹⁶ Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizni, ro'c guläaznu.

Huihuii Pabl Jacob

¹⁷ Che bidzunnü guedx Jerusalén, bibalazduhx rexpejn Jesucrist sa'csi siopnu ro'c. ¹⁸ Che bara yääl huinänu Pabl lo Jacob näjza lo renani rnibee guidoo xten rexpejn Jesucrist. ¹⁹ Dxejc gudäaz Pablreni, bijni diidx xcuent tebgaj redzuun nani badeed Dios bejnñi che guyunäjni rebenzajt nani di gac xpejn Israel, te biejn diajgreni xtidx Dios. ²⁰ Che biejn diajgreni xtidx Pabl, gulä'preni xpala'n Dios, räjpzarenini lo Pabl:

—Guejblu, sa'nu, anajnlü lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. ²¹ Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neñ reguejdx xten rebenzajt, rulijdxlurenini na'c gusal'reni bee rexi'nreni, na'cza chazanäjzurenini rexcostumbrnu. ²² ¿Xhini'c jiennu? Siejn diajgreni abidzujñlu ree, dxejc suchagsa'reni te jäädreni lojlu.

²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. ²⁴ Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiiixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeereni laaca rusooblu xleii toMoisés. ²⁵ Biädla rebenzijt nani huililajz xtidx Jesucrist, xhet najc di, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz neñ guidoo xhi dxej jiadnä tejpgareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siääd Asia lo Pabl neñ guidoroga. Gunaazreni Pabl, dxejcti gusloj cayujnreni biejy, ²⁸ guredxa'reni räjpreni:

—iColtaa xpejn Israel! iColtaa te gacnäjtu nuure! iBahuiilaare! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrrureni xleii toMoisés, riye'tzni lo bejn xhet sajc di xquidoronure. Colhuilaa xho siädnäni ree beñ griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siääd guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

³⁰ Guideb guejdxga guyu' yärsia', bire' beñguixhuj, bixa'treni yejcti Pabl, gunaazreni, gudobxhaxhrene Pabl, gulägajc reni neñ guidoroga. Biägajc re-puerto xten guidoro. ³¹ La! ni cayujnreni xhigab ju'treni, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo rebeñ xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicient cayajc biejy sa'csi cabedxa' guiraa rebejn. Dxejcti gunibeeni chanä resoldaad Pabl cadre rbäjzreni. ³⁵ Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlaizreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—iAn rniilu xtidxsaä! ³⁸ An dilu gac niguii ni siääd nación Egipto, nani gudilnä gubier, nani huinä lo reyu-bijdz tajp mil niguii nani rugu't bejn.

³⁹ Dxejcti räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejcti cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22 —Guejbtu bengool, guejbtu resa'ä, näjza la'tu dade'. Gucudajgtu rextidxä —räjpni.

² Che biejn diajgreni caniini didx hebreo, dxidujru guzuj rebejn. Räjp Pabl lojreni:

³ —Narä nacä te xpejn Israel. Guedx Tarso xten Cilicia gojä. Reepac gulaä. Lo Gamaliel bisiedä guijtz. Baluisa'cni narä guiragajc releii xten retoxtad-goldoonu. Guideb xtipä basobä ni gunibee Dios. Gucä si'cpac ni najctu naj. ⁴ Dxejcti bidxecheduxhä loj renani huililajz xtidx Jesucrist, bagu'tazareni. Balibä xhidajl bejn, niguii näjza gunaa, con cadenguiib. Basäuäreni neñ latzguiib. ⁵ Bixhojz ni sajru näjza guiraa rebeñgool ni sajru neñ xquidootu, sajc guinii xhini'c benä. Laareni baniidxreni guijtz loä. Ni'c huinä lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jiadnääreni guedx Jerusalén te jäuren neñ latzguiib, te gusacsireni rebejnnga.

Gunii Pabl xho huililajzni xtidx Jesucrist

(Hch. 9:1-19; 26:12-18)

⁶ Räjpzani:

—Dxejcti hua'a guedx Damasco. Laidxejcti ameer guidzunä guejdxga, chela bazanij te balro guideb gabi narä. Xhaguibaali siääd bajlga. ⁷ Biabroä lo yuj, dxejcti biejn diagä te se' ni canii loä, najni: "Saulo, Saulo, xhicient rusacsílu narä näjza rexeñä?" najni. ⁸ Dxejcti räpä lojni: "¿Chuluj, Dad?" Najni loä: "Narä nacä Jesucrist ni siääd Nasare't, nani cagusacsíduxhlu." ⁹ Rebejn ni sanää bahuiioj bajlga, bidxejbreni, niluxh di diajgreni niejn xse' nani gunii loä. ¹⁰ Räpä lojni: "Dad, xhini'c gunä?" Dxejcti najni loä: "Huistie, huij guedx Damasco. Ro'c sinii te dade' lojlu guiraa ni guinibeä gunlu." ¹¹ Bastujxh bajlga loä, diru loä nien, ni'cni gunaaz resa'ä naä, sontinu guedx Damasco.

¹² Räjp Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpejn Israel nrii nadalajz lo dade'ga. Biääd Ananías loä. ¹³ Cuä'a guzujni najni loä: "iSaulo, betzä, bahuisac!" Lagajc dxejcti biajc loä, bahuiä lojni. ¹⁴ Naj Ananías loä: "Xtios retoxtad-goldoonu agulelu. Gule Dios luj te jiejn diajglu rediidx

ni rlanjni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵ Loj guiraa bejn susule'lu guiraa ni bahuiilu nājza nani biejn diajglu. ¹⁶ ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu."

Gunii Pabl xhicuent baluiini xtidx Dios lo rebenzajt

¹⁷ Che gubi'ä guedx Jerusalén, biu'ä neņ guidoro xten rexpejn Israel te guredx-gunabä lo Dios. Laļ ni cabedx-canabä lo Dios, astoo gunixcaļä, ¹⁸ dxejc bahuiä lo Jesucrist. Najni loä: "Basquejn, birii guedx Jerusalén sa'csi di rebejn chalilajz xtidxä ni gusule'lu lojreni." ¹⁹ Narä räpäza lojni: "Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neņ latzguuib. ²⁰ Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajn xten renani bagu't Esteban laļ ni bacuaareni guij." ²¹ Dxejcti naj Jesucrist loä: "Huij. Suxhalä luj zitduxh. Chäällo lo guiraa rebenzajt ni di gac xpejn Israel."

Bia'n Pabl neņ rolizro xten resoldaad

²² Bacuadiajg guiraa rebejn laļ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjļ guibajnruni.

²³ Sanuutis cabedxa'reni. Gulääreni xcamangwreni, cacuaazareni yuyoļ jiaa. ²⁴ Dxejcti gunibee comandant lo resoldaad, räjpni:

—Colchanä Pabl neņ yuro xtenu. Ro'c colquuin Pabl te guiniini didxgulii, te gacbeenu xhicuent rbedxaduxh rebejn lojni.

²⁵ Sanätireni Pabl. Entis baliibreni ni', ņaa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beņ roman che gajdtu gacbee xhi dojl bejnni, ä? Et si'cti caj lo xleiilu.

²⁶ Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beņ roman.

²⁷ Biädguxuņ comandant lo Pabl, räjpni:

—¿La gulii najclu beņ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beņ roman.

Dxejcti räjp Pabl lojni:

—Narä che goļäli nacä beņ roman.

²⁹ Che biejn diajg resoldaad nani niguijn Pabl si'c, baslagajcreni reduguijd ni naliib ni', ņaani. Che biejnza diajg comandant najc Pabl beņ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰ Che bara yääl, rlanj comandant gacbeeni xhicuent rlanj rexpejn Israel ju't Pabl. Ni'c gunibeeni jiaäd rebixhojz ni sajcro nājza reguxhtis xten guidoro. Dxejcti biädñani Pabl, bazujnini nez loj guiraa rebejn ni bire' ro'c.

23 Rdxelodzu'tz Pabl lo rebejn ni tre' ro'c laļ ni räjpni lojreni:

—Narä gusule'ä tiop diidx lo guejbtu, beņ Israel, sa'ä. Guideb ni nabaņä ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni sajcro, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, beņguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäjļ gun bejn? ¿Xhicuent gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gacbee laa bixhojz ni sajcro xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacbeä cania lo bixhojz ni sajcro, sa'csi nanä agunii Dios: "Na'c guiniyajlu reni rnibee xpejnlu." Si'c caj lo guijtz ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beņ saducee, yu'za reni najc beņ farisee. Dxejcti guredxa' Pabl räjpni lojreni:

—Sa'ä, narä nacä te beņ farisee, xi'nza te beņ farisee narä. Rililazä sibansac bejn lo rebengut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhreni, räjpreni:

—Di niguiire gac beņguijdx. Palga gunii te angl xten Dios o te togool lojni, alga Dios tiļnäjnu, dxejc sidxechnäj Diosnu.

¹⁰ Che gusloj cabedxaduxhreni lo sa'reni, bidxejb comandant, andi ju'treni Pabl, caxha'treni yejcti. Dxejcti gunibeeni biäjt resoldaad cadro suga' Pabl. Guideb xti-jpreni gulääreni Pabl galäii rebejnğa huiņasacrenini neņ yuro xtenreni.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidunnu palga dinu guigutxgaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jiädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jiädnä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujnri, biu'ni räjpreni lo Pabl rediidx ni biejn diajgni. ¹⁷ Dxejcti gurejdx Pabl te capitán, räjpreni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpreni lo comandant:

—Pabl, nani niäu neñ yuro xten resoldaad, gunab loä jiädnälaa bi'nre lo guejblu te guiniini te diidx lo guejblu —räjpreni.

¹⁹ Dxejcti guraaz comandant naa bi'nre, huinäni te laad cadro rut jiejnri diajgni xtiidxreni, dxejcti räjpreni lojni:

—¿Xhini'c rlanjzu guiniilu loä?

²⁰ Dxejcti bazejcti diidx, räjpreni loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlanj jiejnru diajgri diidx xcuent Pabl. ²¹ Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztisreni guxhal guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdipac gäblu guiniilu diidxre loä.

Huij Pabl lo Pels ni najc gubernadoo

²³ Dxejcti gurejdx comandant tiop capitán, räjpreni lojreni:

—Colgutojp tiop gayuu soldaad, chää guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcgaa guxhijñ guiriireni ree. ²⁴ Colquii tiop cabaii cuib Pabl te xhet gacdi Pabl cheni chanätuni lo gubernador Pels —räjpreni.

²⁵ Dxejcti bejn comandant te guijtzt chanäreni lo gubernadoo.

²⁶ Loj guijtztga rñii scree: "Gubernador Pels, nani sacduxh. Narä, Claudio Lisias, ruxhalä xtiixios lo guejblu.

²⁷ Rediidxre rucuaä lo guejblu. Gunaaz rexpejn Israel

niguiire, luxh paru dina nidzunga'cä con resoldaad, nugu'trenini. Che gucebeä najcni beñ roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejcti gucebeä requej ni rbe'creni najc ganax xcuent leii xtenreni, niluxh xhet bejndini te nungäjl guetni, niclazä nanab jiäuni neñ latzguiib. ³⁰ Che baxhalreni diidx loä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ctis rniä lo guejblu", si'c caj lo guijtzt ni bejn comandant.

³¹ Che biu' guxhijñ, huixii resoldaad Pabl sanärenini guedx Antipatris si'cni gunibee comandant gunreni.

³² Che bara yääl, gubi' resoldaad nani guzaj ni'reni.

Resoldaad ni bijb cabaii guzanäj Pabl guedx Cesarea.

³³ Che bidzujñ redee Cesarea, badeedreni xquijtzt comandant lo gubernadoo, huinäzarenini Pabl lojni te biembeenini. ³⁴ Che gulujx biñi guijtztga, gunabdiidxni lo Pabl:

—¿Caro siäädlu?

Che gucebeeni siääd Pabl Cilicia, ³⁵ räjpreni lo Pabl:

—Guidzujnsi rexpejn Israel ni cadxechnäj luj, sucua-diaggacä xtiidxlu —räjp gubernadoo.

Gunibeeni ga'p resoldaadni neñ yuro xten Herodes.

Gunii Pabl xtiidxni lo Pels

24 Gudejdti gaii dxej, dxejcti bidzujñ Ananías, bixhojz ni sajrcu, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoo. ² Che biädnäreni Pabl, gusloj Tértulo cabe'c xquej Pabl lo gubernadoo. Räjpreni lo gubernadoo:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacduxh ni cayujñ guejblu. ³ Xquixtiosduxh guejblu, gubernadoo Pels, xcuent guiraa redzunsac ni rujñ guejblu guira nejz.

⁴ Luxh na'cru gusieednu guejblu, gucuadiaglaa guejblu tiop diidx. ⁵ Agucebeenu xho najc niguiire. Benguidduxhni. Cadrotis rijni rujñi biey lo rexpejn Israel.

Laani rnibee te cuaa ni laa nasareñ, nalajznu rebejn nani rililajz xtidx Jesucrist ni biääd guedx Nasare't.

⁶ Rlanjzini nuxhijñi xquidoronu, ni'c guraaznuni. Nienu te junt te lagajc nuure nienu yälguxhtisni si'cni caj lo xquijtztu.

⁷ Niluxh bidzujñ comandant Lisias näjza resoldaad. Diptis badzucajreni niguiiga ladzñaanu.

⁸ Laani gunibeeni lo guejblu jiääd reni rbe'c xquejni.

Naj lagajc guejblu sajz guiniabdiidx lojni te gacbee guejblu gulii guiraa requej nani rbe'cnu xcuentni —räjp Tértulo.

⁹ Dxejcti guiraa rexpejn Israel ni suga' ro'c räjpreni guliica xtidx Tértulo. ¹⁰ Dxejcti bejn gubernadoo seen lo Pabl te guiniini. Baze'c Pabl diidx, räjpreni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujñ guejblu yälguxhtis naciön Israelre —räjp Pabl—. ¹¹ Gutzbitio'p dxejtis bidzujñ guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. ¹² Nicla tej dina nichagdiñ beñ neñ guidoro. Nicla tej dina niunä

biejy neñ reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guliij najc xti-idxreni. ¹⁴ Rniliäpac lo guejblu: Rañä Xtios retoxtad-goldoonu. Jesucrist baluui xho gañsa'cnu Dios. Rililazä rextiidxni. Xhidalduxh rexpejñ Israel rniyaj xho basule' Jesucrist gañ bejñ Dios. Ruzobä guiraali releii xten to-Moisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujñ te dxej che guibañsac rebeñgut, rebeñguijdx sigajc rebeñsa'c. ¹⁶ Ni'cni racbeä laaca nabañä guiraa dxej, di lastoä guidxejb, nicla nez loj bejñ niclaza nez loj Dios, sa'csi rut rajcdi guiliäs dixhii xcuentä.

¹⁷ Räjpn Pabl:

—Agujc xchej yu'a zijt, lajdx garenca bejñ, ñaj gu-binää meel ni baxhal rebeñ nejzga te gudedäni lo re-bejñ ni xhet rajpdi. Biädñäza gojn xtenä gudedäni lo Dios. ¹⁸ Ni'c sanää guidoro. Ro'c bidxäjl rexpejñ Israel ni siädä Asia narä. Agucñayaä si'c ni rnibee xleiiinu. Xhet beñxhidajldi suganää, xhetza biejdidi cayunä. ¹⁹ ¿Con rebejñga ñaj? Te cue'creni quej lo guejblu palga yu' xhini'c rdexchnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebeñgool lo guedx Jerusalén —räjp Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejñ lo rebeñgut, ni'c biädñätu narä lo rebejñre —si'c guniä lojreni.

²² Che biejn diajg Pels xtidx Pabl näjza sa'csi najne'ni xcuent diidx nani baluui Jesucrist, basoobni stee dxej guidxagsac sa'reni räjpni lojreni:

—Che jiädli comandant Lisias dxejc gunä yälguxhtis —räjp Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlanjtsiñ gunni. Na'cza gudxojnñi jiädä rex-amigwni te fiireni lojni.

²⁴ Che gudejd balti dxej, gubi' Pels, biädñäni chäälni Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist. ²⁵ Gunii Pabl xho nanab guibañsa'c bejñ nez loj Dios si'c ni gunibee Dios guibajñ bejñ. Nanabza gacbee bejñ na'c gun bejñ cos guijdx, sa'csi sidzujñ dxej gac Dios juejz loj guiraa rebejñ te fiini xhi bejnreni. Racslesli Pels tant bidxejbni biejn diajgñi diidxga. Räjpn lo Pabl:

—Huij ñaj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjñini. ²⁷ Si'c gudejd tiop iiz. Dxejc birii Pels gubernadoor. Dxejcti biu' Porcio Festo, gujcnì gubernadorcoob. Niluxh Pels rlanj chanälajz rexpejñ Israelni, ni'c basa'nñi niäusijc Pabl.

Gunii Pabl xtiidxni lo Festo

25 Che biu' Festo gujcnì gubernadorcoob xten reguejdxga, bia'nñi guedx Cesarea choñ dxej. Dxejc biriini ro'c sääni guedx Jerusalén. ² Che bidzujñni

guejdxga, rebixhojz nani rnibee näjza reniguii ni sajrcu lo rexpejñ Israel biädä lo Festo. Gusloj cabe'creni xquej Pabl lojni. Gunabduxhreni lo Festo ³ sa'csi rlanjreni gunni te huen laareni, guinibeeni jiädñäreni Pabl guedx Jerusalén. Si'c gunabreni, sa'csi abenxgaareni xhigab cuäzñhiga'tzreni te ju'treni Pabl lo nezyuj.

⁴ Dxejcti räjp Festo lojreni:

—Suniaü Pabl guedx Cesarea. Di gaclaa guibi'ä guedx Cesarea. ⁵ Suchää reniguii ni sajrcu lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnñi —räjpni.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biädä Pabl lojni. ⁷ Che bidzujñ Pabl lojni, biädä rexpejñ Israel nani biädä guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtennu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlanjñi guiliäsni xpala'nñi loj rexpejñ Israel, räjpni lo Pabl:

—¿La sisiajlu guedx Jerusalén te cue'c rexpejñ Israel xquejlu ro'c nezloä, ä?

¹⁰ Dxejcti räjp Pabl lojni:

—Ñaj suga'a loj guejblu, ni gule ñeii César. Guejblu rnibee guiraa reguejdxre. Ree nungäjñ cue'creni xquej lo guejblu, xhet guedx Jerusaléñdi. Ananchee guejblu xhet latsiajdi benä lo rexpejñ Israel. ¹¹ Palga nacä te beñguijdx, o palga yu' xhi latsiaj benä te nungäjñ guetä, xho dina xcäbä guetä. Palga xhet latsiajdi benä nani canii rexpejñ Israel benä, dxejc rutliidi saj guted narä ladzñaareni. Suchale'creni xquej lo César nani najc ñeii xten rebeñ roman —räjp Pabl.

¹² Che guninäj Festo reguxhtis xten xquidoro rexpejñ Israel, räjpni lo Pabl:

—Luj gunablu chäälu loj ñeii César. Mbaj. Sijlu lo ñeii César —räjp Festo.

Huixiireni Pabl huinärenini lo ñeii Agripa

¹³ Che gudejd balti dxej, bidzujñ ñeii Agripa näjza chäälni Berenice guedx Cesarea. Biädñuirenì gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Räjpn Festo lojni:

—Ree niäusijc te niguii ni laa Pabl ni basa'n Pels.

¹⁵ Che guyu'ä guedx Jerusalén, rebixhojz ni rnibee näjza rebeñgool xten rexpejñ Israel gule'c xquejñi loä. Rlanjreni guinibeä guetni. ¹⁶ Räpä lojreni: “Di leii xten naciõñ roman gusaan guet te bejñ palga di bejñ jiädx-gaa te guiniireni nez lojpacni xhi bejñ niguiiga, te guzejca niguiiga diidx xcuent requej, te guiniini la guliireni.” ¹⁷ Ni'cni che biädä rexpejñ Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä.

¹⁸ Benä xhigab pet yu' xhi cosro bejnñi. Luxh che gusloj cabe'creni xquejñi, gucbegacä xhet latsiarodi bejñ Pabl. ¹⁹ Alga cadilñäjrenini xcuent xleiiireni, xcostumbr-

reni. Guniizareni xcuent te niguii ni laa Jesucrist. Agujt-ni, niluxh canii Pabl gubañsacni lo rebengut. ²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni laj ni gac guxhañani lo César —räjp Festo.

²² Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiaglu xtiidxni —räjpni.

²³ Che bara yääl, biääd Agripa näjza Berenice, luxh sucheduxhreni. Näjza recapitän ni sajcro näjza rebejn ni sajcro lo guejdxga biu'reni neñ yuro xten Festo. Dxejc gunibee Festo biääd Pabl. ²⁴ Dxejcti räjp Festo lo guiraa reni re' neñ yuro:

—Reii Agripa näjza guiraa rebejn ni tre' ree, colcuadi-ajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canab-duxhreni guetni. ²⁵ Niluxh narä rchaloä xhet bejndini te nungäjil guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhañani lojni. ²⁶ Naj dina ganä xhini'c gucuaä lo guijtz te guxhañani lo César ni rnibee narä. Ni'c biädnaä niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César.

²⁷ Narä runä xhigab di nungäjil guxhañani niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

Gunii Pabl rextiidxni lo reii Agripa

26 Dxejcti räjp Agripa lo Pabl:
—Gunilaa xtiidxlu loonu.

Dxejcti guläs Pabl ñaani, gusloj cagusule'ni diidx lojreni. Räjpn:

² —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. ³ Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jjeed guejblu gucuadiaglaa guejblu guiraa rextidxä.

⁴ Räjppza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleiinu si'cni rililajznu. ⁶ Naj suga'a ree, rlazjreni jäuä sa'csi rililazä diidx nani bia'n Dios con retoxtdagoldoonu. ⁷ Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibañsacreni, ni'cni rlazjreni gusäurenä narä. ⁸ Palga abejn Dios xhigab guiliäsni guiraa rebengut te guibañsacreni, xhicuent di lajztu chalii xtidx Dios?

⁹ Räjppza Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwduxh basäuäreni neñ latzguiib. ¹⁰ Guiraa recosre benäza guedx Jerusalén. Baniidx rebixhojz ni rnibee guijtz loä te basäuä rexpejn Jesucrist neñ latzguiib. Che biäurenä neñ latzguiib, narä gule'cä xquejreni te gujtreni. ¹¹ Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijz te ro'c huisacsä rexpejn Jesucrist.

(Hch. 9:1-19; 22:6-16)

¹² Räjppza Pabl:

—Ni'c sa'a nez guedx Damasco, ca'a guijtz ni baniidx rebixhojz ni rnibee. ¹³ Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabi cadro suga'a näjza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: "Saulo, Saulo, xhicuent rusacsílu narä näjza rexpenä? Che rusacsílu narä, laga-jc luj rdejdlu trabajw, si'c te gon ni rucuaní' yejc garu'ch." ¹⁵ Dxejcti räpä lojni: "¿Chu luj Dad?" Dxejc najni loä: "Narä nacä Jesucrist nani cagusacsíduxhlu.

¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. ¹⁷ Naj suxhañalu loj rexpejn Israel näjza lo rebenzijz nani di gac xpejn Israel. Che gusacsí rexpejn Israel näjza rebenzijz luj, sacnäduxhälu, te di ju'treni luj.

¹⁸ Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirurenä gusoob xtidx Bendxab ni rnibee rebendxab, sa'csi susoobreni xtidx Dios. Che chalilajzreni rextidxä, sudzucaj Dios xtojlni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä."

¹⁹ Räjppza Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgä xtiidxni lo rebeñ Damasco. Räpä lojreni: "Colgusiechajz, colgusoob xtidx Dios. Colyujn dzunsa'c te gacbee rebejn abasiechajzto, arusoobtu xtidx Dios." Si'cza guniä lo rebeñ Jerusalén, näjza lo rebejn ni yu' reguedx Judea, näjza lo rebenzijz ni di gac xpejn Israel. ²¹ Sa'csi benä si'c, gunaaz rexpejn Israel narä neñ guidoro, rlazjreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtz nani bacuaa to Moisés näjza guiraa reniguii nani gunii xtidx Dios. Laarenä galooli guniireni xcuent xhini'c gac naj. ²³ Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo rebengut, ganiddooza laani suluiini loj rexpejn Israel näjza loj guiraa rebenzijz guliipac xtidx Dios, sibañsac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ La₁ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

²⁵ Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii cania. ²⁶ Ree suga' reii Agripa. Laani nancheeni guiraa rediidxre, ni'c guyasi cania rediidxre lojni, dizana guidxebä sa'csi anajnni gullii guiraa ni gujc, sa'csi xhet xhiga'tzdi gujcreni. ²⁷ Guejblu reii Agripa, zla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpeñ Dios.

²⁹ Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gac-tu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni. ³¹ Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiauni.

³² Dxejcti räjp Agripa lo Festo:

—Paru dini niniab chääni lo César, sajc nuslaanuni.

Birii Pabl säa nez guedx Roma

27 Basoobtireni dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Näjza te dade' ni laa Aristarco guzaj, siäädni guedx Tesalónica xten Macedonia. Biu'nu neñ barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjgwnu, te guxiiru rda' bej loonu. ⁵ Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia. ⁶ Ro'c bidxäjl capitán xten resoladaad stee barcw ni siääd guedx Alejandría. Agojl chää barcwga Italia. Bateedtini guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos

Puertos cadre guxii säab bej. Gajxh ro'c tre' guedx Lasea. ⁹ Agujc balti dxej cayaclaanu, luxh agudejzä dxej ni rucua'n rexpejn Israel, guxii riäädx chaa ijz. Re-baire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn, ¹⁰ räjpni lojreni:

—Rexamigwä, runxgaä bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹ Niluxh di capitán xten resoladaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹² Luxh sa'csi lajtga dini gajc huen tedreni rebäii na₁duxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta.

¹⁴ Niluxh di niacalaa gusloj te nisguipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rla-jzni. ¹⁶ Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gan guläsreni canuu neñ barcw.

¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibi₁ni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni niaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rla-jzni.

¹⁸ Che bara yääl caguscuä' beduxh barcw lo nisdoo.

Sas basälreni che'n cargw lo nisdoo te bicharu barcw.

¹⁹ Ni riojn dxej, lagajc laareni basälreni lo nisdoo guiraa xtrast barcw. ²⁰ Che agujc balti dxej niäu lo gu-bijdx, diza rebale' nieñ xhaguibaa sa'csi lajtis cayajb nisguipeduxhga, biennu xhigab guiraanu sejtneu.

²¹ Xchero rut rla-jzdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. ²² Niluxh colcuedcxi lastootu. Niclatej bejn ni siääd lo barcw di guet. Barcwtis sinitloj. ²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, ²⁴ najni loä: "Na'c guidxejblu Pabl. Nanabpac chäälü lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet", najni loä. ²⁵ Ni'cni cania lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, ²⁸ ni'c bastejbreni te guib lo duu xhajn nisdoo, te barexhreni ro'c, dxejc gucbeerreni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guib con duu xajn nisdoo, dxejc

gucbeereni ro'c najc nisdoo jät si'cti galbigajdz metr.
²⁹ Dxejc bidxejbreni te di chalaj barcw yejc reguij.
 Bacuaatireni tajp guibro si'c guench ni naliib te caden
 te ru'reni neñ yujxh te ruscuääzreni barcw, te jia'nni
 tejsi lajt. Dxejc rlaizreni malaii jianijga lo guedxliuj.
³⁰ Dxejcti gulät remos canuu lo nisdoo cayujnsireni
 si'cni chastejbreni stee guench guiib lo nisdoo, niluxh
 rlaizreni guxuñreni guidon la sajc guidzujñreni ro' nisdoo.
³¹ Dxejcti räjp Pabl lo capitán näjza lo resoldaad:
 —Palga di redee jia'n neñ barcw, di gacdi guslaatu
 xcälñabajntu —räjpmi.

³² Dxejcti batiugya' resoldaad duu ni naaz canuu te
 bitejbni lo nisdoo, sanäti nisdoo canuuga. ³³ Che gusloj
 cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau.
³⁴ Naj coltajw te gac guixoobtu lo nisdoo. Na'c guntu
 xhigab guettu, nicla tej xquidxejcti di nitloj.

³⁵ Che gulujx gunii Pabl si'c, cua'ni yätxtiil, badeedni
 xquixtios lo Dios nez loj guiraareni. Dxejc gula'nini,
 gusloj cayajwnini. ³⁶ Dxejc bibaa-lajzreni, näjza laareni
 gusloj cayajwreni. ³⁷ Nuunu najcnu tiop gayuu gayoñb-
 itzubixho'p bejn ni yu' neñ barcwga. ³⁸ Che agujc guda-
 jwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahui-
 ireni cadre rdzujñ te gueubäz ro' nisdoo cadre yu' xhi-
 roob yujxh ro' nisdoo. Rlaizreni nusiureni barcw
 ro'c. ⁴⁰ Dxejcti baslaareni guidap guench guiib ni naaz
 barcw, bia'nreni guideb caden neñ nisdoo, bax-
 heczareni yajg ni ruzaj barcw, guläszareni ladro nez
 delant barcw te balaña bej barcw. Badzuréreni barcw
 sääreni nez ro' nisdoo. ⁴¹ Sas biu'reni te lajt cadre rdx-
 agsa' tiop cuaa nis. Ro'c huilaj yejc barcw neñ yujxh
 neñ nisdoo, digacdiru guiniibni. Dxejcti gusloj cabijl
 dejtz barcw sa'csi sanuutis caguijn nisdoo detz barcw.
⁴² Dxejcti rlaiz resoldaad nugu't repres te di guixoo-
 breni lo nis guxuñreni. ⁴³ Niluxh di rlaiz capitán xten
 resoldaad guet Pabl, ni'c dini nusaan nugu't resoldaad
 repres. Gunibee capitán ganiddoo renani rajc rxoob lo
 nis guitiäjs lo nisdoo te guidzujñreni lo yujxh. ⁴⁴ Dxejcti
 birinajl rebejn ni digacdi guixoob lo nis, naazreni bara-
 jd o te la' yajg ni gula' detz barcw. Si'c gujc bidzujñ
 guiragajc rebejn lo yujxh ro' nisdoo. Nadaanreni bidzu-
 jñreni lo yujxhga.

Bidzujñ Pabl lo yuj ni laa Malta ni re' lo nisdoo

28 Che bidzujñnu lo yuj ni tre' lo nisdoo, biem-
 beenu yujga najc ni laa Malta. ² Gucnäj rebejn
 ro'c nuure, gule'creni guiboo bahuiireni nuure sa'csi
 cayacnalduxh, cayajbza nisguij. ³ Ca' Pabl te däaz yajg,
 sale'cnini lo guiboo, chela biriyäl te bäl nialajz neñ ya-
 jgga. Saa gudauya'ni ñaa Pabl. ⁴ Che bahuu reben Mal-
 ta li najl bäl nialajzga cayauya' ñaa Pabl, gusloj
 cayäjbreni lo sa'reni:

—Pet rugu'tni bejn ni'c mase bejnni gaan lo nisdoo
 siguijxni xtojlni, sejtmi ñaj.

⁵ Gubijb Pabl ñaani dxejcti bitejb bälga lo guiboo.
 Xhet gujcdi ñaa Pabl. ⁶ Dxejc reben ro'c cabäz fiireni la
 sisiäguij ñaa Pabl o laa sejtmi. Xchero bidxelojreni. Che

bahuiireni xhet gujcdini, gusloj bejnreni ste'ca xhigab,
 räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc
 xcubernadoor Malta. Biojia'nnu rolijzni choñ dxej.
 Huenduxh gujc dade'ga, baniidxni guiraa ni biquiinnu.
⁸ Naga' xtad Publio cayacxhuuni, yu'ni xliaa, cayajczani
 yobrejn. Huihuu Pabl. Guredx-gunab Pabl lo Dios,
 dxejc batzuub Pabl ñaani yejcn, basiacgajcni. ⁹ Che
 gucbee rebenguejdxga abasiajcn beñ racxhuuga,
 bidzujñajreni beñ racxhuu lo Pabl, basiajcn Pabl
 guiraareni. ¹⁰ Ni'c banidx-xliaareni xhidalduxh xhicos,
 luxh che biriinu ro'c, baniidxreni guiralii recos ni biqui-
 innu neñ barcw.

Bidzujñ Pabl guedx Roma

¹¹ Agujc choñ bäii yu'nu ro'c che biu'nu neñ te barcw
 ni siääd Alejandría. Lagajc ro'c bateed barcwga rebäi-
 najl che rsiäb beduxh. Yejc barcwga caj tiop figuur
 xten tiop biuux ni laa Cástor näjza Pólux, rexingan-
 cua'ch dios ni laa Zeus. ¹² Biriinu Malta sonnu neñ bar-
 cw nez guedx Siracusa. Ro'c bia'nnu choñ dxej. ¹³ Dxe-
 jcti biusacnu neñ barcw, sonnu lo nisdoo cheni
 bidzujñlinu guejdx ni laa Regio. Che bara yääl, gubi' te
 bej birii lad sur. Biusacnu neñ barcw. Bara yääl
 bidzujñnu guedx Puteoli. ¹⁴ Ro'c bidxaagnu gaii xpejn
 Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu
 sonnu nez guedx Roma. ¹⁵ Che gucbee rexpejn Jesu-
 crist ni yu' guedx Roma siopsaanu nez Roma, biää-
 drene guedx Foro de Apio näjza stee guejdx ni laa Tres
 Tabernas, ro'c bidxaagreni nuure. Che bahuu Pabl lo-
 jreni, guzutijp lastooni, badeedni xquixtios lo Dios.
¹⁶ Che biu'nu guedx Roma, bateed capitán repres
 ladzña comandant, niluxh basaanni cualaa Pabl te yu'
 cadre cuääzni. Tejtis soldaad biannäj Pabl.

Baluu Pabl xtidx Dios lo reben Roma

¹⁷ Che gudejd choñ dxej, gurejdx Pabl reni rnibee lo
 rexpejn Israel. Che bidxaag sa'reni cadre yu' Pabl, räjp-
 ni lojreni:

—Guejbtu reexamigwä, resa'ä, xhetliidi nani xhet laadi
 benä lo rexpejn Israel, dizana nibälazä xleii toMoisés.
 Niluxh basäureni narä neñ latzguiib guedx Jerusalén,
 dxejcti bateedreni narä ladzña reroman. ¹⁸ Che biejn
 diajgreni xtidxä, rlaiz reguxhtis roman nuslaa narä
 sa'csi xhet benädi te nugu'treni narä. ¹⁹ Niluxh naaddi
 rexpejn Israel guslaareni narä, gunabätis lojpac reii
 César jädle'creni quej ni cabe'creni xcuentä. Niluxh
 narä xhet xquejdi rexpejn Israel cue'cä. ²⁰ Ni'cni
 guredxä la'tu te fiä lojtu, te guininää la'tu, sa'csi rililazä
 lagajc si'c rililajz xpejn Israel sibañsac rebengut, ni'c
 nalibä cadenre.

²¹ Dxejcti räjpreni lojni:

—Nicla tej guijtz gajd reguxhtis xten reguedx Judea
 guxhal loonu xcuentlu, gajdza rexpejñnu ni bidzujñ

ree jiädsan diidx xhet laadi bejnlu. ²² Rlajznu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

²³ Guletireni te dxej guidxagsa'reni. Che bidzujñ dxejga, bidxagsa' xhidalduxh bejñ neñ yu' cadro rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii to-Moisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz rebeñ Israel jiääd. ²⁴ Yu' reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxan xten Dios rediidxre guniini, räjpni lo rextadgoldoonu:

²⁶ Huij, gunii lo rebejnre, scree gojz lojreni: Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbree xhini'c ruhuiitu.

²⁷ Agucnajd lastoo rebejnre sa'csi di rlajzreni chalilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii. Ni'cni direni gusiechlajzreni te gusaan gunreni dojl te gudzucaj Dios xtojñreni.

²⁸ Räjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejñ Israel te gusiejch lajzreni, te gudzucaj Dios xtojñreni. Rniliápac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijl sa'reni lañ ni sääreni.

³⁰ Tiop ijz guläjz Pabl guejdxga neñ yu' ni cualaani. Biuni guiralii rebejñ ni biääd rolijzni. ³¹ Lo guiraa rebejñga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Romanos

Rucuaa Pabl lo rebeṅ guidoo neṅ guedx Roma

1 Narä, Pabl, nacä te xmos Jesucrist, laani gule narä te gusule'ä xtidx Dios loj rebeṅ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guijtz xten reprofet'ga. ³ Rediidx ni rusule'ä najc xcuent Jesucrist, Xi'n Dios, ni najc xagdoos toreei David xcuent tiejxhni. ⁴ Xcuent Xsprit Dxan Dad Jesucrist, najcni Xi'npac Dios. Badeed Dios yäl'ribee lojni, ni'cni gubaṅsacni lo rebeṅgut. ⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeṅ ni rej guideb guedxliuj xtiidxni. ⁶ Luxh nadxaagtu loj rebeṅ ni guleni te chalilajzreni xtiidxni.

⁷ Ruxhaḷä guijtzre lojtu ni yu' guedx Roma, guiraatu ni sanälajz Dios ni bibeetu gactu beṅdxan. Gacnäj Dios ni najc Xtdnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj rujy beṅ diidx xcuent xcäl'rililajztu. ⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist.

¹⁰ Sanuutis canabä lojni, top sajc jädhuiä lojtu si'cni rlazä gunä agujc xchejli. ¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹² Nalajznu, te gustioobnu lajz sa'nu xcäl'rililajz xtidx Dios xten sa'nu.

¹³ Rebetzä rlazä gacbeetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru beṅ xtidx Dios sigajcni salilajzreni guiralajt cadro hua'a loj rebeṅ ni di gac xpeṅ Israel.

¹⁴ Nungäjlpac gusule'ä xtidx Dios loj rebeṅ nani rnii garen-garen didxsaj, sigajc loj rebeṅ griegw, loj renani nayääl, sigajc loj rebeṅ najn. ¹⁵ Rbaali lazä suga'a naj, te gusule'ä xtidx Dios näjza lojtu ni yu' guedx Roma.

Xcäl'ribee xtidx Dios

¹⁶ Sa'csi dina guituiä xcuent xtidx Dios, sa'csi najcni yäl'ribee xten Dios te guslaani lo dojl chutis beṅ nani rlajz chalilajz xtiidxni, ganidtoo reni najc rexpeṅ Israel, dxejcti näjza rebeṅ ni di gac xpeṅ Israel. ¹⁷ Sa'csi xtidx Dios rusule'ä xho nanab chalilajz te beṅ te gacni te beṅsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beṅ xtidx Dios, najcni

te beṅnaya nez lo Dios, nabaṅnäjni Dios xcuent xcäl'rililajzni."

Rextojl beṅ

¹⁸ Xcälrdxe'ch Dios nani yu' xhaguibaa siajbni yejc rebeṅ nani gun dojl, nani rlajz gun cosguijdx, nani di gusaan guisieed sabeṅreni didxgulii. ¹⁹ Sa'csi anancheereni nani sajc gan beṅ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰ Cheni birixtiejli guedxliuj, recos nani di gacdi fii beṅ xcuent Dios, si'c xcäl'ribeeni ni najc par tejpas, si'c xtujx xtenni, huenliisi ruzeṅreni sa'csi ruluilojreni recos ni ruzeṅ nani benchee Dios. Guiraa reni'c ruluiloj najcni Gueb Dios ni rajp yäl'ribee par tejpas, ni'c di gacdi guiniireni loj Dios direni niembee xhini'c rlajz Dios gunreni. ²¹ Ni'cni, mase biembeereni Dios, direni niliä'p xpala'nni te gaṅreni Gueb Dios, dizareni nudeed xquixtios lojni. Alga guyalajz gujcreni, bicäy xcariejnreni, naareni hueen najc gunreni si'ctis ni jiajb yejcreni, si'cni rsia' lajzreni neṅ lastooreni. ²² Caniireni nanduxhreni, per direni gan, nayäälreni. ²³ Gulälazreni xcäl'dimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjli.

²⁴ Ni'cni gulälaz Diosreni, basaanni gunreni si'ctis ni rlajzreni. Bejnreni dojl con resa'reni. ²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzaren nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcäl'latsiareni, lo yälxtujy xtenreni. Diru regunaa guesnäj niguii, lagajc sagunaareni resnäjreni. ²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rlajzreni jiuereni Dios, basaanti Dios suyu' cosguijdx xcariejnreni, te chanuutisreni lo xcäl'latsiareni, rujnreni recos ni xhet laadi.

²⁹ Guidxareni dojl, näjza cosguijdx, näj yäl'ruguilajz xhixten sa'reni; rugu'treni beṅ, rujnreni yäl'rsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizaren didxxhii. ³⁰ Rniyaj sa'reni, rdxe'chreni lo Dios, guyalajzreni, dipacreni guitujy, rliä'preni lagajc xpala'nreni, entis latsiacoob rbäx-tiejreni, guyalajzreni lo xcuzejnreni, ³¹ nadduxhreni, xheti xcariejnreni, xhet sajc di xtiidxreni ni ria'nreni lo

sabejnreni, direni chanälajz sa'reni si'cni nungäjł gacni, dizareni gulasajz sa'reni. ³² Luxh mase agucbeereni gun Dios yälğuxhtis lojreni, najnzareni nungäjł guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

Dios rujn yälğuxhtis con didxguliipac

2 Ni'cni, ħcanejz chäätu, la'tu beņguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälğuxhtis, sa'csi luj rgubeelu sabejnlu, lagajcza luj rujnlu lagajc dojlga. ² Nancheenu sujn Dios yälğuxhtissa'c loj renani rujn sa' dojlga. ³ Beņ guedxliuj ni rgubee loj renani rujn dojl, luxh sigajcza rujnlu, ħla rujnlu xhigab sidedcaj gun Dios yälğuxhtis lojlu xcuent xtojllu, ä? ⁴ O ħla rbälazlu ni rujn Dios, najcni huenduxh, lacti guroob najc xcälru-laslažni, rapduxhzani pasens? ħLa dilu gan dee najc ni gacnäjlū gusiechlažzlu te guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechlažzlu, cagutajllu yälğuxhtis ni gaclu che guidzujñ dxej ni gun Dios yälğuxhtis loj rebeņ guedxliuj, ⁶ siguijx Dios loj tejgatu xcuent dzuun nani bejn tejgatu. ⁷ Loj rebejn nani rlažztisreni guibaŋsa'c, ni gusoob xtiidxni, sudeed Dios yälñabajñ par tejpas sa'csi gudiilreni xhaniduj näjza go'preni xpala'nreni loj Dios, rlažzreni guibajñreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusooobreni reyälłatsiaj, redidxguijdx. ⁹ Guiraa rebeņ guedxliuj ni rujn dojl sidejd trabajwduxh näjza sac-huin lastooreni; ganid rexpeņ Israel, dxejcti näjza rebeņ griegw. ¹⁰ Loj guiraa rebejn nani rujn cos-hueen, sudeed Dios xhaniduj, näjza bala'ñ, näjza yälrbecdx lastooreni, ganid rexpeņ Israel, dxejcti näjza rebeņ griegw.

¹¹ Sa'csi tebloj najc guiraasi rebejn nez loj Dios. ¹² Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälğuxhtisreni xcuent xtojłreni. ¹³ Xhet ganaxdi renani rucuađiajgtis xleii Moisés najc beņnaya nez loj Dios; rebejn ni rusooobpac rexleii toMoisés, reni'c najc beņnaya loj Dios. ¹⁴ Yu' xhidal bejn ni di gumbee xleii toMoisés, dizareni gac rexpeņ Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. ¹⁵ Recossa'c ni rujnreni rululoj nezyusa'c ni yu' lastooreni. Xcäriejnreni rululoj xhini'c loj guiraa nani rujnreni najc cos sa'c, xhini'c najc dojl. ¹⁶ Guiraa recosre sajč che guidzujñ dxej ni gun Dios yälğuxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejč sisiojb guiraa rediidx ni cagusule'ä lojtu.

Rexpeņ Israel näj xleii toMoisés

¹⁷ Luj ni laalu xpeņ Israel, ni rniilu sanäpaclu xleii toMoisés, rniduxhlu najclu xpeņ Dios, ¹⁸ rniilu nancheezalu xhini'c rlažz Dios gunlu, anajnzalu xhini'c

najc hueenru sa'csi bisiedsa'cpaclu leii. ¹⁹ Rchalolu sajč guluiilu nezyusa'c lo rebejn nani najc si'c lotiä'p, sajč guzanijlu xcäriejn reni nacäy xcäriejnreni. ²⁰ Rchalolu najclu mastr lo renani nayääl, najczalu mastr lo rebiu-ux, sa'csi nansa'clu leii, luxh lojni caj guiraa yälñajn näjza guiraa didxguliipac. ²¹ Ni'cni rniä lojlu, luj ni caguseed xtee bejn, ħħhicuent dilu guseed lagajc luj? Luj ni rusule'lu diidx na'c cuan bejn, ħħhicuent rbajñlu? ²² Luj nani rniilu na'c guesnäjni te ni di gac chäälñi, ħla resnäjlū nani di gac chäällu, ä? Rdx'e'chlu xcuent rebanäjb, ħħhicuent rbäälū xhicos neņ xquidoo rebanäjb, ä? ²³ Luj rlažzlu chä'p xpala'nlu sa'csi najñlu leii, ħla rusaxntujylū Dios sa'csi dilu gusoob xtidx leiiga, ä? ²⁴ Bahuii xho rebejn nani di gac xpeņ Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

²⁵ Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. ²⁶ Ni'cni palga te bejn ni di chu beega, luxh rusooobni guirliipac xtidx leiiga, ħla di gacdi guchaagni cuent najcni si'c te nani yu' beega, ä? ²⁷ Bejn nani di chu beega, luxh rililajzni guiraliipac xtidx leiiga, sujñni yälğuxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. ²⁸ Sa'csi xhet guiraadi rebejn ni yu' beega najc rexpeņ Israel, luxh di beega ni ru' bejn gun gusoobpac bejn xtidx leiiga. ²⁹ Najcpac te xpeņ Israel nani najcni neņ lastooni, nani yu' bee lastooni, rusooobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nñi, xhet bejñdi.

3 ħħhini'c sacnäj te bejn najcni te rexpeņ Israel, ä? O ħħhi sajč chuni beega? ² ħEmpac sacduxhni! Ganidtoo, sa'csi loj rexpeņ Israel badeed Dios xtiidxni. ³ Mase yu' renani di nililajz diidxga, ħla ni'cni xhet sajčdi diidx ni bia'n Dios loj rexpejñni, ä? ⁴ ħħho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu suluii laaca rujnlu, te che gaclu yälğuxhtis, nicla tej xtojllu di guidxäjł.

⁵ Palga xcälłatsiajñu ruluiiru najc Dios huenduxh, ħħhini'c guiniinu dxejč? Palga gun Dios yälğuxhtis nurnu, dxejč tednu trabajwduxh, ħla rujñni latsiaj loonu, ä? (Caniä si'c te beņ guedxliuj naj.) ⁶ ħħho gacni si'c! Paru najcni si'c, ħħho mood gun Dios yälğuxhtis loj rebejn guedxliuj?

⁷ Paru redidx-xhii ni rniä riliä'p ru xpala'n Dios näjza xtidxliini, ħħhicuent gunni yälğuxhtis narä si'c te beņdojl? ⁸ Yu'za bejn ni canii didx-xhii, najreni cayäjpnu lo rebejn: "Colyejñ cosguijdx te guilulojñi recoshuen." Per rebejn ni canii si'c sidzujñ dxej gacreni yälğuxhtis.

Guiraanu najcnu beņdojl

⁹ ħDxejca'? ħLa najcnu beņhuenduxhru lojreni, ä? Dini gac; tebloj abile'cnu yälquij xten rexpeņ Israel con rebejn ni di gac xpeņ Israel, sa'csi guiraareni yu'reni lo dojl. ¹⁰ Si'cni caj lo guijt:

Ruti te bensa'c, nicla tejni.
¹¹ Ruti te bejn ni racbee, ruti chu tej nani rguil Dios.
¹² Guiragajcreni abirii lo xnejz Dios, teblojsi xhet sajcdireni.
 Ruti chu tej ni rujn cossa'c, nicla tejni.
¹³ Ro'reni rii ganax didxgujdx, najcni si'c te baa ni naxal, rusqueereni con lujdxreni, didxlatsiaj rii ro'reni najcni si'c benen ni yu' ro' te bäl-nialajz.
¹⁴ Ro'reni entis cague, entis canii didxrdxe'ch lo sa'reni.
¹⁵ Ni'reni ruxunli saxhe' xtiejn sa'reni.
¹⁶ Cadrotis rijreni rujnreni latsiaj, ruteedreni sa'reni trabajw.
¹⁷ Direni gumbee nezyuj ni ruscuexdilajz.
¹⁸ Niclaza guidxelojreni Dios.
¹⁹ Racbeenu najc rediidx nani caj lo xleii Dios par re-bejn ni rnibee leii lojreni, te jäuu ro' guirali rebejn, te guiraa reben guedxliuj gacbeereni yu' xtojreni nez loj Dios. ²⁰ Sa'csi mase gusoob bejn guira'ti diidx ni caj lo leii, di leiiga gudzucaj xtoj bejnga, sa'csi leiiga najc nani guluii dojl ni yu' nen lastooni.

Ruslaa Dios lo dojl xcuent yälirililajz xtiidxni

²¹ Naj ruluii Dios stee mood guibicaj xtojlnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. ²² Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliza nani salilajz, sa'csi tebloj najcnu nez lojni. ²³ Sa'csi guirali rebejn guedxliuj abanijt lo Dios, direni guiga' guidzujreni lo xnezyuj Dios. ²⁴ Niluxh balaslajz Dios nuunu, banidxxlia'ni loonu yäl'nabannaya nez loj Dios sa'csi Jesucristis gudijx yäl'guxhtis xten dojl che baxhe'ni xtiejn ni lo cruzj te badzucaj ni xtojlnu. ²⁵ Baxhał Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojl chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibanaya bejn lojni. Galoo gojptis Dios pasens rebejn, dini niujn yäl'guxhtis rextojlreni, ²⁶ sa'csi acanajn Dios guc gunni yäl'guxhtis redojlga, te si'c guiluiini xcäl'nayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷ Ni'cni ¿con yäl'naro? ¿Con yäl'bindaan? ¿Xhet sajcdini! ¿Xhi leii rudzucaj xtojlnu? ¿La leii najc ni rnii jiennu dzunsa'c, ä? ¿Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. ²⁸ Dxejc sajc guiniä lojt chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujn redzunsa'c ni caj lo leii.

²⁹ ¿La najc Dios Xtiooztis reppen Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guiroc cuaa bejn. ³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl

rebejn ni xhet beedi guyu' sa'csi huililajzreni xtiidxni. ³¹ ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

Xcälirililajz toAbram

⁴ ¿Xhini'c sajc guiniinu xcuent toxtadgoldoonu, Abram? ² Paru niajc toAbram benaya nez loj Dios por redzuun ni bejn, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj redixre:

Huililajz toAbram xtidx Dios, ni'c bachaag Dios cuent najcni te benaya nez lojni. ⁴ Meel nani rca' te bejn ni rujn te dzuun, meelga najc ni riäl xca'ni, xhet rcaxlia'dinini. ⁵ Luxh nani rililajz xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te benaya nez loj Dios, sa'csi huililajzni xtiidxni. ⁶ Sigajcza naj toDavid, chicbaa bejn nani ruchaag Dios cuent najcni te benaya luxh di niqiiin niujn redzuun ni caj lo leii. Räjpn:

⁷ Chicbaa renani abaslaa Dios lo xtojreni, renani abiäuu loj xtojreni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi niinu:

“ToAbram gujc te benaya nez loj Dios sa'csi huililajzni xtidx Dios.” ¹⁰ Guc bidxaag cuent najcni te benaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yäl'naya sa'csi huililajzni xtidx Dios che gajdlini chu bee te gacni xtad guiraa renani rililajz lał ni xhet beedi yu'reni, te näjza laareni guidxaag cuent najcni benaya nez loj Dios, ¹² te gaczani xtad guiraa renani yu' bee ni huililajz xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälirililajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yäl'nasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te benaya nez loj Dios sa'csi huililajzni xtidx Dios.

¹⁴ Sa'csi paru renani rusoob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram. ¹⁵ Che yu' te leii, luxh yu' chu di gusoobni, dxej rdx'ch Dios loj bejn. Cadro xheti leii, xhetiza xtojreni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios.

¹⁷ Si'cza caj lo xtidx Dios, caj redixre: “Abenä gaclu xtad xhidal renación.” Si'c bia'n Dios diidx loj toAbram, Gueb Dios nani gudeed yäl'nabajn loj rebengut, nani rnii xcuent recos nani gajd gac ascanu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujnci xtad xhidajl nación, te gusojb xtidx Dios ni guniini che räjpni: "Scree gac xhidajl rexagdoolu." ¹⁹ Di toAbram nunijt xcälirililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu. ²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. ²¹ Anajnni rajp Dios yäl'nibee te gunni guiralii nani bia'n diidx gunni. ²² Ni'c bachaag Dios cuent najcni te beñnaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: "Bidxaag cuent najcni te beñnaya nez loj Dios sa'csi huililajzni xtidx Dios", ²⁴ näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebengut, sidxaag cuent najcnu beñnaya nez loj Dios. ²⁵ Bacuaareni Jesucrist lo cruzj te gudijxni rextojlno nez loj Dios, luxh gubañsacni lo rebengut, te gac gacnu beñnaya nez loj Dios.

Xhi rsiajc bejn che najcreni beñnaya nez loj Dios

5 Ni'cni che rililajznu xtidx Dios rudzucuj Jesucrist xtojlnu rajcnu beñnaya nez loj Dios, ni'cni rus-cuecdxini lajznu. ² Sa'csi gujt Jesucrist, sa'csi gubañsacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yäl'nabajn, su'pacnu lo xcälrdimbicha' Dios. ³ Luxh xhet ni'ctis, sajcza guibalaaznu che tednu trabajw, sa'csi najnnu trabajwga sujñ jia'pnu pasens. ⁴ Luxh che rajpnu pasens rajcnu te benguyajlru; che anajczanu benguyajl, rililazsa'crunu. ⁵ Luxh yäl'rililazsa'cnu dini gusanxtujy, sa'csi yäl'sanälajz ni rajp Dios ruchaj lastoonu sa'csi neñ lastoonu rbäjz Xsprit Dxan xten Dios ni baniidxni loonu.

⁶ Lał ni xhetliidi sajcdi jiennu lagajc xcuentnu te guibicaj xtojlnu, che basa' dxej biääd Jesucrist te gujtñi lo cruzj xcuent rebendojl. ⁷ Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxälj te bejn ni xcäjb guet lacuaa te beñsa'c. ⁸ Luxh Dios baluiloj xcäl'rinälajzni xcuent nuurnu sa'csi lał ni yugajcnu lo dojl, gujt Jesucrist lo cruzj xcuentnu. ⁹ Aticaxh ñaj ni najcnu beñnaya nez loj Dios sa'csi baxhe'ni xtejjñi te gubicaj xtojlnu, ñaj sidedcaj gacnu xcäl'guxhtis Dios. ¹⁰ Palga lał ni rdxe'chnu lo Dios, basiäljñi lajzni xcuentnu sa'csi gujt Xi'nni lo cruzj, ñaj ni abiälj lajzni, suslaani nuure lo dojl sa'csi gubañsac Xi'nni loj rebengut. ¹¹ Luxh xhet ni'ctis, sibalazñajnu Dios xcuent Dad Jesucrist, sa'csi xcuentni ara'pnu yäl'rbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguii biu' dojl lo guedxliuj, luxh xcuent dojl biäädza yäl'gujt, gudejdti yäl'gujt loj guiraa rebejn, sa'csi guiraa rebejn bejnreni dojl. ¹³ Cheni gajd xleii toMoisés chu lo guedxliujre, alabejn rebejn dojl, per di niajcdi nucuaqijñi rebejn sa'csi xheti leii.

¹⁴ Luxh empac gujt rebejn neñ redxej ni gubajn toAdán hasta redxej ni gubajn toMoisés, mase direni niujñ la-gajc dojl nani bejn toAdán; luxh ruluiloj yu' chu stee bejn nungäjł jiääd.

¹⁵ Luxh nani runidx-xlia' Dios dini gac si'c najc xtojł toAdán. Dini gac si'c sa'csi palga xcuent dojl ni bejn toAdán, gujt xhidalduxh bejn, cuantimaaz ñaj sunidxxlia' Dios yäl'nabajn par tejpas loonu por xcäl'rulaslajz Dios, nägajc por xcäl'rulaslajz Dad nani laa Jesucrist.

¹⁶ Luxh nani runidx-xlia' Dios loonu dini gac si'c yäl'runi-jt ni biääd loonu xcuent dojl ni bejn toAdán; sa'csi xcuent tejtis dojlga biääd yäl'guxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl, te xcuent ni bejn Jesucrist sajcz gac bejn beñnaya nez loj Dios. ¹⁷ Palga xcuent dojl ni bejn tejsi bejnğa gunibee yäl'gujt lo guiraa bejn, cuantimaaz lo yäl'nabajn par tejpas sinibee guiraa reni rca' xcäl'rulaslajz Jesucrist näjza renani rcaxlia' lojni yäl'racnaya nez loj Dios.

¹⁸ Ni'cni sigajc ni biääd yäl'guxhtis lo guiraa rebejn guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidajl bejn gujc beñnaya nez loj Dios, cua'reni yäl'nabajn par tejpas.

¹⁹ Nalajznu sigajc ni baniijt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajcz beñnaya nez loj Dios xcuent tej niguii ni basoob xtidx Dios. ²⁰ Ni'cni badeed Dios xleii toMoisés, te guzeñru dojl. Niluxh cadro guyuduxh dojl, ro'c nanabza chuduxhru xcäl'rulaslazduxh Dios, ²¹ te sigajc ni gunibee dojl guyu' yäl'gujt, sigajcza guinibeeru xcäl'rulaslajz Dios te jia'cnu beñnaya nez loj Dios, te xca'nu yäl'nabajn par tejpas xcuent Xi'nni, Dad Jesucrist.

Agujtñu lo dojl per nabaññajnu Jesucrist

6 ¿Xhini'c guiniinu, ñaj? ¿La sajcz guidxunrunu lo dojl te tioobru xcäl'rulaslajz Dios, ä? ² ¿Gurniälojtñu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajñrunu lo dojl? ³ ¿La ditu gan, che gurobnisnu con laj Jesucrist, najcni si'c ni näjza nuurnu gujtñu si'c ni gujt Jesucrist? ⁴ Sa'csi che gurobnisnu bigatznäjñuni si'c lo yäl'gujt, te sigajcni huäjs Jesucrist lo yäl'gujt xcuent xcäl'rnibee Dios, sigajcza näj nuurnu sajcz guidxunnu lo te yäl'nabañcoob.

⁵ Sa'csi palga gujcnu tejsi con laani lo xcäl'gujtñi che birobnisnu, sigajcza sajczu tejsi con laani lo yäl'nabañsac lo rebengut. ⁶ Ni'cni xcärienbiejwñu cuaj lo cruzj con laani, te badzucajni rextojlno, te di gacdiru guinibee dojl loonu. ⁷ Sa'csi nani agujt, di gacdiru guinibee dojl lojni. ⁸ Palga nuurnu agujtñu con Jesucrist, rililaaznu sibañsaczanu con laani. ⁹ Sa'csi nadonpacnu gubañsac Jesucrist loj rebengut, ni'c diruni guet, diru yäl'gujt ga'p yäl'rnibee lojni. ¹⁰ Che gujt Jesucrist, gujtñi xcuent dojl, luxh diru gacdi guinibee dojl laani par tejpas; ñaj ni gubañsacni, nabajñni nez loj Dios. ¹¹ Ni'cni la'tu colguchaag cuent najctu si'c te bengut lo

dojl, luxh nez loj Dios, colguchaag cuent nabannäjtü Jesucrist.

¹² Ni'cni na'c gusaantu guinibee dojl tiejxhtu te guntu si'ctis ni rlajz tiejxhtu. ¹³ Na'cruza gusaantu jiajb guideb lagaa tiejxhtu lo dojl te guntu cosgujdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb lagaa tiejxhtu te guntu recoshueen si'c ni rlajz Dios guntu. ¹⁴ Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'rulaslajz Dios.

La'tu najc si'c remos

¹⁵ ¿Xho gacni naj? ¿La sajz jienrunu dojl naj ni dirunu chu lo leii sa'csi yu'nu lo xcäl'rulaslajz Dios, ä? ¿Xho gacni si'c! ¹⁶ La'tu nansa'ctu palga yu'tu si'c te mos loj te lam te gusobdiajgtu xtiidxni, najcpactu xmos bejn nani rusobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädna yälgujt lojtu. Palga gusoobtu xtidx Dios, ni'c najc xlamtu. Dxejc sajctu bejnaya nez loj Dios. ¹⁷ Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. ¹⁸ Luxh agułaatu lo dojl, biädjiajctu xmos Dios lo dzunsa'c. ¹⁹ Narä cagusule'ä diidx con sa' didx guyasire sa'csi gajctu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bejnaya nez loj Dios.

²⁰ Sa'csi che gujctu xmos dojl, di rextidx Dios guinibee la'tu. ²¹ Najä, ¿xhini'c bejntu gaan che gujctu xmos dojl, bejntu recos ni rtuinäjtü naj? Ni xnezyuj recosga rdzujn loj yälgujttis. ²² Per naj, sa'csi agułaatu lo dojl, abiu'tu najctu xmos Dios, sujntu sajctu bejnaya nez loj Dios, luxh xnezyuj recoscoobre rdzujn lo yäl'nabannäjtü Dios par tejpas. ²³ Xcäl'rajx xten dojl najc yälgujt, per nani runidx-xlia' Dios najc xcäl'nabannäjtü Dios par tejpas xcuent ni bejn Jesucrist xtdnu.

Yäl'ruluii ni rudeed yälguchnaa

7 Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? ² Najcni si'c te gunaa nani bachnaa te niguii. Nanabpac cuäznäjni chääl'ni guideb nabajnni. Si'c rnibee leiiga. Palga guet chääl'ni, diru gacdi guinibee leiiga lojni xcuent chääl'ni. ³ Ni'cni, laj ni nabajnni chääl'ni gunaaga, palga cuäznäj gunaaga ste'ca niguii, cayujnni dojl sirilajni gunaguiddx. Palga agujt chääl'ni gunaaga, agułaani lo leiiga, sajz guchnaani stee niguii, xhet dojldi cayujnni, dizani guirilaj gunaguiddx.

⁴ Ni'cni la'tu, rebetzä, sigajcza agułaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruz, te naj sajz jiu'tu lo ste'ca bejn, loj lagajc Jesucrist nani gubansac loj rebengut te sajz jiennu redzunsa'c ni rlajz Dios jiennu. ⁵ Sa'csi laj ni gubajnnu lo yäl'nabanniejwga, lagajc rediidx nani rnii leiiga di gacdi gun bejn, lagajc recosga rlajz gun tiejxhnu, luxh

si'c sozaatisnu lo xnezyuj yälgujt. ⁶ Naj abiriinu lo leiiga, sa'csi agujtnu lo leiiga nani guinibee loonu galoo. Naj con xpirtcoob ni yu' nejn lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguij lajzlu rexhixten bejn." ⁸ Ni'cni lagajc diidx ni caj lo leiiga bejn guyuguij lazä rexhixten bejn sa'csi nancheä najcni dojl. Paru xheti leii, xhetiza dojl, agujtni. ⁹ Galoo gubannä xhet leiidi nanä, luxh che biäd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. ¹⁰ Luxh baxhaj Dios leiiga loonu te jiuäni, te xca'ä yäl'nabajn, luxh alga bazenni benä dojl, banitä nez loj Dios, gutäti dxejc. ¹¹ Con leiiga, basguee dojl narä, bejnna narä si'c te bengut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. ¹³ ¿Dxejca? ¿La nani najc te coshueen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te bejn guedxliujre, nacä xmospac dojl. ¹⁵ Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. ¹⁶ Naj palga narä runä latsiaj nani dipacna rlazä gunä, lagajcza ni'c ruluu hueenca najc leii. ¹⁷ Naj, diruni gac narä ni cayujn latsiaj, sa'csi yu' dojl nejn lastoä, ni'c ni cayujn runä latsiaj. ¹⁸ Sa'csi narä nanä nejn lastoä, nalajznu lo tiexhä, xhetliidi cossa'cdu yu'; sa'csi rlazä gunä cossa'c, per dina gacdipä te gunäpac recossa'cga. ¹⁹ Sa'csi dina gunä redzunsa'c nani rlazä gunä, alga latsiaj nani diru rlazä gunä, ni'c runä. ²⁰ Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

²¹ Ni'cni narä, nani rlazä gunä redzunsa'c, rdxälä leiire: yu'pa dojl tiexhä. ²² Sa'csi nejn lastoä, rlazäpac gusobä diidx xten xleii Dios. ²³ Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladznaa xleii dojl nani yu' guideb lagaa tiexhä.

²⁴ ¿Proobza narä! ¿Chuni'c guslaa tiexhä ni nungäj guet xcuent dojl? ²⁵ ¿Xquixtios loj Dios sa'csi Dad Jesucrist sajz guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlajz gusoob xtiidx dojl, chuni lo xleii dojl.

Yäl'nabajn ni najc xcuent Sprit Dxi xten Dios

8 Ni'cni naj rut rajcni rbe'c xcäl'quij renani ahuililajz xtidx Jesucrist, renani diru jiu gunreni latsiaj ni rla-

jz gun tiejxhrene, alga riurureni rujnrene ni rnibee Sprit Dhan xten Dios ni rbäjz neñ lastooreni. ² Sa'csi leii xten Sprit Dhan xten Dios ni rudeed yäl'nabajñ xcuent Jesucrist, abaslaani narä lo yäl'nibee xten xleii dojl näjza yäl'gujt. ³ Sa'csi nani di niajcdi niujñ leibiejw, sa'csi dini niajcadip lo rebenguedxliuj te gacreni beñnaya nez loj Dios, ni'c bejn Dios che baxhañni Xi'nni Jesucrist, si'c te beñ guedxliujre xcuent dojl, te bejnii yäl'guxhtis lo dojl ni rnibee tiejxh bejn. ⁴ Te si'c gac xcäl'guxhtis xten leibiejw lo tiejxh nuurnu, renani dirunu gusoob nani rlaiz gun tiejxhnu, sa'csi ñaj rbajñnu si'c ni rnibee Sprit Dhan xten Dios ni yu' neñ lastoonu.

⁵ Sa'csi renani rusoobtis nani rlaiz gun tiejxhrene, rujntisrene xhigab xcuent redojlga, luxh renani rusoob xtidx Sprit Dhan xten Dios rujntisrene xhigab xcuent nani rlaiz Dios gunrene. ⁶ Sa'csi renani yu'tis yejcreni nani rlaiz gun tiejxhrene, sejtrene, sinijtrene; luxh renani yu'tis yejcreni nani rni Sprit Dhan Dios, reni'c sibecdxilajzrene, sica'reni yäl'nabajñ lo Dios par tejpas. ⁷ Te xcäriejn nani riutis ni rlaiz gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunni. ⁸ Renani nabajñtis te gunrene latsiaj ni rlaiz gun tiejxhrene di Dios guibalazñajrene.

⁹ Luxh la'tu dirutu gun si'ctis ni rlaiz gun tiejxhtu, ni'cni rujntu si'c ni rlaiz Sprit Dhan xten Dios guntu, palga rbäjzni neñ lastootu. Palga yu' chu tejtü ni di Sprit Dhan cuääz neñ lastooni, di ni'c gac xpejñni.

¹⁰ Palga rbäjz Jesucrist neñ lastootu, agujt tiejxhtu xcuent dojl, xprittu nabajñ sa'csi anajctu beñnaya nez loj Dios. ¹¹ Luxh palga neñ lastootu rbäjz Sprit xten nani baspañsac Jesucrist lo rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliujre xcuent Xprittu nani yu' neñ lastoonu.

¹² Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlaiz gun tiexhnu. ¹³ Sa'csi palga cayujntu si'c ni rlaiztis gun tiejxhtu, sejtactu. Palga nabajñtu xcuent Sprit Dhan xten Dios ni rbäjz neñ lastootu, sibälaztu latsiaj ni rlaiz gun tiejxhtu, sibaññajtu Dios par tejpas.

¹⁴ Sa'csi guiraa renani ruluu Sprit Dhan xten Dios guiraa reni'c najc rexi'n Dios. ¹⁵ Naj ditu nica' te sprit xten te mos te chusactu lo yäl'rdxejb, alga cua'tu sprit xten ni najc si'c te bisiäjb ni cua' bejn si'c xi'npacni, ñaj najcnu xi'nni, ni'cni sajc gäbnu lojni: "Guejblu, Xtadä." ¹⁶ Sa'csi lagajc Sprit Dhan xten Dios ruluu loj xprittu, najcpacnu xi'n Dios. ¹⁷ Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdnu neñ redxejre, digacdi gun tebloonureni con yäl'rdimbicha' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäjzrene, yuduxhrene gaan fiireni dxej che guluuloj Dios chuni'c najc rexi'nni. ²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlaizdi recosga, per sa'csi si'c bejn Dios, ni cabäjztis ²¹ guslaapacni guiraa recos ni

bencheeni lo guedxliujre lo xcäl'rnibee yäl'gujt, yäl'rnitloj, te dxej sajc jiu'ni lo yäl'rbedxi xten xcäl'rdimbicha' xten rexi'n Dios. ²² Guiraa recos ni gulecxtiej Dios lo guedxliujre entis roonrene, guira dxej rdejdrene trabajw, si'c rdejd te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dhan xten Dios neñ lastoonu, roonzanu cabäüznu dxej cheni xca' Dios nuure si'c rexi'nni, cheni guscoobzani tiexhnu. ²⁴ Sa'csi xcäl'rililaaznu ni rbäüznu, ni'c bejn guilaanu luxh yäl'rbäjz ni guyasi rien, di ni'c gac yäl'rbäjz, sa'csi çchu laa ni cuääz xcuent te cos ni ala bahuiini? ²⁵ Palga cabäüznu xcuent te cos ni gajdnu guihuii, rbaali laaznu, rsiudzu'tznu rbäjznu guihuiinu gacni.

²⁶ Sigajcza racñaj Sprit Dhan xten Dios nuure cadre xheti yäl'rutijp laaznu sa'csi nicla guidonnu xho mood riäjñ guiniab bejn lo Dios. Luxh lagajc Sprit Dhan ni yu' lastoonu rniabni lo Dios xcuent nuure con yäl'rbedxneñ nani nicla gajd bejn gäb con diidx xho najcni. ²⁷ Dios, nani rula'tz lastoonu, nanchee xhini'c rniab Sprit Dhan xtenni xcuent nuurnu, sa'csi rniabni si'cpac ni rlaiz Dios guiniabnu xcuent rexpejñpac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunrene xtzuunni rsiajcrenini te gun Dios gac recosga par xcäl'nasa'creni. ²⁹ Sa'csi renani biembec Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani guleni galooli, reni'c gurejdxni; renani gurejdxni, bejnzani najcreni beñnaya nez loj Dios; renani bejnii najcreni beñnaya nez loj Dios, gulä'pzeni xpala'nrene.

³¹ çXhixhni'c guiniinu xcuent dee? Palga yu' Dios xlaadnu, çchuxh ni'c najc ni gun gaan loonu? ³² Dios nani di nudxojn Xi'nni, nani cuäjb cuaj Xi'nni lo cruzj te gujtni, te gudijxni xcuent xtojñnu, çxho dini guniidx loonu xcuent Xi'nni guira'ti nani rquiinnu, ä? ³³ çChuni'c sajc cue'c xhi xcäl'quij reni agule Dios nez lo Dios, ä? Ni lagajc Dios najc nani rni najcnu beñnaya nez lojni.

³⁴ çChuni'c najc nani cue'c xhi xcäl'quijnu nez lo Dios? Jesucrist najc nani gujt por nuure, luxh et ni'ctis. Laani gubañsaczani loj rebengujt, luxh ñaj sobga'ni xladbee Dios cadre rnibeeni; laazani cabejdx canabni lo Dios xcuentnu. ³⁵ çChuni'c sajc gudzucaj nuurnu lo yäl'sanälajz xten Jesucrist: trabajw, o yäl'xliajs, o yäl'rusacsí, o yäl'rliaan, o yäl'xhabääl, o yäl'rdxejb, o te spaad, ä? Nicla tejni. ³⁶ Si'c ni caj lo guijtz ni caj xtidx Dios:

Xcuentlu, sa'csi najcnu xpejñlu caye'tnu guixe-guixee. Ruchaagreni cuent najcnu si'c xiil ni aguro' te ju't bejñni.

³⁷ Luxh loj guiraa recosre, sujñpacnu gaan xcuent nani sanälajz nuure, sa'csi sacñajpacni nuure. ³⁸ Sa'csi anancheä nicla yäl'gujt, nicla yäl'nabajñ, nicla rexangl Dios, niclaza renani rnibee, nicla recos ni yu' ñaj, niclaza recos nani churu gac, niclaza yäl'milaagwr, ³⁹ nicla jiaroduxh, niclaza jiajtpac, niclaza xhitis cos ni

guc-chee, nicla tej redee di gacdi gudzucaj nuurnu lo xcäl̄sanälajz Dios, yäl̄sanälajz ni rajpza Dad, Jesucrist.

Dios agule reben Israel

9 Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxan xten Dios cagululii xcärienä laaca rniä; ² cayac-huinduxh lastoä, sanuutis yäl̄xliajsga. ³ Sa'csi narä rlazä malaii sajç laga-jc narä nitloä lo Dios te sajç gacnäã resa'ä lo guedxliujre, rexpejn Israel. ⁴ Sa'csi laareni najc xagdoö toIsrael, luxh laareni nungäj̄l gacreni si'c xi'npac Dios. Gubannäj̄ Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen guidoo. Sica'reni reyäl̄nasa'c xten Dios palga jiuireni xtiidxni. ⁵ Laareni najc rexagdoö xten toxtadgoldoönu ni gubajn agujc xhero. Jesucrist gujczä xagdoö xten toIsrael che gojlni si'c te bejn guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoö toIsrael najc xpejn̄pac Israel. ⁷ Diza guiraa reni najc rexagdoö toAbram gac xi'nguliipacni sa'csi räjp Dios lo toAbram: "Rexagdoöoolu nani guigab najc reni gac xagdoö Isaac." ⁸ Ni'cni xhet guiraadi rexagdoö toAbram najc rexi'n Dios, xtebtis renani chalilajz xtiidxni, reni'c najc xi'nni. ⁹ Sa'csi bia'n Dios diidx loj toAbram: "Stebijz, lagajc bäiire guibisacä, te dxejc chu te xi'n Sara."

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chääl̄ni, toxtadgoolnu Isaac. ¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: "Xingangaloolu gac xmos xinhuinlu."

¹³ Si'cza caj lo guijtz rediidxre: "Sanälazä Jacoob, niluxh bidxehnää Esaú."

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! ¹⁵ Sa'csi räjp Dios loj toMoisés: "Sulaslazä chutis bejn nani rlazä gulaslazä, sacnäã chutis bejn nani rlazä gacnäã." ¹⁶ Ni'cni dini gac xcuent ni rlajz rebejn gac, dizani gac xcuent nani rujn rebejn. Rajctisni si'c rlajz Dios nani rulaslazä bejn. ¹⁷ Ni'cni caj lo guijtz xten Dios che gunii Dios xcuent Faraón: "Narä benä gujclu reii xten Egipto te guluiloj xcäl̄rnibeä, te guiliä'p bejn xpala'nä guideb guedxliujre." ¹⁸ Rulaslazäni rebejn nani rlajztisni, runnadipzani lastoo bejn nani rlajztisni.

¹⁹ Naj la'tu siniitu loä: "¿Xhicuent rucuaquijni bejn? ¿Chuni'c sajç sudzu'tz nez loj nani rlajzni gac, ä?"

²⁰ ¿Chuxh luj, bejn guedxliuj, te jieinäj̄lu Dios? Xhixh säjb te gues loj nani bencheeni: "¿Xhicuent bejnlü narä scree?" ²¹ Gurniäl̄ojlu. Bejn nani runchee guejs, ¿la di gacdi gunni si'ctisni rlajzni con bajnga, ä? ¿La di gacdi guncheeni te guesa'c nägajcza te guesyuj ni xhet sirbdi con lagajc bajnga?

²² ¿Xhiru najc, palga Dios rlajzni guluiloj ni xho rujn ni yäl̄guxhtis, näjza rlajzni guluiloj ni xcäl̄rnibeeni, gopnäjni pasens renani nungäj̄l gac yäl̄guxhtis, te nitlo-

zjareni, ä? ²³ Bejn ni si'c te guluiloj ni lacti sajç xcäl̄rdimbicha'ni loj renani galooli guleni chü loj ni lo xcäl̄rdimbicha'ni. ²⁴ Lagajc nuurnu najcnu reni aguleni; xhet xtebtis loj rexpejn Israel guleni nuurnu, näjza loj rebejn ni di gac rexpejn Israel guleni nuurnu. ²⁵ Cajza lo guijtz ni bacuaa Oseas:

Renani di gac xpeñä, reni'c cuälää "xpeñä".

Luxh nani dina ninälazä, sinälazäni.

²⁶ Dxejcti lagajc cadro räjpreni lojreni:

"Ditu gac rexpeñä",

lagajc ro'c säjpreni lojreni:

"La'tu najctu xi'n Dios ni nabajn par tejpas."

²⁷ Cajza lo guijtz ni bacuaa Isaías: "Mase najc xhidajl rexpejn Israel si'c najc yujxh ni tre' ro' nisdoo, guxii gac reni laa lo dojl. ²⁸ Sa'csi susoobpac Dad, Dios xtiidxni xcuent xcäl̄guxhtis rebejn guedxliuj, luxh siojbza gunni." ²⁹ Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoö rebejn tiemp, ni ajcnu si'c gujç Sodoma näjza Gomorra, reguejdx ni gunitloj.

Xtidx Dios näj rexpejn Israel

³⁰ ¿Xhini'c sajç guiniinu naj? Rebejn nani di gac xpejn Israel, direni niguiil xho gacreni bejnaya nez loj Dios, niluxh agujcreni bejnaya nez loj Dios sa'csi huililajzreni xtidx Jesucrist. ³¹ Luxh rexpejn Israel, mase sanuutisreni lo xleii Moisés ni rululii xho gac bejn bejnaya nez loj Dios, banijtreni, direni niujn gaan nusobreni guideb leiiga. ³² ¿Xhicuent gujçni si'c? Sa'csi direni nililajz xtidx Dios, alga rlajzreni guntisreni dzuun xten leii, naareni si'c gacreni bejnaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. ³³ Si'cza bacuaa Isaías, räjpni:

Aguleä te bejn lo guedx Sión ni gac si'c te guij cadro rtiäj̄l ni' bejn,

te guij ni rusäl̄ta' bejn.

Chutis tej nani chalilajz xtiidxni, dini jianxtuj.

10 Rebetzä, rlazduxhä chalilajz rexpeñä xtidx Dios. Rniabduxhä lo Dios te guslaanireni lo xtojreni.

² Narä rniäpac nancheä ruzuxhijb rexpejn Israel lo Dios, niluxh direni gumbesa'c xhini'c rlajz Dios gunreni.

³ Sa'csi direni niacbee xcuent xho rajc te bejn te bejnaya nez loj Dios, ni'c rlajzreni gunreni dzuun si'c ni caj lo leii te gacreni bejnaya nez loj Dios, ni'cza direni nusob xtidx Dios te gacreni bejnaya nez loj ni. ⁴ Abasoob Jesucrist xtidx Leii, ni'cni che chalilajz bejn xtidx Jesucrist, anajcreni bejnaya nez loj Dios.

⁵ ToMoisés bacuaa rediidxre: "Chutis ni rlajz gac bejnaya nez loj Dios sa'csi rusoobni xtidx leii, nanab gusobsa'c pacni diidxga guideb nabajni ni lo guedxliujre."

⁶ Xcäl̄nayareni nez loj Dios sa'csi rililajzreni xtidx Jesucrist, rni scree: "Na'c guiniitu nen lastootu, ¿chuni'c chä'p xhaguibaa?" nalajznu, te jädnäsacni Jesucrist loj guedxliuj. ⁷ Na'cza gäbni: "¿Chuni'c jäjt gabijl?" (nalajznu te chaxiini Jesucrist loj rebengut). ⁸ ¿Xhini'c rniini naj? Rniini: "Diidxga suga' gajxh ro'tu, nen lastootu."

Nalajznu, diidx xcuent yälirililaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebengut, suslaani la'tu lo dojl. ¹⁰ Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

¹¹ Sa'csi rnii xtidx Dios scree: "Chutis ni rililajz xtidx Dad Jesucrist, dini jianxtuuj." ¹² Sa'csi guiraa rebejn najc tebloj nez lojni, rexpejn Israel sigajc rebenzijt, sa'csi la-gajc laani najcni Dad lo guiraareni, rulaslazduxhni guiraa renani rbedx-rniab lojni. ¹³ Lo xtidx Dios caj rediidxre: "Chutis ni rbedx-rniab lo Dad, siliaani lo xto-ijni palga rililajzni xtidx Dios." ¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di didxga lojreni, ä? ¹⁵ Luxh ¿xhoza gusule'reni diidxga palga rut guxhaldireni? Si'cni caj lo guijtz: "Chipza saru najc ni' renani riädnä diidx xcuent cossa'c, yälrbecdx lajz rebejn."

¹⁶ Xhet guiraadireni rusoob xtiidxni, sa'csi guniiza toIsaías: "Dad, ¿chuni'c chalilajz xtiidxnu?" ¹⁷ Rililajz bejn xtidx Dios che rucudiajgreni diidxga; rucudiajzreni che yu' chu rusule' xtidx Jesucrist.

¹⁸ Naj arniä: Gajdpac diajgreni jiejn xtiidxni, o ¿la babeiñ diajgreni, ä? Pues abiejñ diajgreni, sa'csi lo xtidx Dios caj scree:

Abire'ch xse'reni guideb guedxliuj,
abidzujnza rextiidxreni lo guiraa reguejdx ni tre' lo guedxliujre.

¹⁹ Rniäza: Dipac rexpen Israel niacbee, o ¿la gucbeereni, ä? Galooli gunii toMoisés rediidxre:

Sunä gudxojuñtu xcuent rebejn ni di gac te guejdx,
con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre:

Renani di niguuil narä, bidxäjl narä,
baluiloäza loj renani di niniabdiidx narä.

²¹ Guniiza toIsaías xcuent rexpen Israel:

Desde galooli, dxej-yäl basgaä naä lo rebejnğa te ni-ureni xtidxä,

luxh najcreni bejn ni di gusoob diidx, rutzu'reni didx-naj.

Rexpen Israel nani guäa lo dojl

11 Arniä: ¿La agulälaz Dios rexpen Israel, ä? ¿Xho gacni si'c! Ni lagajc narä nacä te xpen Israel, te xagdo toAbram, nadxagä lo resa' toBenjamín. ² Di Dios nibälaz rexpejnñi, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadro rnii xcuent Elías, xho gunabduxh Elías didxnaj lo Dios xcuent rexpen Israel, ä? Räjpnñi scree: ³ "Dad, abagu'treni guiraa reniguii nani gunii xti-idxlu, abatzujlreni rexquidoolu, xtebtis narä bia'nä, luxh naj rlanjreni ju'treni narä." ⁴ Luxh, ¿xhini'c räjpn Dios lojni? Räjpnñi: "Abaluheä gajdz miñ bejn nani gajd guzuxhijb nez loj Baal." ⁵ Si'cza naj, abia'n te chinae' rexpen Israel nani agule Dios xcuent xcäl'rulaslajzni.

⁶ Dxejc palga ruslaani nuure lo dojl xcuent xcäl'rulaslajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcäl'rulaslajz Dios gac yäl'rulaslajz.

⁷ ¿Dxejca'? Di rexpen Israel nidxäl nani caguuilreni, luxh rebejn nani agule Dios, ni'c bidxälni, luxh ste cuaareni, aguyalajzreni. ⁸ Gujcnñi si'c caj lo xtidx Dios: Bascäy Dios xcäriejnreni, näjza balojni di jieñ, lo dxe najli di diajgreni jiejn.

⁹ Guniiza toDavid, scree caj lo xtidx Dios:

Sugun xmex lanijreni jiajbreni,
te gac guiga'reni,
sugacni si'c guij ni rulani' bejn, te gacreni yäl'guxhtis.
¹⁰ Suguscäy Dios balojreni te na'c fisa'creni,
sujie't dejtzen, sutedreni trabajwduxh par tejpas.

Yäl'ruslaa lo dojl xten bejn ni di gac xpen Israel

¹¹ Naj rniabdidxä: ¿La biajb rexpen Israel te gunijtreni par tejpas, ä? ¿Xho gacni si'c! Sa'csi biajb rexpejn Israel, ni'cni gojl biääd yäl'ruslaa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl. ¹² Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yäl'runijñt xten rexpen Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, ¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. ¹⁵ Palga gulecdxireni lajz reben guedxliuj con Dios sa'csi gulälaz rexpen Israel xtidx Jesucrist, aticaxh che chalilajz rexpen Israel rextidx Jesucrist, sibansac renani najc si'c bengut. ¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpen Israel najcreni si'c te yajg oliib; palga gutiu-ugreni te naa yajgga, dxejc ro'c guquidreni naa ste'ca yajg te guibajñni con xtiejn yajg oliibga. ¹⁸ Ni'cni, na'c gactu guyalajz lo reñaapac yajgga. Colgusnaj lajztu, xhet la'ditu ni rudeed yäl'nabajñ lo xlobaa yajgga, lobaaga ni runiidx yäl'nabajñ lojtu.

¹⁹ Dxejc colguinii: "Batiuugreni naapac yajgre, te gujc biguidä cuä' yajgga." ²⁰ Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu guyalajz, colguidxiej, ²¹ sa'csi palga di Dios nutedbia reña yajgga, diza Dios gutedbia la'tu. ²² Bahuiñ lacti hueen najc Dios! Luxh lacti niälajzani; con renani banijñ najcni niälajz, luxh lacti rulaslajz Dios la'tu palga chanuu jiuñtu xtiidxni. Palga ditu jiuñ xtiidxni, näjza la'tu sudzucaj Dios. ²³ Luxh sigajcza reni bidin, palga di chanuu cuälazreni xtiidxni sajz suquidsac Diosreni lo yajgga. ²⁴ Luxh la'tu najctu benzijt, najctu si'c naa te yagoliib ni xtebca gulejn neñ dajn. Luxh batiuugni la'tu te baquidni la'tu lo te yagoliib ni najc yagsa'c ni rcauxh oliib lojni, mase xhet si'cni najc olibguijxhga, jaticaxh rexpen Israel ni banijñ najc si'c naapac xten yagolibsa'cga ni

bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpen Israel lo dojl

²⁵ Rebetzä, rlazä gacbeetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxex ni chalilajz rebenzajt xtidx Dios. ²⁶ Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajč beḡ guedx Sión,
luxh sudzucajni xtojḷ renani najc xagdoō tojacoob.

²⁷ Dee najc diidx ni bia'nä con laareni,
che gudzucaä xtojḷreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni.

²⁹ Sa'csi rut rajcdi rudzucaj nicla yäl'nasa'c ni rudeed Dios, niclaza yäl'rbejdx xten Dios. ³⁰ La'tu galoo ditu nu-soob xtidx Dios. Naj rulaslajz Dios la'tu sa'csi gulälaz rexpen Israel xtiidxni. ³¹ Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzani la'tu. ³² Dios basaan biajb guiraanu lo dojl, te si'c sajč gulaslajz Dios guiraanu.

³³ ¡Lacti guroob najc yäl'nasa'c xten xcäl'najn, xcäl'racbee xten Dios! Nicla tej beḡ guedxliuj di gacbee guiraa rexcäl'guxhtisni, rudliidiza najn rexnezyujni.

³⁴ Si'c caj lo guijtz: "¿Chuni'c gucbee xcäriejn Dios? ¿Chuni'cza abaluiini? Rutliidi." ³⁵ O ¿chuni'c badedxgaa te xhi cos lojni, te quixsacnini lojni, ä? Rutliidi." ³⁶ Sa'csi loj Dios siäd guira'ti, luxh laani bencheeni guira'ti par lagajcza laani. Suguiiä'pnu xpala'nni par tejpas. Sugacni si'c.

Yäl'nabajn rliä'p xpala'n Dios

12 Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajntu lo Dios te gac guibaḡsa'ctu si'cni rlazj Dios. Dee najc yäl'rajnpac Dios si'c ni nungäjḷ gaḡtu Dios. ² Na'c rujntu lagajc xhigab ni rujn reben guedxliuj, colguscoob rehxigabtu te guidx-aapac xmoodtu te si'c guluii Dios xhini'c rlazjni guntu, nalajznu xhini'c najc hueen, xhini'c rdxaglajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj teygatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo teygatu xho chalilajztu xtiidxni. ⁴ Sa'csi sigajc najc tiejxhnu, yu' xhidäl la'ni, luxh teygareni rujn xtzuum-xtzuumreni, ⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejx lo Jesucrist, mase teyganu rujn xtzun-xtzuumnu, tejsi najcnu.

⁶ Luxh sa'csi teyganu rajpnu garen-garen dzuun xcuent yäl'rulaslajz ni baniidx Dios loonu, sujiennu rextzuunnu screeza: nani rajc rniä xtidx Jesucrist, suguiiniini, si'c ni najc xcäl'rililajzni; ⁷ nani rajc racnäy sa'ni,

sugacnäjni; nani rajc ruluii xtidx Dios, suguluiini; ⁸ nani rajc gulljdx resa'ni, sugulijdxnireni, nani rajc rudedxlia' xhixtteni lo sa'ni, saru sugudeedni xhixtteni; nani rajc rnibee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

Xho nanab guibaḡnu lo xnezyuj Dios

⁹ Colchanälajzpac resa'tu, na'c gunsitu si'cni rinälajz-tureni. Colcuälaz redzunguijdx, colyejntis redzunsac.

¹⁰ Colchanälajz resa'tu si'c rinälajz beḡ rebejztni. Colguiliä'p xpala'nreni.

¹¹ Colyejn dzunsa'c, na'c cuedxitu. Colyejn xtzuum Jesucrist con guideb xtijptu, guideb xcäriejntu.

¹² Colguibalajz sa'csi ahuililajztu xtiidxni. Colcuedcxi lajztu che tedtu trabajw. Colcuedx-col'nabtis lo Dios guideb nabajntu.

¹³ Colgacnäy rebejn nani rililajz xtidx Dios; sacru col'ni loj ni riädhuiitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäy renani rbalajz, colyonnäy renani roon.

¹⁶ Colyejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najc-tu beḡnanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi beḡ.

¹⁸ Cadrotis sajčni, dxitis colguibaḡnäy guiraa rebejn.

¹⁹ Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yäl'guxhtis lojreni, ni'cni caj lo xquijztni scree: "Narä gunä yäl'guxhtis, narä quixä lojreni si'c naj Dad, Dios."

²⁰ Näjza: "Palga calaan nani rdxe'ch lojtu, colgudeed xhi gauni, palga cayojni, colgudeedza xhi yäni, te si'c jianxtiujni." ²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13 Guiraatu nanab jitu xtidx renani rnibee lojtu.

Sa'csi xheti te yäl'rnibee nani di Dios nudeed, luxh guiraa reyäl'rnibee ni yu' lo guedxliujre, lagajc Dios gule'creni. ² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yäl'guxhtis lojreni. ³ Renani rnibee di guchejb renani riu xtiidxreni, ruchejbreni renani najc beḡ guijdx ni di jiu xtiidxreni. Palga di rlazjtu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c.

⁴ Reguxhtis rujnreni lojtu xtzuum Dios te guibaḡsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuum Dios te gunreni yäl'guxhtis, te quixpac renani rujn dojl. ⁵ Ni'cni nanab jitu rextiidxreni, xhet ganaxtis sa'csi rujnreni yäl'guxhtis lojtu, näjza te ga'ptu te xcäriejnsa'c, te xcärien-naya. ⁶ Ni'cni colquijx lojreni nani riäjḷ xca'reni sa'csi renani rnibee najc xmos Dios, luxh ni'cpac najc xtzuumreni.

⁷ Colgudeed lo guiraa beḡ nani riäjḷ xca'reni. Colquijx loj renani nazääbtu; colquijx impuest loj ni riäjḷ xca'ni; colchanälajz renani riäjḷ chanälajztu; colguiliä'p xpala'n

renani riäjł chä'p xpala'reni. ⁸ Na'c xcajlu di'n loj nicla tej bejn, di'ntis xten yälřinälajz sa'ni, sa'csi nani rinälajz xpisiñni, bejnga abasoob xleii Dios. ⁹ Sa'csi lo xleii Dios caj scree: "Na'c guesnäjl u bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rnii: "Chanälajzlu resa'lu si'c sanälajzlu lagajc luj." ¹⁰ Nani rajp yälsanälajz, dini gun latsiaj lo resa'ni. Ni'cni yälsanälajz rusooob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxey ni nabajñnu ñaj, anajntu alagojł oř guibajñnu lo bacal sa'csi abidzuxgajxhru dxej che laanu neñ dojl lo dxej che huililajznu. ¹² Aguxhiñduxh, asiädgajxh bianij.

Ni'cni cuääz jiennu redzuun guijdx ni rajc lo xcäy, te ji-entisnu redzunsac ni rajc rdxee, lo bianij.

¹³ Guibansa'cnu si'c riäjł guibajñ rebejn rdxee, na'c guibanu lo yälřä, niclaza lo yälbiejy, na'c guidies-näjnu bejn ni di gac chäällu, na'c ga'pnu rebis, na'c guidxagdiñnu resa'nu, na'c chuguij lajznu xhixten resa'nu. ¹⁴ Ni'cni colca' xcälřnabee Jesucrist te na'c guntu redojl ni rlajz gun tiejxhtu.

Na'c guiniyajtu rebejztu

14 Colnii didxdoo lo rebejn nani di gumbesa'c xtidx Dios, na'c tiñajtureni. ² Sa'csi yu' reni rililajz nani sajç gaureni guira'ti xhi cos, niluxh nani gajd sutijp lo yälřirilajz, ganaxtis berduur rajwni. ³ Nani rajw guira'ti, na'c guidxehnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios ag-uleza bejnga. ⁴ ¿Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujñni o la xhet laadi rujñni. Luxh sujñni laaca sa'csi Dad Jesucrist sujñ sutijp lastooni.

⁵ Tej bejn naa sajçru tej dxej lo stee dxej, dxejç ste'ca bejn rchalo guiraa redxey najc tebloj. Xhet najc di, tejga bejn sugunpac lagajc xhigabni. ⁶ Nani rapda te dxej, rujñni te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajñ xcuentcanu, nicla tejzanu dinu guet xcuentcanu. ⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lałtis najcnu rexpew Dad, Jesucrist.

⁹ Ni'cni gujt Jesucrist, ni'cni gubañsaczani, te sajç gacni Dad xten rebejgut, näjza Dad xten rebejn nani nabajñ.

¹⁰ Dxejç luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadre cueni te gunni yälğuxhtis loonu.

¹¹ Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios, guiraa rebeñ guedxliuj suzuxhijbreni loä, luxh quiragajc ro'reni sicäjp narä nacä Dad Dios.

¹² Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab neñ lastoonu xhetliidi jiennu ni gun jiajb resa'nu lo dojl. ¹⁴ Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. ¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶ Ni'cni na'c gusaanlu guiniyajreni nani najc te cos hueen par luj. ¹⁷ Sa'csi xcälřnabee Dios dini gac xcuent yälřrajw, niclaza xcuent yälřä; xcälřnabee Dios najc xcuent te yälřnabañnya nez loj Dios, näjza yälřbedxilajz con yälřbalajz xcuent Sprit Dx-an xten Dios. ¹⁸ Sa'csi nani rujñ si'c lo xtzuum Jesucrist, bejnga rchagajz Dios, luxh rebeñ guedxliuj rniiza didxsa'c xcuent sa' bejnga.

¹⁹ Ni'cni chanuutis guidiilnu recos nani rujñ chu yälřbedxilajz, näjza nani rujñ racnäjnü resa'nu te tioobrueni loj xnezyuj Dios. ²⁰ Na'c guntu nit xtzuum Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neñ dojl, ni'c najc xhet laadi. ²¹ Hueen najc na'c gautu bääl, na'cza yätu bin, na'cza guntu jiajb sa'lu neñ dojl. ²² Nani rililajz, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. ²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yälřirilajz, sa'csi xhitis ni di gac xcuent yälřirilajz, lagajc ni'c najc dojl.

Huinälajz sa'lu

15 Nuurnu ni agusutijpnu lo yälřirilajz nanab gac-näjnu resa'nu nani gajd chalilazsa'c. Di gacdi guibanñisnu xcuentcanu. ² Teiganu nanab chonälaaznu resa'nu lo xcälřnabañsa'cni te gacnäjnü chalilajzrureni. ³ Sa'csi nicla Jesucrist dini nibajñ xcuentcani, luxh si'cni caj loj xtidx Dios: "Redidxyaj ni guniyajreni lojlu biajbrene yecä." ⁴ Guiraa rediix ni cuaj lo guijtz galooli, cuajreni te guluiireni nuurnu te ga'pnu yälsutijp näjza yälřrustioblajz te gacza guibääznu lo xtidx Dios. ⁵ Dios rusutijp lajznu, Dios rutioob lastoonu. Rniabä loj Diosga gacnäjnü guntu tejtis xhigab xten Jesucrist con resa'tu. ⁶ Te dxejcti tejtis gac xse'tu guiliä'ptu xpala'n Dios, Xtad Jesucrist.

Gusule' xtidx Dios loj rebeñjijt

⁷ Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios.

⁸ Sa'csi narä rniä lojtu, biääd Jesucrist te gujçni si'c te mos loj rexpew Israel te baluiini xcuent didxgulii xten Dios te gusojb rediix nani bia'n Dios loj retoxtad-goldoonu, ⁹ näjza par rebeñjijt, te guliä'preni xpala'n Dios sa'csi baluilojni xcälřulasajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebeñjijt,

soläza dij lojlu.

¹⁰ Dxejcti stee lajt rniini:

La'tu benzijt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzijt, colguiliä'p xpala'n Dad, suguiliä'pza guiralii rebejn xpala'nni.

¹² Stee huält guniiza Isaías scree:

Siricaj te xagdoo toIsaí, näjza te ni chäs te guinibeeni loj rebenzijt, laani cabäjz rebenzijt.

¹³ Naj rniabä lo Dios ni rudeed yärbäzljaz, te laani gacnä j guibalajztu, cuedcxilajztu, sa'csi salilajztu, te tioobru yärbäzljaz ni rajptu sa'csi Sprit Dxaan xten Dios yu' neñ lastootu, luxh laani rajpni yälnibee.

¹⁴ Luxh xcuent la'tu rebetzä, anancheä nabañsa'ctu nasinduxhtu, arajcza rulijdxtu sa'tu, ¹⁵ luxh loj guijtzre bacuaä gaii didxnaj xcuent tiop-choñ cos, te gusnaä lajztu. Runä si'c xcuent yälrulasljaz ni baniidx Dios löä

¹⁶ te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujceni beñnaya sa'csi rbäjz Sprit Dxaan neñ lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸ Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizaren i rextzuunni, ¹⁹ con yälmilaagwr xten redzunro, resenro, ni gujc con xcälnibee Sprit Dxaan xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. ²⁰ Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. ²¹ Te gacni si'cni caj lo guijtz:

Renani rutliidi bij diidx xcuentni, suhuiipacreni lojni, luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²² Ni'cni balti huält badxojn Dios narä jiädhuiä lojtu.

²³ Luxh naj sa'csi abaluxä xtzunä guideb nezree, näjza sa'csi agujc balti ijz rladuxhä jiädhuiä lojtu, ²⁴ naj che cha'a España siädhuiäpac lojtu. Che tedä, jiädhuiäpac contu te ganid guibalaznaä la'tu, dxejcti gacnäjtü narä te cha'a España. ²⁵ Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. ²⁶ Sa'csi rebejn Macedonia näjza rebeñ Acaya rlajzpacreni guxhaljreni te coobr loj rebeñproob ni yu' lo reni huililajz xtidx Dios neñ guedx Jerusalén. ²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhalj xtidx Jesucrist lojreni, naj laaca rujnreni cayacnäjnreni rebeñ Jerusalén con xhixtenreni. ²⁸ Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España. ²⁹ Luxh ananä che jiälä lojtu, li guidxa lastoä xcälnasa'c xtidx Jesucrist guidzuna lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcälninäljaz Sprit Dxaan xten Dios, colguidxagsa'tu, te colgacnä j colcuedx-guiniabtu lo Dios xcuentä. ³¹ Colnab lo Dios te guslaani narä loj rebeñ Judea nani di gusoob xtiidxni te saru gun rebeñdxan ni yu' Jerusalén te xca'reni ni chanää lojreni.

³² Te cabaa lazä guidzuna lojtu, sa'csi rlajzpac Dios jiälä lojtu, te lajni yu'ä lojtu siälyuä, susilazäza con la'tu.

³³ Dios ni rbecdxilajz bejn gacnä j guiraatu. Sugacni si'c.

Ruxhaljni xtiixios lojreni

16 Colgacnä j bisiajnno Febe. Nane're bejn dzunduxh neñ guidoo ni tre' Cencrea. ² Colca'ni xcuent Dad, Jesucrist, si'cni riäjl gun bejn gacnä j renani rililajzpac xtidx Dios. Colyacnä jni lo xhitis nani guiquinni, sa'csi laani gucnäduxhni xhidal rebejn, nägajcza narä gucnäjni.

³ Ruxhalä xtiixios lo Priscila näjza lo Aquila, ni racnä j narä lo xtzun Jesucrist. ⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. ⁵ Ruxhalä xtiixios loj resa'ä ni rdxagsa'reni roliz Priscila näjza Aquila. Ruxhalä xtiixios loj Epeneto, ni sanälazduxhä, ni gujc beñganid ni huililajz xtidx Jesucrist neñ guedx Acaya. ⁶ Ruxhalä xtiixios lo Marii nani benduxh dzuun lojtu. ⁷ Ruxhalä xtiixios loj rebeñ ladxä ni laa Andrónico näjza Junias; laareni guyunä j narä neñ latzguuib, najceni beñro loj reapost. Ganid laareni huililajz xtidx Jesucrist, dxejcti huililazä.

⁸ Ruxhalä xtiixios loj Amplias, ni sanälazä xcuent Jesucrist. ⁹ Ruxhalä xtiixios loj Urbano, ni runnä j nuurnu xtzun Jesucrist. Ruxhaläza xtiixios loj Estaquis, ni sanälazä. ¹⁰ Ruxhaläza xtiixios loj Apeles, ni abadeed balti seen rililajzpacni xtidx Jesucrist. Ruxhaläza xtiixios loj guiraa ni tre' roliz Aristóbulo. ¹¹ Ruxhaläza xtiixios lo Herodión beñ ladxä, näjza loj resa' Narciso nani ahuililajz xtidx Jesucrist. ¹² Ruxhaläza xtiixios loj nan Trifena näjza nan Trifosa, guiro'preni cayujn xtzun Jesucrist. Ruxhaläza xtiixios loj nan Pérsida, sanälazäni, abenduxhni xtzun Jesucrist. ¹³ Ruxhaläza xtiixios lo Ruffo nani agule Dios, näjza lo xnnani, sa'csi gujcni si'c xnanäza. ¹⁴ Ruxhaläza xtiixios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵ Ruxhaläza xtiixios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpeñ Dios nani yunäjreni ro'c.

¹⁶ Colye'tz xchan loj resa'tu. Guiraa rexquidoo Jesucrist ruxhalj xtiixios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn bie j te guilia' sa' bejn, nani rlajz guntu guiraloj nani najc garenca loj yälrului ni bisieedtu, colguibicaj lojreni, ¹⁸ sa'csi sa' rebeñnga direni gun xtzun Jesucrist. Laareni rlajztisreni gunreni si'c rlajz tiejxhreni; rniireni didxdoo, diidx ni rgudxguel diajg bejn te rusgueereni lastoo rebejn nani di susin.

¹⁹ Guiranejz abire'ch diidx xcuent xho rusobsapcactu xtidx Jesucrist, ni'cni rbaa lazä, ni'cni rlazä gactu nasin-

duxh xcuent recoshueen, luxh si'c báz xhet ganditu xcuent recosguidx. ²⁰ Luxh Dios nani ruscuecdxilajz bejn siojb guta'cwni beñdxab xhan ni'tu. Gacnäj Dad Jesucrist la'tu.

²¹ Timoteu nani racnäj narä lo dzuun, ruxhal xtixtios lojtu. Lucio, Jasón, nájza Sosípater, beñ ladxä, ruxhalza xtixtios lojtu.

²² Najrä Tercio, ni cagucuaä guijtzre xcuent Pabl, ruxhalza xtixtios lojtu xcuent Jesucrist.

²³ Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' rebeñ guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajc gusudzu'tz la'tu loj xtiidxni nani basule'ä, nájza loj xtidx Jesucrist xcuent rexhigab ni naga'tz galooli, ²⁶ naj abaluiloj rediidxga lojtu; nájza xcuent ni bacuaa reprofe't galooli; si'c najc diidx ni bia'n Gueb Dios ni nabajn par tejpas loj rexpejni, agusule'ni loj guiraa rebeñ guedxliuj, te gusoobreni diidx sa'csi rililajzreni xtiidxni, ²⁷ colguiliä'p xpala'n ni najc tejtis Dios ni nanduxh. Suguiä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

1 Corintios

Bacuaa Pabl te guijtz lo guidoo xten guedx Corinto

1 Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijtzre lojtu ² ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajz xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³ Rniabnu lo Dios ni najc xtdnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yälru-laslajz xten Dios ni cua'tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶ sigajcza con xcäl'nabansa'ctu baluiitu huililajz pactu xtidx Dios xcuent Crist. ⁷ Ni'cni xhetliidi cayäädxditu loj redzunsa'c ni runiidx Dios, laj ni ganduxh yu'tu cabäjztu guibisac Jesucrist lo guedxliuj. ⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtennu, te sanäjzuni.

Rlia' sa'reni neñ guidoo

¹⁰ Rulidxä la'tu, rebetzä, xcuent Xtd Jesucristnu, colyejn tejsi xhigab te na'c la' sa'tu, saru guibanäjztu sa'tu, colyejn tejsi xhigab, colga'p tejsi xcäriejn. ¹¹ Sa'csi agucbeä xcuenttu, betzä ni huililajz xtidx Dios. Tej resa' Cloé biädsan diidx loä xcuenttu, yu' yälrdijl lojtu. ¹² Rlazä guiniä scree lojtu sa'csi yu'reni rnii: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zarenii rnii: "Narä nacä xpejn Crist." ¹³ ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä? ¹⁴ Rudedä xquixtios lo Dios dina nutiobnisä nicla tejt, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷ Di Crist nuxhal narä te gusule'ä rextiidxni xcuent xho gun bejn te jaareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

Crist najc xcäl'milaagwr näjza xcäl'najn Dios

¹⁸ Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. ¹⁹ Scree caj loj rexquijtz Dios:

Narä sutzulä yäl'nasiñ xten rebenajn, sudzucaäza xcäl'nadxällajz, xhigab rebejn ni nadxäl-lazduxh.

²⁰ ¿Con bejn ni nanduxh? ¿Con bejn ni rucuaa, ni najc mastr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasiñ xten guedxliuj si'c nayällajz nez loj Dios, ä? ²¹ Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre, ni'c bichagljaz Dios con yäl'rusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rlazjpacreni fiireni remilaagwr; rebejn griegw rguuil yäl'nanduxh. ²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzajt xhet sajcdi rediidxre.

²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzajt, rediidxre najczani yäl'milaagwr najczani yäl'nasiñ xten Dios. ²⁵ Sa'csi xcäl'nayääl xten Dios si'c rchalo rebejn ni'c najc nasiñduxhru loj xcäl'nasiñ xten reben guedxliuj; luxh xcäl'rnijaz xten Dios sacduxhruni loj guiraa xcäl'nadaan reben guedxliuj.

²⁶ Colhuii la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben nasiñ loj reben guedxliuj, guxiiza rajptu yäl'nibee, guxiizatu najctu bejn ni agojl guiga'tu ben'sa'c. ²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. ²⁸ Agule Dios rebejn ni di guiga' benro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹ Te nicla tej bejn digacdi guiliä'p lagajc xpala'nni nez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yäl'nasiñ xten Dios, te guibansa'cnu nez loj Dios, te gacnaya lastoonu, näjza te quiixni rextojl'nu.

³¹ Si'c bejn Dios te soob xtiidxni cadro caj scree:

Ni rlazj guinii didxro, suguiliä'pni xpala'n dzuun ni bejn Jesucrist.

Rediidx xcuent Crist ni cuaj lo cruzj

2 Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. ²Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj. ³Bidzuñä lojtu guideb rdxagä, guideb racditä sa'csi cadxebduxhä. ⁴Cheni basule'ä diidx lojtu, dina niniä didxro xten yäl'nasiñ xten guedxliuj, alga guniä xtiidx yäl'nasiñ xten Sprit Dxañ xten Dios näjza xcäl'rnibee Dios, ⁵te di gac xcäl'rililajztu xcuent yäl'nasiñ xten guedxliujre, te gac xcäl'rililajztu xcuent yäl'rnibee xten Dios.

Rumbee bejn Dios xcuent ni rului Sprit Dxañ xten Dios

⁶Rniizanu lo sa'nu ni aguyajl lo xtidx Dios rediidx xten yäl'nasiñ xten Dios, per te yäl'nasiñ ni di gac xcäl'nasiñdi guedxliuj, niclaza xten reni rnibee lo guedxliujre, sa'csi sidzujñ dxej sinitlojreni. ⁷Niluxh che rniinu yäl'nasiñ xten Dios, rniinu diidx ni rut racbextebdi, xcuent xho gac guidzujñu cadro yu' Dios xhaguibaa. Cheni gajdli gac guedxliuj, rapcheeni yäl'nasiñxhiga'tz xtenni. Baluiinini loonu te guibanñäänuni lo xcäl'rdimbicha' xtenni. ⁸Nicla tej reni rnibee lo guedxliujre gajd gacbee recosre niluxh paru niacbeerenini, direni nu-cuaa lo cruzj Dad Jesucrist nani rajp xcäl'rdimbichaduxh. ⁹Najcni si'cni caj lo rextidx Dios cadro rni:

Recos ni gajdpac baloj bejn fii,
nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰Niluxh abaluii Diosreni loonu con Sprit Dxañ xten Dios, sa'csi laani basule'nireni loonu. Sprit Dxañ xten Dios racbesa'c guiraa rexhigab, näjza recos xhiga'tz xten Dios.

¹¹Loj rebejn guedxliuj çchuni'c racbee rexhigab ni rujn bejn? Lagajc sprit xten bejn ni yu' neñni racbee xhi xhigab cayujñni. Sigajcza rut racbeedi rexhigab xten Dios; Sprit Dxantis xten Dios racbeeni. ¹²Luxh nuurnu dinu nica' yäl'najñ xten guedxliuj, alga cua'nu Sprit Dxañ ni siääd lo Dios te gacbeenu rexhicos ni abasalajz Dios loonu. ¹³Nuurnu rniizanu xcuent recosga, xhet didxdi ni ruluii xcäl'najñ guedxliujre, diidxtis ni baluii Sprit Dxañ xten Dios loonu. Si'c ruluiinu rediidxga loj rebejn ni rbäjz Sprit Dxañ xten Dios neñ lastooreni.

¹⁴Niluxh reni di chalilajz xtidx Dios, direni gacbee rexhigab xten Sprit Dxañ xten Dios, sa'csi laareni xhigabyäältis rchaloreni xcäl'nasiñ Dios. Di gacdiza gabeereni rexhigabga, sa'csi Sprit Dxañ xten Diostis rajc ruluii lo bejn rexhigab xtenni. ¹⁵Rebejn ni ahuililajz xtidx Dios, rula'tzreni guira'ti ni ruluii Sprit Dxañ xten Dios lojreni. Luxh rebejn ni ahuililajz rutliidi rula'tzdireni. ¹⁶Sa'csi scree caj lo xtidx Dios: "çChuni'c agucbee xho najc xhigab xten Dios te gac guluini Gueb Dios, ä?" Nicla tej bejn. Niluxh nuurnu rajpnu lo

xcäriejñnu xhigab xten Crist, nalajznu racbeenu rextidxni.

Reni rujn dzuun lo Dios

3 Rebetzä, di niajcdi niniä redidxnagajn lojtu si'c ni rniä loj rebejn ni rajp yäl'nasiñ xten Sprit Dxañ xten Dios, basule'ä ganaxtis didx guyasi lojtu, sa'csi najctu bejn guedxliuj o biuxbäz ni guxii racbeeni xcuent Crist. ²Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³sa'csi nabansiñctu si'c nabajñ rebejn guedxliuj lañtis runemiidtu, rdxechlajztu lo sa'tu, çla ditu gacbee naciñctu si'c bejn guedxliuj, ä? çLa lañtis nabajñtu si'c nabajñ rebejn guedxliuj ni di gumbee xtidx Dios, ä? ⁴Sa'csi cheni rni tejni: "Narä nacä te xpejn Pabl", dxejcti steeni rni: "Narä nacä te xpejn Apolos", çla xhet cayujnditu sigajctis ni rujn rebejn guedxliuj, ä?

⁵çChuni'c najc Pabl? çChuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu. ⁶Ganid basule'ä xtidx Dios lojtu, dxejç biääd Apolos te gucñäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajç nani rusanij xcäriejn rebejn. ⁸Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejganu dzuun nani riennu. ⁹Nuurnu najcnu si'c remos ni runnäj Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios. ¹⁰Narä nacä si'c te mastr albañil. Baniidx Dios dzuun loä, gucñäjni narä te casuä reguij lo yujre, te naj ste'ca bejn quixh basuu yejçni. Niluxh tejga ni chanuu gun dzuun lojga, suga'pni cuidaad xho guiliäsni padeerga. ¹¹Sa'csi di gacdi gusujreni garenca cimient loj nani najc-xgaa, ni najc Jesucrist. ¹²Naj palga guiliäs bejn te padeer yejç cimientga con oor, con pla't, con guij ni sacduxh, o con baräjç, guixhtriuu, o balag biquii, ¹³sidzujñ dxej sien xho najc dzuun ni bejn tejga bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcni. ¹⁴Palga yu' reni bejn te yusa'c yejç cimientga, luxh dini chec lo guibooga, sudeed Dios lo bejnga ni riäjçl xca'ni sa'csi bejñni yusa'c. ¹⁵Niluxh palga chec ni bejñni yejç cimientga xhet xca' dini, xcäl'nabajñtisni di nit, luxh xtzuunni sejç.

¹⁶çLa ditu gan la'tu najctu xquidoo Dios, luxh neñ lastootu rbäjz Sprit Dxañ xten Dios, ä? ¹⁷Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸Nicla tejtu na'c gusgueetu lagajc la'tu. Palga yu' chu rujn xhigab nanduxhni xcuent yäl'nasiñ xten guedxliujre, nanabpac gacni si'c te bejn ni xhet najndi te xca'ni yäl'nasiñ xten Dios te guliipac gacni te beñna-j, te beñ nasiñ. ¹⁹Sa'csi yäl'nasiñ xten guedxliuj xhet

sajcdi nez loj Dios. Lo rexquijtz Dios caj scree: "Dios rujn rga' reni rajp yäl'nasiñ xten guedxliuj lagajc xcuent xcäl'rusgueereni ni rujn lagajc xcäl'nadxäl'lajzreni."

²⁰ Ste'ca lajt caj scree: "Nanchee Dios xho najc xhigab ni rujn rebejn ni rajp xcäl'nasiñ guedxliujre, luxh xhetliidi sajcdi nez loj Dios." ²¹ Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu, ²² palga najcni Pabl, o Apolos, o Pedr, o guedxliuj, o yäl'nabajn, o yäl'gujt, o recos ni yu' naj, o recos ni churu gac, guiraareni najc xtentu. ²³ La'tu najctu xten Crist, luxh Crist najc Xi'n Dios.

Xtzuun reapost

4 Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. ² Mbaj pues, te bejn ni cahuii te dzuun nanab gusoobreni diidx, gunreni te dzunsa'c. ³ Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴ Entis rbedxi xcärienä, per xhet xcuent ni'cni sajcdi guiniä xheti xtojä, Dad Jesucrist najc nani rula'tz narä, rhuilojni xho nacä. ⁵ Ni'cni la'tu na'c gucuaquijtu bejn che gajd guidzujñ dxej; colcuäjz jiaäd Jesucrist dxej laani sibääni lo bianij guiralii ni naga'tz lo nacäjy, luxh suluilozani xhi xhigab yu' neñ lastoo tejga rebejn, dxej te tejganu sudeed Dios ni nungäj'l xca'nu.

⁶ Rebetzä, xcäl'nasa'ctu cania rediidxre lojtu. Cania xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'ntu tejtü lo resa'tu, la'l ni cabälaztu steeni. ⁷ Sa'csi çxhuni'c rni najclu beñsa'cru lo ste'ca bejn?, o çxhini'c rajplu ni di Dios nuniidx lojlu? Luxh palga cuaxlia'luni, çxhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸ Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii gulii najcpactu reii te näjzanu guinibenäjnu la'tu. ⁹ Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibereeni guet. Nez loj rebejn guedxliuj näjza nez loj rexangl Dios najcnu si'c rebejn ni rdedlojtis bejn lojreni. ¹⁰ Nuurnu najcnu beñnayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc beñdanduxh. Rliä'p rebejn xpala'ntu, ni'c rbälazreni nuurnu. ¹¹ Cadeednu trabajwduxh naj, rliaannu, riojlnu, xho rniaj xhajbnu, rdil'näj rebejn nuurnu, luxh xheti rolijznu. ¹² Rdxaagnu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusac'si rebejn nuurnu, rientisnu huant. ¹³ Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. ¹⁵ Palga ga'ptu tzuu mi'l bejn ni guluiitu rediidx xten Crist, ruti

stee xtadtu; narä gucä xtadtu, ganid narä basule'a rextidx Dios lojtu. ¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabañä lo yäl'nabajn xten Jesucrist, sigajcni ruluiä neñ reguidoo guiraasi lajt. ¹⁸ Yu'tu ni acayajc guyalajz, naatu pet dina guibisacä lojtu. ¹⁹ Cabäzä jiaädhuiätu, palga si'c rlanj Dios, dxej sacbeä chuni'c najc rebejn ni cayajc guyalajz, fiä xhipacni rujnreni, xhet xtiidxtisreni gacbeä. ²⁰ Sa'csi xcäl'rnibee Dios xhet ganaxtis xcuent diidx najcni, näjza dzuun ni rujnreni ruluiloj xcäl'rnibee Sprit Dxan xten Dios ni rajpreni. ²¹ ¿Xho rlanjzatu guidzujñ lojtu, ä? ¿La sidzujñ si'c te dad ni ca' te baar te quinätu o la guidzujñä yäl'rinälajz näjza yäl'nadolajz te gulidxätu, ä?

Xho nanab gunnäjtu te bejn ni rujn falt lo sa'ni

5 Agucbeä yu' tejtü ni ahuililajz xtidx Dios, cua'ni si'c chäälni te gunaa ni gujc chäälni xtdni. Dee najc te dojduxh nani nicla reni di chalilajz xtidx Dios direni gun. ² Luxh la'tu gujctü guyalajz lacuaa niac-huin lastootu; te bejn nani bejn dojlga, riäj'l nibäätuni nez lojtu. ³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnga ni bejn dojduxhga, sigajc ni niunä paru suga'ä ro'c. ⁴ Con lajt Dad Jesucrist, che abidxagsa'tu, luxh alastoä suganäj la'tu, con xcäl'rnibee Dad Jesucrist, ⁵ abenä xhigab guteednu bejnga ladzña beñdxab te ted tiejxhni trabajw, niluxh sprit xtenni laani neñ dxej ni jiaädsac Dad Jesucrist lo guedxliujre.

⁶ Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadro ru'chni, ä? ⁷ Colgudzucaj cobyujxhga, te guibajntu te yäl'nabañayacoob si'c te cobyä, sa'ni racchee yätxtiil ni xheti levaduur yejcnii par lanij xten pascw. Arajptu yäl'nabañaya sa'csi agujt Jesucrist sigajc gujt te xile' lo lanij pascw te badzucajni rextojlñu. ⁸ Si'c nanab jiennu lanij xten pascw con yätxtiil ni xheti levaduur yejcnii, nalajznu con yäl'guliipac neñ lastoonu, xhet yätxtiildi ni yu' cobyujxhga yejcnii, nalajznu na'c gunlu latsiaj.

⁹ Lo stee guijtz abacuaä lojtu, na'c guchaagtu reben ni runnäj cosguijdx bejn ni di gac chäälni. ¹⁰ Niluxh xhet caniädi xcuent rebejn guedxliuj ni rujn cosguijdx con bejn ni di gac chäälni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu rebanäj. Paru si'c gacni, nanab jiunejztu guedxliujre. ¹¹ Niluxh narä bacuaä guijtzga lojtu te na'c guchagsa'tu te bejn nani rni ahuililajzni xtidx Dios, luxh rujnruni cosguijdx con bejn ni di gac chäälni, o rchaglaztejni meel, o riuni rebanäj, o rniyaj sa'ni, o rsiojzni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnga. ¹² Sa'csi narä di gacdi gunä yäl'guxhtis loj rebejn ni gajd chalilajz xtidx Dios. Gunti Dios yäl'guxhtis lojreni. La'tu nungäj'l guntu yäl'guxhtis loj rebejn ni ahuililajz xtidx Dios. Ni'cni colgudzucaj beñdojlga lojtu.

Na'c chäätu loj rebendojl te gunreni yälguxhtis lojtu

6 Palga tejtü ni ahuililajz xtidx Dios rlajz cue'c xquej stee sa'tu, xhicient chale'ctu xquejni loj rebendojl te gunreni yälguxhtis lojtu? xhicient ditu guiniab yälguxhtis loj rebejn ni ahuililajz xtidx Dios, ä? ² La ditu gan, rebejn ni ahuililajz xtidx Dios sujntu yälguxhtis lo reben guedxliuj, ä? Palga la'tu sujntu yälguxhtis lo reben guedxliuj, la di gacdi guntu yälguxhtis lo sa'tu lo recosbäz lacuaa chäätu loj rebendojl te gunreni xcälguxhtisreni lojtu, ä? ³ La ditu gan sienzanu yälguxhtis lo rexangl Dios, ä? iAticaxh jiennu yälguxhtis loj recos bäze' xten sa'nu lo yäl'nabajñre! ⁴ Palga la'tu cadilñäj sa'tu xcuent recos xten guedxliujre, xho mood chäälu loj rebendojl ni rut najcdi loj xquidootu, te naareni lojtu xhini'c guntu, ä? ⁵ Rniä rediidxga lojtu te guitujytu. La ruti nicla tej beñnasin loj guiraatu ni sajc gun yälguxhtis lo resa'tu, ä? ⁶ xhicient rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanijttu sa'csi yu' yälrdilñäj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O la ditu gan reben dojl dipacreni jiu' lo xcäl'rnibee Dios, ä? Na'c gusaantu gusgueereni la'tu; nicla te resa' dee di jiu' lo xcäl'rnibee Dios: guiraa reni richagtoo regunaa; guiraa reni rajñ rebanäj; reni resnäj bejn ni di gac chäälni; reniguii ni rungunaa; reni najc birääx; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcäl'rnibee Dios.

¹¹ Yu'zatu ni gujc si'c galoo, niluxh naj abasia Dios lastootu, naj anajctu beñnaya nez loj Dios sa'csi abiäl'lajz Dios xtojltu xcuent Jesucrist, najza xcuent Sprit Dxan xtenni. La'tu anajctu rexpejnñi.

Tiejxhnu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. ¹³ Guliini najc yäl'rajw par xque'ni, luxh xque'ni najc par yäl'rajw, niluxh sidzujñ dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebeñgut, siliäsazani nuurnu con xcäl'rnibeduxhni.

¹⁵ La ditu gan tejpgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, la sajc gudeednuni loj te gunadxab, ä? iGurniälolju jiennu si'c! ¹⁶ La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: "Guiro'preni sajc si'c tejtis bejn." ¹⁷ Niluxh nani rudeed lastooni lo Dios anajczani tejtis con laani sa'csi rbäjz Sprit Dxan xten Dios neñ lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc neñ tiejxhni. ¹⁹ O la ditu gacbee tiejxhtu najc xquidoo Sprit Dxan ni abaniidx Dios te cuääzni neñ lastoonu, ä? Ni'cni di gacdi guinibee lagajc la'tu.

²⁰ Agudijx Jesucrist xtojlnu con xtejnñi lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu najza Xpřitnu.

Yäl'rulijdx xcuent yäl'ruchnaa

7 Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii. ² Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni. ³ Nanab niguii guchaagni chäälni che rlajz chäälni, sigajcza gunaa nanab guchaagni chäälni che ni si'c rlajz chäälni. ⁴ Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ Na'c gusuni' tejtü lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquijl beñdxabtu chunäjtu ste'ca bejn.

⁶ Rniä rediidxre lojtu te ni rlajz guchnaa sajc guchnaani, niluxh dina guiniä lojtu, nanabpac guchnaatu. ⁷ Narä rlazä maläi sajc gac guiraa bejn si'c ni nacä. Dios abadeed loj tejga bejn xho mood guibajñni. Yu'reni sajc guibajñ tej mood, yu'zareni sajc guibajñ garenca mood.

⁸ Loj reben xteb najza loj regunabiud rniä, hueen najc na'c guchnaareni, gacreni si'c narä. ⁹ Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlajzreni guchaagreni te niguii o te gunaa.

¹⁰ Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹ Niluxh palga guro'n te gunaa chäälni, na'c guchnasacni, o maazru hueen gusiäjñni diidx guibisacni lo chäälni. Sigajcza te niguii na'c guro'nni chäälni.

¹² Naj rediidx ni guiniä najc xhigab xtenä, xhet diidxdni ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlajz gunaaga cuäänäjni niguiiga, na'c guro'n niguiigani. ¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlajzni cuäänäjni gunaaga, na'c guro'n gunaaga chäälni.

¹⁴ Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabaññäj sa'reni, hueen najc yäl'ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabaññäjsa'reni, hueen najc yäl'ruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵ Palga chäälni te gunaa o chäälni te niguii ni di chalilajz xtidx Dios luxh rlajzni guiliä' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p

por cuäznäjni chäälni ni di chalilajz xtidx Dios, niluxh gurejdx Dios nuurnu te cuedcxini lajznu. ¹⁶ Sa'csi ¿xho najnlu, gunaa, la suslaa Dios chäällu lo dojl xcuentlu, ä? O ¿xho najnlu, niguii, la suslaa Dios chäällu lo dojl xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibajñnu. Si'cza rulidä gunrenini neñ guiraa reguidoo. ¹⁸ Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. ²⁰ Tejgani jia'n si'cni najcni cheni gurejdx Diosni. ²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi. ²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³ Guzii Cristtu con xtiejñni, ni'c na'c gusaantu guinibee bejn la'tu te gac guntu xtzun Dios. ²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi. ²⁵ Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶ Runä xhigab hueen najc palga di reniguii guchnaa sa'csi siääd yälñaganduxh lo guedxliujre. ²⁷ ¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. ²⁸ Palga guchnaalu, xhet dojl di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yälñabajñre. Ni'cni rniä na'c guchnaatu sa'csi di rlazä tedtu trabajw.

²⁹ Rebetzä, rlazä guiniä lojtu rediidxre: Guxiiru dxej guibajñnu lo guedxliujre, ni'cni reni abachnaa na'c gunreni xhigab xtentis yälñuchnaa, te gac gunreni xtzun Dios. ³⁰ Luxh reni cayoon, nanab gunreni si'cni xhet cayoonireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios. ³³ Renani abachnaa riureni recos guedxliujre te guspaani lajz chäälni, ³⁴ tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälni.

³⁵ Rniä rediidxre par xcälñasa'ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani. ³⁷ Palga steeni dini gun xhigab si'c nanab gunni, sajc gunni si'ctis ni rlajzni palga abejñpacni xhigab neñ lastooni di xindxa'pni guchnaa, hueenza najc si'c. ³⁸ Ni'cni nani ruedeed xinda'pni guchnaa, hueen rujñni, sigajcza nani dini gudeed xindxa'pni guchnaa, laacaza rujñni. ³⁹ Te gunaa ni abachnaa, rajñni por guibaññajni chäälni guideb nabajñ chäälni. Palga guet chäälni, jianxtebni stehuält, dxejc sajc guchnaani chutis niguii ni rlajzni, palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxan xten Dios narä.

Yälñajw ni ruzujreni lo rebanäjñ

8 Rniä lojtu xcuent reyälñajw ni ruzujreni lo rebanäjñ. Guliini guiraanu rajñnu yälñajn xcuent recosga. Niluxh yälñajn rujñ rajc bejn gualajz. Luxh yälñinälajz sa'ni, ni'c rujñ racnäjnu resa'nu. ² Palga yu' chuni'c rujñ xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. ³ Palga yu' chu sanälajz Dios, Dios anumbee bejñga. ⁴ Ni'cni, xcuent reyälñajw ni risujreni loj rebanäjñ, anancheenu xhet sajcni rebanäjñ ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" näjza xhidajl lam ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajñnu. Rajñnu tejtis Dad ni rnibee loonu, ni'c najc Jesucrist. Xcuent xcälñibeeni guc-chee guiraa recos loj guedxliuj, luxh nuurnu nabajñnu xcuent Jesucrist.

⁷ Niluxh xhet guira'ti bejn najñ yu' tejtis Dios. Yu' rebejn ni ahuililajz xtidx Dios abia'reni rajñreni rebanäjñ, luxh rajwzareneni reyälñajw lascanu guzujni loj banäjñ sa'csi nacäjyru xcäriejñreni, ni'cni et laadi ria'n lastooreni, rxhinza xcäriejñreni. ⁸ Xhet xcuent xhi rdaudinu sajc guibañsa'crunu lo xnejz Dios. Xhet najcdi palga guidaunu o palga dinu guida. ⁹ Colñatiro xhi rujñtu te na'c guntu jiajb te bejn lo dojl nani gajd chalilazsa'c xtidx Dios. ¹⁰ Palga te bejn ni gajd chalilazsa'c xtidx Dios fiini cayajwlu reyälñajw ni guzuj lo rebanäjñ, luxh luj najclu te beñnajñ, sa'csi dee gajd gacbesa'c rextidx Dios, ¿la di lajzni gac nadip te näjza laani chatajwni yälñajw ni guzuj lo rebanäjñ? ¹¹ Niluxh luj, xhet dojl di cayujñlu, per bejtzlu ni gajd chalilazsa'c xtidx Dios, sixijñni, luxh najcni bejtzlu sa'csi näjza par laani gujt Dad Jesucrist lo cruz. ¹² Si'cza che rujñlu dojl lo bejtzlu, runnajlu lajzreni sa'csi gajd xcäriejñreni jiansa'c, luxh si'c cayujñzalu dojl lagajc lo Crist. ¹³ Ni'cni, palga narä runä riabsac betzä lo dojl xcuent ni rauä, hueenru dirunä gauä yälñajw ni gun jiajb betzä lo dojl stehuält.

Xhi sajc gun te apost

9 ĴLa dina gacä te bejn ni rut lojdi yu'ä? ĴLa xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najc-tu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluilajztu guliipac nacä te apost.

³ Diidx ni rniä scree loj reni di chalilajz nacä apost najc scree: ⁴ ĴLa di riälj xca'ä guiraa ni runiidxtu gauä näjza ni runiidxtu yä'ä? ⁵ ĴLa digacdziza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶ O Ĵla xtebtis Bernabé näjza narä di gacdi cuääz jienno dzuun te guidaunu laj rusule'nu xtidx Dios? ⁷ ĴChuni'c rajc soldaad luxh lagajc laani siini xhi gauni? O Ĵchuni'c rusuj yaguub luxh dini gau ninejxh ni rcaj lojga, ä? O Ĵchuni'c rajp gaii dxib, luxh dini yä le'ch ni rudeedreni, ä? ⁸ Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre. ⁹ Loj reguijtz xten xleii toMoisés caj rediidxre: "Na'c gusälju guijxh ro' gon che cayo'tni yejc triuu." ĴLa guniitis Dios rediidxre sa'csi riuni regon, ä? ¹⁰ ĴDini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riälj gunlojni xca'ni te yäl'nasa'c ni rajc lo xniaan. ¹¹ La'tu najctu si'c te yuj cadro gule'cnu binij sa'csi basule'nu rextidx Dios lojtu, Ĵla rujntu xhigab dzunro najc gacnäjtu nuurnu tudxene', ä? ¹² Palga racnäjtu ste'ca bejn ni ruluiitu, nungäljru gacnäjtu nuurnu.

Niluxh gajdnu guinii si'c lojtu sa'csi di rlazdzinu guidxoonnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. ¹³ La'tu najntu reni rujn dzuun nejn guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. ¹⁴ Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni. ¹⁵ Niluxh gajdpacna gunä si'c, xhetza caca'ädi. Dizana gucuää rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶ Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷ Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. ¹⁸ ĴXhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riälj gunreni.

¹⁹ Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. ²⁰ Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx

Dios, niluxh diruna guibanä lo leiiga. ²¹ Stee lajt cadro rlazä gunä gaan reni di guibajn lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. ²² Cheni yu'ä loj reni guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³ Runä guira'ti xcuent xtidx Dios ni rusläa bejn lo dojl, te xca'zanu, narä näjza rebejn ni ahuililajz xtidxä, yäl'nabajn par tejpas.

²⁴ Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵ Guiraa reni rrajz guxun rapdareni tiejxhreni te ga'p tiejxhreni yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. ²⁶ Narä dina guxunä si'cni dina ganä caro cha'ä, dizana gucuää si'c te bejn ni rucuanäj te balaa, o cayääztisni lo bej. ²⁷ Niluxh narä runä rajc tiexhä si'c xmosä te na'c gunni si'ctis ni rrajzni, te gunni nani rrajz Dios te di cheni abasule'ä xtidx Dios loj xhidajl bejn, gusanxtujy tiexhä narä.

Yäl'rulijdx lo xcuent rebanäjb

10 Rebetzä, di rlazä jiäl'lajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. ² Gudejdreni xpalaa te za näjza gudejdreni galäii nisdoo; ni'c najc si'c te yäl'robnis sa'csi sanajlreni toMoisés. ³ Sigajcza guiraareni gudajw tejtis yäl'rajw ni baxhal Dios xhaguibaali. ⁴ Guiraaazareni gu' nis ni badeed Dios, Dios bejn birii nisga cuä' te guilaj. Luxh Xpriet Crist gusanäjreni cadrotis sääreni nez lo reyubidzroga. Luxh con xcäl'nibeeni birii nis loj guilajga, Crist najc si'c guilaj ni huinäreni. ⁵ Dios bidxehnäj xhidajlreni, ni'c xhidajlreni gujt nez lo reyubijdzga.

⁶ Guiraa rediidxga najc te yäl'rulijdx loonu, te na'c guichaglaznu jiennu lagajc redojl ni bejn retoxtadgoldoonu. ⁷ Na'cza ganu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisurenireni te gusloj caguijtreni." ⁸ Na'c chunäjnu stee bejn di gac chäältu si'c bejnreni, ni'cni gujt galbichon mil'reni tejtis dxej. ⁹ Na'cza guche'chnu Dios con rextojl'nu si'c bejn balti rebejn'ga, ni'cni gujtreni sa'csi gudauya' bäl'reni. ¹⁰ Na'cza chamojmtu xcuent ni rujn Dios si'c ni bejn rebejn'ga xcuent ni bejn Dios, ni'cni baxhal Dios angl xten yäl'gujt bagu't xhidajlreni.

¹¹ Guiraa redee gusajc retoxtadgoldoonu te rulijdxni nuurnu, cuajzareni lo guijtz te guluii rediidxga nuurnu xho riälj jiennu, nuurnu ni nabajn'nu nejn redxej naj. ¹² Ni'cni chutis ni rujn xhigab naba'nsa'cni nez loj Dios, sudzu'tzni te di jiabsacni. ¹³ Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yäl'nadip yäl'nadaan lojtu te che

tedtu trabajw sidxäلتu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanälazä, colbicaj lo yälrajn xten rebanäjb. ¹⁵ Rniä lojtu si'c lo te beñ nasin, te bennajn: colgulatzsa'c rextidxä don la laaca najcreni. ¹⁶ Che rdaunu xchej xten Dad Jesucrist najcni te seen nabañnäanu Jesucrist. Che rdunnu neñ co'p, rnaalajznu gudijx Dad Jesucrist xtejjni xcuent xtojlnu lo cru-jz. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cru-jz xcuentnu. ¹⁷ Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ ¡Bahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan neñ guidoo, ni'c najcreni tejsi con guiraa rebejn nani rujn sigajc rujnreni. ¹⁹ ¿Xhixhni'c rlazä guiniä, ñaj? ¿La caniä yu' xhi sajz gojn nani gule'c bejn lo banäjb, ä? O ¿la yu' xhi sajz banäjbga, ä? ²⁰ Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo rebenzxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebenzxab, te di chachunäjzatu rebenzxab. ²¹ Sa'csi digacdi yätu co'p ni rusnaj laaznu ni bejn Dad Jesucrist lo cru-jz nägajzca co'p nani rudeedreni lo rebenzxab. Digacdi za guidaunu xchej xten Dad Jesucrist nägajzca xchej ni rudeedreni lo rebenzxab. ²² O ¿la rlazznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios

²³ Guliicani, sajz jiennu xhitis ni rlazznu jiennu, niluxh xhet guira'ti ni rlazznu jiennu najc hueen par nuurnu. Guira'ti najc laaca, niluxh yu' reni di gacnä j gustioobnu lo xcälirililajz Dios. ²⁴ Na'c guntu xhigab quiiltistu lagajc xcäl'nasa'ctu; maazru hueen quiilzatu xcäl'nasa'c xpiñntu. ²⁵ Coltajw xhitis bääl ni rdo' lo guii, na'c guiniabdidxtu caro siäädni te di gacnaj xcäriejntu. ²⁶ Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

²⁷ Palga jäädgajñ te bejn ni di chalilajz xtidx Dios luj jäädtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdidxlu te di gacnaj xcäriejnlu. ²⁸ Palga yu' chu naa lojlu: "Dee najc bääl ni bile'cnu lo rebanäjb", na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. ²⁹ Dina guiniä xcäriejnlu, didi gunnajni xcäriejn stee dade'ga; mbaj ñaj, ¿xhicuent riäjñ gula'tzreni narä sa'csi rajc runä guira'ti porsä racnaj xcäriejn ste'ca bejn, ä? ³⁰ Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios? ³¹ Ni'cni palga gautu, o palga yätu o xhitis ni rujntu, colyujn guira'ti te chä'p xpala'n Dios. ³² Na'c guche'chtu nicla rexpejn Israel niclaza rebenzijt, niclaza rexpejn xquidoo Dios. ³³ Sigajzca runä narä, runä guira'ti ni ruspaa lajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuuililajzreni xtidx Dios.

11 Colyejn si'cni runä narä, sigajzca narä runä si'cni rujn Jesucrist.

Xho riäjñ gun regunaa neñ xquidoo Dios

² Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu ru-soobtu rediidx sigajcni baluiäreni lojtu. ³ Narä rlazä gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. ⁴ Chutis te niguii ni yu' xhumbreel yejcnä lañni cabedx-canabni lo Dios o lañni caguluiini xtidx Dios, laani rusanjtu yejcni. ⁵ Palga yu' te gunaa ni dini gusäu xpäini yejcnä che cabedx-canabni loj Dios o che caniini xtidx Dios, rusanxujny yejcnä sa'csi najcni sigajc najc te gunaa ni abigaj yejcnä. ⁶ Palga di te gunaa gusäu xpäini yejcnä sugugaj yejcnä. Palga najcni te xtuju guigaj yejcnä, sugusäuni xpäini yejcnä. ⁷ Di guchaag gusäu te niguii yejcnä sa'csi najcreni si'c xtuix Dios, näjza xcälrdimbicha' Dios. Niluxh regunaa najc si'c xcälrdimbicha' niguii. ⁸ Sa'csi di niguii nixixtejt cuä' gunaa; gunaa najc ni birixtejt cuä' niguii. ⁹ Xhetza xcuent gunaa di guc-chee niguii; gunaa najc ni guc-chee xcuent niguii. ¹⁰ Ni'cni nanab jääu yejcnä gunaa neñ guidoo si'c te seen lo rexangl Dios yu' chu rnibeereni. ¹¹ Niluxh nez lo Dios nicla niguii niclaza gunaa digacdi guiban xtebreni. ¹² Sigajc galoo birixtejt gunaa cuä' niguii, sigajzca ñaj gunaa najc nani ruu bäz; luxh Diostis najc nani runchee guira'ti rebejn.

¹³ Colyejn lagajc xhigabtu ñaj, ¿la laaca najcni cuedx-guiniab te gunaa lo Dios lañni xhet niäudi yejcnä, ä? ¹⁴ Loj rebeñ guedxliuj guiraa reniguii rgaj yejcnä, sa'csi najcni te xtuju guigaduxh xquidxejcnä. ¹⁵ Niluxh regunaa hueen najc rga' xquidxejcnä te rusäuni yejcnä. ¹⁶ Palga yu' chu tiñdiidx xcuent rediidx nani caniä lojtu, nanab gacbeeni si'ctis riennu, si'ctisza rujnreni neñ guiraa rexquidoo Dios.

Xho ruxhiñreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu neñ xquidoo Dios, lacuaa laaca cuetu, xhet laadi rujntu. ¹⁸ Rnixgää dee: Abiejn diagä che re'tu lo xquidoo Dios, rliä'tu lo sa'tu rajctu tiop cuaa; luxh riliica lazä rediidxre. ¹⁹ Pet naatu nanab guntu si'c te gacbeetu churenic sanälajzpac Dios, churenic sajru lo xtzuum Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, tejtga bejn rlazz xcaxgaa xhi gauni, dxejct yu' reni agudxadoo xque'reni, agusozzarenä, lañni yu' stee cuaa bejn calaan, gajdreni gau. ²² ¿Xho mood? ¿La xheti rlijztu cadro gac gautu, yätu, ä? O ¿la rbälazlu xquidoo Dios, ni'c rusanjtu ylu rebejn ni xhet räjpdi, ä? ¿Xhini'c guiniä lojtu ñaj? ¿La naatu guiliä'pä xpala'ntu xcuent nani rujntu, ä? ¡Gurniä lojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcuent xho bejnni guxhijñ che gudaunäjni rexpejnñi te xchej xten pascw, guxhijñ ni gudo'ni. Cua'ni yätxtiil, ²⁴ dxejc che abadeedni xquixtios lo Dios, gula'ni yätxtiilga, räjpni lojreni: "Colgajw, dee najc tiexhä ni gudedä guet xcuenttu. Scree guntu te guinalajztu narä." ²⁵ Si'cza bennäjni co'p che gulujx gudajwreni, räjpni lojreni: "Ni yu' neñ co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä." ²⁶ Che gautu yätxtiilga, che yätu neñ co'pga, ruluilosactu xhi bejn Jesucrist che gudijxni xcuent rextojñnu lo cruzj; si'cza colyujñ dxejli ni guibisacni lo guedxliujre.

Xho riäjł gac xchej Dad Jesucrist

²⁷ Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujñni dojl, najcni si'cni lagajc laani bagu't Jesucrist, baxhe'zani xtiejnñi. ²⁸ Niluxh sugula'tz tejgatu lagajc lastooni don la yu' xhi dojl bejnñi, dxejcti sajç gauñi yätxtiil, yäni co'p xten xchej Dad Jesucrist, sa'csi abaxhobdojlñi. ²⁹ Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujñni jiajb xcälñaj Dios yejçni. ³⁰ Ni'cni lacti resa'tu racxhuu, xhet nadaanreni, luxh yu'zarenı agujt. ³¹ Ni'cni nanab fiinu xho najcnu, guiniabnu lo Dios gudzucajñi rextojñnu te didi tednu trabajw. ³² Niluxh che rdejdnü trabajw, rdejdnüni te na'c tednu trabajwduxh si'c ted rebeñ guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuäjz resa'tu. ³⁴ Palga yu' chu tejtü ni calaan, sugauni lagajc rolizjñi, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsa'cni.

Dzuun ni rudeed Sprit Dxan xten Dios lo tejga ni rililajz

12 Rebetzä, rlazä gacbeetu xcuent dzuun ni rudeed Sprit Dxan xten Dios lo tejganu.

² La'tu najntu che gajdtu chalilajz xtidx Dios, rajntu chutis banäjb ni di gacbee, ni naatis bejn gañtu.

³ Ni'cni rlazä gacbeetu naj, nicla tejtü ni yu' Xsprit Dxan Dios neñ lastooni sajç guini: "Xhet sajçdi Jesucrist." Luxh rut rajçdi rñii: "Jesucrist najc Dadbid baxhuaan-nu", palga di Xsprit Dxan Dios cuääz neñ lastooni.

⁴ Mbaj naj. Yu' xhidajł dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujñ dzuunga neñ lastoo guiragajcnu. ⁵ Yu'za balti cuaa dzuun nani riennu, niluxh tejsi najc Xtadbid baxhuaan-nu. ⁶ Yu' xhidajł mood rajç dzuun, niluxh tejsi Dios rujñ dzuunga lastoo guiralii bejn. ⁷ Tejga bejn ruluiloj garen-garen xtzuum Sprit Dxan xten Dios, niluxh guira'ti redzuunga najc te gacnäreni guiraanu. ⁸ Lo tej

bejn rudeed Sprit Dxan yälñasiñ, lo steeni rudeed lagajc Sprit Dxanga yälñajñ. ⁹ Lagajcza Sprit Dxanga rudeedzani yälñililajzro lo tejni, dxejc lo steeni rudeedza lagajc Sprit Dxanga yälñibee te rusiajçni yälñracxhuu. ¹⁰ Loj stee bejn rudeedzani yälñibee te gunni milaagwr, loj stee bejn rudeedni yälñriembeee te sajç guinixgaani xcuent recos ni churu gac; lo steeni rudeedni yälñasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yälñracbee te rajç rñiini loonu xhini'c guñii bejn ni rñii garen-garen redidxsaj. ¹¹ Niluxh tejsi najc Sprit nani rujñ guiraa redzuunre, racnäjnı rujñ tejganu xtzuumni si'ctis ni rlajzñi.

Guiraanu najcnu te la' tejsi tiejxh

¹² Sigajc ni najc tiejxhnu tejsi, mase yu' xhidajł la' xtenni, tejgareni te la' tejsi tiejxh, sigajcza najc rebejn nani huililajz xtidx Jesucrist. ¹³ Guiraanu, mase najcnu rexpejn Israel o beñ griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujçnu si'c tejsi tiejxh, luxh tejsi Sprit Dxan xten Dios biädläjz neñ lastoonu.

¹⁴ Sa'csi tiejxhnu dini gac tejsi la', najcni balti la'.

¹⁵ Paru naa ni'nu: "Sa'csi dina gacä te ñaa, ni'cni dina gacä te la' tiejxhre." ¿Xhixh porsı ni'c dini gac tla' tiejxhga, ä? ¿Gurniälöjlu! ¹⁶ Palga diajgnü naa: "Dina gacä te baloj, ni'cni dina gacä te la' tiejxhre." ¿Xhixh porsı ni'c dini gac tla' tiejxhga, ä? ¿Gurniälöjlu! ¹⁷ Palga guideb tiejxhni niajç te baloj, ¿xhi cojn niejn diajgnı? Palga guideb tiejxhni niajç te diajgnı, ¿xhi cojn chuxhi'ni? ¹⁸ Mbaj naj, ni'c basoob Dios guiraa rela' te guc-chee tiejxhnu si'ctis ni rlajzñi gacni. ¹⁹ Paru niajç guidebni si'c tejtis la'ni, ¿xho niajçpacni te tiejxhni dxejc?

²⁰ Niluxh naj ensilaani yu' xhidajł la' te najcni tejsi tiejxhni.

²¹ Te balojnu di gac gäbni lo ñaanu: "Dina guiquinälu", niclaza bitıuejçni di gac gäbni lo ni'ni: "Dina guiquinälu." ²² Chucala lapacreni rquiniñru nani ruzeñ lascanu xhet sajçdireni. ²³ Luxh retla'ga nani rchalonu guxiı sajçreni, reni'c maazru sajç. Luxh reni rtuinäänu, niguii sigajç gunaa, reni'c riapdarunu.

²⁴ Biätla sgaii la' tiejxhnu nani rlui saruru, reni'c di guiquini gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajç.

²⁵ Bejnñi si'c te di chu yälrdijł lo retla' tiejxhnu, te guiraa retla'ga gacnäj sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajcza che guil-iä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸ Luxh abadeed Dios yälñibee lo tejganu lo xquidooni te gunnu xtzuum-xtzuumni. Ganidtoo guleni reapost; ni rojpga guleni rebejn ni rñii xtidx Dios; ni riojnga, guleni rebejn ni ruseed; dxejcti guleni reni rujñ remilagwr, reni rusiajç beñracxhuu, reni racnäj, reni rñii garen-garen redidxsaj. ²⁹ Et guiraadi rexpejn Jesucrist najc apost. Et guiraadizarenı rñiireni xtidx Dios. Et guiraadireni rajç ruseed. Et

guiraadizareni rajc rujn remilagwr. ³⁰ Et guiraadireni rajc rusiajc rebenracxhuu. Etza guiraadireni rajc rnii garen-garen didxsaj, et guiraadireni rajc rnii xhi sälo redidxsajga. ³¹ Nanab guideb lastootu rlaiztu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

Yälsanälajz

13 Palga guiniä giraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza giralii yäl'nasiñ xten guedxliujre, palga rapä yäl'rillazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rehxixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajz cabäzreni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. ⁵ Direni gun recos ni di guchaag, dini quuil xcäl'nasa'ctisni, dini guidxe'ch, dini jiu redojl ni rujn bejn lojni. ⁶ Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. ⁷ Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäzjni, rajc rdejdn xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäzj redidxga. ¿La rajc rnii bejn garen-garen redidxsaj, ä? Sidzujn dxej siacdx redidxsajga. ¿La yu' yäl'najn? Sidzujn dxej sinitlojpacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰ niluxh che jädsac Jesucrist ni rajp giralii yäl'najn, sinitloj xcäl'nandxucnu.

¹¹ Che gucä biuux, guiniä si'c biuux, benäza xhigab si'c biuux, niluxh che bidzuna lo yäl'benjol, gunitloj rehxigab biuux ni benä galoo. ¹² Sa'csi naj rhuiinu si'c loj te guihujn ni nacäy, luxh che guibañnänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. ¹³ Niluxh naj ria'n yäl'rillajz näjza yäl'rbäzljajz, näjza yälsanälajz. Lo guidxon redee, sajcrü yäl'rinalajz.

Renani rnii rediidx

14 Ganiddoo colquuil yäl'rinalajz, colnabza lo Dios te guniidxruni xhi stee dzuun, niluxh colyejnru te xca'tu yäl'rnibesa'c te gusule'tu xtidx Dios. ² Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniiini cosro, cosxhiga'tz nani ruluii Sprit Dyan xten Dios guiniini. ³ Niluxh bejn ni rusule' xtidx Dios, rustioobni xcäl'rillajz bejn ni ruliidxni, ruspaani lajz nani rac-huin lajzni. ⁴ Che rnii te bejn garenca didxsaj

ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobruni lastoo guiraa rebenguidoo.

⁵ Narä rlazä maläii rajc rnii guiraatu garen-garen didx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca didx palga di gacdi gusule'ni lo rebejn xhini'c caniiini.

⁶ Mbaj naj betzä, che jäälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'ruluii.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn golsa'creni, ¿xho jien-nu gacbeenu xhi dij cayol'reni, ä? ⁸ Sigajcza lo guerr, palga direni gol cornet dippac, ¿xho gacbeereni agojl chatijl'reni, ä? ⁹ Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniiilu, ä? Xlia'si guiniilu, lo bejtis sää xtiidxlu. ¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹ Niluxh palga dina gacbeä didxsaj ni rniireni loä, nacä si'c te benzijit loj nani canii loä, sigajcza sajc nani caninä narä. ¹² Ni'cni la'tu ni rlaiztu xca'tu yäl'rnibee xten Sprit Dyan te guntu xhi redzuun, colguejs, colnab lojni xhidajl dzuun te gacnäjtioobru xcäl'rillajz rexpen guidoo.

¹³ Ni'cni palga yu' te bejn ni rnii garenca didxsaj, suguiniabni loj Dios yäl'rnibee te gac gusule'ni diidx ni rniini lo rebejn. ¹⁴ Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. ¹⁵ ¿Xho ricajni dxejc? Siniab xspritä näjza xcärienä lo Dios; sol xspritä näjza xcärienä dij. ¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadijg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu. ¹⁷ Hueenza calä'plu xpala'n Dios, per stee bejnga dini tioob loj yäl'rillajz. ¹⁸ Rudedä xquixtios lo Dios maazru rajc rniä garen-garen diidx loj guiragajctu. ¹⁹ Niluxh neñ guidoo maazru rlazä guiniä con xcärienä gaitis diidx nani gacbeetu, nani guluii la'tu, loj tzuu mi' diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹ Scree caj lo xleii to-Moisés: "Mase guiniä lo rebejn con garenca diidx näjza xtidx benzijit, nicla si'c direni gucuadijg xtidxä", naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl'rusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu neñ guidoo dxejcti caniiitu garen-garen diidx ni rut racbeedi, dxejc guidzujn tej ni di gan xtidx Dios, siniini guiraatu rajc yejctu. ²⁴ Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiitu, sacbeeni yu' xtojlni, ²⁵ sienloj rehxigab xhiga'tz ni yu' neñ lastooni, dxejcti siabrojni

suzuxhibni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu neñ guidoo suxca' tejpgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcälrlilajz renani ahuililajz xtidx Dios. ²⁷ Palga yu' renani rnii con garenca diidx, suguinii tio'p-choñ bejn, niluxh tebgajreni, dxejcti sugusule' steeni xhi säloj ni rnii tejpgareni. ²⁸ Palga rut rajcni gusule' rediidxga, na'c guiniireni con garenca diidx neñ guidoo, suguinixtebrene lo Dios. ²⁹ Si'cza renani rusule' diidx ni rudeed Dios lojreni, suguinii tio'p-choñ bejn, niluxh tebgajreni, te cuadiajg stiop xchoñreni donnu la laaca caniireni. ³⁰ Palga guluiloj Dios te cos loj te bejn ni sobga' cacuadiajg, sucuedxisijcni, dxejcru suguinii. ³¹ Sa'csi guiraatu sajz gusule'tu tebgajtu didx ni baniidx Dios lojtu te gac guisieedu, te tioob lastoo guiraatu lo yälrlilajz. ³² Rudeed Sprit Dxan xten Dios yäl'najn loj reni rusule' diidx ni rudeed Dios lojreni te acanajnreni che riäj'l guiniireni o che riäj'l cuedxiireni, ³³ sa'csi Dios najc te Dios ni rujn guira'ti xnejz-xnejzni, dini gun biegy, niluxh rbecdxini lastoo bejn neñ guiraa reguidoo xten rebejn ni ahuililajzpac xtiidxni. ³⁴ Sucuedxi regu-naa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gu-cuadiajgreni xtidx Dios ni rusule' reniguii lojreni. ³⁵ Palga rlanjreni gacbeerureni, suguiniaidiidxreni loj chääl-ni che guibi'reni rolijzreni, sa'csi sianxtuju gunaaga palga guiniini neñ guidoo. ³⁶ Colgacbee et la'ditu guläxtejditu rextidx Dios, luxh etza xtebtis lojtu biäädni. ³⁷ Palga yu' tejtü ni rchalo rajc rniini diidx ni rudeed Dios lojni, o palga rchalon abadeed Xpirt Dxan xten Dios te dzunro lojni, sug-acbeepacni dee: guiraa rediidx ni cagucuaä lojtu, ru-cuaäni sa'csi si'c gunibee Jesucrist gucuaäni. ³⁸ Palga yu' chu tejtü ni di chalilajz rapä xcäl'rnibee Jesucrist, rutzä juidi xtiidxni. ³⁹ Ni'cni, rebetzä, colyejnru te gusule'tu diidx ni runi-idx Dios lojtu, na'c gudxoju renani rniiza garenca didxsaj. ⁴⁰ Luxh guira'ti nani rujntu, colyensa'cni, xnejz-xnejzni.

Gubañsac Jesucrist lo rebengut

15 Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga. ³ Lojtu ganiddoo basule'ä rediidx ni sajcrü ni bisiedä, basule'ä xho gujt Jesucrist lo cruz, bixe' xtejnne te badzucajni rextojl'nu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubañsacni si'cni caj lo xtidx Dios gacni. ⁵ Cheni gubañsacni, baluilojni lo Pedr, dxejctiru loj guitzubito'p

rexpejn'pacni, ⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabansijc, niluxh yu'za reni agujt. ⁷ Dxejcti baluilojni lo Jacoob, dxejctiru loj guiraa reapost.

⁸ Dxejcti lultpac baluilojzani loä, luxh alagudejd ru-luilojni lo rexpejn'ni dxejc. ⁹ Narä guxiiru sacä loj guiraa reapost, niclaza nungäj'l cuälajreni narä apost sa'csi basacsä rexpejn' xquidoo Dios. ¹⁰ Balaslazduxh Dios narä, ni'c narä nacä si'c ni nacä naj. Luxh et xlia'di bal-aslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl'rulaslajz Dios cay-acnäj narä. ¹¹ ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibañsac rebengut

¹² Mbaj naj, palga nuurnu cagusule'nu diidx xcuent ni gubañsac Crist loj rebengut, ¿xhicuent yu'tu ni rnii, xheti yäl'rbañsac loj rebengut? ¹³ Palga xheti yäl'rbañsac lo rebengut, dxejc nicla Crist di nibañsac lo rebengut. ¹⁴ Luxh palga di Crist nibañsac lo rebengut, ¡xlia'si najc diidx nani basule'nu! ¡xlia'siza najc xcäl'rlilajztu! ¹⁵ Luxh et ni'ctis. Abiga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibañsac loj rebengut. ¹⁶ Niluxh palga di rebengut chäs, niclaza Crist di nibañsa'c lo rebengut. ¹⁷ Luxh palga di Jesucrist nibañsac loj rebengut, xhet sajcdi xcäl'rlilajztu, sanuutistu loj xtojltu. ¹⁸ Sigajcza agunijt rebengut nani huililajz xtidx Jesucrist. ¹⁹ Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäj'l jiaduxhzej guiraa reni ruhuii loonu.

²⁰ ¡Per dini gac si'c! Guliipacni gubañsac Jesucrist loj rebengut. Laani guc ganiddoo loj guiraa rebengut ni gubañsac, luxh laani dini niejt par tejpas. ²¹ Sigajcni biääd yäl'gujt loonu xcuent tejtis niguii, sigajcza biääd yäl'rbañsac lo rebengut loonu xcuent tejtis niguii. ²² Sigajc xcuent te niguii ni laa Adán biääd yäl'gujt, sigajcza xcuent Jesucrist biääd yäl'rbañsac loj rebengut. ²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejn'ni che jädsacni lo guedxliujre, guiraareni suspañsacni. ²⁴ Che agujc ni'c, dxejcti siääd dxe lult che gudedsacni yäl'rnibee lo Dios Xtadni, che abadzujl'ni guiraa reyäl'rnibee, guiraa reyäl'guxhtis, guiraa reyäl'milagwr. ²⁵ Nungäj'l'pac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶ Lu't ni rdxe'ch lojni ni gunitlojni najc yäl'gujt. ²⁷ Lo xquijtz Dios caj: "Agudixhni guira'ti detz ni'ni te guinibeenireni." Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸ Che acanibee Jesucrist guiraali recos, dxejcti sudeedni guideb yäl'rnibee loj Xtadni Dios, te xtebtis Dios guinibee guira'tipac. ²⁹ Palga rujntu xhigab di bejn guibañsac loj rebengut, ¿xhi gun rebejn nani robnis xcuent rebengut?

Palga di bejn guibaṅsac lo rebengut, ¿xhicuent rutiobnisreni la'tu xcuent rebengut?

³⁰ ¿Xhicuentza rdxunnu lo casionduxh guira'ti or?

³¹ Rniliápac lojtu, rebetzá, calápá xpala'ntu xcuent Jesucrist Xtadnu ni cayun xtzuunni lojtu. Ni'cni guniá lojtu, guira dxej rguillreni nará te ju'treni nará. ³² Palga bená xhigab si'c te niguii guedxliuj che bacuanáá reniguii ni najc si'c man nialajz lo guedx Éfeso, ¿xhi gaan bená? Palga di bejn guibaṅsac loj rebengut, do'o jien si'c ni caj lo guijtz: "Do'o guidaú, do'o guidaú, sa'csi guixee empac sejtnu."

³³ Na'c gusaantu gusgueerreni la'tu, palga sachaaglu lo benguijdx nája luj sajclu benguijdx. ³⁴ Basani jxcáriejnlu si'cni nanab gunlu. Bascuááz dojl ni rujnlu sa'csi yu' balti bejn ni dipac gumbee Dios. Te guitujytnu ni'c rniá diidre lojtu.

Xho guibaṅsac rebengut

³⁵ Naj yu' reni rniabdiidx: "¿Xho rbaṅsac bejn loj rebengut? ¿Xhoza gac tiejxhreni?" ³⁶ ¡Chip nayáállu! Che rbe'clu te binij, di gájl guillie jn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gájlga si'cni rla jzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejnni, rustioobni gájlga, lo tejga gájl rudeedni xpala jgni o tiejxhni, si'ctis ni rla jzni. ³⁹ Xhet guiraadi retiejxhreni najc tebloj. Yu' báäl xten bejn, yu'za báäl xten reguidxaa, yu'za báäl xten reman xhaguibaa, yu'za báäl xten rebájl. ⁴⁰ Sigajcza yu' tiejxh rebajl xhaguibaa, tiejxh rexten guedxliujre. Niluxh yálr dimbicha' xten rebajl xhaguibaa najc tej, dxej yálr dimbicha' guedxliuj najc ste'ca. ⁴¹ Bicha' xte gubijdx najc garen lo xten báii, sigajcza xpicha' rebal xhaguibaa najc garen-garenza lo sa'reni. ⁴² Sigajcza yálrbaṅsac loj rebengut; che guet bejn rga'tz tiejxhni luxh rujdxni, rnitlojni. Luxh che guibaṅsacni loj rebengut, garenca gac tiejxhni, diruni gudx, anabajn ni par tejpas. ⁴³ Che rga'tzni, rujn bejn xhigab xhetru gacná jdi tiejxhga, niluxh che guibaṅsacni, lacti sacru, lacti sajz tiejxhga. Che rga'tzni, xhetru sajzdi gunni, luxh che guibaṅsacni, anadipduxhni. ⁴⁴ Che rga'tz tiejxhnu, najcni xten guedxliujre, luxh che chásni najcni te tiexhcoob ni runiidx Dios. Ni'cni yu' te tiejxhni ni siáäd lo guedxliuj, yu'za te tiejxhni ni siáäd xhaguibaa.

⁴⁵ Si'cza caj lo xtidx Dios: "Nigui galooga ni laa Adán, bejn Dios gujcní te bejn nabajn." Niluxh Adán ni biáäd lult, Jesucrist najc Sprit ni runiidx yálnabaṅcoob loonu.

⁴⁶ Ganid najc yálnabajn xten guedxliujre, dxejctiru yu' te yálnabaṅcoob xhaguibaali. ⁴⁷ Sigajcza niguii galooga najc bejn guedxliujre, niluxh ni rojp niguii ni biáäd najc bejn xhaguibaali. ⁴⁸ Benchee Dios Adán con yuj, najcni bejn guedxliuj. Xhaguibaali biáäd Jesucrist, najcni bejn xhaguibaa. ⁴⁹ Sigajcni najcni si'c bejn guedxliujre, sigajcza sajznu sigajc najc bejn ni yu' xhaguibaa.

⁵⁰ Naj guiniá rediidre lojtu betzá, di gac ted tiejxhnu ni najc báäl nája rejn xhaguibaa cadro yu' Dios. Tiejxhnure nani sinitloj di gacdiza xca'ni stee tiejxh ni najc par tejpas. ⁵¹ ¡Colhuii! Rlazáza gacbeetu te didx-xhiga'tz; xhet guiraadinu guet, niluxh sidxaa guiraa

retiejxhnu ⁵² tera't bázlule', si'c cheni rdinya' guzii, che jiel lult trompe't, dxej sibansac rebengut, sájsreni guideb tiexhcoobreni ni najc par tejpas. Luxh nája tiejxhnu sidxaa. ⁵³ Sa'csi tiejxhnu ni najc xten guedxliuj nanab guida xani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtñi, niluxh tiejxhnu ni najc xten xhaguibaa di gacdi guetñi, najcni par tejpas. ⁵⁴ Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, nája che tiejxhnu ni sajz guet abidxaa te ga'pnu tiejxhnu ni di gacdi guet, ni najc par tejpas, dxej sisiojb xtidx Dios ni caj scree: "Yálgujt agunitloj sa'csi bejn Jesucrist gaan lojni. ⁵⁵ Yálgujt, ¿xho gac gunlu gaan naj, ä? Yálgujt, ¿Con xcálnayanlu naj, ä?" ⁵⁶ Xcálnayan xten yálgujt najc dojl. Xcálrñibee dojl najc leii. ⁵⁷ Niluxh rdeednu xquixtios lo Dios, nani runiidx te yálrñibee loonu te jiennu gaan lo yálgujt xcuent Dad Jesucrist.

⁵⁸ Ni'cni rebetzá ni sanälazduxhá, colchanuutis, colsudzu'tz lo xtidx Dios, na'c guida jgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

Meel ni guire' par rexpejn Dios

16 Xcuent meel nani guire' par rebejtznu, colyejn ni sigajcni rápä gun reben rexquidoo Galacia. ² Casob dumingw, nalajznu ganid dxej xmaan, te jgatu colcuáá te meel yejz nani rujntu gaan nen te xmaan, colcucweeni, te na'c gutie'tu meel che jiälá. ³ Te che guidzuná, guxhála meelga, nája tiop-choṅ guijtz chaná chutis bejn ni cuetu chasa'nni guedx Jerusalén. ⁴ Palga laaca cha'aza, sajzca chänäreni nará.

Xhigab ni bejn Pabl cháäni biaj

⁵ Guida zuná lojtu che agudedá reguedx Macedonia, sa'csi sidedá nejzga galoo ni jiälá ro'c. ⁶ Dxejcti pet siannáá la'tu, pet saclaá, sidedá guiraa rebái najl ro'c, te gacná jtu nará che cha'a cadrotis cha'a. ⁷ Sa'csi di rlazá jiádhuiátu te ladejtzi, rlazá jiannáá la'tu xchejpac, palga gusaan Dad Jesucrist guná si'c. ⁸ Niluxh sia'ná guedx Éfeso, te ro'c tedá lanij ni rusnaj lajz bejn che biáäd Sprit Dxan xten Dios. ⁹ Sa'csi ro'c yu' xhidajl bejn nani rla jz guisieed xtidx Dios, niluxh ro'c yu'za xhidajl reni rdxe'ch loá.

¹⁰ Palga guida zunj Timoteu lojtu, saru colhuiini, te na'c chuni yársia' la' ni yunájni la'tu, sa'csi cayujn ni xtzuun Dios sigajc runá nará. ¹¹ Na'c gusaantu chu tej ni cuälazni, colcuedxí lajzni, dxej colgusunejzni, te jiádhuiini nará ree, sa'csi ree cabááznu laani con rebejtznu.

¹² Niluxh xcuent bejtznu Apolos, rápäza lojni niáäd pacni lojtu con rebejtznu, niluxh di rla jz pacni niáädni naj. Per siáädcani dxejtis ni gac jiáädni.

Rextixtios lult ni ruxhałni

¹³ Cołsusin, cołsudzu'tz lo yälirililajz xten Dios, colyejn dzuun si'c niguii, colyajc beñdaan. ¹⁴ Xhitis ni rujntu colyejnni con yälrinälajz.

¹⁵ La'tu rebetzä, anajntu xcuent rexfamil Estéfanos, nani ganid huililajz xtidx Dios nez reguedx Acaya, najntu xho racnäduhrene rebejtzn nani huililajz xtidx Dios ro'c. Naj rniabduhjä lojtu, ¹⁶ colgusoob xtidx rebejnğa, näjza xtidx guiraa rebejn ni racnäj rexpejn Dios, ni rujnza xtzuum Dios. ¹⁷ Rbalazä bidzujn Estéfanos, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu.

¹⁸ Gulecdxireni lazä näjza lajztu, ni'cni, ¡coljju sa' rebejnğa!

¹⁹ Rebejn xquidoo Dios nez reguedx Asia ruxhał xtixtios lojtu. Aquila näjza chäälni Priscila näjza rebejn ni re' rolizreni ruxhałzareni xtixtios lojtu. ²⁰ Guiraa rebejtzn ruxhał xtixtios lojtu. Colguinii tejgatu lo sa'tu: "Xchan, gacnäj Dios la'tu."

²¹ Narä Pabl, ruxhałä xtixtios lojtu, lagajc narä benä reletre.

²² Palga yu' chu tejtu ni di chanälajz Dad Jesucrist, sunitlojni. ¡Dad Jesucrist, guda!

²³ Gacnäj xcäl'rulaslajz Jesucrist guiraatu. ²⁴ Yälrinälajz ni rapä xcuent Jesucrist suchunäjni la'tu. Sugacni si'c.

2 Corintios

Ni rojp guijtzt ni bacuaa Pabl lo guidoo xten guedx Corinto

1 Narä Pabl nacä apost xten Jesucrist sa'csi si'c rlaiz Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijtztze lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. ² Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

Trabajw ni gudejd Pabl

³ Guiliä'pnu xpala'n Dios Xtad Jesucrist, nani rulaslajz nuurnu, nani rustoolajz nuunu. ⁴ Che rdejdnu trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. ⁵ Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. ⁶ Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejznanu. ⁷ Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnu, suscuedxi Dios lajztu sigajcni ruscuedxini laaznu.

⁸ Rebetzä, rlazä gacbeepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. ⁹ Gulicanu, alabienu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac rebengut. ¹⁰ Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, ¹¹ sa'csi cayacnäjtü nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcälrulaslajz Dios ni baniidxni loonu.

Xhicuent di Pabl nij guedx Corinto

¹² Dee najc nani ruspa laaznu: rbedxi xcäriejnnu, ni'c ruluii loonu laaca nabajjnu, con yälndolajz rienu si'cni nrabee Dios; xhet sa'csi rajpnu xcäl'najn reben guedxliujdi, alga sa'csi racnäj Dios nuure. Si'cpac nabajjnu lo guedxliujre, luxh maazru che yu'nu lojtu. ¹³ Cacuuanu lojtu rediidx ni sajc gojtu, ni sajc gacbeetu, luxh cabäzä sacbesa'ctu guiragajc rediidx ni gucuää,

¹⁴ lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

¹⁵ Ni'cni ganiddoo benä xhigab niädhuiä la'tu te ni-balajztu tio'p huält. ¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. ¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te ben guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? ¹⁸ Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a". ¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni". ²⁰ Si'cza guiraa rediidx ni bia'n Dios loonu xcuent Jesucrist najczeni "sunäpacni"; näjza xcuent laani najczeni "sugacni si'c" par nuurnu, te chä'p xpala'n Dios xcuent nuurnu. ²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jienu txzuunni. ²² Abacuaazani xseenni loonu, ni'cni baniidxni Sprit Dxan xtenni te cuääzni nen lastoonu.

²³ Rbedxä loj Dios gacbeeni xhi yu' lastoä, guliipacni te diruna gutalä xcäl'najtu, ni'c dina niälsacä guedx Corinto. ²⁴ Di rlaiznu guinibeenu xho chalilajztu, alga rlaiznu gacnäänutu lo dzuun te guibaa lajztu; guliipac agusudzu'tztu lo xcäl'riliilajztu.

2 Niluxh lagajc xcuent xcäl'nasa'cä benä xhigab dina jäädhuisacä la'tu che cayac-huin lazä. ² Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. ³ Ni'cni lagajc xcuent ni'c bacuaä lojtu, te che jäälä lojtu, di rebejn gunhuin lazä nani riäjil guspaa lazä. Luxh nancheä palga narä guibaa lazä, nägajc la'tu sibaaza lajztu. ⁴ Che bacuaä guijtztga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yäl'sanälazduxh ni sanälazä la'tu.

Yälrusiäjil lajz ni yu' par nani bejn falt

⁵ Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh. ⁶ Alabasacsiduxh xhidajl bejn dade'ga, na'cru gusacsítuni naj. ⁷ Naj colsiäjil lajztu xcuent xtojlni, colcuedxi lajzni didi gac-huinduxhtej lajzni. ⁸ Ni'cni rniabä lojtu, colchanälajz bejnre si'c ni huinälajztuni galoo. ⁹ Bacuaxgaäza lojtu te gacbeä laa susoobtu xtidxä.

¹⁰ Naj renani jiäjl lajzto xtojlni, näj narä siäjł lazäni. Sigajcza narä, nani basiäjł lazä, palga yu' xhi basiäjł lazä, benäni xcuent xcäl'nasa'ctu, nez loj Jesucrist, ¹¹ te di gun beñdxab gaan nuure, sa'csi anajnnu xho najc latsiaj ni rujn beñdxab.

Guyu' Pabl yärsia' che bidzujñni guedx Troas

¹² Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojnđi narä, ¹³ niluxh guyuduxhä yärsia' sa'csi dina nidxlä Tito, bejznu. Ni'cni basadixgacäreni, sa'äti nez reguedx Macedonia.

Jesucrist rujn riennu gaan

¹⁴ Xquixtios lo Dios nani con Jesucrist racnäj nuurnu te dipacnu gunijł, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejł xtidx Dios. ¹⁵ Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejł nani canijł sa'csi naadireni chalilajzreni xtiidxni. ¹⁶ Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl'nabañcoob. ¿Chu laa ni racbee sa' recosga? ¹⁷ Sa'csi dinu gac si'c najc xhidajł bejł nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäj Jesucrist nez loj Dios ni cahuii xhini'c riennu.

Diidx nacoob ni basa'n Dios loonu

3 Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijłz ni rnii najcreni beñsa'c. ¿La rłajzzatu guiluini lojtu sa' guijłzga, o guiniabnu guntu sa' guijłzga xca'nu, ä? ² La'tu najc si'c xquijłznu ni rnii xho najcnu. Lastoopacnu acuajtu. Guiraa rebejł rajc rhuii xho huililajzto xtidx Dios sa'csi basule'nu xtiidxni lojtu. ³ Huenliisi rluiloj najctu si'c xquijłz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajł bacuaa rextidx Diosga, bacuaanireni lastootu.

⁴ Nadoncheenu redee, ni'cni xcuent Crist dinu guidxejb nez loj Dios. ⁵ Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. ⁶ Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleii biädñä dojl, dxejc gujłtnu. Niluxh didxcoobga ni rusule'nu biädñä Sprit Dxan xten Diosni, luxh runiidxni yäl'nabañcoob loonu. ⁷ Lei baluii yu' xtojł bejł, riäjł guetreni. Xhidajł seen guyu' che bacuaa Dios rediidxga lo guij. Luxh di niajcdi nuhuii rexpejł Israel loj Moisés, bidxebreni sa'csi rdimbicha' lojni, luxh sanuu cayuii yäl'rdimbicha'ga. ⁸ Palga si'c gujc che biäd leii, aticaxh naj su'ru xcäl'rdimbicha' xleii Sprit Dxan xten Dios, ni najc redidxcoob nani abasule'nu.

⁹ Palga xleii toMoisés ni baluiloj yäl'gujł xcuent dojl biädñä yäl'rdimbicha', aticaxh naj yu' xcäl'rdimbicha' xtidxcoob Dios ni rudzucaj dojl. ¹⁰ Naj dirunu fii xcäl'rdimbicha' xleii toMoisés sa'csi xtidxcoob Dios rdimbicha'ru par tejpas. ¹¹ Palga yäl'rdimbicha' nani biuii bianisesduxhni tera't, stee yäl'rdimbicha're ni najc par tejpas sidimbichasesduxhni.

¹² Luxh ni'c runiidx yäl'rbecdxi lajznu, dipacnu guidxejb che rusule'nu xtidxcoob Dios. ¹³ Dinu gac si'c toMoisés, ni basäu tla' lajd lojni te di fii rexpejł Israel cayuii yäl'rdimbicha' ni guyu' lojni. ¹⁴ Niluxh bicäjy xcäriejnreni; lo dxej najli che riel xleii toMoisés, najcni si'cni yu' xhi lajd rusäu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. ¹⁵ Lo dxe najli che rojreni xleii toMoisés, najcni si'cni ruscäjy te lajd xcäriejnreni. ¹⁶ Lo xtidx Dios rnii scree: "Niluxh che gusiechajz te bejł, gudzuréni nez loj Dad, sibicaj lajdga", nalajznu sacbeeni xtidx Dios. ¹⁷ Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸ Niluxh nuure dinu gusäu lajd lojnu, didi guscäjy ni xcäriejnreni. Nuure najcnu si'c te guihujajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcäl'rdimbicha' Jesucrist, sa'csi si'c cayujł Sprit Dxan xtenni.

4 Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jäxhan. ² Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejł rsiapaacnu lo xnezyuj Dios. ³ Niluxh palga yu' chu dipac gacbee rextidx Dios nani rusule'nu, najctisreni rebejł nani ala canitloj par tejpas, ⁴ sa'csi abascäjy beñdxab ni rnibee guedxliujre xcäriejnreni, si'cni rujñni lo rebejł nani di chalilajz xtidx Jesucrist, te na'c fiireni xcäl'rdimbicha' xtidx Dios ni rnii xcuent xhanij xten Jesucrist, ni najc xtujxh Dios. ⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶ Che benchee Dios guedxliuj, guniini: "Lo xcäjy suguirii te bajł ni gusanij." Lagajc Diosga abasanij lastoonu te baniidxni bajł ni najc yäl'riembee xcäl'rdimbicha' Dios nez loj Jesucrist.

Xho guibañnu con yäl'rililajz

⁷ Nuurnu najcnu si'c te guesyuj, xhet sajcdinu, niluxh guidxanu te yäl'nasacduxh, ni najc xtidx Dios xcuent Jesucrist, te guiluiloj xcäl'nasa'c xten xcäl'rnibee Dios lacuaa xhisi te yäl'nadipbäz xtenu. ⁸ Rdeednu trabajw guira nejz, niluxh dinu gunijł yäl'runloj. Mase di jien xho jiennu, dinu chu yärsia'. ⁹ Rusacsíreni nuure, niluxh di Dios cuälaznu, rguijłreni nuure, dizareni ju't nuure. ¹⁰ Cadrotis rionnu rusacsíreni nuure si'c basacsíreni Jesucrist, te si'c neñ tiejxhnu gululojzani yäl'nabañsac loj rebengut xten Jesucrist. ¹¹ Cadrotis rionnu rłajzreni ju'treni nuure sa'csi rusule'nu xtidx Jesucrist te si'cza neñ tiejxhnu gululojzani xcäl'nabajł Jesucrist loj

rebeņ guedxliujre. ¹² Ni'cni rujn yālgujt dzuun loonu, per yālnabajņ cayujn dzuun lojtu.

¹³ Sa'csi rajpnu lagajc xsprit xten yālrililajzga, sigajc ni caj lo xtidx Dios: "Huililazā ni'cni basule'ā diidx." Siga-jcza nuure, huililaaznu xtidx Dios, ni'cni rusule'nuni.

¹⁴ Sa'csi nadonnu lagajc nani baspaņsac Jesucrist loj rebeņgut, lagajcza laani gun guibaņsacnu con Jesucrist te gunni sunājnu la'tu nez lojni. ¹⁵ Rsiajcnu guiraa ni rsiajcnu te xcuentis la'tu gudeedru bejņ xquixtios lo Dios, te guiliā'pruzareni xpala'nni xcuent yālrulasajz ni sanuutis care'ch lo xhidajļ bejņ.

¹⁶ Ni'cni dinu gunijt yālrūnloj, per mase tiejxhre acayujxh, guixe-guixee cagustioob Dios spritnu. ¹⁷ Re-trabajw ni cadeednu lo yālnabajņre rdedgajczeni, niluxh rujnreni ga'pnu te yālrđimbichaduxh ni gajdnu guidon, ni najc par tejpas. ¹⁸ Dinu fiitis renani ruzeņ lo guedxliujre sa'csi sinitloj reni'c, alga cayenloonu renani di guzeņ, sa'csi renani di guzeņ najczeni par tejpas.

5 Aracbeenu tiejxhnu najc si'c te yu' xten xaimnu lo guedxliujre, sidzujņ dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ² Guliicani, laļni dxunnu neņ tiejxhre, rbedxneņnu rdeednu trabajw, ni'cni rļajznu malāii agojļ guidxaa tiejxh guedxliujre te xca'nu te tiexhcoob ni siāād xhaguibaa. ³ Te si'c che acua'nuni, diruni gac si'cni suxhabāāl xaimnu, sa'csi abicoob tiexhnu. ⁴ Laļni dxunnu neņ tiejxhre rbedxneņnu, rdeednu trabajw, sa'csi di rlaaznu suxhabāāl xaimnu, rļajznu gacwnu tiexhcoobnu, te tiejxhre nani cayejt, sidebnājni tiexhcoob ni siāād xhaguibaa. ⁵ Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujņpacnini.

⁶ Ni'cni dinu guidxeeb, sa'csi nadonnu laļni nabajņnu lo guedxliujre, di gacdi guibajņnu xhaguibaa loj Dadga. ⁷ Sa'csi nabajņnu xcuent nani rililajznu, xhet xcuentdi nani rajc rhuiinu. ⁸ Ni'cni rniā nabajņnu dinu guidxeeb, rchaloonu hueenru guisa'nnu tiejxhnu lo guedxliujnure, te cholāznāānu Jesucrist xhaguibaa. ⁹ Ni'cni tejtis najc xhigabnu, palga lo guedxliujre o xhaguibaa, rļajztisnu jiennu renani gun guibaa lajzni. ¹⁰ Sa'csi guiraanu riājļ suunu nez loj yagxhiil cadro gun Jesucrist yālguxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yālrbecdxi lajzni

¹¹ Luxh sa'csi rdxejbnu (nalajznu rucuaadiaagnu xtidx) Dad Jesucrist, ruliidxnu rebeņ te chalilajzreni xtiidxni. Luxh Dios najn xho nabajņnu; malāii nājza lo xcāriejntu guluiļoj xho nabajņnu. ¹² Dinu guiliā'p lagajc xpala'nnu lojtu stehuālt, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebeņ ni rchagļajztis ruhuii xho rien bejņ, direni gacbee xhi yu' neņ lastooreni. ¹³ Palga najcnu si'c bejņ ni rajc yejcreni, si'c najcnu par Dios, palga najcnu si'c bejņ ni nasa'c xcāriejnnu, najcnuni par la'tu. ¹⁴ Sa'csi sanālazduxh Jesucrist nuure, ni'c rusoobtisnu xtiidxni, sa'csi

nancheenu gujt tejtis par guiraanu, ni'c najcni si'cni agujt guiraanu nez loj Dios. ¹⁵ Luxh Jesucrist gujt xcuent guiraa rebeņ, te renani rililajz xtiidxni, na'cru guibajņreni xcuenttis laareni, alga guibajņpacreni xcuenttis Jesucrist nani gujt, nani gubaņsac xcuent laareni. ¹⁶ Ni'cni nuure dinu fii lo bejņ si'cni najczeni lo guedxliujre. Galoo biembeenu Jesucrist si'cni gujčni che gubajņni lo guedxliuj, niluxh ņaj et si'cti riembeennuni. ¹⁷ Ni'cni chutis bejņ, palga rililajzni xtidx Jesucrist, sujņnini te beņcoob, diruni guichagļajz gunruni nani rajc lo guedxliuj, alga guichagļajzni gunni xtzun Dios.

¹⁸ Guiraa dee siāād lo Dios, nani basiājļ lajzni xcuent Jesucrist, dxejcti baniidxni loonu rediidx xcuent xcālrusiājļ lajzni te gusule'nu rediidxga, ¹⁹ nalajznu, nanab gusule'nu diidxre: Dios guyunāj Jesucrist, cagusiājļ lajzni con rebeņ guedxliuj, te xca'nireni, sa'csi diruni gudzuub xtojļ reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebeņ. ²⁰ Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiājļ lajznu, colyajc tejsi con Dios.

²¹ Di Jesucrist niujņ nicla tej dojļ, niluxh sa'csi sanālaz Dios nuunu, xcuentnu bejņ Dios gujc Jesucrist si'c te beņdojļ che gule'cni guiraa rextojļ guedxliuj yejc Jesucrist che cuajni lo cruzj. Si'c gujčni te sajc ga'pnu xcālnaya, xcālnasa'c Dios xcuent Jesucrist.

6 Ni'cni rniabnu lojtu, jia'cnu tejsi lo xtzun Dios, na'c cuālaztu xcālracnāj Dios; palga guntu si'c, xlia'si cua'tuni. ² Sa'csi loj xtidx Dios caj scree: Dxej nani riājļ gunāni, bacuadiagā xtiidxtu, dxej che gubicaj xtojļtu gucnāā la'tu. iColjjejn! ņaj najc te tiempas'c, coljjejnza, ņaj najc dxej ni guibicaj xtojļtu.

³ Na'c jiennu nicla tej ni gun guidxe'ch lajz bejņ, didi guiniireni xhet laadi najc xcālrusule'nu. ⁴ Niluxh lo guira'ti dzuun ni riennu, guluiļojnu lo rebeņ najcnu xmos Dios; gacnu nadolajz; jiennu huant che rusac-sireni nuure; che rdejndu trabajw; che di jien xho jiennu; ⁵ che rguijņreni nuure; che rusāureni nuure neņ latzguiib; che rdejndu lo bieiduxh; che rdajļ xtzunnu; che re'ch bacaļ yāāl; che rucua'nnu; ⁶ guluiļojza najcnu xmos Dios xcuent xcālnabaņsa'cnu lo Dios; nājza xcālnansa'c xtidx Diosnu; nājza yālrājz nadolajz; sa'csi laaca riennu lo sa'nu; nājza sa'csi rbājz Sprit Dxan xten Dios neņ lastoonu; nājza xcuent yālrināļajzpac bejņ; ⁷ nājza xcuent didxguliipac; nājza lo xcālrnibeduxh Dios; ca'zanu si'c te madxed xcālnaya Dios, ca'nuni guropņaanu, ladbee, nājza ladbājgw. ⁸ Ruluiļojzanu najcnu xmos Dios palga chā'p xpala'nnu, o palgaza jianxtujyņu; palga guiniireni didxsa'c xcuentnu, o palgaza guiniyajreni nuunu; palga naareni najcnu beņrusguee, mase najcnu bejņ ni rni didxlii. ⁹ Palga rut rļajzdi gumbee nuunu, o palga guira'ti bejņ numbee nuunu; acayejtnu, niluxh bahuii, anu anabajņ; rusaan Dios rguijņreni nuure, niluxh dinu guet; ¹⁰ najcnu si'c bejņ ni yu' xliajs, niluxh rbalaznu; najcnu si'c bejņ ni xhet rajpdi, luxh riennu gapduxh bejņ; najcnu si'c bejņ ni xhet rajpdi, niluxh rajpnu guiraloj.

¹¹ Lojtu, beŋ Corinto, aguniliinu lojtu guiragajc rediidx ni yu' neŋ lastoonu. ¹² Xhetliidi diidxdi bacua'tznu lojtu, niluxh pet cacuatx lajztu diidx ni nanab guiniitu loonu. ¹³ Naj narä rulidxä la'tu si'c rulijdx te Dad rexi'nni: ¡Colguinii loonu rediidx ni yu' neŋ lastootu!

Najcnu si'c xquidoo Dios ni nabajŋ

¹⁴ Na'c guchaagtu lo rebejŋ nani di chalilajx xtidx Dios, sa'csi di gacdi gunteblojtu dzuun sa'csi tejni rrajz gun dzunsa'c, steeni rrajz gunni dzunguijdx, ¿xho gac sanäj bajl xcäy, ä? ¹⁵ O ¿xho gac sanäj Jesucrist beŋdxab ni laa Satanás, ä? O ¿xho gac sanäj te bejŋ nani rililajx xtidx Dios te bejŋ ni di chalilajx xtidx Dios, ä? ¹⁶ ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajŋ, lagajc si'cni gunii Dios galoo:

Cuäzä neŋ lastooreni, sisanääzareni.

Narä sacä Xtiosreni, laareni sajcreni rexpenä.

¹⁷ Ni'cni colrrii galäireni, colguibicaj lojreni, te laad colcuääz, si'c naj Dios:

Te gac xca'ätu, na'c fa'tu recosdxuudx.

¹⁸ Dxejc la'tu sajctu rexinganä, rexindxa'pä, luxh narä gacä xtadtu, si'c naj Gueb Dios ni rajp guiralii yälrnibee.

7 Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcay guiraa rexhigabguijdx, guiraa redojl, te gac sanu lo rexnezyudxan Dios con xcälrdxejb Dios.

Xho basiejch lajz rebeŋ Corinto

² ¡Colchanälajz nuunu neŋ lastootu! Xhet latsiajdi biennu lojtu. Rut baxhiŋdinu. Rutza basgueddinu. ³ Dina guiniä rediidxre te cue'cä xquejtu; ni aguniä lojtu galooli, la'tu yu'tu neŋ lastoonu palga tejsi guetnu, o palga tejsi guibajŋrunu. ⁴ La'tu nadip lazä, rniduxhä didxsa'c xcuenttu lo bejŋ, rbedxi lastoä, rbalazduxhä loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yälrdijl ni guyu' guideb gabinu, xcuenta yälrdxejb ni guyu' lastoonu. ⁶ Niluxh Dios ni racnä j rebejŋ ni rac-huin lajzreni, gucnäj nuure, sa'csi che bidzujŋ Tito guredxi lastoä. ⁷ Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rrajztu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

⁸ Acananä guc-huin lajztu che bi'tu guijtz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejŋ guijtzga guc-huin lajztu, xhet xchejdi guc-huin lajztu. ⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rrajz Dios, te di yu' xhi gunijttu xcuent nuunu. ¹⁰ Sa'csi yälrac-huin ni ruxha'l Dios loonu rujn rusiejch lajznu, te rusläa Dios nuurnu lo dojl ni'cni rbaalazä che

bejnii si'c. Niluxh yälrac-huin xten guedxliuj dini gun gusiejch lajz rebejŋ rextojlreni, alga rujnni nitloj bejŋ tejpas. ¹¹ La'tu bejntu huant xliajs ni baxha'l Dios si'cni rchagla jz Dios gac. Naj ¡colhuii gaŋ! ¡Lacti xhi cossa'c bejnii par la'tu! Bejnii bahuisa'c pactu xhini'c gujc, te gac gusulegajctu xcuentni; dxejc bejnii bidxe'chtu, näjza bejnii bidxejbtu, ni'cni basaantu dojlga, dxejcti bejnii rrajz pactu nuhuiitu loä, bejnzani guyu'tu yärsia'c xcuentä, bejnzani rrajztu guntu yälguxhtis bejŋ nani bejŋ dojlga. Guiraa redee baluiloj et la'ditu bejŋ dojl. ¹² Ni'cni, che bacuaä guijtzga, dina nucuaäni loj bejŋ ni bejŋ dojlga, niluxh bacuaä guijtzga lojtu te guiluiloj xcälrsia'tu ni rajptu xcuent narä nez loj Dios. ¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpritni xcuent guiraatu. ¹⁴ Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxguli, sigajcna najc guiraa redixsa'c xcuenttu ni guniä loj Tito, guliipacni. ¹⁵ Ni'cni maazru sanälajzni la'tu, che rnaj lajzni xho basobtu diidx, xho bejntu cua'tuni che bidzujŋnu, racsejslitu cadxejbtu. ¹⁶ Naj rbaalazä sa'csi loj guira'ti la'tu nadip lazä.

Saru rudeedreni meel

8 Naj bejtznu, rrajznu guiniinu lojtu xho badeed Dios xcälrulaslajzni lo rebeŋ Macedonia ni huililajx xtidx Dios. ² Mase gudedduxhreni trabajw, bibalajzreni, mase xhetliidi gojpreni, badeedreni meel si'c te beŋ ni rajp. ³ Narä caniliä lojtu, badeedreni xmeelreni si'cni gojpreni, luxh badeedrurenii loj ni naa bejŋ sajg gudeedreni. ⁴ Gunabduxhareni loonu guisaannu gudeedreni xmeelreni te gacnä jreni rexpen Dios. ⁵ Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac. ⁶ Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yälrajn; rchagla jz pactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

⁸ Dina guiniä lojtu colyujnpacni; narä rlazätis gacbeetu xho rbaalajz reni rudeed meel te gululoj don la guli sanälajzpaczatu rexpejŋ Dios. ⁹ Sa'csi la'tu anum-beheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu gujcni si'c te bejŋ ni xhet rajpdi, te xcuentni ga'ptu guiraa rexhixten Dios xhaguibaa.

¹⁰ Narä siniä lojtu xhi xhigab runä, par lagajc xcäl-nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rrajz pactu guntuni. ¹¹ Naj colchanuu, colguluux dzuunga si'cni guslojtu cayujntu ni. Naj te luux dzuunga colgudeed si'cni rajptu. ¹² Sa'csi palga rrajzduxh te bejŋ gudeed lo Dios, laaca najc gudeedni si'ctis ni rajppacni. Di Dios guiniab gudeed bejŋ nani dini ga'p. ¹³ Dina guiniä gudeedtejt te tedtu

trabajw te gapduxh stee bejn, alga te gacteblojstistu.

¹⁴ Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajc suniidxzareni te gusalojreni nani cayäädxtu te si'c gacni tebloj. ¹⁵ Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojpa yäl'nasa'c, xhet biäädxdidi."

Tito näjza rexcompanieerni

¹⁶ Xquixtios lo Dios nani rudeed lo Tito lagajc yärsia' ni rapä narä par la'tu. ¹⁷ Sa'csi cuäjbni gunni nani gunabä lojni gunni. Luxh sa'csi rlazduxhpacni gunni xtzun Dios, naj lagajc laani bejnna xhigab jädhuiini lojtu te luux dzuunre.

¹⁸ Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäjni narä te gacnäjni narä lo xtzun Dios nani cayennu te guiliä'pni xpala'n Gueb Dad Jesucrist, te guiluilojza lacti rlazjpacni jiennu xtzunni. ²⁰ Ni'cni rlazä jipdaduxhnu te di chu tej ni guiniyay nuure xcuent mellore ni chosa'nnu lo rexpejn Dios. ²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²² Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlazjpacni gunsacni xhidajl dzuun, luxh naj rlazjruni gunsacni redzuunga sa'csi nadip lajzni la'tu. ²³ Palga yu' chu guiniabdiid xcuent Tito, colyejtz lojni laani najc nani cayunnä narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. ²⁴ Ni'c na'c guidxejbtu che yu'tu lo rebejn reguidoo guluiipactu loj rebejnga xho sanälajztu, näjza redzuun ni rujntu ni'c rniinu ganax didxsa'c xcuenttu.

Meel par rebejtznu

9 Ni'cni dina gucuaäru lojtu xcuent dzuunre, nalajznu, yäl'racnäj rexpejn Dios, ² sa'csi anancheä rlazjpacu guntuni, luxh xcuentpac ni'c agulä'pä xpala'ntu loj reben Macedonia, rapä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel.

³ Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjlzitu gudeedtu xmeeltu, sigajc ni agunixgaä lojtu. ⁴ Didi che jädnää reben Macedonia jiophuiinu la'tu, xhet rajpditu, dxejcti jianxtuyä narä, näjza la'tu. ⁵ Ni'cni benä xhigab, nanabpac jädxgaa rebejtznu, jädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlazjpacu gudeedtu, xhet sa'csi rniinu riäjlpac gudeedtu.

⁶ Rniliä lojtu, nani guxii rbe'c, guxiiza yäl'nasa'c guiliäsni, niluxh nani rbe'c xhidajl binij, xhidajlza yäl'nasa'c guiliäsni. ⁷ Tejgatu colhuii don lacti sajc gudeedni, dxejcti si'c sugudeedni si'cti ni rlazjzni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn

ni rbaali lajzni rudeedni meel lojni. ⁸ Luxh Dios sajc gu-niidxru xcäl'racnäjni lojlu, te si'c guixe-guixee sajp lu xhidajl guiraloj rexhixtenlu, te ga'plu xhitis ni rquiinlu loj guira'ti xtzunsac'lu. ⁹ Sa'csi lo xtidx Dios caj scree:

Abadeduxhni loj reben ni xhet rajpdi luxh redzunsac' ni rujnni, najcreni par tejpas.

¹⁰ Dios nani rudeed binij ni rbe'c nani rujn dzuun loni-aa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yäl'nasa'c xten xtzunsac'ctu. ¹¹ Te si'c ga'ptu lacti yäl'nasa'c te gac gudeedzatu xhiroob. Luxh xcuent xtzunnu, meel ni ruxhaltu loj rexpejn Dios sujn gudedduxhrene xquixtios lo Dios. ¹² Sa'csi che racnäjtu rebejtznu, dinu guideed ganaxtis ni rquiinreni, rujnzanu rudeedruene xquixtios lo Dios. ¹³ Che racnäjtu sa'tu si'c, ruluilojtu lacti rusoobtu xtidx Dios si'cni ahuililajztuni, ni'cni siliä'preni xpala'n Dios xcuent xcäl'racnäjtu, nalajznu xcuent meel ni badeedtu lojreni, näjza loj guiraareni. ¹⁴ Dxejcti laareni sibeex-sini-abzareni lo Dios xcuenttu, sinälazduxhrene la'tu sa'csi runidduxh Dios xcäl'racnäjni lojtu. ¹⁵ Xquixtiosti Dios sa'csi baniidxni yäl'nasa'cduxhtej loonu!

Yäl'rnibee ni rajp Pabl sa'csi najcni apost

10 Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac bennadolajz che biälä lojtu, niluxh che suga'a zijt lojtu, dxejcti nacä benñialajz). ² Narä canabä lojtu, colguibanasa'c te che jädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rnii nabanä si'c te benguedxliuj. ³ Guliicani najcnu benguedxliuj, niluxh dinu gucuanä sa'nu guiib nani rca' ben guedxliuj che rcuaareni. ⁴ Sa'csi reguiib ni rca'nu te guidi'sa'nu direni gac sa' guiib ni rca' ben guedxliuj. Nuunu rucuaanu con xcäl'rnibee Dios te riennu gaan loj guiraa rexcäl'rnibee guedxliujre. ⁵ Ni'cni cagutzujl'nu guiraa rexhigabguijdxreni, näjza nani rchalonei najc xhigabro nani rlazjzreni guiniyajreni yäl'rumbee Dios, luxh caca'nu guiralii rexhigabnu cagutednureni ladz'naa Jesucrist te gusoobnu rextidx Jesucrist. ⁶ Cabäätisnu te gunnu yäl'guxhtis loj chutis bejn ni dini gusoob xtidx Dios, che abasoob guiragajcti xtidx Dios.

⁷ La'tu cahuiitu redzuun ni rien. Palga yu' chu tejtuni rchalonei najcni xpejn Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajznanuni. ⁸ Sa'csi mase guiliä'pärü xpala'nä xcuent yäl'rnibee ni rapä, ni baniidx Dios te gustiobä xcäl'rililajztu, et te guxhiñädi la'tu, ni'cni dina guituiä. ⁹ Dina rlazä guchalotu rlazä guchebä la'tu con rexquitzä.

¹⁰ Sa'csi rniireni: "Lo rexquijtzni caj didxnagajn, didxnialajz, niluxh che suga'ni laapacni, xheti xcäl'si-udzu'tzni, luxh xho rniaj diidx ni rniini." ¹¹ Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹² Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³ Nuure dinu gunnarotej lagajc nuurnu, niluxh riennu si'cni nungäjl jiennu, xcuent yälrnibee ni baniidx Dios loonu te jiennu dzuun cadro yu'litu. ¹⁴ Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu. ¹⁵ Dinu niennaro lagajc nuurnu xcuent xtzun ste'ca bejn, ascanu lagajc nuunu biennuni. Cabääznu tioobru xcälrlilajztu, te gac jienrunu dzuun lojtu, si'ctis gal'jiennuni. ¹⁶ Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

¹⁷ Sa'csi nani rlajz gacnaro, suguiliä'pni xpala'n Dad Jesucrist. ¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

Pabl näjza rebejn ni rniisi najcreni apost

11 Maläii chanunäsijctu narä laj ni guiniä gaii didx-nayäle', niluxh asanunäjtu narä. ² Randzu'ä la'tu con yälrandzu' ni baniidx Dios, sa'csi abia'n diidx gut-edä la'tu ladzḡnaa Jesucrist te xca'ni la'tu. Rlazä gactu beḡnaya chäätu lojni, si'c te dxa'p che ruchḡnaani te bi'n, rut bahuäl'dini. ³ Niluxh rdxebä didi gusguee beḡdxab la'tu si'c ni basguee bäl Eva con xcäl'nadxällä-jzni. Didi gunni guichaa xhigabtu, guibicajtu lo xtidx Jesucrist luxh ḡaj laaca rajḡpactu Jesucrist, guideb las-tootu. ⁴ Sa'csi la'tu cagutipduxh lajztu che riädnni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. ⁵ Narä runä xhigab dina gacä bejn ni guxiiru sajz loj guiraa reapost.

⁶ Mase di gacdi guinisa'cä, xhet yäl'najndiza cayädxä; niluxh ni'c huenliisi rlui loj guiraa rediidx ni abaluiä lojtu, guiraa redzuun ni abenä ro'c.

⁷ O ḡla benä te dojl guyu'ä lojtu si'c te beḡ nadolajz, te gactu beḡroru, sa'csi xhetliidi cua'ädi xcuent ni basule'ä xtidx Dios lojtu? ⁸ Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuntu. Sa'csi che biääd re-bejznu ni siääd Macedonia, baniidxreni guiraa ni biquinä. Loj guiraa redee dina nutalä xtzuntu, luxh si'c sinuu gunä. ¹⁰ Guideb didxlii xten Jesucrist ni yu' neḡ lastoä, rniliä rut sajzdi gudzucax xcuent xho yuä lojtu, ni'cni care'ch didxroga lo guiraa reguedx Acaya.

¹¹ ḡXhicuent rniä si'c? ḡLaa sa'csi dina chanälazä la'tu, ä? ḡXho gacni si'c! ḡDios anajn lacti sanälazä la'tu!

¹² Niluxh nani rungacä, lagajc ni'c sinuu gunä, te gudxonä renani rlajz gacnaro, renani rlajz naa rebejn najcreni si'cpac najcnu, niluxh direni gac. ¹³ Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni. ¹⁴ Luxh xho di-

ni gac si'c, ni lagajc beḡdxab ni laa Satanäs ruluiloj si'c te xangl Dios ni rdimbicha' te rusgueeni bejn. ¹⁵ Ni'cni na'c guidxelojtu palga näjza rexmos beḡdxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

Rdej d Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, colḡgusaanza guiniä si'c te ni rajc yejcnj te guiniäa didxro lagajc xcuentä. ¹⁷ Diidx ni rniä dina guiniäni xcuent xcälrnibee Dios, alga rniäni si'c te ni rajc yejcnj, lala redidxro ni rniä xcuent lagajc narä. ¹⁸ Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajzca siniä didxro xcuent lagajc narä. ¹⁹ Ni la'tu, sa'csi nasiḡduxhtu, sanunäjtu rebejn ni rajc yejcreni. ²⁰ La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzunni o rliä'preni lagajc xpala'reni, o rga'preni lojtu. ²¹ Mase rtuiyä guiniäni, dipac niajzdi niniä diidx lojtu te niacä si'c najc re-bejnga. Niluxh loj xhitis nani runnaroreni, (canisicä si'c te beḡnayääl) narä sajzru gunnaröä.

²² ḡLa najcreni xpejn hebreos? Sigajzca narä. ḡLa najcreni xpejn Israel? Sigajzca narä. ḡLa najcreni xajg toAbram? Sigajzca narä. ²³ ḡLa najcreni xmos Jesucrist? Narä nacäruni lojreni. Naj rniä si'c te bejn ni rajc yejcnj. Abenäru dzuun lojreni, agudijnrurenj narä loj ni gudijnreni laareni, abasäururenj narä neḡ latzguuib, niela gac guigab bal huält gudijnreni narä; baltiza huält ameer nietä. ²⁴ Gaii huält gudijn rexpejn Israel narä, tejga huält batiäjlneni duguijd detzä galbitzubigaa huält. ²⁵ Choḡ huält bahuajcwreni narä garo't; stee huält bacuaareni guij yecä; choḡ huält biääd barcw cadro sa'ä loj nisdoo; teb dxej, teb yääl guyu'ä lo nisdoo. ²⁶ Huaduxhä biaj, lacti bixuḡ riesgw xcuentä lo gueuu, xcuent regubaan, xcuent rebenladxä, xcuentza rebenzajt. Bixuḡza riesgw neḡ reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najcreni bejznu lo xtidx Jesucrist. ²⁷ Abenduxhä dzuun, agudedduxhä trabajw, balti yääl dina niesä, balti huält gulanä, bioḡä, balti huält xheti xhi niauä; agudedäza yäl'nalduxh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. ²⁹ Che rdxajg tejtu, näjza narä rdxagä. Palga tejtu riabj lo dojl, narä ruduxhä yärsia' xcuentni. ³⁰ Palga nanab gunnaröä lagajc narä, sunäni xcuent rediidx nani ruluiloj xcälrdxagä. ³¹ Dios ni najc Xtad Jesucrist, nani riäjln guiliä'p xpala'nni par tejpas, ananchee dina gusguee la'tu. ³² Che guyu'ä guedx Damasco, gubernadoo nani guyu' ro'c, najcni xpejn rei Aretas, gunibee gojḡ rexcuxhtisni guejdxga te niniaazreni narä te nisäurenj narä neḡ latzguuib.

³³ Niluxh basiäjtneni narä neḡ te dximro nez ro' te padeer ni rdej d gabi guejdxga, te si'c gulaä ladzḡnaareni.

Dios baluiloj lo bacal

12 Mase riäjł guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluiloj Dios loä. ² Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij, Diostis najn. ³ Diostis najn la guideb tiejxhni, o ganax xpritni, niluxh nanä xho huij niguiiga, ⁴ guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. ⁵ Xcuent sa' niguiiga sajz guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni rululoj xcälrdxagä. ⁶ Mase rlazä guiniä didxro, didxsa'c xcuent lagajc narä, dini gac didxnayääl, sa'csi guli-icazani. Niluxh dina guiniäni te di guntu xhigab nacä beñroru loj ni rhuitu runä o nani riejn diajgtu rniä.

⁷ Baluiloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguidx tiexhä, si'c te guejch huääz tiexhä, ni baxhal beñdxab xten Satanäs te gusacsini narä te di gacä te beñnaro.

⁸ Chon huält agunabä lo Jesucrist xcuent ni'c, te guibicajni. ⁹ Niluxh laani najni loä: "Yälracnäjä ni gunidxä salduxh luj, sa'csi ruzensa'cru xcälmlagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä. ¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yäl'nadip, yäl'nadaan loä.

Yu' Pabl yärsia' xcuent guidoo ni yu' Corinto

¹¹ Agucä si'c te beñnayääl, lagajc la'tu bejntu nacä si'c. La'tu riäjł niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajzru mase rut nacädi. ¹² Redzuun ni benä lał ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr. ¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuntu, nalajznu dina niniabä niacnäjtü narä si'c gucnäjä narä reguidoo ni yu' garenca lajt. ¡Colsiäjł lajztu narä dojlre!

¹⁴ Naj cayunä xhigab jädhuiätu, naj gacni chon huält siälä. Di quilä xhixtentu, alga lagajc la'tu rguilä. Di rlazä gotalä xtzuuntu. Di riäjł cuchee rebiuux meel par xczajzreni. Reguzajn ni riäjł cuchee meel par rexi'nreni. ¹⁵ Xhet najcdi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

¹⁶ Niluxh mase si'c najcni, di narä nutalä xtzuuntu. Empac yu'reni canii basgueä la'tu sa'csi nadxällazä.

¹⁷ ¿Xhixh naatu cua'ä xhi xtentu sa'csi baxhalä rebejztu lojtu, ä? ¹⁸ Che baxhalä Tito, räpä lojni chanääni stee bejztu te jädhuiireni la'tu. ¿Xhixh cua'ni xhi xten-

tu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ Lałni cayoltu guiraa rediidxre, cayujntu xhigab canabnu jääjł lajztu, niluxh xhet si'cdini. Caniinu rediidxre nez loj Dios, caniizanu con xcälracnäjä Jesucrist te si'c tioobrutu lo xtidx Dios, rebetzä nani rinälazä. ²⁰ Sa'csi rdxebä andi che jädhuiätu fiä ditu gac si'cni rlazä gac-tu, dxejctiru la'tu suhuiizatu dizana gacä si'cni rlazä gacä. Rdxebä andi yu'tu ni cadijł, ni ruguij lajzni xhix-ten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajł diidx lo sa'ni; ni cayunnaro lagajc laani, ni cayujnza bieje. ²¹ Rdxebä andi che jädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechljajztu xcuent xtojltu. Yu'tu ni di guibañnaya, resnäjtü bejn ni di gac chäältu, yu'za balti dojl rujntu.

Lult yäl'rulijdx xten Pabl

13 Naj gac chon huält siädhuiä la'tu. Guira'ti quej nanab cue'creni con xtidx tio'p o chon bejn ni najnpac xhi dojl bejn tejnani. ² Mase ruti narä ro'c, arnixgä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jäälsacä, diruna gulaslazätu nicla tejtu, ³ sa'csi rlazätu fiipactu la guli runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neñ lastootu. ⁴ Guliicani che cuajni lo cruzj, gucni si'c te bejn nani casis, niluxh naj nabajni sa'csi rapduxhni xcälrnibee Dios. Näjza nuure rsia'cnu si'c te bejn nani casisnäjä laani niluxh nabañnäjnü laani xcuent xcälrnibee Dios ni baniidxza Dios xcuenttu.

⁵ Col'ninäj lastootu lagajc la'tu, col'huii la guliipac ahuililajztu xtidx Dios; col'huisa'c xho najc lastootu. ¿La ditu gacbee rbäjz Jesucrist neñ lastootu, ä? Palga ruti-ni, rusqueetu lastootu, ditu nililajztu xtidx Dios. ⁶ Narä rlazä gacbeetu, dinu nusguee lastoonu, ahuililajzpacnu xtidx Dios. ⁷ Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸ Sa'csi xhetliidi rajcni riennu te nitloj didxguli, xcälrnibeenu najc te gusule'nu didxlii. ⁹ Ni'cni rbaa lajznu che casisnu, niluxh la'tu nadip, nadaantu; rbejdxrniabzanu lo Dios guiza' xcälrililajztu lo xtidx Dios.

¹⁰ Rucuaä reguijzre lojtu che gajdna jäälä, te che jäälä na'c tiñnäätu si'cpacni nungäjł tiñnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹ Ni'cni rbejztu, col'guibalajz, col'huii guisa' xcälrililajztu, col'cuedxdi lajztu, col'yennäj sa'tu tejsi xhigab, dxi-tis gubajñ. Dios xten yälrinälajz näjza yälrbecdxi lajz chunäj la'tu. ¹² Col'nii: "Xchan" lo resa'tu. ¹³ Guiraa rebejztu nani ahuililajz ruxhalä xtixtios lojtu.

¹⁴ Yälracnäjä xten Dad Jesucrist, näjza yälrinälajz xten Dios, näjza yälracnäjä xten Sprit Dxan chu neñ lastootu. Sugacni si'c.

Gálatas

Pabl rucuaa guijtjz loj reben guidoo nez región Galacia

1 Narä, Pabl, nacä apost xten Jesucrist. Xhet rebejn-di baxhaġ narä, xhetza bejnġdi gule narä. Lagajc Jesucrist näjza Xtadni Dios ni yu' xhaguibaa, nani guläs Jesucrist loj rebenġgut, laareni agulereni narä. ² Narä, näjza guiraa resa'nu nani yunäj narä, rucuaanu guijtjzre lo rebenġ guidoo ni yu' nez reguedx Galacia. ³ Xca' guebġtu xcälġracnäġ Dios con xcälġrbedxilajz xten Dios xtadnu näjza xten Dad Jesucrist. ⁴ Lagajc laani cuäjbni gujtġni te gusġlaani nuure lo doġġl xten guedxliuj guijdxre, si'cni gunibee Xtadnu, Gueb-Dios. ⁵ Chä'p xpala'n Dios par teġpas. Sugacni si'c.

Xhetdi xhi stee didxcoob ni sajġ gusġlaa nuure

⁶ Rdxeloduxhä lacti rioġb cabälaztu Dios ni gurejdx la'tu con xcälġrinälajz Crist, luxh ġaj cagusoobtu ste'ca diidx. ⁷ Xhetdi stee diidx ni sajġ gusġlaa nuure lo doġġl. Yu'reni rlajz gusieġchreni lajztu con ste'ca diidx, rlaġzreni guchaareni xtidx Jesucrist. ⁸ Niluxh palga ġiääd chu ġiädliui loġtu ste'ca diidx ni rusġlaa bejn lo doġġl, niluxh di diidxga gac si'c najc diidx nani abaluiinu loġtu, bejnġga agubibdeni, chutis najcnu, mase naräni, mase te xangġ Dios ni ġiääd xhaguibaali. ⁹ Si'c ni guniä loġtu, si'c rnisacä loġtu ġaj: Pal yu' chu ġiädliui loġtu ste'ca diidx ni rusġlaa bejn lo doġġl, luxh di diidxga gac si'c najc diidx nani abaluiinu loġtu, bejnġga agubibdeni.

¹⁰ ĤXhi naatu? ĤLa rlazä guinisa'c bejn xcuentä o la rlazä guinisa'c Dios xcuentä, ä? ĤLa rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

Xtzun Pabl

¹¹ Colyacbee sa'ä, diidx ni rusġlaa bejn lo doġġl nani abasule'ä loġtu di diidxga gac xhigab bejn guedxliuj.

¹² Xhet loġdi bejn guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³ Anajntu xho gucä, xho gubanä galoo che rusobätis rexleii toMoisés. Dxejġ basacsıdixhä rebenġ guidoo ni huililajz xtidx Jesucrist, si'c benä te rlazä nitloġreni.

¹⁴ Loġ reni rusooob xleii toMoisés narä cagusobäru xtiidxni, nanduxhäru loġ guiraareni. Loġ rebejn nani sadx-agä ladxä, maazru sanälazä xcostumbr rextadgoldoä. ¹⁵ Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶ Dxejġ bibalajz Dios baluiloġni Xi'nni Jesucrist loä te guiniä xtiidxni xcuent xho rusġlaani bejn lo doġġl loġ reni di gac xpejn Israel. Che gujġc si'c rut loġdi huiye'tzä. ¹⁷ Niclaza

nia'ä guedx Jerusalén loġ reni ganid gujġc apost loä. Alga hua'a nez reguedx Arabia, dxejġcti gubisacä guedx Damasco.

¹⁸ Che agudejġ si'cti choġ ġjz, dxejġcru hua'a guedx Jerusalén te biembeä Pedr, dxejġc biannääni tzun-gubijdx. ¹⁹ Niluxh dina nuhuiä loġ chu stee apost ro'c. Loġtis Jacoob, betzhuin Jesucrist bahuiä. ²⁰ Rniliä nez lo Dios, dina guiniä didx-xhii, rediidx ni cacuaä najc guliipac.

²¹ Dxejġcti hua'a reguejdx xten Siria näjza Cilicia. ²² Resa'nu ni yu' neġ xquidoo Crist guideb nez reguedx Judea, direni gumbee narä. ²³ Rieġntis diaġgreni: "Bejn nani basacsıdixh nuure agujġc xcheġ, abejnġga caguluii-ni xcuent lagajc xcälġrililajz nani galoo rlajzni nunitloġni." ²⁴ Dxejġc rliä'preni xpala'n Dios sa'csi huililazäza xtiidxni.

Bidxaag Pabl loġ reapost

2 Che agudejġ tzudaj ġjz, dxejġcru hua'a guedx Jerusalén con Bernabé, näjza Tito huinänu. ² Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni rusġlaa lo doġġl. Niluxh loġtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun. ³ Sanäää Tito, te bejn griegw ni di gac xpejn Israel. Nicla loġni direni niäġb chuni bee si'c caj lo leii xten Moisés. ⁴ Niluxh gaai bejn ni rujnsi si'cni najcreni sa'nu, bidxaagreni loonu te gula'tzreni xho rajnġnu Dios. Rdxehchreni sa'csi nuunu, rexpejn Jesucrist, dinu ġienru si'c ni bejn rextadgoldoonu. Laareni rlajzreni guxhiidreni nurnu, rlajzreni gusoobnu rextiidxreni. ⁵ Dipacnu nicäġb nucuadiaġgnu xtiidxreni, sa'csi rlaaznu chanuu chalilajztu xtidx Jesucrist nani rusġlaa bejn lo doġġl.

⁶ Niluxh reni sajġ, nalajznu reni rnibee rebenġ guidoo ro'c, xhet te didxcoobdi guniireni loä. (Luxh par narä xhet najcġdi mase bensajczeni, sa'csi Dios runtebloġ guiraa bejn.) ⁷ Luxh bahuiireni abaniidx Dios xtidx Jesucrist loä, luxh rusule'äni loġ rebenġzijt te guibicaj xtoġġreni, sigajcni rusule' Pedr xtidx Jesucrist loġ rexpejn Israel nani rujnġpac si'c ni caj lo leii. ⁸ Lagajc Dios nani badeed bejn Pedr dzuun xte apost loġ rexpejn Israel, lagajcza Diosre baniidx gunä dzuun, te gacä apost loġ rebenġzijt nani di gac xpejn Israel.

⁹ Ni'cni Jacoob, Pedr, näjza Juan nani najc bejnroru neġ guidoo xten Jesucrist, gucbeereni laa Dios ni cayacnäġ narä. Dxejġc baniidxreni ġaareni loä näġ lo Bernabé si'c te seen rbalajzreni, te chonnu guiro'pnu loġ rebenġzijt. Niluxh laareni chanuureni gusule'reni loġ rex-

peñ Israel. ¹⁰ Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

Pabl gudilnäj Pedr lo guedx Antioquía

¹¹ Che biääd Pedr lo guedx Antioquía, gudilnääni, sa'csi abejnni dojl xhet laadi cayujnni. ¹² Galoo gu-daunäjni rebenzajt, luxh che bidzujñ gaii xpejn Israel ni baxhal Jacoob, dxejcti gubicajni lo rebenzajt, diruni ni-aunäjreni sa'csi bidxejbni rexpejn Israel ni ru' bee ni bidzujñ ro'c. ¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. ¹⁴ Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa rebenzajt: "Palga luj najclu te xpejn Israel, luxh nabajñlu si'c rebenzajt ni digac xpejn Israel, xhet si'c di ni caj loj leii, xhicient rlazlu guinibeelu guibajn rebenzajt si'c rexpejn Israel nani rusooob xleii toMoisés?"

Nungäjñ chalilajz rexpejn Israel, sigajc guiraa bejn, te gubicaj xtojñreni

¹⁵ Nuure najcnu rexpejn Israel cheni gojllinu; dinu gac beñdojl si'c najc rebenzajt. ¹⁶ Anadonnu rut chu tejt bejn sajñ guibicaj xtojñni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojñnu sa'csi rililajznu, xhet sa'csi riennu si'cni caj loj leii. Di gacdi jia xtojñ bejn xcuent yälrusooob xleii toMoisés.

¹⁷ Palga lañ ni rlaznu jia xtojñnu xcuent xcälirililajz xtidx Jesucrist, ruhuiinu cayenrunu dojl, la sajñ guiniinu: Jesucrist ruluii rienrunu dojl, ä? xho gacni si'c! ¹⁸ Palga rlazä gunsacä redzuun nani abar'o'nä, lagajc narä rapä dojl nacä beñ dojl. ¹⁹ Niluxh xcuent leii, anacä si'c beñgut: digacdiru guinibee leii narä sa'csi naj nabañä lo xnejz Dios. Luxh lagajc leii bejn nacä si'c beñgut che gucbeä di gacdi gusobä guiraa ni caj lo leiga. ²⁰ Najcni si'cni gutnäá Crist lo cruzj. Naj xhet narädi ni nabañä, laa Crist ni nabajñ neñ lastoä. Yälñabajñ ni nabañä naj lo guedxliujre nabañä sa'csi rililazä xtidx Xi'n Dios nani rinälajz narä luxh gujtni te gudijxni xtojñ. ²¹ Dina cuälazä xcälñulasajz Dios. Paru sajñ gudzucaj leii xtojñ bejn te gacreni beñnaya nez loj Dios, dxejc xlia'si gujt Jesucrist.

Yälirililajz rusia dojl

3 iChipsa nayäältu beñ Galacia! xChu bascajytu te di cuadijgtu xtidx Jesucrist? Ni nez lojpacku bisule'nu diidx xho cuaj Jesucrist lo cruzj. ² Tejtis diidx rlazä guiniitu loä. xLa cua'tu Sprit Dxan xten Dios sa'csi bejntu si'cni caj lo leii, ä? o xla sa'csi huililajztu diidx ni biejn diajgtu? ³ Chipsa nayäältu. Acua'tu Sprit Dxan xten Dios dxejcti naj rlazjtu guntu ni rijbtis yejctu guntu. ⁴ xLa xlia'si gudejdtu trabajw? Chugan la gulii xlia'sini. ⁵ Che runiidx Dios Sprit Dxan xtenni lojtu, che rujnni milaagwr nez lojtu, xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtidxni ni riejn diajgtu.

⁶ Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni. ⁷ Ni'cni coly-acbee dee: renani rililajz xtidx Dios najc xi'n toAbram. ⁸ Galooli najñ Dios xcuent yälirililajz susia Dios lastoo rebenzajt, ni'c räjpni lo Abram: "Guirali rebenzajt guedxliuj sacle' xcuentlu." Diidxre cuaj lo guijtñ ni gujc galooli, cadro caj xtidx Dios. ⁹ Ni'cni reni rililajz naj agucnäj Diosreni sigajc gucnäjni toAbram nani huililajz. ¹⁰ Guiraa reni rlazj guibajñreni gunreni si'cni caj lo leii, agubibdereni sa'csi scree caj lo leii: "Guiraa reni digunpac si'cni caj lo reguijtz xten leii, sucuibdereni." ¹¹ Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannäjni Dios xcuent xcälirililajz. ¹² Leii dini naa chalilajz bejn te xca'ni yälñabajñ. Scree caj lo leii: "Nani gunpac si'cni caj loj reguijtz xten leii, ni'c nanab guibajñ lojpac leiga."

¹³ Jesucrist badzucaj nuure loj yälñribde xten leii. Laani gubibdeni xcuentnu sa'csi xtidx Dios naj: "Anabibde te bejn ni najñ loj te yajg." ¹⁴ Scree gusajc Jesucrist te gusojb diidx ni räjp Dios loj toAbram, sacnäjni guiraa rebenzajt; najza te guiraanu ni chalilajznu xtidx Jesucrist xca'nu Sprit Dxan xten Dios.

Leii näj diidx ni bia'n Dios loj toAbram

¹⁵ Betzä, naj gusä'tä te diidx xcuent beñ guedxliuj. Cheni rujñ bejn te guijtñ te jia'n diidx lo stee bejn, mase bejntis najcreni, che abacuaani lajni lo guijtza, rut sajñdi gudzucaj guijtza. Rutza sajñdi gucuaaru diidx lojni che anajcni. ¹⁶ Luxh anajnnu badeed Dios xtidxni loj toAbram najza loj xagdooni. Dini ninii "rexagdooni" si'c loj xhidajñreni, guniini lo tejtis xagdooni, luxh laani najc Jesucrist. ¹⁷ Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lañtis sajñni. ¹⁸ Paru naquiiñ leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

¹⁹ xHicient badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojñreni, lañ ni jiaäd nani najc xagdo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjñ diidx. ²⁰ Te ni rusiäjñ diidx xhet par tejtis bejñdi najcni, niluxh Dios tejtis najc.

Xcuent leii

²¹ xLa garenca najc xleii Moisés lo diidx ni basa'n Dios loj toAbram, ä? xho gacni si'c! Paru nica'nu te leii ni rajc rudeed yälñabajñ, dxejc sii xcuent leiiga nica' bejn yälñabannaya. ²² Niluxh loj reguijtz xten Dios caj diidx ni rni: Guiraa bejn niäuu neñ dojl, te reni chalilajz xtidx Dios si'c huililajz toAbram, reni'c xca' xcälirililajz

diidx xcuent Jesucrist si'cni bia'n Dios diidx loj toAbram.

²³ Che gajd xcälirililajz xcuent Jesucrist jääd, dxejc basáuu leii nuure neñ dojl, cabäjtisnu guiricaj xcälirililajz xcuent xtidx Dios. ²⁴ Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojlnu con yälirililajz xtiidxni. ²⁵ Niluxh naj sa'csi arajpnu yälirililajz xcuent xtiidxni, dirunu guiquini te mastr, nalajznu leii.

²⁶ Guiraatu najctu xi'n Dios xcuent yälirililajz xtidx Jesucrist, ²⁷ sa'csi guiraatu ni gurobnistu loj xtidx Jesucrist, najctu rexpejn Jesucrist. ²⁸ Naj rutiru rexpeñ Israel niclaza rebenzajt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹ Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl-nasa'c ni abia'n diidx gudeed Dios loj Abram.

4 Mbaj naj. Nani xca' yäl'nasa'c, che najcni biuux, najcni sigajc te mos, mase xtenni gac guiraa xhix-ten xtadni. ² Yu' chu te bejn ruhuiini, yu'za chu rnibee xhixtenni cheni agurooblini, cheni guidzujn dxej xca'ni ni gudeed xtadni. ³ Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jieñnu lo guedxliuj. ⁴ Niluxh che bisa' dxej ni basoob Dios, baxhał Dios Xi'npacni. Xi'n te gunaa gojlni, loj rexpejn Israelza biädjiäjlni, basoobni leii xten to-Moisés. ⁵ Si'c gujc te xcasacni reni rusoobpac leii, te xca'ni nuure gacnu si'c te xpisiäjbnj.

⁶ Luxh sa'csi anajctu xi'nni, ni'c baxhał Dios Sprit xten Xi'nni te cuääzni neñ lastoonu. Laani rniini lo Dios xcuentnu: "Guejblu, Xtadnu." ⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, sunid-xza Dios yäl'nasa'c loonu xcuent Dad Jesucrist.

Rulijdxni na'c gacsac bejn mos

⁸ Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb. ¹⁰ Cayutistu redxej, rebäii, retieemp, rejiz. ¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzun-guijdxdi bejntu loä che guyu'ä lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴ Dizatu nuze' niclaza nibälajztu narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵ ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. ¹⁶ Naj ¿la rdxe'chtu loä sa'csi cania didxlii lojtu, ä?

¹⁷ Naj yu' gaii bejn nani rujnsi si'cni sanäreni leii rujn-sireni si'cni rinälajzreni la'tu. Niluxh rlajzreni gudzuca-jreni la'tu te gusaantu xtidxä, te chanajltu laareni, te jitu xtiidxreni. ¹⁸ Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. ¹⁹ Rexi'nä, xcuent la'tu cadedä trabajwdxh si'c te gunaa ni rajl xpäzni, luxh sinuu sidedä trabajw cheni

arbäjpacni Jesucrist neñ lastootu. ²⁰ Maläii gac jäälä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar naj Sara

²¹ Colguinii loä, la'tu ni rlajz gun si'cni caj lo leii, ¿la di-tu gacbee, la di diajgtu jiejn xhini'c caj lo leii, ä?

²² ¿Coljiejn! Scree caj loj leii: guyu' tio'p xi'n toAbram.

Tejni najc xi'n gunaa ni najc xmos Sara. Steeni najc xi'n chäälpacni. ²³ Niluxh xi'n xmosni gojl sa'csi lagajc laani bejn ni xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴ Diidx xcuent re-gunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mos-ga guyu' te gacreni mos lo leii. ²⁵ Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpeñ Israel con rexi'nreni, sanäreni leii. ²⁶ Niluxh di guedx Jerusalén ni yu' guibaa gac si'c mos, luxh nu-urnu najcnu xi'nni. ²⁷ Scree caj loj xtidx Dios:

Bibalajz, luj gunaa ni gajd xi'nlu chu, guredxa', bibalajz,

luj ni gajdlu ted trabajw ni rdejg gunaa che rajl xi'nni.

Sa'csi su'ru xi'n gunaa nani gulälajz chääl ni quela xi'n gunaa ni gudiesnäj chääl stee gunaaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram.

²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuent diidx ni bia'n Dios loj Abram. Sigajcza najcni naj. ³⁰ ¿Xhi caj lo reguijtz? "Barilaagw gunamos naj xi'nni, te di xca' xi'n gunamos yäl'nasa'c xtenlu si'c ni xca' xi'n gunaa nani najc chäälpaclu." ³¹ Naj nuure, betzä, dinu gac si'c xi'n gunamos te chunu lo leii. Nu-urnu najcnu si'c xi'n gunaa nani najc chäälpac toAbram.

Colguzutijp lajztu lo yälirililajz xtidx Dios

5 Colgusutijp lajztu lo xtidx Dios nani baniidx Jesu-crist loonu sa'csi guliipac gulää Jesucrist nuure ladzña leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladzña leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. ³ Rniäza stehuält, guiraa bejn nani rlajzpac chu bee, nanab gunni si'cpac ni caj lo leii. ⁴ Palga rlajztu guntu redzuun ni caj lo leii te guibicaj xtojltu, dxejc agubicajtu lo Jesu-crist, agubicajzatu lo xcälracnäj Dios. ⁵ Niluxh nuure xcuentpac Sprit Dxan xten Dios rililajznu gudijx Jesu-crist xtojlnu lo crujz, cayenloonu jädsacni te guniidxni yälbañsa'c par tejpas loonu. ⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajz najc chalilajz bejn xtidx Dios. Yälirililajzga rujn guibañsa'cnu te chonälajznu resa'nu.

⁷ La'tu laaca sasajtu. ¿Chu badxojn gusoobtu xtidxlíi Dios? ⁸ Xhet Diosdi ni guletu badxojnditu. ⁹ Anajntu tudxe'nsi cobgulaj rusaguijni yátxtiil; si'c te cobgulajga najc te niguii ni caguluiitu xtidx leii. ¹⁰ Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹ Narä rebetzä, paru narä caguluiä chutu bee, si'c ruluu rexepejn Israel, ¿xhi xcuent rusacsí rexepejn Israel narä? Paru si'c caguluiä, dirutu chalilajz gudijx Jesucrist xtojlnu lo cruzj. Luxh si'cpacza rlajzreni. ¹² Rebejn nani cagusgueetu caniireni chutu bee, ¡malaiiza gutiuugreni tejpas lagajc tiejxhreni!

¹³ La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixгаа na'c xca'tistu rediidxga dxejcti guntu si'ctis ni rlajz tiejxhtu, si'ctis ni riabza yejcti. Colgacnäj sa'tu con yälrinälajz, tejni sigajc steeni. ¹⁴ Sa'csi guiraa diidx ni caj lo leii con tejtis diidxre rsiojbn: "Chanälajztu sa'tu sigajc rinälajztu lagajc la'tu." ¹⁵ Palga rdijltu, rauya'tu sa'tu, rajwtu sa'tu, ¡colnatiro! Andi lagajc la'tu gunijttu sa'tu.

Nani rchaglajz rebejn näj yäl'nabajn ni rudeed xtidx Dios

¹⁶ Rniä lojtu, colguibajn si'c ruluu xtidx Dios näjza Sprit Dxan xtenni, te si'c na'c guibajntu si'ctis ni rlajz tiejxhtu, si'c ni najctis xhigabtu. ¹⁷ Sa'csi ni najc xhigab xten bejn rdxe'ch loj xhigab Sprit Dxan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlajztu guntu. ¹⁸ Luxh palga cagulijdx Sprit Dxan la'tu, dxejc dirutu quiquiin guntu si'c ni caj lo leii.

¹⁹ Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee cháäl bejn, yälrusguee cháäl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, ²⁰ yälrajn rebanäj, yälbidxaa ni rujn daan bejn, yälrdxechlajz loj sa'ni, yälrchagdijl sa'ni, yäl'nayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujnreni: ²¹ yälrdxe'ch lajz, yälrugut sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälrnibee Dios xhaguibaa.

²² Niluxh xtzuum Sprit Dxan xten Dios najc yälrinälajz sa'ni, yälrbalajz lastooni, yälrbedxi lajzni, yälrbecdxi lajz sa'ni, yäl'najc beñsa'c lo chutis bejn, yäl'nagodzlajz, yälrlilajz, ²³ yäl'nadolajz, yälrnibee lastooni lo ni rlajz gun tiejxhni. Xheti te leii ni rudxojn gun bejn sa' redzuunre. ²⁴ Niluxh renani ahuililajz xtidx Jesucrist, abatío'nreni guiraa redolguijdx ni rlajz gun tiejxhreni.

²⁵ Palga rbäjz Sprit Dxan nejn lastoonu, do'o guibajn si'c rnibee Sprit Dxan guibajntu.

²⁶ Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

Colgacnäj sa'tu

6 Sa'ä, palga chu tejtü ni abiajb nejn dojl, lagajc la'tu nani arabeetu xtidx Dios colgulijdx bejnnga, colgacnäjni te guiriini nejn dojl. Colnii lojni nadolajz, nasinlajztu lagajc la'tu didi che guidon nägajcza la'tu jiajbtu nejn dojl. ² Colhuii xhi rquiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

³ Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴ Tejgatu colcube xho najc xtzuumtu te fiitu la laaca najcni, dxejcti sajz guiliä'ptu lagajc xpala'ntu. Dxejc ditu guiquiin chu stee bejn guiliä'p xpala'ntu. ⁵ Sa'csi tejga bejn susule'ni diidx lo Dios xhini'c bejnni.

⁶ Nani casieed xtidx Dios nanab gacnäj bejn nani ruluuini, gudeedni tudxe'n xhixtenni loj nani ruluuini.

⁷ Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn. ⁸ Paru te bejn gun dzuun xcuenttis tiejxhni, dxejc che guidzujn dxej xca'ni yäl'nasa'c, sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yäl'nasa'c, sica'ni yäl'nabajn par tejpas. ⁹ Ni'cni na'c guidxajgnu jiennu dzunsa'c te che guidzujn dxej ni xca'ni yäl'nasa'c, xca'zanu te yäl'nasa'cro. ¹⁰ Ni'cni nanab la'l ni sajcní, gacnäjnu chutis bejn, ganiddoo resa'nu ni ahuililajz.

Yäl'rulijdx näjza xtixtios

¹¹ Colhuilaa lacti reletrduxh cacuaä lojtu con naäpac. ¹² Guiraa reni rdxaglajz gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo cruzj. ¹³ Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu. ¹⁴ Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. ¹⁵ Che ahuililajz te bejn xtidx Jesucrist, xhetru sajcdi chu bejn bee, xhetza sajcdi na'c chu bejn bee. Nani sajctis najc gacni si'c te beñcoob lo xtidx Jesucrist. ¹⁶ Guiraa renani nabajn si'cni ruluu xtidx Jesucrist sibedxi lajzreni xcuent xcäl'rulaslajz Dios. Näjza rexepejn Israel nani ahuililajz xtidx Jesucrist sibedxi lajzreni.

¹⁷ Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸ Rebetzä, gacnäj Dad Jesucrist guiragajcti con Sprit Dxan xtenni. Sugacni si'c.

Efesios

Bacuaa Pabl lo rebeḡ guidoo neḡ guedx Éfeso

1 Narä, Pabl, nacä apost xten Jesucrist sa'csi si'c rla-jz Dios. Cacuaä guijtzre loj rebeḡ nani huililajz xti-idxni, loj reni rujn si'cpac rniini neḡ guedx Éfeso.

² Xca'tu yälracnäḡ, yälrbexi lajz xten Xtradnu Dios, näjza xten Dad Jesucrist.

Rusule' Pabl xtidx Jesucrist

³ Rliä'pnu xpala'n Dios, Dad näj Xtrad Jesucrist. Dios racnäḡ nuure, xcuent Crist runiidxni guiraa reyälracnäḡ xca' lastoonu, astoo yu'lanu xhaguibaa. ⁴ Laani gule nuure, che gajdli guirixtieḡ guedxliujre, te gacnu xpejḡni, te guibaḡnayanu nez lojni con yälrinälajz. ⁵ Sigajcza anungäjḡ xca'ni nuure te gacnu si'c xi'npacni sa'csi abiääd Jesucrist te guslaani nuure neḡ dojl, si'c ni gunibee Dios sa'csi balaslajzni nuure. ⁶ Gucnäḡ Dios nuure te guiliä'pnu xpala'n Dios, sa'csi lagajc laani acua'ni nuure, abejḡni nuure tejsi con xi'nni ni sanälajzni. ⁷ Laani baslaani nuure neḡ dojl xcuent xtieḡni, laani badzucajni xtojḡnu xcuent xcälruslaslajzni ⁸ nani banidxduxhni loonu. Guideb yälrajn, guideb xcärieḡni ⁹ basule'ni loonu xhigab xhiga'tzni xcuent redzuun ni rlanjzni guni, xhigabza ni beḡni galooli. ¹⁰ Luxh sidzujḡ dxej sisiojbpac xhigab ni beḡni Dios. Che guidzujḡ dxejga sutojḡ Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcäl'nasa'c Jesucrist, sa'csi galooli beḡni Dios xhigab guniidxni yäl'nasa'cga. Lagajc Dios benchee guira'ti ni yu', luxh rujnpacni nani abejḡni xhigab najc laaca gunni ¹² te guiliä'p beḡni xpala'n xcäl'nibeeni xcuentnu, nani ganiddoo biolilaaznu xtidx Jesucrist. ¹³ Näjza la'tu, che bieḡni diajgtu redidx gulii, rediidx ni ruslaa beḡni lo dojl, dxej huililajztu xtidx Jesucrist, dxej gujczatu tejsi con laani. Dxej cua'tu Sprit Dxaḡn xten Dios, ni'c najc si'c seen ahuililajztu, si'cni bia'n Dios diidx. ¹⁴ Baniidx Dios Sprit Dxaḡn xtenni te cuääzni neḡ lastoonu, te ni'c najc seen xca'nu yäl'nasa'c nani guniidx Dios che abaluuxni xtzuunni, nalajznu guslaani guiraa rexeḡni te guiliä'preni xpala'nni lo xcäl'nibeeni.

Rniab Pabl gudeed Dios yälrajn loj renani ahuililajz

¹⁵ Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexeḡni Jesucrist, ¹⁶ dina gusaḡä gudedä xquixtios lo Dios xcuent la'tu. Rnaduxh lazä la'tu che rniabä lo Dios.

¹⁷ Rniabä lo Xtios Dad Jesucrist, xtradni ni rnibee xh-

aguibaa, guniidxni lojtu te yäl'nanduxh, te yäl'ruluiloj recos xhiga'tz te gacbeduxhrutu xcuent Gueb Dios.

¹⁸ Rniabäza lo Dios jianij xcärieḡntu te gacbeetu xhini'c najc speranz xten yäl'racrejdxtu lo xtiidxni, te gacbeetu lacti saru, lacti sajc yäl'nasa'c ni gudeed Dios lo Jesucrist näjza loj rexeḡni, ¹⁹ te gacbeezatu lacti gurobduxh najc yäl'nibee nani rajpni nez loonu nani ahuililajz xtiidxni. Guiraa redee ruluu lacti nadip najc yäl'nibee xten Dios. ²⁰ Lagajc yäl'nibeere beḡni dzuun par Jesucrist. Con yäl'nibeere baspajḡ Dios Jesucrist lo rebeḡntu, te gureḡni xladbee Dios cadre rnibeeni xhaguibaa. ²¹ Maazru sajci lo chutis gubier, lo chutis yäl'nibee, lo xhitis yäl'nadip, lo chutis ni rnibee; maazru sajci lo chutis nani abibee te guinibee, sigajc naj, sigajc neḡ redxeḡ ni churu jiaäd. ²² Niluxh badeed Dios guira'tini ladzḡnaa Jesucrist, laazani beḡni bibee Jesucrist gunibeeni lo guiraa xhixten xquidooni. ²³ Rebeḡn guidoore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebeḡni ni najc xquidooni.

Ruslaa Dios nurnu sa'csi rinälajzni nurnu

2 Laani baniidxni yäl'nabajḡ lojtu che najctu si'c beḡntu nez loj Dios sa'csi rujntu dojl. ² Galoo gubajḡntu lo dojl, entis lo xnez guedxliujre guzajtu, biutu xtidx beḡndxab nani rnibee guedxliujre. Sprit xtenni rujn dzuun neḡ lastoo rexi'nni nani di gucuadijḡ xtidx Dios. ³ Luxh galoo, näj nuure nadxaagḡni lojreni, biennu si'c ni rlanj tiejxhnu. Dxej biennu si'ctisni rlanj tiejxhnu, si'ctisni biejḡ xhigabnu. Nungäjḡ guidxe'ch Dios loonu, sigajc bidxe'chni loj guiraa rebeḡn guedxliuj. ⁴ Niluxh balaslajz Dios nuure. Con xcäl'sanälazduxhni huinälajzni nuure. ⁵ Mase anajcnu beḡntu lo dojl, laani baniidxni yäl'nabajḡ loonu. Rajpnu yäl'nabajḡre con Jesucrist. Sa'csi balaslajzni nuure baslaani nuure neḡ dojl. ⁶ Baspaḡsacni nuure con Jesucrist; sigajcza beḡni cuenäjḡni Jesucrist xhaguibaa, ⁷ te neḡ redxeḡ ni churu jiaäd, guluilojḡni lacti sajc xcäl'nasa'c xten yäl'rulaslajzni, ni'c sanälajzni nuure, najcni huenduxh loonu por Jesucrist. ⁸ Sa'csi rulaslajz Dios nuure, ni'c baslaani nuure neḡ dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. ⁹ Xhet xcuent xhi dzunsa'cni ni biennu, te di chu tejtḡ gac nayedxlaḡzdi. ¹⁰ Dios najc ni benchee nuure. Sigajcza con Jesucrist beḡni gacnu beḡni ni rujn dzunsa'c nani galooli agunibee Dios jienpacnu.

Yälrbedxilajz ni rajpnu por Jesucrist

¹¹ Ni'c colsnaj lajztu xho gujctu galoo. Ditu niajc rexpejn Israel. Rniireni la'tu 'benzjijt' sa'csi ditu chu bee si'c ru' rexpejn Israel. Sa'csi lagajc con naareni rusäl'reni bee. ¹² Dxejc suga'tu ditu gumbee Jesucrist. Zijt yu'tu loj rexpejn Israel, najctu benzjijt. Nicla gumbeetu redidix ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. ¹³ Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojl'tu con xtiejn Jesucrist. ¹⁴ Jesucrist najc ni rbecdxi lajznu. Laani bejn gujc rexpejn Israel tejsi con rebenzjijt. Laani badzucajni redzuun xten leii te gujc rexpejn Israel tejsi con rebenzjijt. ¹⁵ Lagajc con tiejxh Jesucrist ni gojl lo cruz banijtni redzuun xten leii nani bejn bidxe'ch rexpejn Israel lo rebenzjijt. Lagajc laani bejni bidxagsa'reni te gujcreni tejsi che huililajzreni xtiidxni, gujcreni te beñcoob. Dxejc gulecdxini lajznireni. ¹⁶ Con yälgujt ni gujtni lo cruz badzu'ni guiro'preni lo Dios te gujcreni tejsi. Si'c guläjz rdexchnäj sa'reni.

¹⁷ Cajza lo guijtz rediidxre:

Biädni te basule'ni xho ga'p rebejn yälrbedxi lajz rebejn ni suga' zijt lo Dios näjza reni suga' gajxh lo Dios. ¹⁸ Laani bejn sajc jiu' guiro'p cuaa bejn lo Dios con tejsi xhigab, näjza tejsi Sprit. ¹⁹ Ni'cni dirutu gac benzjijt, bejn ni rut numbeedi. Anajctu tejsi con rexpejn, najczatu sa' rexpejn Dios. ²⁰ La'tu najctu si'c te yuro. La'tu najctu si'c padeer xten yu'ga. Reapost näjza reprofet najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajcru, sa'csi Jesucrist rnibee. ²¹ Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²² Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te neñni cuääz Sprit Dxi xten Dios.

Pabl nungäj chanä xtidx Dios lo rebenzjijt

3 Ni'cni yu'ä neñ latzguuib, narä, Pabl sa'csi cagusule'ä Jesucrist, te jädnää xtiidxni lojtu, najctu benzjijt. ² Pet abiejn diajgtu lacti hueen najc Dios baniidxni dzuunre loä, jädnää xtiidxni lojtu. ³ Dios baluiini xhigab-xhiga'tzni loä (si'cni bacuaä lojtu galoo). ⁴ Che gojtu guijtzga, sacbeetu cati ananä rehxigabxhiga'tz xten Jesucrist. ⁵ Xhigab-xhiga'tzre di bejn niembee galoo, niluxh naj Sprit Dxi xten Dios abaluiinini loj reapost näjza loj reprofet. ⁶ Dee najc xhigab-xhiga'tzga: por rediidx xcuent Jesucrist ni ruslaa bejn neñ dojl rujn Dios gac reni najc benzjijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yäl'nasa'c si'c bia'n Dios diidx.

⁷ Narä nacä te apost xten dzuun ni baniidxni, por xcäl'rulasajz Dios ni cuaxlia'ä. Dios baniidx dzuunre loä con xcäl'rnibeduxhni. ⁸ Luxh masä guxiiru sacä lo guiraa rexpejn, loä baniidxni xcäl'racnäjni te lo rebenzjijt gusule'ä xtiidxni, nalajznu redidxcoob xcuent xcäl'nasa'c Jesucrist, ⁹ te gusule'ä lo guiraa bejn rex-

higabxhiga'tz nani bacua'tz Dios lojnu galooli. Dios benchee guiralii ni yu'. ¹⁰ Si'c gujc te naj jien guiralii yäl'nanduxh xten Dios. Reni najc xpejn pacni neñ xquidooni guluii yäl'najre lo rexangl Dios, loj reni rnibee xhaguibaa. ¹¹ Galooli bejn Dios xhigabre par tejpas, ni'cni biädä xtadnu Jesucrist te guzojb xhigab ni bejn Dios. ¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. ¹³ Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

Xcäl'sanälajz Jesucrist

¹⁴ Ni'cni ruzuxhibä nez loj Xtad Dad Jesucrist ¹⁵ nani badeed lajni lo guiraa reni yu' xhaguibaa näjza reni yu' lo guedxliuj, ¹⁶ rniabä loj Dad xhaguibaa gutijpni lastootu con yäl'rnibee xcuent Sprit Dxi xtenni, sa'csi yuduxh xcäl'nasa'cni lo xcäl'rdimbicha'ni xhaguibaa. ¹⁷ Rniabäza lo Dios te jädläjz Jesucrist neñ lastootu sa'csi ahuililajztu. Te che agusudzu'tztu, agusutijptu lo yäl'rinälajz ¹⁸ dxejc sajc gacbeetu sigajc guiraa rexpejn pacni lacti gulajg, lactiza siool, lacti jäät, lactiza jiaa najc yäl'sanälajz xten Jesucrist. ¹⁹ Te gumbeezatu xcäl'sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexcäl'nasa'c Dios.

²⁰ Dios rnibeduxh. Sajc gunidduxhruni loj xhitis ni rniabnu lojni, loj recos ni rienu xhigab. Con Sprit Dxi an ni rujn dzuun neñ lastoonu suniidxni reyäl'nasa'c. ²¹ Loj Diosre coldeed xquixtios. Colguiliä'p xpala'nni neñ guidoo xcuent Dad Jesucrist guira dxej, par tejpas. Sugacni si'c.

Por Sprit Dxi nadxaag sa'nu

4 Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnzatu xhigab cheni gurejdxni la'tu. ² Colguibajn con yäl'nalasajz, näjza yäl'nadolajz, colcuedxni lajztu. Colyujn huant resa'tu con yäl'rinälajz sa'ni. ³ Colhuii te guidxaag sa'tu gactu tejsi con Sprit Dxi ni ruscuedxilajztu. ⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl'runloj ni rajptu xcuent diidix nani gurejdxu. ⁵ Rajptu tejsi Dad, tejsi yäl'rillilajz, tejsi yäl'robnis, ⁶ tejsi Dios, tejsi Xtad guiraanu nani rnibee guira'ti lo guiraanu.

⁷ Lo tejanu abaniidxni dzuun si'ctis bejn Jesucrist xhigab guniidxni lo tejanu. ⁸ Ni'cni caj lo reguijtz:

Che huä'pni xhaguibaa, cadre rnibeeni,
abejni gan lo guiraa yäl'rnibee,
dxejcti badeedni dzuun lo rexpejn lo guedxliuj.

⁹ Xhi säloj cadre caj, "huä'pni"? Dee säloj ganid biäjt-ni maazru jäät lo guedxliuj. ¹⁰ Lagajc nani biäjtga, lagajc laani huä'pni jiaaru lo guiraa rehxaguibaa te sajc guinibeeni guibaa näjza guedxliuj. ¹¹ Lagajc laani badeedni xtzuun tejegareni. Yu'reni badeedni gac apost, yu'reni badeedni gac profet, gaiireni badeedni gusule' xho ruslaa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni

badeedni guluii rexpejñi. ¹² Guiraa redee badeedni te guluiireni rexpejñ Jesucrist, te gunreni dzuun te gusta-jlreni rebejñ ni gac xquidoo Jesucrist. ¹³ Nungäjñ gac dzuunre che guidzujñli dxej ni nadxaag-sa'nu guiraanu loj yälrlilalajz, che guidzujñli dxej riembesa'cnu Xi'n Dios, dxej anajcnu benguyajñ lo xtiidxni, si'c te ni aguroob loj xcälrnibee Jesucrist. ¹⁴ Dirunu gac si'c rebuux ni tera'tsi rusiejch lajzni, rucua diajgreni xtidx chutis bejñ, mase xhitis diidx ruluiini. Dxej riajbreni lo redidx-xhii xten bejñ nani rusguee, nani cabäjtis gusguee bejñ. ¹⁵ Maazru hueen chonuunu loj redidxlii xten Jesucrist con yälrlinälajz te tioobnu lo guiraa recos xten nani rnibee, lagajc Jesucrist. ¹⁶ Loj Jesucrist nazdzu'tz guiraa rexpejñni, te si'cni nazdzu'tzsa'reni sääreni, najczeni tejsi loj tiejxh Jesucrist, racnäj sa'reni segun xhi dzuun rujñ tejjareni, casieedrurenit te cayajc xhidajlrubejñga con yälrsanälajz.

Te yäl'nabañcoob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajñtu si'c nabajñ rebejñ nani di gumbee Dios. Laareni rujñ si'ctis ni riajb yejcreni. ¹⁸ Nayääl xcäriejñreni, direni ga'p xcäl'nabajñ Dios sa'csi nadduxh lastooreni. ¹⁹ Redee che gacnajd xcäriejñreni gusloj bejñreni guiralajz yälrtujy, guiraa redojñ ni di nungäjñ gunreni. ²⁰ Niluxh la'tu xhet si'c di bisieedtu loj Jesucrist. ²¹ Palga abiejñ diajgtu xtiidxni, niluxh abaluiini lojtu didxlii ni siädñä Jesucrist, ²² colgusaan yäl'nabanyujxh ni gojptu: Lo yäl'nabanyujxhga rujñ bejñ si'ctis ni rla-jzni. Dxejcti si'c runijtni la'tu lo Dios. ²³ Colgusiejch lajz-tu, colgusia xcäriejñtu, ²⁴ te gactu beñcoob nani bejñ Dios, colchanuu te yäl'nabañsa'c, te yäl'nabanya xten xtidxliini.

²⁵ Colguoro'n diidx-xhii, colñii didxlii lo resa'tu sa'csi tejsi najcnu guiraanu.

²⁶ Che guidxe'chtu, na'c guntu dojñ. Na'c gusaantu chu xcälrdxe'chtu guideb dxej che chääzli gubijdx.

²⁷ Na'c gusaantu jiu' beñdxab neñ lastootu.

²⁸ Nani rilajñ, na'cru cuanni. Laaca gunni dzuun con ñaani te gunni te dzunsa'c nani gudeed meel lojñ te gac gacnäjzani rebejñ nani xhet rajpdi.

²⁹ Na'c gusaantu guirii nicla tej didxguijdx ro'tu. Colñii ganax didxsa'c te gacnäjni guisieed reni rucua diajg xtiidxtu. ³⁰ Na'c guntu gac-huin lajz Sprit Dxan xten Dios. Laani najc te seen xten Dios najctu xpejñ Dios, ni'c rbäjzni neñ lastootu che guidzujñli dxej ni chäätu lo Dios.

³¹ Colguoro'n yäl'nabañdxuudx xtentu, näj yälrdxe'ch, näj yälrdxagdijñ sa'ni, näj yälrbedxa', näj yälrgue.

Colguibicaj lo guiraa redojñga, na'c gactu benguijdx.

³² Nungäjñ gactu huen loj resa'tu, colgulasajz resa'tu, colsiäjñ lajztu con resa'tu ni rujñ dojñ lojtu si'c rsiäjñ Dios lajzni rextojñtu xcuent Dad Jesucrist.

Xho nanab guibajñ rexi'n Dios

5 Colguibajñ si'c nabajñ Dios, sa'csi najctu xi'nni nani sanälajzni. ² Colchasanäj yälrsanälajz sigajcni

huinälajz Jesucrist nuure cheni badeedni lagajc laani lo Dios, cuajni lo crujz, gujtni. Laani gujñni si'c gojñ, gujczani yälrbibyaal ni bidxagajz Dios.

³ Nicla gusa'ttu yälrsuguee chääñ bejñ, nicla redojñ dxuudx, niclaza yälrsanälaztej xhixtentisni. Nicla gusa'ttuni lo sa'tu, sa'csi xhet si'c di nungäjñ gun bejñ ni nabañ-naya. ⁴ Sigajcza colcuälaz diidx ni rujñ xtuujy, näjza didxnajd, näjza didxñaj nani digac laaca.

Colgudeedtis xquixtios lo Dios. ⁵ La'tu anajntu nicla tej ni rusguee chälbejñ, nicla tej beñdxuudx, nicla tej ni sanälaztej xhixtentisni, nicla renani rajñ rebanäjñ, nicla tej reni'c di xca' yäl'nasa'c loj Jesucrist, dizareni jiu' lo xcälrnibee Jesucrist, xcälrnibee Dios. ⁶ Na'c gusaantu gusguee bejñ la'tu con diidx ni xhet sajcdi sa'csi xcuent redzuunga riädä xcälrdxe'ch Dios loj rebejñ ni di gusoob xtiidxni. ⁷ Na'c guntu sigajc rujñreni.

⁸ Galoo nacäjytis xcäriejñtu gubajñtu, luxh näj abasanij Jesucrist xcäriejñtu. Colguibajñ si'c nungäjñ guibajñ nani abianij xcäriejñni. ⁹ Sa'csi nani abianij xcäriejñni rujñ dzunsa'c, rniini didxgulii. ¹⁰ Colguisieed xhini'c rchagajz Dios. ¹¹ Na'c guntu redzundxuudx nani rujñ reni nacäjy xcäriejñreni, coltilñaj reni rujñ sa' dzunguijdxga. ¹² Sa'csi te xtuujyñ najc jieinu diidx xcuent xtuunreni ni runxhiga'tzreni. ¹³ Niluxh guiraa sa' redzuunre ni rdilñäjnu, huenliisi sieñ xhi najczeni, suzeñni lo xpianij Jesucrist. Sa'csi guira'ti ni ruzeñ najc nianij. ¹⁴ Ni'cni caj loj reguijtz, räjp Dios:

Gubajñ, huistie luj ni rejslu.

ñHuistie lo dojñ, luj ni naga'lu lo dojñ si'c bengut, te gusanij Jesucrist xcäriejñlu!

¹⁵ Colñuii, colsiñ, na'c guibajñtu si'c te bejñ nani di gacbee, colguibajñ si'c bejñ nani yu' xcäriejñni. ¹⁶ Coltedsa'c redxej sa'csi neñ redxejre ganax cosguijdx rujñ bejñ. ¹⁷ Ni'cni na'c guibajñtu si'c rebejñ nani di gacbee, colyacnasiñ, te gacbeetu xhini'c najc ni rla-jz Dad xhaguibaa guntu. ¹⁸ Lacuaa yätu nejp nani runijñ bejñ, colgapchee Sprit Dxan xten Dios neñ lastootu. ¹⁹ Colñii loj resa'tu rediidx nani gunii rebejñ tiemp gulä'preni xpala'n Dios, colyelza redij xten Dios, con reyälriejñ colguiliä'p xpala'n Dios neñ lastootu. ²⁰ Di jiañ lajztu gudeedtu xquixtios lo Dios xtadnu con laj Dad Jesucrist.

Xho guibañaj sa' rexpejñ Jesucrist

²¹ Sa'csi rajñtu Jesucrist, colgusoob xtidx sa'tu.

²² Lojtu, regunaa ni abachñaa, rniä scree: Colgusoob xtidx chäätu si'c rusoobzatu xtidx Dad Jesucrist.

²³ Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejñ guidooni lo redojñ, najczeni si'c tiejxhni. ²⁴ Ni'cni, sigajc rusoob rebeñ guidooga nani rnibee Jesucrist gunreni, sigajcza nungäjñ gusoob regunaa ni abachñaa nani guinibeetis chääreni gunreni.

²⁵ Lojtu, reniguii ni abachñaa rniä scree: Colchanälajz chäätu sigajc ni huinälajz Jesucrist rexpeñ guidooni, badeedni lagajc tiejxhni loj Dios cheni cuajni lo crujz por laareni ²⁶ te basiani xtojñ rexpejñ guidooni, te gujcreni te beñcoob, abidiib lastooreni con xtiidxni si'c

rdiib te cos con nis ²⁷ te che xca'ni rexpən guidooni, najceni te guidoo ni sajcro, te guidoo nani xheti xtojlni, te guidoo nani sugadzu'tz, te guidoo xhet xhi riäädxdidi, najcni te guidoya, xheti xhi xtojldini. ²⁸ Sigajcza, te niguii nani abachnaa nungäjł chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹ Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpən guidooni. ³⁰ Najczanu tejsi loj tiejxh Jesucrist, loj xpäälni, loj rextzujtni. ³¹ "Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejn." ³² Dee najc te diidx xhiga'tzduxh; li te "¿chuj?" najcni. Niluxh narä rniä xcuent Jesucrist con rexpənguidooni. ³³ Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

6 Lojtu biuux, rniä scree: Colgucuadiajg xtidx Jesucrist, colgusoob xtidx xtadtu sa'csi ni'c sajz nez loj Dios. ² Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gu-soobtu diidxga; ³ "Te saruduxh guibajntu xchero lo guedxliujre."

⁴ La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälınaj, colgulijdxreni con xtidx Jesucrist.

⁵ La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu neñ lastootu. Colyejn xtzuumni si'cni najc xtzuum Jesucrist. ⁶ Colyejn xtzuumni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuumnactu; si'cni rlajz Dios. ⁷ Colyujn xtzuumni guideb lastootu si'c xmos Jesucrist, et si'cni xmos beñ guedxliuj. ⁸ Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹ Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpəñ Jesucrist lo guerr

¹⁰ Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälınadip xcälrnibeeni. ¹¹ Colgajcw xhabguiib xten Dios te gac sudzu'tztu lo reyälrusguee xten beñdxab. ¹² Sa'csi xhet beñ guedxliujtis cadılınäjnu. Cadılınäjzanu reguxhtis xte yälçäjy, näjza reyälrnibee, rebejn nani rnibee loj reyälçäjy, näjza rexangl beñdxab nani rnibee bej xten guedxliujre. ¹³ Ni'cni colca' guideb lad-guiib xten Dios nani runiidxni loonu te gac sudzu'tznu neñ dxej ni guideednu trabajwduxh, te che agudejdni, laltis sisi-udzu'tznu. ¹⁴ Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu. ¹⁵ Colcuuaa gurach-guiib ni'tu (ni'c najc xtidx Jesucrist ni rus-cuecdxi lajztu). ¹⁶ Colca' escud-guiib ni najc yälrlilajz te con yälrlilajz xtidx Dios di beñdxab gun gaan gusguee la'tu con rextidx-xhiini. ¹⁷ Colca' yälruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxan xten Dios ni najc xtidx Dios. ¹⁸ Colınab lo Dios guiraa dxej; colınab lojni con Sprit Dxan xtenni; colsusıntis; na'c jieedtu guiniabtu lo Dios xcuent guiraa xpejnı. ¹⁹ Colınabza lo Dios por narä te guniidx Dios diidx cheni galı guiniä, te na'c guidxebä guiniä che guluiä didx-xhiga'tz xten yälruslaa bejn lo dojl. ²⁰ Xcuent rediidxga ni yu'ä neñ latzguiib, caduä con caden. Ni'cni colınab lo Dios te na'c guidxebä guiniä rediidxga si'cpacni säbyäjł guiniäni.

Lult xtixtios

²¹ Niluxh te gacbeetu xho sasaj rextzunä, nägajcza xho yu'ä narä, Tıquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx.

²² Laapacni ruxhalä lojtu, te gacbeetu xho yu'nu, te si'c guscuecdxini lajztu.

²³ Rniabä yälrbexilajz par resa'nu, näjza yälrlilajz con yälınälajz xten Dios Xtadnu näjza xten Dad Jesucrist. ²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Filipenses

Latzguiib yu' Pabl bacuaani loj rebeḡguidoo xten guedx Filipos

1 Pabl nājza Timoteu, nani najc rexmos Jesucrist, rucuaanu guijtzre lo guiraa rexpejḡ Jesucrist nani rbājz guedx Filipos, loj rebejḡ nani ruluii xtidx Dios neḡ reguidoo nājza loj rediaconos. ² Gacnāj Dios la'tu con yälrbedxi-lajz xten Xtradnu nājza xten Dad Jesucrist.

Rniab Pabl lo Dios xcuent rebejḡ nani rililajz

³ Che rnaj lazä la'tu, rudedä xquixtios lo Dios. ⁴ Che rniabä lo Dios, rbaa lazä rniabä lo Dios xcuent la'tu, ⁵ sa'csi abidxaag sa'nu lo xtidx Jesucrist che guslojli huililajzta hasta ḡajli. ⁶ Ancheä Dios nani gusloj cayunsa'c dzuun neḡ lastootu, lagajc laani suluxsa'c dzuunga dxejli ni jiääd Jesucrist. ⁷ ¿Xhiru xhigab nungäjḡ ḡunä? Ni rapä la'tu neḡ lastoä sa'csi cayacnäjtu narä neḡ latzguiib luxh rsiudzu'tztu riye'tztu lo bejḡ, guli najc rediidx nani rusule'ä xcuent Jesucrist nājza la'tu rusule'tu rediidxga. ⁸ Dios nanchee xho rbaḡnäätu, xho sanälazä guiraatu lo xcälḡsanälajz Jesucrist. ⁹ Rniabä lo Dios te tioobru xcälḡrinälajzta nāj xcälḡnajntu nāgajc churu xcäriejḡ guiraatu, ¹⁰ te cuetu nani najc dzunsa'c te si'c guibaḡ nayatu, te na'c ga'ptu nicla tej dojḡ cheni jiääd Jesucrist. ¹¹ Te guidxa lastootu yäl-nasa'c xten te yälḡnabansa'c ni runiidx Jesucrist, te guspaa lajzta Dios, guiliä'ptu xpala'nni.

Jesucrist najc xcälḡnabaḡä

¹² Rlazä gacbeetu betzä: guiraa nani gusacä ni'c cayacnāj guire'chru xtidx Jesucrist. ¹³ Ni'c guiraa rebejḡ, renani yu' jusgaad sigajc renani yu' garenca lajt, anajnereni niäüä latzguiib xcuent Crist. ¹⁴ Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵ Guliica yu' reni rusule' xtidx Jesucrist sa'csi rdxe'ch lajzreni, rdxe'chzareni loä. Yu'za reni rusule' xtidx Jesucrist sa'csi laaca najc xhigabreni. ¹⁶ Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrurenin trabajw nani tedä neḡ latzguiib. ¹⁷ Niluxh yu' reni rusule' rediidxga sa'csi sanälajzreni Jesucrist. Anajnereni yu'ä latzguiibre te gusule'äru guliipac najc xtidx Jesucrist. ¹⁸ Niluxh ¿xhiru najcni? Palga rujnsireni laaca o palga guliipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. ¹⁹ Ananä laaca guiriä loj guiraa recosre sa'csi canabtu lo Dios xcuentä. Luxh xcälḡracnäj Sprit xten Jesucrist

²⁰ rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä ḡaj te gac guiliä'pä xpala'n Jesucrist con tiexhä palga guibaḡä o palga guetä. ²¹ Sa'csi palga guibaḡä, su'ä lo Jesucrist; luxh palga guetä sunäru gaan. ²² Palga guibaḡäru lo guedxliujre, sajcru ḡunä xtzuum Dad Jesucrist, ni'cni dina gacbeä xhnic cueä xca'ä. ²³ Nagajḡ najcni par narä cueä lo guiro'preni. Te lajt runä xhigab: malaii guetä te cha'a cadre yu' Jesucrist sa'csi ni'c najc hueenru par narä. ²⁴ Niluxh stee lajt nancheä nungäjḡ guibaḡäru lo guedxliujre xcuent la'tu. ²⁵ Niluxh narä racbeäpac siannäärü la'tu, su'äru lojtu te chanuurutu lo xtidx Jesucrist, te guibalajzta lo yälḡrililajz, ²⁶ te guibalajzrutu xcuentä loj Jesucrist che guibisacä lojtu stehuält.

²⁷ Colḡhuiitis guibajntu si'cpac ni rni xtidx Jesucrist, te palga jiädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yälḡrililajz xten xtidx Jesucrist. ²⁸ Na'c guidxejbdu renani rdxe'ch lojtu. Laareni huenliisi ruseḡ agunijtreni ni'c rdxe'chreni, ni'cni la'tu huenliisi ruseḡ aguḡaatu neḡ dojḡ si'c baniidx Dios, ni'cni ditu guidxe'ch. ²⁹ Sa'csi lojtu abaniidx Jesucrist chalilajzta xtiidxni. Niluxh xhet ni'ctis; nāgajcza tedtu trabajw xcuent laani. ³⁰ Cadejdtu lagajc trabajw ni cahuiitu gudedä luxh ḡaj riejn diajgtu cadedsicä trabajwga.

Xcälḡnalaslaḡ nājza xcälḡguobduxh Jesucrist

2 ¿La ruspaä Jesucrist lajzta? ¿La racnäj xcälḡrinälajzta la'tu? ¿La yu' Sprit Dxan xtenni con la'tu? ¿La yu' xcälḡsanälajzta nāj xcälḡrulaslaḡzta lastootu? ² Palga yu'ni, colḡguspaa lazä, colyejḡ tejsi xhigab con narä, colga'p lagajc yälḡsanälajzga, colḡguidxaag sa'tu, colyejḡ tejsi xhigab. ³ Na'c ḡuntu nicla tej dzuun sa'csi cayutu lagajc la'tu, na'cza ḡuntu dzuun te chä'p xpala'ntu. Colyejḡ xtzuumtu con yälḡnalaslaḡ, colḡhuii loj sa'tu si'c beḡroru lojtu. ⁴ Na'c jiu chu tejtu lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpaä Jesucrist ⁶ nani mase najcni sigajc Dios, dini niniadzdu'tz xcälḡrnibee Dios, ⁷ alga basa'nni te laad yälḡrnibee nani rajpni con Xtradni Dios te gujcnin mos cheni gojḡni lo guedxliujre. Gujcnin si'ctis te bejḡ. ⁸ Che gujcnin si'ctis beḡ guedxliuj, gujcnin beḡ nadolajz, beḡ nasobdiidx. Basoobni xtidx Dios, gujtnin lo cruzj, luxh yälḡrejt lo cruzj najc te yälḡrtu-iduxh. ⁹ Ni'cni baspaḡsac Diosni, gule'cni Crist te lajt ni najc jiaaru, badeedza Dios sajcru lajnin lo laj guiraa relaj ni rusä't bejḡ. ¹⁰ Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo

guedxliuj, näjza guiraa reni yu' nez neḡ yuj. ¹¹ Te guiraareni gacbeepac, guiniizareni: "Jesucrist najc Dad", te si'c chä'pduxh xpala'n Xtadnu Dios.

Rexpejn Jesucrist najc si'c bajl ni rusanij lo guedxliuj

¹² Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä ḡaj ni yu'ä zijt, colhuii tejgatu xho gac laatu neḡ dojl, colyajc bejn ni rusoob diidx con yälrðxejb. ¹³ Sa'csi Dios najc ni rujn dzuun neḡ lastootu te rajc rujntu xhigabsa'c, dxejc racnäjzani la'tu te rajc rujntu si'cni rlanjni.

¹⁴ Loj guira'ti ni rujntu, na'c gusmojm̄tu, na'cza gun tiop lajztu, ¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laḡ ni tre'tu loj rebeḡguijdx ni rujn redzunduudx. Nez lojreni gactu si'c te bajl ni rdimbicha' si'c rebalxhaguibaa che nacäy, ¹⁶ sa'csi arapdu'tztu xtidx yälḡnabajn ni runiidx Crist neḡ lastootu te guspaatu lazä dxej cheni jiaäd Jesucrist, sa'csi xhet xlia'di gujc xtzunä, xhetza xlia'di cayunä dzuun ḡaj. ¹⁷ Mase lagajc xtienä guixe' te guiza' te gojn ni xca' Dios xcuent xcälrlililajztu, rbaa lazä, sibalaznääza la'tu. ¹⁸ Sigajcza colguibaa lajztu, colguibalaznäḡ narä.

Timoteu con Epafrodito

¹⁹ Nez loj Dad Jesucrist cayunloä guxhaḡgacä Timoteu lojtu te näjza narä guibaa lazä che agucebeä xho yu'tu nejzga. ²⁰ Sa'csi rutru rapädi nani rujn tejsi xhigab, tej ni guliipac gun dzuun, jupacni la'tu. ²¹ Guiraa rebejḡre rujntis xtzuuncareni, direni jiu gunreni xtzuun Jesucrist. ²² Niluxh la'tu anajntu xho rujn Timoteu; si'c racnäḡ te bi'n xtadni, si'cza racnäḡni narä lo xtidx Jesucrist. ²³ Ni'cni rlazä guxhaḡäni te jiaḡdhuiini la'tu, fixgaäsi don xho sasaj xcuentä ree. ²⁴ Cabäzäza nez lo Dad Jesucrist don la näjza narä sajl jiaḡdhugacätu.

²⁵ Niluxh rchaloä nanabpac guxhaḡä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaḡtuni te jiuni narä, fiini xhini'c rquinä. ²⁶ Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. ²⁷ Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzani narä te di nidedäru loj yälḡnahuinlajz ni yu'ä ree. ²⁸ Ni'cni rlazä guxhaḡgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹ Colca'ni con yälrbalajz si'c bejtztu lo xtidx Dios, sigajcza colyejn reni najc sigajc laani. ³⁰ Xcuent xtzuun Jesucrist ameer niejtni, dini niu xcälḡnabajntisni te bejnni redzuun nani di niajcdi niujntu lagajc la'tu xcuentä.

Te yälḡnabaḡsa'cpac

3 Naj rebetzä, colguibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäḡni la'tu. ² Colḡnati renani najc si'c bä'cw. Colḡnatiza rebejḡ nani rujn dzun guijdx. Colḡnatiza reni ru' bee tiejxhtisreni luxh xlia'si rujnreni si'c. ³ Renani guliipac yu' bee najc nuure nani ahuililajz

xtidx Dios, rienzanu xtzuunni si'cni rlanjni sa'csi ayu' Sprit Dxan xtanni neḡ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. ⁴ Narä sajcza guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhujḡ gubijdx; narä nacä te rexpejn Israel; narä nacä tej rexpejn toBenjamin, nacä te hebreo, luxh xtadä najc te beḡ hebreo; xcuent leii nacä te farisee. ⁶ Basobduxhä guiralii rextidx Dios ni caj lo leii ni'cni basacsiduxhä rexpen Jesucrist; xcuent yälḡnabaḡsa'c xten leii, xhetliidi xtojḡ yu'; basobdzu'tzä xtidx leii. ⁷ Niluxh ḡaj rediidx nani galoo benä xhigab sacduxh, ḡaj xhet sajcdini sa'csi sanälazä Jesucrist.

⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, ⁹ te chu'ä lojni, xhet xcuentdi xcälḡnabaḡsa'cä ni najc xcuent leii, alga xcuent yälḡnabaḡsa'c ni najc xcuent xcälrlililajz Jesucrist, yälḡnabaḡsa'c ni najc xten Dios xcuent yälrlililajz. ¹⁰ Ni'cni rlazä gumbeäru Jesucrist loj yälḡnabee ni rajpni sa'csi huistie gubaḡsa'cni sacni loj rebeḡgut, te gumbeäru retrabajwduxh ni gudejdni, te ganä xho gunä ni rlazj Dios si'c gucbee Jesucrist, bejnzani ni rlazj Dios che gujtni. ¹¹ Te gac guidzünä lo yälguibaḡsac loj rebeḡgut te xca'ä yälḡnabajḡ par tejpas lo Dios.

¹² Dizana guiniä "abenä gaan" o "anacä beḡsa'c", alga sanuätis te gunä gaan yälḡnabajḡ nani cua'ä lo Jesucrist. ¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää ḡää si'cni guiniazä nani churu gac. ¹⁴ Si'cni sanuutis ruxuḡ bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jienu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶ Naj, cadrotis abidzunu lo nani abiembeenu, sigajcza nanab guibaḡsijcnu, chanuutis gusoobnu rediidxga; nungäjl guibajḡnu loj rediidxre, jienu tejsi xhigab.

¹⁷ Rebetzä, coltanajl narä, colyejn si'c runä narä, colhuiiza rebejḡ nani nabajḡ si'c nabaḡä. ¹⁸ Xhidajl huält aguniä lojtu, ḡaj ronäli rnisacä lojtu, yu' xhidajl reni rdxech lojtu, rniyajreni nani bejn Jesucrist che gudijxni xtojḡnu lo cruzj. ¹⁹ Redee che luux xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtuju; luxh riutisreni xcälḡnasa'c guedxliujre. ²⁰ Niluxh nuure, xhaguibaali najc laadxnu, luxh ro'cli cabäaznu jiaäd nani ruslaanu neḡ dojl, nalaaznu lagajc Dad Jesucrist. ²¹ Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcälḡnibeeni. Sujnni dee con yälḡnibebeduxh ni rajpni te rnibeeni loj guirali'ti, guiraa nejz.

Colguibalajztis xcuent Dad Jesucrist

4 Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaa lazä, lojtu ni najc yäl-nasa'c xtenä, colsudzu'tz loj xtidx Jesucrist.

² Rniabduxhä lo Evodia näjza lo Sintique, rulidxäreni gunreni tejsi xhigab xcuent Dad Jesucrist. ³ Sigajcza rniabä lojlu betzä, ni runnäjä narä dzuun, gucnäj regu-naare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj neñ reguijtz xten yäl-n-abajñ par tejpas.

⁴ Colguibalaznäjztis Dad Jesucrist; stehuält rniä: colguibalajz. ⁵ Sugabee guiraa rebejñ xho najc xcäl-n-abajñtu lo xtidx Dios. Asiäddzũgajxh dxej xten Dad Jesucrist.

⁶ Na'c guidxejbtu, colnabtis lo Dad guira'ti, colgudeedza xquixtios lojni lañ ni cabedx-canabtu lojni. ⁷ Dios guniidx xcälrbcdxilazduxhni, nicla guntu xhigab lacti najc yälrbcdxilajzga. Yälrbcdxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸ Mbaj ñaj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsac xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. ⁹ Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jiannäjni la'tu.

Gojñ xten refilepenses ni xca' Pabl

¹⁰ Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaiztu niacnäjtu narä, luxh di niacjdini. ¹¹ Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹² Sajc guibanä che guxii rapä; sajc guibanä che xhidal rapä; abisiedä guibanä xhotis: sajc gauduxhä, sajcza guilianä; sajc gapä xhidajl xhixtenä, sajcza tedä trabajw. ¹³ Guira'tini sajc gunä sa'csi Jesucrist racnäj narä. ¹⁴ Niluxh xhet najcdi; laaca dzuun bejntu che bejntu xhigab gacnäjtu narä lañ ni cadedä trabajw.

¹⁵ Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä. ¹⁶ Cheni yu'äli guedx Tesalónica, baxhañtu meel loä tej-tio'p huält. ¹⁷ Niluxh narä di rlazä xca'ätis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxhañtu meel loä. ¹⁸ Naj acua'ä guiraa ni baxhañtu, arapä xhidajl, arapduxhä sa'csi acua'ä nani biädnä Epafradito baxhañtu loä, te gojñ ni rlianejxh si'c guxhyaal, te dzunsa'c ni rchaglajz Dios. ¹⁹ Dios xtenä guniidx lojtu guiraa nani riäädx xca'tu, si'ctisni rajpni reyäl'nasa'cduxh xhaguibaa con Dad Jesucrist. ²⁰ Colguiliä'p xpala'n Dios xtadnu guixeguixee par tejpas. Si'c gacni.

Lult xtixtios

²¹ Coldeed xtixtios lo guiraa rebejñ ni abia lastooni nez loj Dad Jesucrist. Rebejznu ni yu' ree näj narä ruxhañtu xtixtios lojtu. ²² Guiraa rebenree ni abia lastooni nez loj Dad Jesucrist ruxhañtu xtixtios, niluxh ruxhañtu resa' César xtixtios lojtu.

²³ Suga'p xcälracnäj Dad Jesucrist lastootu. Sugacni si'c.

Colosenses

Bacuaa Pabl loj rebeṅ guidoo ni yu' guedx Colosas

1 Narä, Pabl nacä te apost xten Jesucrist. Dios gule narä. Narä näjza bejtznu Timoteu ² cagucuaanu reguijtzre loj rebeṅ Colosas nani nabaṅnaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xtradnu.

Rniab Pabl gudeed Dios yälṅajn xtenni

³ Rdeednu xquixtios lo Dios xtrad Dad Jesucrist rniabnu lojni xcuenttu guixe-guixee. ⁴ Abiejn diajgnu xho rililajztu xtidx Dad Jesucrist, näjza xho sanälajztu rebeṅ ni ahuililajz xtidx Jesucrist, ⁵ sa'csi cabäjztu xca'tu reyälṅasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadijgtu xtidxlii Jesucrist xcuent yälruslaa lo dojl. ⁶ Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebeṅ ni cayacbee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeszatu guliipac najc xcälṅulaslajz Dios. ⁷ Sigajcza bisieedtuni lo Epafras, ni sanuutis cayacnäjni nuure lo dzuun. Laani najc te beṅsa'c, yu'ni lojtu cayujnpacni xtzuum Jesucrist lacuaa nuure. ⁸ Laani abasule'ni diidx loonu xho sanälajz sa'tu sa'csi nabajṅ Sprit Dxaan xten Dios neṅ lastootu.

⁹ Laa ni'cni dxejli nani biejn diajgnu diidxre xcuenttu, di cuääz cabedx-canabnu lo Dios, canabnu gacbeduxhtu xho rlajz Dios guntu, guniidxni guiraa yälṅajn näjza gusanijni xcäriejntu ¹⁰ te guibajntu si'cni nungälṅ guibajṅ beṅ ni sanajl Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzusa'c näjza jianijru xcäriejntu xcuent yälṅriembee Dios. ¹¹ Tioobrutu loj xcälṅnadip, xcälṅnibee Dios te guibaa lajztu gusutiplajztu, cue'cdxilajztu loj xhitis ni sajctu. ¹² Guibalajznu guideednu xquixtios loj xtradnu Dios nani basudzu'tz nuure te xca'nu yälṅnabajṅ par tejpas sigajc guiraa rebeṅ nani ahuililajz xtiidxni yu'reni lo xpianijni. ¹³ Laani abaslaani nuure loj xcälṅnibee yälṅnacäjä, abateedni nuure lo xcälṅnibee xi'nni ni sanälajzni. ¹⁴ Laa xi'nni ni baslaa nuure neṅ dojl cheni baxhe'ni xtiejnni, gujtni lo cruzj, dxejc gudijxni rextojṅnu.

Gubisacnu loj Dios xcuent xcälṅujt Jesucrist

¹⁵ Rut rajcdi ruhuu lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh rnibeeni lo guiralii ni yu' lo guedxliuj. ¹⁶ Por laani benchee Dios guiralii ni yu' xhaguibaa ni yu'za lo

guedxliuj, renani ruzeṅ sigajc renani di guzeṅ: reṅei, näjza reni rnibee loj rexangl Dios, näjza reni rnibee loj rexangl beṅdxab, nägajcza reyälṅnibee xten reguixhajg, sigajczani loj regubier, lo reguxhtis ni rajp yälṅnibee, guiraani guc-chee por laani, näjza par laani. ¹⁷ Alanabajṅ Jesucrist galooli, che gajdli guirixtiej guedxliuj. Por laani yu' guira'ti ni yu'. ¹⁸ Laani najc nani rnibee guidoo, nalajznu rebeṅ nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajc guinibee. ¹⁹ Sa'csi bidxagljz Dad Dios ga'p Jesucrist guiralii yälṅnibee nani najc xten Dios, ²⁰ por la-gajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiälṅ-lajzni, aguredxi lajzni sa'csi bixe' xtiejn Jesucrist lo cruzj.

²¹ Luxh la'tu gujcti si'c beṅzijt lo Dios sa'csi galoo rdxe'chtu lo Dios neṅ lastootu xcuent redzunguijdx nani bejntu. ²² Niluxh ṅaj abiälṅ-lajz Dios abadzu' Jesucrist la'tu, agucnayatü gubi'tu lo Dios xcuent xtiejn Jesucrist ni baxhe'ni lo cruzj cheni gujtni. Ni'c bejnni te che suutu nez lojni, xhetiru xtojṅtu, xhet xhi guiniidi Dios lojtu sa'csi anayapactu. ²³ Niluxh riälṅ chanuu sudzu'tztu, cuedxitu lo yälṅrililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebeṅ ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebeṅ ni ahuililajz xtiidxni, ni najc si'c tiejxh Jesucrist. ²⁵ Ni'c nacä te beṅ ni rusule' diidx neṅ guidooga. Dzuunga baniidx Dios gunä par xcälṅnasa'ctu te gusule'äpac guiragajc xtidx Dios, ²⁶ te gacbeenu rehxigabxhiga'tz nani najc xhiga'tz galododuxh niluxh ṅaj abaluiini redidxxhiga'tzre loj rexpejnni. ²⁷ Lojreni bejn Dios xhigab gu-luiini reyälṅnasa'c xten yälṅrdimbicha' xten redidxxhiga'tz ni cagusule'ni loj rebeṅzijt. Yälṅxhiga'tzre säloj Jesucrist rbäjz neṅ lastootu ni'c runlojtu chaläjztu lo yälṅrdimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebeṅ, guideb yälṅajn ruluiinu te guisa' yälṅajn xten guiraa rebeṅ xcuent Jesucrist che guidzujṅreni nez loj Jesucrist. ²⁹ Xcuent dzuunre guideb xtipä runä dzuun con guiraa yälṅnibee nani runiidx Jesucrist narä.

2 Rlazä gacbeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. ² Te tioob lastoo guiraatu sa'csi abidxagsa' lastootu lo yäl-sanälajz, näjza te ga'ptu guiraa reyäl'nasa'c ni rajp bejn che racbe-sa'creni xtidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist. ³ Neñ lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yälnumbee. ⁴ Dee rniä lojtu te di gusguee chu gusgueetu con rediidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yäl'rillilajz xten Jesucrist.

⁶ Ni'cni sigajc ni huililajztu xtidx Jesucrist, sigajcza colchasanäj Jesucrist. ⁷ Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yäl'rillilajz xten Jesucrist si'c ni abisieedu. Col'gudedduxhru xquixtios lo Dios.

Yäl'nabañcoob ni rudeed Jesucrist

⁸ Col'huii, na'c gusaantu guxhiid bejn xcäl'rillilajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rrajz Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰ Xhet cayäädxdä lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt. ¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtoj bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist. ¹² Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl'rnibee nani gulässac Jesucrist lo rebengut. ¹³ Che najctu si'c bengut lo dojl, näjza sa'csi di bee niu' tiejxhtu, dxejcli baniidx Dios yäl'nabajn par tejpas lojtu con Jesucrist, badzucajni guiraa rextojlnu. ¹⁴ Dios badzucaj guiraa releii nani basäuu nuure neñ dojl, badzucajnini lojni, sa'csi bacuaanini lo cruzj, cadre gudijx Jesucrist guiralii rextojlnu. ¹⁵ Cheni gujt Jesucrist lo cruzj bejnni gaan loj reyäl'guxhtis näjza guiraa reyäl'rnibee xten beñdxab näjza rexspritni. Basanxtujynireni nez loj guiraa rebejn. Laani bejnni gaanreni cheni cuajni lo cruzj.

Col'quuil recos ni najc xten xhaguibaa

¹⁶ Nicla tejtä na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzni. ¹⁷ Guiraa redee najc si'csi te balaa xten nani churu jääd, te guluiireni ni rujn balaaga, nalajznu ni'c najc Jesucrist. ¹⁸ Na'c gusaantu gudzucaj bejn xcäl'nasa'ctu te gunreni gactu nadolajz, te gan'tu reangl. Sa' bejnnga richu' loj nani gajdreni fii; rchaloreni najcreni beñro xcuent lagajc xhigabreni.

¹⁹ Laareni direni chanajl Jesucrist nani rnibee, nani rujn roobru tiejxhni, nalajznu rexpejn, sa'csi lojni rca'reni ni rquiin lastooreni, te ruchaagni sa' teygareni si'c nadxaquiid bääl cuä' dzujt lo tiejxh bejn, te gacreni tejsi con Dios.

²⁰ La'tu agujttu con Jesucrist, abiriitu lo rexhigab xten guedxliujre. Naj xhicient guibajntu sigajctis nabajn rebejn nani di gumbee xtidx Jesucrist, ä? xhicient ru-soobtu rediidx ni caj lo releii? Loj releii caj sa' diidxre: ²¹ "Di chahuallu dee, di gaulu ni'c, di canlu dec." ²² Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani ruluii bejn. ²³ Guluiicani sa' releiiga rien asdoo ruluiireni yäl'nanduxh, luxh che ru-soob bejn releiiga rchaloreni rajnreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rrajz tiejxhreni.

3 Palga anabansactu con Jesucrist, col'quuil reyäl'nasa'c ni yu' xhaguibaa cadre sobga' Jesucrist xladbee Dios. ² Col'yejn xhigab xcuenttis reyäl'nasa'c ni yu' xhaguibaa, na'c guntu xhigabtis xcuent reni yu' lo guedxliuj. ³ La'tu anajctu si'c bengut loj reyäl'nasa'c ni yu' lo guedxliuj, luxh yäl'nabajn ni rajptu naj, yäl'nabajnnga naga'tz con Dios xcuent Jesucrist. ⁴ Che guluiilosac Jesucrist ni najc xcäl'nabajntu, dxej näjza la'tu suluiilojtu con laani lo xcäl'rindimbicha'ni.

Yäl'nabañbiejw con yäl'nabañcoob

⁵ Col'cuälaz redzunguijdx xten guedxliuj nani rujntu, yäl'rusguee gunaxteb, yäl'rujn recosdxuudx, recos ni rdxaglaz tiejxhtu, rexhigab-guijdx, yäl'rsiäb-lajz xhi xten bejn, guiraa redee rujn runijt bejn lo Dios sigajc rujn bejn che rajn bejn rebanäjb. ⁶ Guiraa redzuunga rujn riääd xcäl'rdxe'ch Dios yejc renani rujn sa' redzuunga. ⁷ Näjza la'tu bejntu sa' redzunguijdxga galoo cheni guyu'tu lo sa' yäl'nabajnnga. ⁸ Niluxh naj näjza la'tu col'gusaan recosre; nalajznu yäl'rdxe'ch, yäl'ruche'ch sa'ni, yäl'rujn latzsiaj sa'ni, yäl'rnijay sa'ni, näjza rediidx-dxuudx ni rniitu. ⁹ Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. ¹⁰ Col'yajc te beñcoob, ni guixe-guixee cayanijru xcäriejn, te gumbesa'ctu Dios, te gactu sigajc najc Dios ni benchee benguedxliuj. ¹¹ Lo yäl'nabañcoobre rutiru benzijt, niclaza xpen Israel, rutiza rebejn ni ru' bee, niclaza bejn ni di chu bee; rutiza benzijt, niclaza bejn ni siääd zitduxh; rutiza mos, niclaza bejn nani di chu lo bejn, sa'csi che rillilajz te bejn xtidx Jesucrist najcni tebloj con guiraa reni rillilajz xtidx Jesucrist; guiraareni najc xpejn Jesucrist.

¹² Naj agule Dios la'tu te gactu xpejn nani gac naya, nani sanälajzni, col'guibajn con yäl'rulaslaz, na'c guidxe'chtu, col'yacnadoo con yäl'nadolajz, col'niiza nadolajz. ¹³ Col'yujn huant, na'c guidxe'chtu loj sa'tu, palga yu' chu sa'tu rdx'e'ch loj sa'ni, col'gusiäjl-lajztu sigajcni basiäjl-lajz Dad Jesucrist lojntu xcuent rextojlnu. ¹⁴ Che abejntu guiraa recosre, col'guillru yäl-sanälajz nani rusa' loj guiraa recosre. ¹⁵ Xcäl'rbedx-lajz Dios guinibee neñ lastootu, sa'csi parpac ni'c gure-

jd̄xni la'tu, te gac̄zatu tejsi con rexp̄ej̄n Jesucrist. Col̄gudeed xquix̄tios loj Dios.

¹⁶ Xtid̄x Jesucrist chuduxh nēn lastootu con guiraa yäl̄naj̄n, te guluiitu, te gulij̄d̄xtu tejsa resa'tu con redij̄ nani gulä'p toDavid xpala'n Dios, näj̄za redij̄ nani roltu, näj̄za redij̄ nani rliä'p xpala'n Dios. Redij̄ga gol̄nu te guideednu xquix̄tios lo Dios nēn lastoonu. ¹⁷ Guira'ti nani guntu, sigaj̄c rediid̄x ni rniitu, sigaj̄cza redzuun ni ruj̄ntu, col̄yej̄n guiraani con laj̄ Dad Jesucrist, col̄deed xquix̄tios lo Dios xtad̄nu con laj̄ Jesucrist.

Xho nanab guibaj̄n te famil̄ ni najc xpej̄n Jesucrist

¹⁸ Regunaa nani abach̄naa, col̄gusoob xtid̄x chäältu sa'csi si'c r̄laj̄ Dad Jesucrist. ¹⁹ Reniguii nani abach̄naa, col̄chanälaj̄ chäältu, na'c guidexchnäjt̄ureni. ²⁰ Reni najc biuux, col̄gusoob xtid̄x xtad̄tu loj guira'ti, sa'csi si'c rchaglaj̄ Dad Jesucrist. ²¹ Reni najc Dad, na'c guche'chtu rexi'ntu, didi gac-huin laj̄zreni. ²² Reni najc mos, col̄gucuaadij̄g xtid̄x xlam̄tu lo gued̄xliuj̄re loj guira'ti xtzuunni. Na'c gunsact̄u dzuun che cahuiitisreni si'c ruj̄n renani ruspaa laj̄z bej̄ntis. Con yäl̄nadolaj̄z col̄yej̄n dzuun sa'csi sanälaj̄ztu Dios. ²³ Guira'ti nani guntu, col̄yej̄nni guideb lastootu si'c xtzuun Dios, et si'c xtzuundi rebej̄ntis. ²⁴ Anaj̄ntu lo Dad Jesucrist sica'tu yäl̄nasa'c ni najc yäl̄nabaj̄n par tejp̄as, sa'csi loj Dad Jesucrist ruj̄ntu dzuun. ²⁵ Niluxh nani ruj̄n recosguij̄dx, lagaj̄c xcuent recosguij̄dxga gudeed Dios loj̄ni, sa'csi tebloj̄ ruj̄n Dios guiraa rebenguij̄dx.

4 Renani najc lam̄, col̄deed loj rexm̄ostu nani riäj̄l xca'reni sa'csi anantu näj̄za la'tu raj̄ptu xlam̄tu xhaguibaa.

² Col̄chanuu col̄nab lo Dios, col̄susin̄ che rniabtu lo Dios. Col̄gudeed xquix̄tios lo Dios. ³ Col̄nabza lo Dios con nuure te gac̄näj̄ Dios narä gusule'ä xtid̄x Jesucrist, te gusule'ä redid̄x-xhiga'tz xten Crist. Xcuent ni'cza yu'ä nēn latzguiib. ⁴ Col̄nab lo Dios te guyasi gusule'ä rediid̄xga si'cni riäj̄l guiniä.

⁵ Col̄guibansin̄ loj rebej̄n nani di gumbee xtid̄x Jesucrist, col̄gusule' diid̄x cheni riäj̄l guiniitu lojreni. ⁶ Rextid̄xtu nanab gac̄ni si'c rchaglaj̄z Dios, saruduxhza gac xtiid̄xtu te gacbeetu xho riäj̄l gudzu'tu diid̄x loj tej̄gareni.

Lult xtix̄tios

⁷ Tíquico, bej̄tznu ni sanälaj̄znu, ni runsa'c dzuun, ni najc xmos Dad Jesucrist, laani gusule'ni diid̄x lojtu xcuent guiraa rextzunä. ⁸ Ruxhałäni lojtu te gacbeepactu xho yu'ä, te guspaani laj̄ztu. ⁹ Laani jiäd̄nāzani Onésimo nani najc te betznu ni sanälaj̄znu. Laani najc tej̄ resa'tu. Laareni gusule'zareni guira'ti nani cadeednu ree.

¹⁰ Aristarco, nani yunäj̄ narä nēn latzguiib, ruxhał̄ni xtix̄tios lojtu näj̄za Marcw, betz prim̄ xten Bernabé (abacuaä lojtu xcuentni, xho guntu, palga jiäd̄huiini la'tu, sacru col̄huiini). ¹¹ Näj̄za Jesús nani laaza Justo, ruxhał̄ xtix̄tios lojtu. Laatisreni najc rexp̄ej̄n Israel nani cayac̄näj̄ loj dzuun xten xcäl̄rnibee Dios. Laareni ruspaa lazä. ¹² Epafras, ni najc te sa'tu, ruxhał̄ xtix̄tios lojtu, luxh rniabduxhni xcuenttu lo Dios te sudzu'tz̄tu guntu guiragaj̄c ni r̄laj̄ Dios guntu. ¹³ Narä rniliä xho rdzuun Epafras xcuent la'tu, näj̄za xcuent rebej̄n ni yu' gued̄x Laodicea, näj̄za gued̄x Hierápolis. ¹⁴ Lucas, doctoor ni sanälaj̄znu, näj̄za Demas ruxhał̄zareni xtix̄tios lojtu.

¹⁵ Col̄deed xtix̄tios loj rebej̄tznu nani yu' gued̄x Laodicea, näj̄za loj Ninfas, näj̄za lo rebej̄n nani re' rolij̄zni. ¹⁶ Cheni aguluj̄x bil̄tu guij̄tzre, col̄guxhał̄ni te jiel̄ni nēn guidoo xten gued̄x Laodicea, dxej̄cti col̄yel̄za guij̄tz nani baxhał̄ä lo rebej̄n gued̄x Laodicea. ¹⁷ Col̄ye'tz loj Arquipo: "Bahuisa'c xtzuun Dad Jesucrist nani cua'lu loj̄ni. Bensa'c dzuunga."

¹⁸ Lagaj̄c narä Pabl rucuaä xtix̄tiosre con lagaj̄c naä, con lagaj̄c xleträ. Col̄gusnaj-laj̄ztu narä yu'ä latzguiib. Gac̄näj̄ Dios la'tu. Sugac̄ni si'c.

1 Tesalonicenses

Bacuaa Pabl con reexamigwni lo guidoo guedx Tesalónica

1 Narä, Pabl, näjza Silvan, näjza Timoteu cacuaanu guijtze lojtu, resa'nu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz beṅ Tesalónica xtidx Dios

2 Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. **3** Ruzä'tnu lo Dios xtradnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtü sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. **4** Bejtznu, racbeenu sanälajz Dios la'tu, laani aguleni la'tu. **5** Sa'csi che basule'nu xtidx Dios lojtu, et ganax diidxtis gujcn, niluxh xcälrnibee Sprit Dxan xten Dios neṅ lastootu bejn gucbeepactu diidx ni najc didxlii. Nanchesactü xho gujcnu che guyu'nu lojtu. Si'c baluiinu la'tu te guibaṅsa'ctu.

6 Sigajcni nabaṅnäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxni lojtu, mase gudejdtu trabajw. **7** Si'c gujcn te baluiitu loj guiraa reni rililajz nez Macedonia näjza nez Acaya xho nungäjł gac. **8** Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. **9** Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guliipac. **10** Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcälrdxe'ch Dios ni churu siäd.

Xhi bejn Pabl neṅ guedx Tesalónica

2 Naj lagajc la'tu najntu, bejtznu, et xlia'di bio'pnu lojtu. **2** Et najntu xho gudéreni loonu, basacsireni nuurnu guedx Filipos. Niluxh mase gudejdtu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdtu trabajwduxh. **3** Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee. **4** Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. **5** Anajntu xho basule'nu xtidx

Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz nienu gan xhi nica'nu. Dios nanchee xcuent ni rienu. **6** Dizanu ni-diil guiliä'p bejn xpala'nnu, niclaza la'tu, niclaza chu stee bejn, mase nungäjł nienu niacbeetu rajpnu yälrnibee sa'csi baxhał Jesucrist nuurnu. **7** Niluxh guc nadolajznu che guyu'nu lojtu, cuanäjnu la'tu si'c rcanäj te naṅ rexpäzni. **8** Sa'csi huinälazduxhnu la'tu, bienu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. **9** Bejtznu, la'tu rnalajztu xho bienu dzuun te bienu gan xcäl'nabaannu. Bienu dzuun dxej-yääl, te di niednäjtü nuurnu lał ni basule'nu xtidx Dios lojtu.

10 Lagajc la'tu nancheetu, sigajc nanchee Dios, laaca bienu che guyu'nu lojtu: gujcnu bejn ni randuxh Dios, gujcnu beṅdxojn, gujcnu beṅsa'c. **11** Anajntu xho baliidxnu la'tu, xho bascuedxinu lajztu si'c runnäj te dad rexingaanni. **12** Guiraa dee bienu, te guibaṅsa'ctu si'c nungäjł gun reni najc xi'n Dios, lagajc Dios ni gurejdx la'tu te chunäjntüni lo xcälrnibeeni näjza lo xcälrdimbicha'ni.

13 Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi beṅ guedxliuj. Niluxh gulii xtidx Diosni, sa'csi rusiani lastoo renani rililajz. **14** Bejtznu, dxejcti bejntu lagajc si'c rujn rebejn xquidoo Dios neṅ reguedx Judea reni najc xpen Jesucrist; luxh gusajctu lagajc ni gusajczeni, basacsí rebeṅ lajdxtu la'tu. Sigajcza birinajł rexpen Israelreni. **15** Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzareni nuurnu. Direni chanälajz Dios, dizareni gusaan chanajł rebejn Jesucrist. **16** Che rrajznu gulijdxnu reni digac rexpen Israel, te näjza laareni laareni lo dojl, direni gusaan, si'ctis cagutajłreni xtojłreni. Niluxh naj abiädapac yälrdxe'ch xten Dios yejcreni.

Rrajz Pabl nihuisacni ro'c

17 Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. **18** Rrajznu nio'pnu, narä, Pabl xhidal huält rlazä niälä, niluxh beṅdxab di nusaan. **19** ¿Xhini'c najc xcälrbäaznu, xcälrbalajznu, xcälracnaronu? Lagajc la'tu gactuni che suunu nez loj Jesucrist che jiädsc Dad Jesucrist. **20** La'tu najc ni ruspaa lajznu ni rliä'pza xpala'nnu nez lo Dios.

3 Dxejc, che dirunu nutijp lajznu, biennu xhigab bianxtebä guedx Atenas. ² Dxejc baxhaļä Timoteu, bejtznu nez loj Jesucrist, te biädhuiini la'tu, sa'csi laani najcni te xpeņ Dios ni runnäj nuurnu dzuun, rniini xtidx Jesucrist, te guscuecdxini lajztu, guzudzu'tzni xcälrlililajztu. ³ Te nicla tejtu di guidxejb che jiääd reyälhuin sa'csi la'tu anajntu agule Dios nuurnu ni'c sidejdnu trabajw. ⁴ Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵ Ni'cni diruna nutiplazä, baxhaļä chu jiädnä diidx xho najc xcälrlililajztu, sa'csi cadxebä andi abasguee beņdxab la'tu, luxh xlia'si biennu dzuun guyu'nu lojtu. ⁶ Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. ⁷ Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸ Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹ Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoonu xcuent la'tu nez lo Dios. ¹⁰ Dxej-yääl rniabnu lo Dios gusaanni jiphuiinu la'tu te gusa'nu guiraa redidx ni cayäädx gacbeetu xcuent xcälrlililajztu.

¹¹ Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiphuiinu la'tu. ¹² Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu näjza loj guiraa rebejn, si'cni rinälajznu la'tu, ¹³ te gunni sudzu'tz lastootu, na'c ga'ptu dojl nez lo Xtadnu Dios, che jiääd Jesucrist näjza guiraa rexpejn ni xhaguibaali.

Guibajnnu si'c rchaglajz Dios

4 Naj, rebejtznu, rniabduxhnu lojtu, rulijdxnu la'tu con laj Dad Jesucrist, guibajntu si'cni baluiinu la'tu nungäjļ guibajntu te guspaatu lajz Dios, te si'c chanuutis guibaņsa'ctu nez lo Dios.

² La'tu, anajntu rediidx ni baluiinu lojtu con xcälrnibee Dad Jesucrist. ³ Lagajc Dios rlanjz nayatis guibaņsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni. ⁴ Tejgatu gantu xho guibaņnäjtu chäältu nayatis näjza xpala'nni. ⁵ Xhet si'c ni rujndi regunadxab näjza reniguii, nicla si'c ni rujn rebejn ni di gumbec Dios. ⁶ Rut chutejditu gusguee bejtzni lo redzunguijdxre, sa'csi Dios susacsí guiraa rebejn ni rujnza redojļre, ni'cni abiniinu lojtu, agunixgaanu diidxre lojtu. ⁷ Sa'csi Dios gurejdxni nuurnu te guibajnnu lo yälrabaņnaya xtenni, xhet lo yälrabaņdxuudxdi. ⁸ Ni'cni bejn ni di gucuađiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

⁹ Ditu guiquiin gucuaäru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. ¹⁰ Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtznu, chä'pru xcälrinälajztu. ¹¹ Colgutijp lajztu, dxitis colguibajņ, coljiu xtzuuncatu, lagajc naatu colyejn dzu-

un si'cni agunibeenu guntu. ¹² Te fii rebejn ni di chalilajz laaca nabaņsa'ctu, nägajcza te xhet jiäädxdi xhi rquiintu.

Xho gac che jiädsac Jesucrist lo guedxliuj

¹³ Bejtznu, rlanjznu gacbeetu xcuent rebeņgut te di gac-huin lajztu si'c rujn rebejn ni di chalilajz xtidx Dios. ¹⁴ Si'c ni rililajznu gujt Jesucrist, dxejc gubaņsacni, sigajcza rililajznu suspansac Dios guiraa reni nagayejs neņ baa, renani huililajz xtidx Jesucrist. Luxh che guibi' Jesucrist, siädnäni reni.

¹⁵ Xcuent xcälrnibee Jesucrist rniä lojtu, nuurnu ni nabajnnu che jiädsac Jesucrist, dinu nid loj reni nagayejs neņ baa. ¹⁶ Sa'csi lagajc Dad Jesucrist siäjt lo guedxliujre, sixedxa'ni, siejzxa xse' guixhajg ni rnibee, sixedxa'za trompet xten Dios. Dxejc sibaņxgaa reni nagayejs neņ baa, reni huililajz xtidx Crist. ¹⁷ Dxejc nuure ni nabaņsijcnu sidxaagnureni neņ rebäj te lo bej chachagloonu Dad. Si'c chonnu cholaznäjnuni par tejpas. ¹⁸ Ni'cni rniä lojtu, colcuedxilajz sa'tu con rediidxre.

5 Niluxh xcuent redxejga, reijzga, xhet riquiinditu gucuaäni lojtu, ² sa'csi la'tu anansa'ctu sidzujņ dxej ni jiääd Jesucrist cheni rut cayunlojdini, sigajc che riääd te gubaan yääl. ³ Che canii bejn: "laaca dxunnu, dxunsa'cnu", chela gacbeereni acadiejdreni trabajw si'c che rdzujņ yälñayan te gunaa che rajl xi'nni, luxh digacdi guxunreni lojni. ⁴ Niluxh bejtznu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. ⁵ Sa'csi guiraatu najctu beņsa'c nabajntu lo bianij, lo rdxee, dinu gac benguijdx, dinu guibajņ lo yääl, lo yälrcäjäy. ⁶ Ni'cni di nungäjļ guidiesnu si'c rejs stecuaa bejn, ni'cni nungäjļ sunasiņnu na'cza jiennu redojļ ni rlanjz tiejxhnu. ⁷ Reni rejs, rejsreni yääl, reni rsiojz, rsiojzreni yääl. ⁸ Niluxh nuure nabajnnu lo rdxee, ni'cni nanab na'c jiennu si'c, riäjļ xca'nu yälrlililajz näjza yälrinälajz si'c rca' soldaad gamangw guib ni rajcwini, ni rusäuu lastooni. Riäjļza guiläzdu'tznu sa'csi yälruslaa lo dojl najc si'c xhumbrel-guiib ni ru' yejc soldaad ni rusäuu yejci. ⁹ Sa'csi di Dios nibe nuurnu te chonnu gabijļ, alga guleni nuurnu te xca'nu yälñabajņ ni rudeed xi'nni, Jesucrist. ¹⁰ Sa'csi gujt Jesucrist lacuaa nuurnu, te guibaņnäjnuni masä nabajnnu lo guedxliujre o nagayejsnu neņ baa che guibi'ni. ¹¹ Ni'cni, colguspaa lajz sa'tu, tejtu sigajcza steetu, sigajcni cayujntu naj.

Rulijdx Pabl resa'ni

¹² Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. ¹³ Riäjļza chanälazduxhturen xcuent dzuun ni rujnreni. Colcuedxi con resa'tu.

¹⁴ Rulijdxnu la'tu, bejtznu, colgulijdx reni najc beņlat-siaj; colsudzu'tz lajz reni guxii rbalajz lo xnez Dios; colgacnäj reni di gumbesa'c xtidx Dios, colcuedxi lajz guiraasi bejn.

¹⁵ Colhunii di chu tejtü gunza dolguijdx lo rebejn ni rujn dolguijdx. Laaca guntu ganax dzunsa'c lo sa'tu, sigajcza lo chutis bejn.

¹⁶ Colguibalajztis guideb nabajntu. ¹⁷ Na'c cuääz guiniitu lo Dios. ¹⁸ Mase xhitis rsiajctu, coldeed xquixtios lo Dios, sa'csi si'c rlajz Dios gun reni rililajz Jesucrist.

¹⁹ Di cuälaztu xtidx Sprit Dxa xten Dios ni rniini nen lastootu. ²⁰ Na'c cuälaztu xtidx reni rnii xtidx Dios xcuent nani churu gac. ²¹ Colquiil guiraa rediidx, coljiannäjtis rediidx ni najc didxsa'c. ²² Colbicaj lo guiralii dolguijdx.

²³ Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjł guntu te cuääztu dxej ni guibisac Dad Jesucrist. ²⁴ Dad ni gurejdx la'tu rujza guiraa ni rniini, ni'c sujnzani guiraa redzuunre.

Ruzadiidxnireni

²⁵ Bejtznu, colnab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, gołtu guijtze loj guiraa rebejtznu.

²⁸ Gacnäj Dad Jesucrist la'tu. Sugacni si'c.

2 Tesalonicenses

Rucuaanu guijtze lojtu, rexpen Jesucrist ni rbäjz guedx Tesalónica

1 Narä Pabl, näjza Silvan näjza Timoteu, cacuaanu guijtze lojtu, rebejtzn ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. ² Gacnäj Dios Xtadnu näj Dad Jesucrist la'tu, guscuedxizareni lajztu.

Gun Dios yälguxhtis loj rebejdoj che guibi' Jesucrist lo guedxliuj

³ Bejtzn, rudeednu xquixtios lo Dios xcuenttu, si'c riäjł jienunni, sa'csi xcälřililajztu siädroobru, näjza yälřinälajz ni rajp tejgatu näjza sa'tu siädroobruni. ⁴ Ni'cni rliä'pnu xpala'ntu neņ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejtdu trabajw, rusacsí bejntu. ⁵ Dee ruluiipac xcälřguxhtis Dios najc laaca, ni'c nrii Dios riäjł jiu'tu lo xcälřnibeeni sa'csi cadejtdu trabajw xcuent yälřnibeega.

⁶ Sa'csi rujn Dios xhigab riäjłza quiix reni bateedtu trabajw xtojłreni, ni'c suteedzani reni'c trabajw. ⁷ Niluxh la'tu ni cadejtdu trabajw, sujn Dios gusilaznäjtu nuure che guluiiloj Jesucrist, siriini xhaguibaa siäd-näjni rexangłni ni sajc, ni rnibeduxh. ⁸ Lo te balduxh siäädni, dxejc guisloj susacsíduxhni reni di gan Dios, dizareni gusoob xtidx Dad Jesucrist nani rudzucaj dojl. ⁹ Guiraareni sidejdreni trabajw, par tejpas agunijtreni, zijt chureni lo Dios, lo yälřrdimbicha' xten xcälřnibeeni. ¹⁰ Che jiääd Dad guiriini xhaguibaa, dxejga siliä'p rexpejñni xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riäjł guibajñ reni guleni. Rniabzanu guniidx Dios lojtu guntu guiraa redzunsac ni rchaglajz Dios guntu, gacnäjzani la'tu con xcälřnibeeni te guntu redzuun ni rujntu sa'csi rililajztu. ¹² Te chä'p xpala'n laj Dad Jesucrist si'cni nabajntu, te laani guiliä'pzeni xpala'ntu, xcuent yälřinälajz xten Dios näjza Dad Jesucrist.

Bejdojduxh

2 Naj, rniabduxhnu lojtu bejtzn, xcuent dxej ni jiääd Jesucrist, dxej ni guidojpzanu lojni, ² na'c chugajtu yarsia'. Na'cza gusaantu guchejbreni la'tu con diidx ni ruluii te bejñ ni najc profe't, nicla con diidx ni nrii stee bejñ lojtu, niclaza con diidx ni naareni lojtu caj

loj te guijtze ni naareni baxhałnu lojtu, cadre caj "dxej ni guibi' Jesucrist abidzujñ". ³ Na'c gusaantu gusguee bejñ la'tu xcuent rediidxre. Che gajd dxejga guidzujñ, su' bejñ ni sibälaz xtidx Dios, dxejc suluiiloj beñlatsiaduxh, xi'n nani sinitloj par tejpas. ⁴ Bejñre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni rajñ bejñ, te cueni neņ xquidoo Dios, guluiilojni si'c lagajc Gueb Dios.

⁵ ŁLa di lajztu guisaj cheni guyusicä lojtu, rniä rediidxre lojtu, ä? ⁶ Naj la'tu anajntu xhini'c ruscuääzni, te na'c guiricajni ansde guisa' redxej xtenni. ⁷ Te yälřhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscuääzni galäiini. ⁸ Dxejc suluiiloj beñlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. ⁹ Beñlatsiaduxhre najc si'cpac najc beñdxab. Che guidzujñni, guidzujñni si'c te bejñ nani rnibee, sujñni seen, sujñzani milagrw ni rusguee. ¹⁰ Con xcälřlatsiaj bejñre susgueeni guiraa renani alagunijt lo Dios sa'csi direni nicäjb ninälajzreni didxlii ni nusłaareni neņ dojl. ¹¹ Ni'cni susaan Dios jiääd te yälřrusgueduxh te chalilajzreni didx-xhii. ¹² Te gabijł jii guiraa renani di nicäjb nililajz didxlii, alga bidxaglajzreni yälřlatsiaj.

Reni gule Dios guirii neņ dojl

¹³ Niluxh nuurnu riäjł gudeedtisnu xquixhtios lo Dios por la'tu, bejtzn, ni sanälajz Dad Jesucrist. Rudeednu xquixhtios sa'csi galooli gule Dios la'tu te gusłaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu. ¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälřrdimbicha' Jesucrist.

¹⁵ Naj bejtzn, colchanuu, colsudzu'tz, na'cza jiälłajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtze ni baxhałnu lojtu. ¹⁶ Lagajc Dad Jesucrist, näj Dios Xtadnu, ni sanälajz nuurnu, ni ruscäjñ lajznu par tejpas, ni baniidx xcälřrbääznu racnäjñni nuunu, ¹⁷ guspaani lajztu, gusudzu'tzni la'tu lo guiraa redidxsac ni guiniitu näjza redzuunsac ni guntu.

Colnab lo Dios xcuent nuurnu

3 Bejtzn, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejñ diidxga chä'p xpala'n diidxga, sigajcni gujñni con la'tu. ² Colnabza lo Dios xcanäjñni nuurnu te di tednu ladzñaa rebeñlatsiaj, rebeñguijdx, sa'csi xhet guiraadi bejñ rajp

yälirililajz. ³ Dios ruseob xtiidxni, susudzu'tzni la'tu, sac-näjäzani la'tu te di sactu dolguijdx. ⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxni gacbeerutu xcälisanälajz Dios, canabäza colcuedcdxi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtad Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajñ si'cni baluiinu riäj] guibajñtu. ⁷ La'tu anajntu xho riäj] guibajñtu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia' xcu'n chu tejtü; guiraani bidiixnu, biennu dzuun dxej-yääl, te di nutaalnu xtzuum chu tejtü. ⁹ Masä nungäj] niniabnu niacnäjtü nuurnu, dinu nini-abni; alga biennu dzuun te baluiinu xho chanuutu.

¹⁰ Cheni guyu'nu lojtu, gunibeenu scree guntu: Chutis ni di rlajz gun dzuun di riäj] xca'ni xhi gauni. ¹¹ Aguniireni loonu baltitu rcanzajtis, direni gun dzuun, alga ri-huiireni xhi cayujñ rebejñ. ¹² Rulijdxnu rebejñre, rnibeenureni con laj Xtad Jesucristnu: colcuedcdxi, colyeyñ dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejtü di gucuaiajg xtiidxnu ni caj lo guiitzre, colhuii chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbcdxi, guscuecdxi lajztu guixee, masä xhitis sajctü. Jiannäj Dad Jesucrist guiraatu.

¹⁷ Narä, Pabl cacuaä xtixtiosre con ñaäpac si'c runä lo guiraa rexquitzä, scree rucuaä. ¹⁸ Gacnäjä Xtad Jesucrist guiragajctü. Sugacni si'c.

1 Timoteo

Pabl rucuaa te guijtz lo Timoteu

1 Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani choläaznu. ² Timoteu, luj najclu si'cpac xinganä lo yärlirilajz. Xtdnu Dios näjza Xtd Jesucristnu gacnäjlu, gulaslajzreni luj, guscuecdxireni lastoolu.

Pabl rulijdx xcuent reni ruluii diidx-xhii

³ Che sia'ä reguedx Macedonia, gunibeä jia'nlu guedx Éfeso te gulijdxlu gatii bejn te na'c guluiireni garenca diidx, ⁴ te na'c jiutejreni rexcent rebeñtiemp, te na'cza jjuduxhrene chu gujc rexpengoldooreni, sa'csi di redidixre gacnäj guiroobru lastooreni si'c rustioob yärlirilajz lastoonu. Naj rnibeä si'c chanuu gulijdxlu rebejn.

⁵ Rulijdxnu bejn te ga'preni yärlinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶ Yu'reni abarö'n redidixre, riejtyis ro'reni saniduxhrene diidx ni xhet sajcdi. ⁷ Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj redidix ni ruluiireni, räjpreni, 'didxliipac dee'.

⁸ Anajnnu leii xten Dios najc sacduxhni, palga jiennu si'cni rniipacni. ⁹ Najnnu di leii gac par beñsa'c, najcni par reni najc beñlatsiaj ni di jiu leii xten Dios, näjza reni di gusoob diidx; par rebeñ guijdx, näjza rebeñdojl; par reni di jiu Dios, näjza reni rusguee; par reni rugu't xtdni, xnanni, näjza guiraa reni rugu't bejn; ¹⁰ par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹ nalajznu sa' redzunsa'c ni rulijdx xtdx Dios-le', diidx ni ruslaa lo dojl. Narä biannäá diidxre.

Rudeedni xquixtios lo Dios sa'csi rulaslajznini

¹² Rdedä xquixtios lo Dad Jesucrist ni runiidx yärlnibee narä sa'csi najnni nasobdidxä, ni'cni guleni narä gunä xtzuunni. ¹³ Luxh galoo guniyaáni, birinalä xpejn, basacsä'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴ Niluxh lacti guroob gujc yälracnäj xte Xtdnu, guideb yärlirilajz, näj yälsanälajz ni rajp Jesucrist.

¹⁵ Diidxre najc guliduxh, nanab chalilajzpacuni: Jesucrist biääd lo guedxliujre te guslaani rebeñ dojl; lo rebeñ dojl narä nacäru beñdojlduxh. ¹⁶ Ni'cni balaslajz Dios narä, mase nacä beñdojlduxh lo guiraareni, te

ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yälnabajn par tejpas. ¹⁷ Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajgnni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yälrulijdx ni runidxä lojlu te gucuaa'clu si'c te soldaad ni abisieed, sigajc ni gunii reprofet xcuentlu galoo. ¹⁹ Di gunijtlu yärlirilajz, bejnza xhigabsa'c, sa'csi yu'reni abarö'n xtdx Dios, ni'c abanijtreni yärlirilajz. ²⁰ Si'c gusajc Himeneo näj Alejandro, luxh abatedä'reni ladzñaa beñdxab te guisieedreni na'c guiniya'reni Dios.

Ruluiini xho guiniabreni lo Dios

2 Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn.

² Guiniabzalu xcuent re'reii näj guiraa reni rnibee lo guedxliujre, te gac guibañdxinu, te gac chanuunu xnez Dios, te saru guibajnnu. ³ Sa' yälrniabga najc laaca, luxh si'c rdxaglajz Dios ni ruslaa nurnu lo dojl guiniabnu lojni. ⁴ Dios rlajz laa guiraa bejn lo dojl, rlajzani gacbeepacreni xtdxliini. ⁵ Yu' tejtis Dios, näjza tejtisza nani rusiäjl diidx lo Dios näjza loj rebeñ guedxliuj. Laani najc Jesucrist ni gujczä niguii. ⁶ Jesucrist gujt lo cruz te gudijxni redojl xten guiraanu ni tre' lo guedxliuj. Dee gujc che gojl dxej ni gule Dios. ⁷ Dios gule narä te gacä apost te gusule'ä xtiidxni, yärlirilajz näjza didxlii lo reni di gac xpejn Israel. Si'c ni rlajz Jesucrist rniä didxlii, dina guiniä diidx ni rusguee.

⁸ Ni'cni rlazä guiraatis lajt guiniab rebejn lo Dios, saru guiliäs ñaareni, gusaanreni yälruxe'ch, na'c gunreni biey. ⁹ Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'cni regunaa ni entis rsiucheduxh con oor o perl o ladsajc, rajc guichniil yejcn te guidxeloj bejnreni. ¹⁰ Masru ruchaag gunreni si'cni rchalglajz Dios, si'c riäjli gun guiraa regunaa ni yu' lo Dios. ¹¹ Riäjli dxitis gucuaadiajg regunaa xtdx Dios ni rusule' reniguii. ¹² Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuaadiajg diidx nani cagusule'ni. ¹³ Sa'csi ganid benchee Dios Adán, dxejctiru bencheeni Eva. ¹⁴ Luxh et Adandi basguee beñdxab, beñdxab basguee gunaaga, dxej biajbni neñ dojl. ¹⁵ Niluxh siliaa regunaa, palga jiureni xtzuunreni si'c nan, palga chanuu chalilajzreni xtdx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

Xho riäjł gac reni rnibee

3 Dee najc didx gulii: palga rlajz te niguii ga'p dzu-un xten Dios, gusule'ni xtidx Dios, guinibeeni re-bejñ, te dzunsa'c najc ni rlajzni gunni. ² Ni'cni, ni rlajz gac nani rnibee, riäjł guibaŋsa'cni te na'c chu xhicuent guiniyaj rebejñni. Riäjł gacni chääł tejtis gunaa, riäjł susiñni, gacni te beŋsa'c, cuedxini, te guibaŋsa'cni. Riäjłza di gudxojñni rolizni guidzujñ bejñ, năgajc riäjł gacni te bejñ ni nansa'c te guluiini. ³ Na'c gacni te beŋgu, nicla te ni rdxagdijł bejñ, na'cza gacni te nani rsia' lajzni ga'pni xhidajł meel, riäjł cuedxini lajzni, na'c chanälajzni meel. ⁴ Riäjł guinibesa'cni rolizni, saru gunni te gusoob rexi'nni xtiidxni. ⁵ Sa'csi palga di te bejñ gan xho guinibeeni lagajc rolizni, aticaxh gac ga'pni guidoo xten Dios. ⁶ Di riäjł guinibee te beŋcoob nani entis huililajz, te di guschä'pni xpala'nni sas jiajbni lo lagajc xcälñaj Dios ni biajb beŋdxab. ⁷ Luxh riäjłza guinii reni di chalilajz xtidx Dios laaca najcni, te na'c jianxtujyñi, te na'cza jiajbni ladzŋaa beŋdxab.

Xho riäjł gac reni rcanäj neŋ guidoo

⁸ Si'cza rediaconos riäjł gacreni bejñ ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹ Riäjł gapdzu'tzni rediidx nagajñ xten yälirililajz, ni'c nanab gac naya lastooreni. ¹⁰ Riäjł fixgaatu xho nabajñreni. Palga nabaŋsa'creni, rutza gacdi gucuaquijdireni, sajç gacreni diacono. ¹¹ Regunaa ni rlajz gac diaconas riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹² Riäjł gac rediacono chääł tejtis gunaa. Riäjł guinibesa'cni rexi'nni năj guiraa reni yu' rolizni. ¹³ Sa'csi rediaconos ni runsa'c xtzuunni, sanälajz bejñreni, dizareni guidxeb j rsiudzu'tz lastooreni lo xcälirililajz xtidx Jesucrist.

Gurobduxh najc yälxhiga'tz xten Jesucrist

¹⁴ Caculaä diidxre lojlu, niluxh rlazä jädhuigaä la'tu. ¹⁵ Luxh palga gaclaä, anajñlu xho riäjł guibajñ bejñ roliz Dios, nalajznu xquidoo Gueb Dios ni nabajñ par tejpas. Guidoore rniadsdu'tz năjza ruluiiru didxlii xten Dios. ¹⁶ Rdxeloyaduxh guiralii bejñ yälxhiga'tz xten xcälñajñ Dios:
Dios biääd lo guedxliuj si'c te beŋguedxliuj,
Sprit Dxañ xten Dios gunii beŋdxanni;
bahuii rexangl Dios lojni;
basule'reni xtiidxni lo rebejñ ni di gac xpejñ Israel;
guira lajt huililajz bejñ xtiidxni;
huäjsni lo xcälrdimbicha' Dios xhaguibaa.

Reni rbicaj lo xnezyuj Dios

4 Aguniipac Sprit Dxañ siääd redxey che chu reni guro'n yälirililajz, sucuadijgñeni xtidx rebejñ ni rusguee năj xtidx rebeŋdxab, ² nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxujy te guiblaa: xhetru racbeedini.

³ Suluii rebejñre na'c guchŋaa bejñ, suluiizareni na'c gau bejñ guiralaj, niluxh Dios bejñpac redee te xca' re-bejñ ni rililajz, ni racbeeza didxlii, te gudeedreni xquixtios lo Dios. ⁴ Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios. ⁵ Sa'csi xtidx Dios năj yälrbedx-rniab lo Dios runsa'c guira'ti.

Te ni runsa'c xtzuun Jesucrist

⁶ Palga susnajlu lajz rebejznu rediidxre, sajclu te mossac xten Jesucrist, luxh si'c sisieedruzalu diidx xten yälirililajz, năj yälrluisa'c ni sanuulu. ⁷ Na'c jiulu ni rniiregularoyei ni xheti xtzuunni. Bisieed sudzu'tz lastoolo lo xtidx Dios. ⁸ Guxii sajç guinibduxh bejñ te gusutijpni tiejxhni. Niluxh sacduxhru cucheeni xtidx Dios neŋ lastooni, sa'csi racnäjni bejñ lo yälñabajñre năjza lo yälñabajñ ni najc par tejpas. ⁹ Dee najc didxlii, riäjł chalilajz guiraatuni. ¹⁰ Ni'c riennu dzuun, rdeednu trabajw, sa'csi cabäjznu Gueb Dios ni nabajñ, ni rusläa bejñ lo dojl, ganiddoo renani rililajz xtiidxni.

¹¹ Sajplu guinibeelu soob rediidxre, năjza guluiilu rediidxre. ¹² Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, năjza xho rajplu xhigabsa'c. ¹³ Lał ni guidzua ro'c, bil xtidx Dios lo rebejñ, balijdxreni, baluiiza xtidx Dios lojreni. ¹⁴ Di gusaanlu reyälñajñ ni baniidx Dios lojlu cheni basuj rebengool ñaareni yejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios.

¹⁶ Gopdzu'tz lagajc luj năjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucudiajg xtiidxlu.

Xho guibaŋñajnu reni rililajz

5 Na'c quidxa'lu loj te beŋgool; guninäjni si'c xtdadlu, balijdx rebi'n si'c bejtzlu, ² balijdx renanbengool si'c xnanlu, balijdx redxap steeb si'c rebisiajñlu con rexhigabsa'c.

³ Gucnäj rebuiud ni guliipac rquiin chu gacnäjreni te chu xhi gaureni. ⁴ Niluxh palga yu' chu biuud yu' xi'nni o xajñni, suguisiedxgaareni guibaŋ nayareni lo xnez Dios, te quiixreni di'n ni nasääbreni lo xtdadreni, năj xnanreni ni baslaareni, sa'csi ni'c najc laaca, rdxaglaizza Diosni. ⁵ Gunaa ni najcpac biuud, abia'n xtebni, ni'c rbäjztisni lo Dios, dxey-yääl rbejdx-rniabni lo Dios.

⁶ Niluxh biuud ni nabajñ cadedgustisni najc si'c te ni agujt neŋ dojl. ⁷ Basule' rediidxre lojreni te rut gucuaquijdireni. ⁸ Palga yu' chutej ni di gacnäj resa'ni, lagajc reni rbäjz rolizni, ni'c agulälaz xtidx Dios, beŋguidxru najcni lo rebejñ nani di chalilajz xtidx Dios.

⁹ Di gucuaalu laj rebuiud lo guijt te gacnäjñtuni palga gajdñi chu gayojñ ijz. Riäjłza gac biuudga te gunaa ni gubaŋñasa'c chääłni. ¹⁰ Riäjłza gumbee bejñni xcuent redzunsa'c ni rujñni; palga baslaani rexi'nni, palga badedlaani rolizni gues beŋ zijt, palga gudiibni ni' rexejñ

Dios te si'c guzeñ xcäl'nadolajzni, palga racnäjni reni rdejd trabajw, palgaza riuni rujnni guira'ti redzunsac'.

¹¹ Niluxh na'c gucuaalu laj biuud ni yu' guxiiru ijz sa'csi che guichagljazreni te niguii, siällajzreni diidx ni bia'nreni lo Jesucrist, te rlanjzi guchnasacreni. ¹² Dxejc siu'reni neñ dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuum Dios. ¹³ Dxejc sia' lojreni xhet gundireni, rijreni rolizj bejn ricuereni. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni. ¹⁴ Ni'cni rlazä rebiuud ni najc dxa'p ru guchnaareni stehuält, chu xi'nreni, fisa'creni rolizjreni te na'c guiniyajreni rebejn ni rdxe'ch lojnu. ¹⁵ Sa'csi yu' gatii biuud ni alagubicaaj lo xnez Dios sanajlreni bendxab.

¹⁶ Pal yu' tej resa'nu ni najc sa'ni te biuud, riäj] gacnäjnini, na'c gusaanni gutajlni xtzuum guidoo, te si'c guidoo sajz gacnäj rebiuud ni rquiinpac chu gacnäjreni.

¹⁷ Rebeñgool ni rnibesa'c guidoo, riäj] chanälajzru-tureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxsa'creni la'tu con xtidx Dios. ¹⁸ Sa'csi lo xtidx Dios caj scree: "Na'c gusäl]lu guijx ro' gon che rusiani triuu"; si'cza caj stee diidx: "Riäj] gax bejn ni rujn dzuun."

¹⁹ Na'c cucuadiajglu xtidx tej ni rucuaquij te beñgool palga ruti tio'p, choñ testiigw. ²⁰ Niluxh reni sanuu ru-jntis dojl, riäj] gulijdxlureni nez loj rebeñ guidoo, te näjza laareni guidxebreni. ²¹ Nez loj Dios, nez loj Dad Jesucrist, nez lojza reangl ni gule Dios, rulidxdxhäu chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn. ²² Na'c gusiojb lajzlu gusujlu ñaalu yejc te bejn, te gacni beñ guidoo palga gajdni guisieed guibañsa'cni lo xnez Dios sa'csi lagajc yejclu jiajb rextojlni. Gubicaaj lo guiraa do]guijdx.

²³ Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexäl]racxhuulu.

²⁴ Yu' bejn ruzengajc rextojlni ni'c rajcni castiigw, niluxh yu' bejn ni di xtojlni guzengajc. ²⁵ Sigajcsa redzunsac' ni rujn bejn; yu'reni ruzengajc, niluxh mase dini guzengajc, digacdi jianxhiga'tzni, sidzujñ dxej suzeñni.

6 Reni najc mos riäj] cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. ² Palga yu' remos ni najc xlamni te nani rli-lajz, na'c cuälazreni rextiidxni sa'csi najcni bejtzni lo xcäl]rililajz Jesucrist. Riäj] gansa'crueni xtzuumni, sa'csi najcni sa'ni loj yäl]rililajz xten Dios, luxh sanälajzarenini. Rediidxre baluii, basule'.

Yäl'nabañsa'c näjza te lastoo ni rbedxi

³ Palga yu' chu ruluu garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluu xho guibañsa'c bejn, ⁴ bejnga rlanjz guiliä'p la-gajc xpala'nni, niluxh xhet najndini. Si'c te yäl]guijdx

yu'tis yejcn yäl]guiniab diidx, yäl]rdi]diidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵ Rujnzani rdi]näj bejn sa'ni. Guiraa redee gun bejn ni aguxhijñ xcäriejnñi, bejn ni diru ga'p didxlii. Rchaloreni sujñreni ganduxh xcuent rediidx ni ruluireni. Gubicaaj lo sa' be-jñre. ⁶ Niluxh yäl'nabañsa'c näjza te lastoo ni rebedxi, redee sa'cduxh. ⁷ Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸ Niluxh palga rajpnu xhi gaunu, xhi gajcwnu, con ni'c riäj] guibalaaznu. ⁹ Niluxh reni rlanjz ga'p xhidalduxh meel, riajbreni lo xhigab guijdx, rujnzareni xhidajl dzuun ni xhet sajcdi, ni rujn daan, ni rusiääz bejn lo yäl]ruxhiñ, lo yäl]rni]toj. ¹⁰ Sa'csi yäl]rinälajzni meel najc xlobaa guiraa redzunguijdx. Yu'za bejn ni rlazduxh ga'pni meel, rusaanreni xcäl]rililajz Dios, dxejc lagajc laareni rujn rdedduxhreni trabajw.

Dzun-huen xten yäl]rililajz

¹¹ Niluxh luj, bejn xten Dios, baxu'ñ lo guiraa dee, te chanuulu lo xcäl]xhigabsa'clu näjza yäl]nabañsa'clu; te chanajllu yäl]rililajz näjza yäl]sanälajz; te chanuulu lo yäl]rbedcxi lajz näjza yäl]nadolajz. ¹² Benduxh dzuun xcuent yäl]rililajz Jesucrist, gunazdu'tz yäl]nabajñ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni. ¹³ Naj rulidxälu nez loj Dios ni rudeed yäl]nabajñ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴ rnibeä guzob-sa'clu guiraa rediidx ni rniä lojlu, na'c guchaaluni, te na'c guiniyajreni luj ñaj niclaza cheni jiääd Xtd Jesucristnu. ¹⁵ Sidzujñ dxejga nani agunii Dios guidzujñni. Dios ni najc le' sujn scree sa'csi laatisni najc Dios, najcni reii xten rereii, rnibeezani reni rnibee. ¹⁶ Laatisni dini guet, nabajñni lo bianij cadro rut rajcdi rbig. Nicla te bejn gajd fii lojñi, niclaza gac fiireni lojñi. Xtebtis laani riäj] ga'p rebejn xpala'nni. Laani rajp yäl]rnibee par tejpas. Sugacni si'c.

¹⁷ Balijdx reni rajp xhidajl xhixtenu lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajñ, ni runiidx loonu guiralii xhixtenu ni rquiinnu te guibala-jznu. ¹⁸ Balijdxreni gunreni dzunsa'c, gundajñreni dzunsa'c, gacnäjreni reni xhet rajpdi, cuenäsa'creni sa'reni. ¹⁹ Si'c ga'preni yäl]nasa'c ni guzudzu'tzreni che jiääd Jesucrist, te guiniaztzu'tzreni yäl]nabajñ par tejpas.

Rulijdxni Timoteu

²⁰ Timoteu, cuanäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl]najñ'. ²¹ Sa'csi yu' reni sanuu yäl]najñre ni'c banijtreni lo Dios xcuent yäl]rililajz. Gacnäj Dios luj. Sugacni si'c.

2 Timoteo

Stee guijtze ni baxha! Pabl loj Timoteu

1 Narä Pabl, nacä apost xten Jesucrist. Dios gule narä, xcuent yäl'nabajn ni gudeed Dios loj reni yunäj Jesucrist, si'c ni bia'n diidx. ² Cacuaä guijtze lojlu, Timoteu, xi'nä lo yäl'rillilajz. Rinälazä luj. Rniabä lo Xtadnu Dios näj lo Dad Jesucrist gacnä juj, gulaslajzreni luj, guscuecdxireni lajzlu.

Rusule'ni xcuent Jesucrist

³ Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. ⁴ Rnaj lazä xho biinlu, naj rlazä fiä lojlu te guibalazä. ⁵ Rnaj lazäza yu'pac yäl'rillilajz lastoolu si'cni guyu'ni galoo lastoo xmaṁlu Loida dxejcru lastoo xnanlu Eunice si'cza yu' yäl'rillilajzga lastoolu naj.

⁶ Ni'cni rniä lojlu naj, si'cni rcanäj bejn rodäj te di juiini, si'cza cuanäduxh reyäl'najn ni baniidx Dios lojlu cheni basuä ṅää yejclu. ⁷ Sa'csi di Dios nuniidx te lastoo ni rdexjb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnu. ⁸ Na'c guitujy lu guiniilu rediidx xten Xtad Jesucristnu, na'cza guituinäjlu narä sa'csi yu'ä neṅ latzguuib xcuent Jesucrist. Näj luj gudejd trabajw ni siääd xcuent yäl'rusule' xtidx Dios si'ctis gacnä juj. ⁹ Dios ni guläa nurnu neṅ dojl, gurejdx nurnu te guibaṁsa'cnu lojtisni. Gurejdxni nuurnu xhet sa'csi biennu dzuṁsa'c, alga sa'csi si'c rlazni laani, sa'csi balaslajzni nuurnu xcuent Jesucrist galooli che gajdli guncheeni guedxliuj. ¹⁰ Niluxh cheni biääd Jesucrist ni badzucaj rextojlṁu lo guedxliujre, baluiloj yäl'rulaslajzga. Jesucrist banitloj yäl'rniabee xten yäl'gujt. Xtiidxni, ni rusule' xho rbicaj dojl, baluui yäl'nabajn, näjza yäl'nabajn par tejpas.

¹¹ Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel. ¹² Ni'cni rdedä trabajw xcuent guiraa rediidxre. Niluxh dina guituyä, sa'csi narä nanä chu xtiidx huililazä, nancheä laani sajc gapdzu'tzni dzuun ni baniidxni loä dxejli cheni guibi'ni.

¹³ Chanuu guluiilu redidxa'c ni banidxä lojlu. Gubajnza lo yäl'rillilajz näj lo yäl'sanälajz ni rajpnu sa'csi yu'nu lo Jesucrist. ¹⁴ Cuanädzu'tz reyäl'najn ni baniidx Dios lojlu näj Sprit Dxan xtenni ni rbäjz neṅ lastoonu.

¹⁵ Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes. ¹⁶ Dad Jesucrist gacnä juj reni yu' rolizj Onesiforo sa'csi balti huält biädspaani lazä, dini nitujy sa'csi yu'ä neṅ latzgui-

ib. ¹⁷ Che bidzujṁni guedx Roma, gudiilpacni narä te bidxäl'ni narä. ¹⁸ Dad Jesucrist gulaslajz laani che guidzujṁ dxej ni guibi' Jesucrist. Luj anajnlu balti dzuṁsa'c bejnni che guyu'ni guedx Éfeso.

Te ni runsa'c xtzuun Jesucrist

2 Ni'cni xi'nä, guzutijp sa'csi rulaslajz Jesucrist luj, racnäjnlu. ² Rediidx ni abiejn diajglu guniä nez loj xhidäl bejn lagajc rediidxga guniini lo rebejn ni rililajzpac, loj rebejn ni sajc guluiiza diidxga lo stecuaa bejn.

³ Batijp lajzlu tednäjlṁu narä trabajw si'c te soldadsa'c xten Jesucrist. ⁴ Di te soldaad gun dzuun ni bejnni che gajdni gac soldaad. Rujṁni xtzuun bejn ni guleni gacni soldaad, te si'c guspaani lajz bejnṁga. ⁵ Sigajcza, ni rguijt digacdi xca'ni yäl'nasa'c palga dini quitsa'c si'c riäjli quitni. ⁶ Bejn ni rujn dzuun loniaa nanab xca'ni xcäl'nasa'cni ganidoo. ⁷ Bejn xhigab xcuent ni rniä lojlu, dxejc sujn Dios gacbeelu guiraani.

⁸ Basnaj lajzlu Jesucrist, te xagdoo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu. ⁹ Ni'cni cagutipä lazä cadedä trabajw, caduä caden si'c te bejn ni bagu't sabejnṁni. Niluxh digacdi xcadu xtidx Dios. ¹⁰ Ni'cni cadedä trabajwre te gacnäa reni agule Dios te näjza reni'c chalilajz xtiidxni te guibajnreni lo bianij xten Jesucrist par tejpas.

¹¹ Guliiduxh najc diidxre;

palga agujtnu con laani, sibannäjzanu laani.

¹² Palga rdejndu trabajw, sinibenäjzanu laani.

Palga dinu guicä'p numbeenuni, dizani guicäjṁ numbeenuni nuurnu loj Xtadni Dios.

¹³ Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

Te bejn nani abia xtzuunni

¹⁴ Basnaj lajz rebejn xcuent rediidxre, gunibee lojreni nez lo Dad Jesucrist na'c tiṁdiidxreni sa'csi sa' diidxga xhet sajc dini, ruxhinqisni reni riendiajṁni. ¹⁵ Batijp lajzlu te guidzujṁlu lo Dios si'c te bejn ni runsa'c dzuun, xheti xhicient guitujy lu, sa'csi ruluisa'cpaclu xtidxliitis Dios.

¹⁶ Gulälaz yäl'rniyaj näjza xhidalduxh diidx ni xhet sajc-di, sa'csi renani rucua diajṁ rediidxga riajbrureni lo redolguijdx. ¹⁷ Luxh diidx ni ruluiireni suxhingajcni lastoo bejn si'c rxhinlajz tiejx bejn. Ni'c casiajc Himeneo näj Fileto. ¹⁸ Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rililajz.

¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejnṁni"; näjza "Nanab

guibicajreni lo redolguijdx, guiraa reni ahuililajz xtidx Jesucrist."

²⁰ Neņ te yuro, xhet ganaxdi cos or nājza cos plat yu'. Yu'za cos yajg nāj cos bajņ; yu'reni najc parsī te lanīro, yu'za reni rquīn guixe-guixee. ²¹ Sigajcza te bejņ ni rla-jz gun dzuunro xten Dios, riājļ guibicajni loj redolguijdx ni xhet sajcdi. Dxejcti Dad Jesucrist sacnājni te gunni redzunro xtenni.

²² Gubicaj lo redzunguijdx ni rujņ rebejņ, huīnuu yāl̄nabaņsa'c, yāl̄rililajz, yāl̄sanālajz, gulecdxiza lajzlu nāj reni rujņ xtuun Dios, naya lastooreni rbedx-rniabreni lo Dios. ²³ Na'c jiulu rediidx ni rulūi rebejņ guedxliuj. Anajņlu rediidxga rujņ rdīl̄nāj rebejņ sa'ni. ²⁴ Niluxh te xmos Dad guibaa di riājļ guchaagni reni rdijļ; riājļ gacni beņsa'c loj guiraatis bejņ. Riājļza guluisa'cni; riājļza gutip lajzni che xhet laadi rujņ bejņ lojni. ²⁵ Guideb yāl̄nadolajz gulūiilu reni rdxē'ch loj rediidx ni rulūiilu. Cuāāzlu gaxājsi gusiejch lajzreni gun Dios gacbeereni didxgulii, ²⁶ te jianij xcāriejņreni te giriireni ladzņaa beņdxab, te gunreni ni rla-jztis Dios.

Xho gac rebejņ neņ redxelult

3 Nanab gacbeelu neņ redxelult sidzujņ dxej tedtu trabajw. ² Sa'csi su' bejņ ni chanālajz lagajctis laani, ni rinālajz xmeeltisni, bejņ ni rniyaduxhtis, bejņ ni rchagla-jz chā'p xpala'ntisni, bejņ ni rniyāz Dios; su' bejņ ni di gusoob xtidx xtadreni, su' bejņ ni di gudeed xquixtios lo Dios, su' bejņ ni najc beņguijdx. ³ Neņ redxelultga su'za bejņ ni di chanālajz sa'ni, bejņ ni di lajzni jīājļ, bejņ ni rusgueduxh; bejņ ni digacdi guscūāāz doļguijdx ni rujņreni; bejņ ni guyalazduxh; bejņ nani ru'ro'n guira'ti dzunsa'c. ⁴ Neņ redxelultga su' bejņ ni ruto' sa'reni; bejņ ni di guidxejb gunreni ni riājbtis yejcreni, bejņ ni rchalosi najcreni beņsacduxh; bejņ ni rchagla-jzru gun nani rchagla-jz tiejxhreni lacuaa chanālajzreni Dios. ⁵ Neņ redxelult su' bejņ ni najc si'c beņguidoo, ascanu rusoobreni xtidx Dios, niluxh naadireni xca'reni yāl̄nadip nāj yāl̄rnibee xten Jesucrist ni ruchaa lastoo bejņ.

Na'c guchaaglu rebejņga, ⁶ sa'csi loj sa' bejņre yu' reni richu' rolijz bejņ, sasgueereni regunanayāā ni ru- jņ doļ. Regunaare rinuu rujreni ni rla-jztis tiejxhreni, rujņreni guiraloj. ⁷ Rebejņre rsiedduxh didxcoob, niluxh di didxlii xten Jesucrist jiu' yejcreni. ⁸ Sigajcni gu- jc Janes nājza Jambres ni bidxe'ch loj Moisés, sigajcza najc rebejņre, cadxehnājreni didxlii xten Jesucrist, na- jcreni bejņ ni aguxhijņ xcāriejņreni, luxh direni gacbee xtidx Dios, direni ga'p yāl̄rililajz. ⁹ Niluxh direni chanuu xchej, sa'csi huenliisi suhūi guiraa rebejņ najcreni beņguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰ Luj sanuutislu lo nani rusule'ā, nāj xho nabaņā, nāj xhicuent runā dzuunre, lo xcāl̄rililazā, lo xcāl̄nadolazā, lo xcāl̄sanālazā, nājza xho batip lazā. ¹¹ Najņlu xho basacsīreni narā gudedāza trabajw ladzņaa rebejņ neņ

reguejdx xten Antioquā, guedx Iconio, nājza guedx Litra. Gudedā trabajw niluxh Dios baļaa narā loj guiraa retrabajwga. ¹² Guliduxh guiraa reni rla-jz chutis loj Jesucrist sidejdpacreni trabajw. ¹³ Niluxh rebengui- jdx nāj reni rusguee, sinuutisreni redolguijdx, sinuuru gusgueereni bejņ, luxh susgueeza bejņ laareni.

¹⁴ Luj huīnuu guzudzu'tz loj ni abisieedlu, nani ahuililajzalu, luj anajņlu chuni'c balūiini lojlu. ¹⁵ Cheni biuuxlilu racbeelu xtidx Dios, ni rulūiilu xho guiriilu neņ doļ te xca'lu yāl̄nabajņ par tejpas sa'csi rililajzlu xtidx Jesucrist.

¹⁶ Guiraa rediidx xten Dios ni caj lo guijtz, lagajc Dios baniidxni te xcajni lo guijtz.

Guiralii xtidx Dios najc laaca te gulūi nuurnu xhini'c najc didxlii,

te gacbeenu xhi najc didx-xhii, te gacbeezanu xho riājļ guibaņsa'cnu.

¹⁷ Te susiņ niguii ni najc xpejņ Dios, te gac gunni guiraa redzunsa'c ni riājļ gunni.

4 Rulidxālu nez lo Dios nājza nez lo Dad Jesucrist ni jīāād si'c rei te gunni yāl̄guxhtis loj reni nabajņ nājza loj reni agujt; rniāza dee lojlu: ² basule' xtidx Dios, gususiņ lo Dios mase xhitis or. Balūi rebeņ doļ, gudīl̄nāj reni di rla-jz guzobdiidx xtidx Dios, balidxnāj resa'tu xtidx Dios. ³ Sa'csi sidzujņ dxej di rebejņ guidxagla-jz gucuadiājz yāl̄rluisa'c; alga diidx ni najc la- gajc si'c najc xhigabreni rla-jzreni jīendia-jgreni, ni'cni siguiilreni xhidajļ bejņ ni rulūi te guisieedreni ganax ni rla-jzreni gucuadiājgreni. ⁴ Susāuureni dia-jgreni te di jīendia-jgreni xtidxlii Dios; alga xhitis diidx gucuadiāj- greni. ⁵ Niluxh luj huīnuutis lo xtidx Dios, batiplajz yāl̄huin, guniitis xho rudzucaj Dios rextojļreni, beņsa'c xtuunlu.

⁶ Sa'csi narā suga'ā ree te ju'treni narā, asiāddzūnga- jxh dxej ni guetā. ⁷ Agulu-jx bacuaā si'c te soldaad ni huicua'sc lo guer, agulu-jx xnezyuā, gopdzutzā yāl̄rililajz. ⁸ Naj cabāzā xca'a yāl̄nasa'c ni guniidx Dad xhaguibaa, suniidxni yāl̄nabaņsa'c. Dad najc juejz ni runsa'c yāl̄guxhtis. Niluxh xhet loātis guniidxni yaļn- abaņsa'c. Sudeednini loj guiraa rebejņ ni catiplajz cabājzreni dxej cheni guibisac Jesucrist.

Rediidx ni rājņni lojtis Timoteu

⁹ Basaaga lajzlu jīādhuigajlu narā; ¹⁰ sa'csi abasa'n Demas narā. Sanālajzruni redzuun xten guedxliujre, ņaj sāāni guedx Tesalónica. Baxhaļā Cresent sāā lo reguejdx ni re' nez Galacia. Baxhaļā Tito sāā guedx Dalmacia. ¹¹ Xtebtis Lucas suganāj narā. Gudiil Marcw te jīādnāluni sa'csi sajz gacnājni narā lo xtzun Dios. ¹² Tíquico baxhaļā sāā guedx Éfeso. ¹³ Cheni jīāādlu, jīādnālu ca'p ni basa'nā guedx Troas rolijz Carpo, nāj rexlibrā; di jīālza lajzlu rexquitzā. ¹⁴ Alejandro, ni najc gubetzguib, basacsīduxhni narā. Dios quiixni sigajcni bejņni. ¹⁵ Luj bahūi te di gunni xhi gunni luj sa'csi rdx- echduxhni lo xtidx Dios ni rusule'nu.

¹⁶ Galoo che bazecā diidx lo reguxhtis, rut gucnājdi narā; guiraareni gulālazreni narā. Rniabā lo Dios na'c guchagcuentni nani bejņreni. ¹⁷ Niluxh Dad ni yu' xh-

aguibaa gucnäj narä, baniidxni yälñadip te gujc guniä guiraa xtidx Dios te biejn diajg reni digac xpeñ Israel xtidx Dios. Luxh gucnäj Dios narä gulääni narä ladzñaareni, si'c ro' te beedz. ¹⁸ Susjaani narä loj guiraa redolguijdx, saptzu'tzni narä, sigucheezani narä te chunääni lo xcälñibeeni xhaguibaa. Lojni coldeed xquixtios, colgañduxhni par tejpas. Sugacni si'c.

Rudeedni xtixtios lo reexamigwni

¹⁹ Badeed xtixtios lo Prisca näjza lo Aquila näjza loj resa' Onesiforo. ²⁰ Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni. ²¹ Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhajreni xtixtios lojlu.

²² Dad Jesucrist chunäj xaimlu. Dios gacnäj guiraatu. Sugacni si'c.

Tito

Bacuaa Pabl lo Tito

1 Narä Pabl, nacä xmos Dios, apost xten Jesucrist, te gacnäá guiroobru xcälrililajz reni agule Dios, te gacbeezareni didxlii ni rusia xcälnabajnu. ² Cayunlojzanu yäl'nabajnu par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. ³ Niluxh che bidzujn dxej ni agulexgaa Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni ruslaa nurnu nen doj. ⁴ Caciaä guijtze lojlu, Tito, xi'nä lo yäl'rililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu nen doj, gacnäjreni luj, gulaslajzreni luj, guscuecdxizareni lajzlu.

Dzuun ni rujn Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo nen tejpga reguejdx si'cni gunibeä gunlu. ⁶ Gule bengool ni nabañsa'c, te na'c guiniyaj bejnreni, nanab gacni chääl tejtis gunaa, riäjzla chalilajz rexi'näni, na'c guibajnreni si'ctisni rlajz tiejxhäreni, jiureni xtidx xtadreni. ⁷ Niguui ni rnibee guidoo rcanäj rexhixten Dios, ni'cni riäjz ga'pni te yäl'nabanya. Na'c gacni te bejnnajd, na'c gacni te bejnna dxecha', na'c gacni bejngu, na'c gacni te bejn ni rdxagdijl bejn, na'cza xca'ni meel ni dini niunsa'c gaan. ⁸ Nanab gacni te bejn ni rudedlaa rolizni jia'n bejn biooz, riäjzla chanälajzni dzunsa'c, gac nasiñni, chu xcäriejnri; guibañsa'cni nez lo Dios, sigajcza nez lo rebejn, guibañnayani nez lo Dios, na'c gunni nani rlajztis tiejxhni. ⁹ Riäjz chanuutisni lo didxlii ni bisieedni te gac gulidxnäjzani bejn xtidx Dios, te guzejcni diidx lo rebejn ni rniyaj xtidx Dios.

¹⁰ Yu' xhidajl benguijdx, bejn ni rnii diidx ni xhet sajcdi, näjza xhidajl bejn ni rnii didx-xhii ni rusguee. Näjza lo rexpene Israel ni riuduxh leii yu' sa' bejnre. ¹¹ Sa' redee ni nanab jäü ro'ni, sa'csi rusgueereni xhidalro sa'reni, ruluiireni ni di riäjz guluiireni te gunreni gaan meel.

¹² Te niguui ni siääd lagajc lajdxreni guniini xcuent lagajc reben lajdxni: "Rebejn ni najc cretenses rniuduxhäreni didx-xhii, niälajzarenäni. Rlajzreni gausa'cni niluxh di rlajzreni gunreni dzuun." ¹³ Niluxh guliini, ni'cni gudilnäjreni, te chalilazsa'cni xtidx Jesucrist, ¹⁴ te na'cruza gucua diajgreni rediidx ni rdxällajz rexpene Israel, niclaza rediidx ni rnibee bejn ni gulälaz didxlii.

¹⁵ Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejnliireni nacdxuudx. ¹⁶ Naj rujnsireni si'cni numbeereni Dios, niluxh ni rujnreni huenliisi ruzen direni nililajz, najcreni benguijdx, direni jiu xtidx Dios, digacdi gunreni nicla tej dzunsa'c.

Rulijdx Pabl Tito guluisa'cni rebejn

2 Niluxh luj guniitis rediidx ni ruluisa'c. ² Baluii rebengool gac benya, bejn ni yu' xcäriejnri, bejn ni rumbee xhini'c najc dzunsa'c, xhini'c najc dzunguijdx, bejn ni rajza yäl'rililajz, yäl'sanälajz, näjza ni rbecdxi lajzni. ³ Sigajcza, regunagool, nanab guibajnreni si'c te ni yusa'c lo Dios, na'c guiniireni diidx ni di riäjz guiniireni, na'cza soozreni. Riäjz guluiireni redidxa'c ⁴ te guluiireni regunaa dxa'p chu xcäriejnreni, chanälajzreni chäälreni näj rexi'näreni. ⁵ Gacreni nasiñ, guibañnayareni, xcanäsa'cni rolizreni, gacreni beñsa'c gusobreni xtidx chäälreni, te rut guiniyajdi xtidx Dios.

⁶ Sigajcza gojz lo rebi'n riäjz chu xcäriejnreni. ⁷ Luj guzuj te fiireni xho riäjz gun bejn dzunsa'c. Che guluiiireni, saru baluii guiraa reni riäjz guluiilu. ⁸ Didxa'c gunii te rut gacdi guiniyaj diidxga, te si'c guituj chutis ni rlajz guidxe'ch lojtu te xhet xhi didxguijdxdi gac guiniireni xcuentlu.

⁹ Balijdx remos te gusoobreni xtidx xlamreni, te gusa'cni dzuun, na'c guzejcni diidx lo rexlamreni.

¹⁰ Na'c cuanreni alga guibañsa'cni te guluii xcälnabajnreni lacti sacduxh xtidx Dios ni baslaa nuurnu nen doj.

¹¹ Sa'csi abiääd xcälracnäj Dios, abiädnäni yälruslaa nen doj lo guiraa rebejn. ¹² La xcälracnäj Dios ni ruluii nuurnu gusa'cni redzunguijdx, näjza dzuun xten guedxliujre te guibañsa'cni, te chonälajznu Dios lo guedxliujre. ¹³ Ruluiizani nuurnu cuääznu guidzujn dxej ni soob xtiidxni ni basa'cni loonu xcuent dxej che jääd Gueb Dios näj Xtad Jesucristnu ni ruslaa nuurnu lo doj. ¹⁴ Laani gujtne te guslaani nuurnu lo guiraa redolguijdx, te basiani nuurnu te gacnu xpejnri, gaczanu te bejn ni rdxaglajz rujn dzunsa'c.

¹⁵ Diidxe gunii, balijdx, basule' si'c te bejnnajn. Di gusaanlu cuälazreni luj.

Ni riäjz gun reni rililajz

3 Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenäni gunreni xhitis dzunsa'c. ² Na'c guiniyajreni

bejn, cuedxireni, gaczareni bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejnnu, dizanu gu-soob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchaglajztis rujn tiejxhnu, nabajntisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu. ⁴ Niluxh che baluiloj xcäl'rulaslajz näjza xcäl'rinälajz Dios ni ruslaa nuurnu näjza reben guedxliuj lo dojl, ⁵ dxejc baslaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Baslaa Dios nuurnu lo dojl sa'csi bidiib lastoonu, te biäjt xtojlnu te najcnu bej-coob, sa'csi bascoobza Xsprit Dxan xten Dios xcäriejn-nu. ⁶ Baniidx Dios cuääzpac Xsprit Dxanni nejn lastoonu xcuent ni bejn Jesucrist ni baslaa nuurnu, ⁷ te sa'csi rujn Dios cuent najcnu bensa'c sa'csi abadzucajni xtojlnu, naj sica'nu xcäl'nasa'cnu ni cabääznu, nalaaznu yäl'nabajn par tejpas.

⁸ Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhrene ganax dzunsa'c. Rediidxre najc laaca, sac-duxhrene loonu. ⁹ Naj basaan rediidx ni najc xlia'si,

rediidx ni gunii reben galoo, yäl'rildiidx xcuent xleii to-Moisés sa'csi guiraa rebiejyga xhet sajcdini, xhetza huendi rujnrene.

¹⁰ Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu.

¹¹ Sa'csi anajntu sa' bejnga abar'o'nni, agulälazni didxlii, lagajc xtojlni sujn nitni.

Diidx ni bacuaani lojtis Tito

¹² Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajl. ¹³ Gucnäduhx licenciaad Zenas näjza Apolos, badeed guiraa ni rquiinrene te chanuureni xpiajrene, te xhet jäädxdireni. ¹⁴ Suguisieedza resa'nu gunrene dzunsa'c te gacnäjrene che guiquiinnureni, te na'c guibajrene xlia'si.

Ruxhalni xtixtios

¹⁵ Guiraa reni yunäj narä ruxhal xtixtios lojlu. Badeedza xtixtios loj resa'nu lo yäl'rililajz. Dios gacnäj guiraatu. Sugacni si'c.

Filemón

Rucuaa Pabl guijtze lo Filemón

1 Narä, Pabl, yu'ä neṅ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtze lojlu, Filemón, ni sanälazduxhnu sa'csi najclu sa'nu lo xtzun Dios. ² Rucuaazanu guijtze lo Apia, bisi-ajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu. ³ Dios Xtdadnu näj Dad Jesucrist gacnäj la'tu, guscuedxireni lajzlu.

Xcälisanälajz näj xcälirililajz Filemón

⁴ Rudedä xquixtios lo Dios xcuent luj che rniä lo Dios. ⁵ Abiejn diagä xcuent yälirinälajz näj yälirililajz ni rajplu lo Dad Jesucrist, näjza reni yu' lo Dios. ⁶ Rniabä lo Dios tioobru xcälirililajzlu laṅ ni rusule'luni, te gacbesa'creni xcuent guiraa reyäl'nasa'c ni rajplu, ni runiidx Dad Jesucrist lojlu. ⁷ Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcälrniabee Jesucrist sajc guiniä gunlu xhitis ni riäjṅ gunlu, ⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. ¹⁰ Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni ṅaj ni yu'ä latzguiib.

¹¹ Galoo, dini niajc beṅsa'c lojlu, niluxh ṅaj sacnäduxhni guiro'pnu. ¹² Ruxhaṅsacäni lojlu, te xcasaluni

stehuält si'c ni najräni xca'lu, sa'csi siädnäni lojlu ascanu lagajc lastoä. ¹³ Narä rlazä niannäjni narä xcuentlu, te niacnäjni narä ṅaj ni yu'ä latzguiib sa'csi basule'ä xtidx Dios. ¹⁴ Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi rlazjpaclu gacni si'c. ¹⁵ Pet gubicaj Onésimo lojlu tio'p-choṅ dxejsi. Niluxh ṅaj xca'luni te chuni lojlu par tejpas. ¹⁶ Naj xhetru si'c di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäjṅ chanälajzruluni, xhet si'c chutis te bejṅ, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lu, cua'ni sigajc narä. ¹⁸ Palga yu' xhi bejnni lojlu o palga yu' xhi nazäabni lojlu, basa'nni lo xcuentä. ¹⁹ Lagajc narä, Pabl abacuaä guijtze con ṅaä con xleträ, narä siguixäni. (Te na'c guiniä nazäabzalu lagajc luj loä.) ²⁰ Betzä, benṅaa hueenre narä si'c te ni sanälajz Dios te guspaalu lazä nez loj Dad Jesucrist.

²¹ Bacuaä guijtze lojlu sa'csi nancheä susooblu xtidxä, sujnzalu maazdi loj ni rniabä lojlu. ²² Sigajcza basuchee te lajt cadro jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

Ruxhaṅni xtixtios lojni

²³ Epafra ruxhaṅ xtixtios lojlu. Laani yunäjni narä latzguiib, sa'csi guniizani xtidx Jesucrist. ²⁴ Marcw, Aristarco, Demas, näj Lucas, ni racnäj narä lo dzuunre, ruxhaṅzaren lojlu.

²⁵ Dad Jesucrist gacnäj la'tu. Sugacni si'c.

Hebreos

Agunii Xi'n Dios xtidx Xtadni

1 Neŋ redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. ² Neŋ redxejre aguniini loonu por Xi'nni, lojzani badeed Dios yäl̄rnibee guncheeni guedxliujre, badeedzani guira'ti lojni. ³ Laani najc xtuxh xten xcäl̄rdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj̄l̄nu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl̄rnibee si'c te bej̄n ni riannäj xhix-ten Xtadni. Lajzani sajcru lo relaj rexangl Dios. ⁵ Sa'csi Dios di niäj̄b loj nicla tej rexangl̄ni:

Luj najclu Xi'nä. Narä guleälu te guinibeelu.

Dizani niäj̄b xcuent nicla tej rexangl̄ni:

Narä gacä xtadni, laani gacni xi'nä.

⁶ Niluxh che biädñäni Xi'n xtebni lo guedxliuj, guniini:

Guiraa rexangl xten Dios, iColgan Xi'nä!

⁷ Che gunii Dios xcuent rexangl̄ni räjpni:

Rujnni ruxhuŋ rexangl̄ni si'c bej̄, rujnni rbebajl rexmosni.

⁸ Niluxh xcuent Xi'nni guniini:

Luj najc Dios.

Nabaj̄nlu par tejpas;

xcäl̄rnibeelu par tejpas najc te yäl̄rnibesa'c.

⁹ Ahuinälajzlu xhigabsa'c, dipaclu nichagljajz xhigabguijdx,

ni'cni Dios ni najc Xtioslu, baniidxru yäl̄rbalajz lojlu quela loj resa'lu.

¹⁰ Rniizani:

Luj, Dad, che guslojli bencheelu guira'ti, bencheelu cad soob guedxliuj, ŋaazalu bencheelu reguibaa.

¹¹ Laareni sinitlojreni, niluxh luj nabaj̄nlu par tejpas.

Guiraareni siujx si'c riujx te lajd.

¹² Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lałgajctis nabaj̄nlu, di rexijzlu ted.

¹³ iGucxha räjp Dios lo te xangl̄ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

¹⁴ Guiraa rexangl Dios najc sprit, ruxhał Diosreni te chayacñajreni rebej̄n ni xca' yäl̄nabaj̄n par tejpas.

Na'c gusaanni diidx ni ruslaani lo dojl

2 Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. ² Anajntu aguzojb diidx ni gunii rexangl Dios neŋ redxe galoo. Luxh reni di nusoob diidxga bejnreni dojl, dxejc bateed Diosreni trabajw. ³ iXho gac guibicaj xcäl̄naj Dios yejcnu palga dinu jiu rextidx Dios xcuent yäl̄ruslaa lo dojl, ä? Ni Dad, Jesucrist basa'n diidxga lo rexpej̄pacni, dxejc laareni basule'reni rediidxre loonu. ⁴ Niluxh Dios baluui najc diidxga guliipac sa'csi bejn̄ni reseen, näjza yäl̄rdxeloduxh, näjza xhidajl remilagrw. Badeedzani Sprit Dxan xtenni loj renani ahuililajz xtiidxni te gun tejegareni garen-garen xtzunreni si'ctis ni rlajz Dios gunreni.

Nani guläxtiej yäl̄ruslaa bejn lo dojl

⁵ Di Dios gudeed yäl̄rnibee lo rexangl̄ni te guinibeereni guedxliucoob ni cagusä'tnu ŋaj. ⁶ Guyu' tej ni bacuaa xtidx Dios lo guijtz, räjpni:

iChu najc niguii, te guinalajz Dios laani?

iChu najc xi'n niguii te jäd̄huiuazaluni?

⁷ Nagabsi dxej guxiiru sajcn̄i lo reangl xhaguibaa, dxejcti badesaclu xcäl̄nasa'cni, badesaclu xpala'nni,

badeedzalu yäl̄rnibee lojni te guinibeeni guira'ti ni bencheelu.

⁸ Badeedlu guinibeeni guiralii ni yu' lo guedxliuj. Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh ŋaj ruhuiinu gajd̄ni guinibee guiralii ni'c. ⁹ Alga rhuiinu Jesucrist, ni bejn Dios guxiiru sajcn̄i lo reangl xten Dios che guyu'ni lo guedxliuj balsi dxej. Che baluux Jesucrist xtzunni lo guedxliuj, badeed Dios yäl̄rdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

¹⁰ Dios benchee guiralii ni yu' lo guedxliujre, ŋajli rnibeeza Dios guira'ti. Luxh Diosre rlajz chanäni xhidajl xi'nni xhaguibaa, ni'cni baxhał Dios xi'npacni Jesucrist te guläxtiejni yäl̄ruslaa bejn lo dojl che gudejdni trabajwduxh lo cruuz. ¹¹ Sa'csi Jesucrist, ni rujn chasanäj bejn te yäl̄nabanya, näjza reni risanäj yäl̄nabanya, tejtis najc xtadreni. Ni'cni di Xi'n Dios guitujy guiniini lojreni: "betzä". ¹² Scree caj lo xtidx Dios:

Chasule'ä lo rebetzä xho najclu, siliä'päza xpala'nlu lojreni.

¹³ Räjpzani:

Sibäzä gacñaj Dios narä.

Ste lajt guniini:

Bahuii loä näjza rexi'nä ni baniidx Dios loä.

¹⁴ Te famiļ najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnni si'c beņguedxliuj, gujtzani te gujc bejnni gunijt nani rnibee yälgujt, nalajznu, beņdxab. ¹⁵ Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajņreni, lacti rdxejbreni yälgujt. ¹⁶ Gulliini di ni niääd te gacnäjni reangl xten Dios, biäädni te gacnäjni guiralii rexajg toAbram. ¹⁷ Ni'cni gujcnı si'cpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlajz Dios gacni te guslaani rebejn lo dojl. ¹⁸ Sa'csi lagajc laani gudejdni trabajw, luxh baquiiłza beņdxabni niujnı dojl, ni'c űaj sajz gacnäjni renani ruquiił beņdxab gun dojl.

Jesucrist sajzru loj Moisés

3 Ni'cni bejtznu, reni anabaņsa'c, sa'csi najctu reni gurejdx Dios gac xi'nıni, colyembee Jesucrist ni baxhaļ Dios loonu. Laani najc bixhojz ni sajzru, rusule'zani xtidx Dios xcuent nani ahuililajznu. ² Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuun Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. ³ Sigajc ni yu'ru xpala'n dad lo xpala'n rexi'nıni, sigajcza yu'ru xpala'n Jesucrist lo xpala'n toMoisés. ⁴ Yu' xtad guiraa refamiļ lo guedxliuj, niluxh gule'c Dios guiralii bejn, bencheezani guedxliuj. ⁵ Basoob Moisés diidx si'c te mos, cuanäjni rexpeņ Dios si'cni gunibee Dios gunni, te baluiini xho gac redzuun ni gajd gac dxejc, luxh űaj agujc redzuunga. ⁶ Niluxh Jesucrist basoob diidx si'c xi'npac Dios. Cuanäjni xfamiļ Dios. Nurnu najcnu xfamiļ Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷ Ni'cni, si'cpac rniı Sprit Dxan xten Dios: űaj, palga jıendıajgtu xse'ni,
⁸ na'c gun-najdttu lastootu si'c bejn rebejn ni bidxechnäj Dios che cuansajreni lo reyubijdz.
⁹ Ro'c bidxechnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.
¹⁰ Ni'cni laļ ni cadxe'ch Dios loj rebejnğa, bejn Dios xhigab:
 Sujiannäjreni xhigabgujdxreni, dina gusanä jiu'reni xcälrusilazä.
¹¹ Ni'cni bidxe'ch Dios lojreni, bejn Dios te xhigabduxh, di rebejnğa jiu' te gusilaznäjni.
¹² Bejtznu, colnatiro andi chu tejtı rujn xhigabgujdx, rlajz guibicaj lo Dios, ni nabajņ par tejpas, sa'csi dini chalilajz xtiidxni. ¹³ Ni'cni colgulijdx resa'tu guixe-guixee, laga najcni nadxej; te di chu tejtı gacnajd lastooni xcuent reyälrusguee xten redojl. ¹⁴ Sa'csi palga chanunu sudzu'tznu lo xtidx Dios ni huililajznu che biem-

beenuni, dxejc yu' xhi rajpnu con Jesucrist. ¹⁵ Si'c caj lo guijtz:

Nadxej, palga jıendıajgtu xse' Dios, na'c gunnajdttu lastootu si'c bejn rebejn ni bidxechnäj Dios lo reyubijdz.
¹⁶ űChu reni'cni bidxechnäj Dios che biendıajgreni xtiidxni? űLa et laadi guiraa rebejn ni gulää Moisés guedx Egipto, ä? ¹⁷ űChuxh loj bidxe'ch Dios tiuu ijz lo reyubijdz, ä? űLa et laadi reni biajb lo dojl, dxejc gujtreni, huijıajbreni nez loj reyubijdz, ä? ¹⁸ űChu loj räjpni dipacreni jiu' lo xcälrusilajzni? Loj reni di nusoob xtiidxni. ¹⁹ Ni'c ruhuiinu di niacijdi niu'reni lo yälrusilajz sa'csi direni nililajz xtidx Dios.

4 Ni'cni palga bia'n diidx siu'pacnu lo yälrusilajz con Dios, nanab jıa'pnu lagajc nuure didi yu' chu tejtı di gun gaan jiu' lo yälrusilajzga. ² Sa'csi nuure abiejn di-aagzanu diidx ni rusia dojl, sigajc bejn diajg rebejnğa; niluxh xlia'si bejn diajgreni diidxga sa'csi bacuadijgreni ni luxh direni nililajzni. ³ Luxh nuure ni ahuililaznu siu'nu lo yälrusilajzga; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh, di rebejnğa jiu' te gusilaznäjni narä. Mase abaluuxni xtzuunni cheni birixtiejli guedxliuj. ⁴ Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuunni, dxejcti basilajzni tebdxej.

Xhet bejndini dxejga.

⁵ Stehuält guniini:

Di rebejnğa jiu' te gusilaznäjni narä.

⁶ Niluxh yu' reni gajd jiu' loj yälrusilajzga, luxh reni bejn diajgni diidx ni rusia dojl di niu' sa'csi direni nusoob xtiidxni. ⁷ Ni'cni basoob Dios ste dxej gac "nadxej". Gudejd xhidajł ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jıendıajgtu xse'ni, na'c gunnajdttu lastootu.

⁸ Paru nudeed Josué yälrusilajzga loj rexpeņ Israel, diru Dios ninisac xcuent stee dxejre. ⁹ űaj ria'nza te yälrusilajz par rexpejn Dios, ¹⁰ sa'csi nani riu' lo xcälrusilaznäni Dios, rusilajzani lo xtzuunni sigajc basilajz Dios lo xtzuunni. ¹¹ Nanab chanuu gusoobnu xtiidxni te jiu'nu lo yälrusilajzga, te di chu tejtı ni gacnajd lajzni si'c ni gucnajd lajz renani di nililajz.

¹² Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, räänzi nez neņ redzujt näj yojb. Sigajcza xtidx Dios räüz nez cadro rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rlajz lastoo bejn gun. ¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu xcuent lo Dios.

Bixhojz ni sajzru najc Jesucrist

¹⁴ Jesucrist, Xi'n Dios, najc xpixhojzpacnu ni sajzru, nani abiu' loj Dios. Ni'cni nanab chanuu sudzu'tznu chalilaznu xtidx Dios. ¹⁵ Xpixhojznu ni sajzru sajz gun-

laslajzni nuure te di jiajbnu lo dojl, sa'csi laani sigajcza gudejdni trabajw, baquill beŋdxabni te niujjni dojl, niluxh dini niujn dojl. ¹⁶ Riäjlpac na'c guidxebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

5 Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jäü lo xtojlreni nez lo Dios. ² Rdejdza bixhojz trabajw sigajc beŋguedxliuj, ni'c sajz ga'pni yälradolajz loj rebejn nani nayääl näjza reni abanijt lo Dios. ³ Niluxh sa'csi näjza laani rujjni dojl, nanab gudeedni guidxaa lo Dios te jäü lo rextojlni sigajc rudeedni guidxaa lo Dios te riäu lo xtojl rebejn.

⁴ Rut sajcdi gac bixhojz xcuentcani. Dios najc ni rbedjxni te gacni bixhojz, dxejc rudeedni xpala'nni lojni si'c badeednini lo Aarón. ⁵ Si'cza di Jesucrist niajc bixhojz ni sajcru xcuentcani. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

⁶ Scree caza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

⁷ Cheni gubajn Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajz nudzucajni lo yälgujt; Dios bacuadiajg xtiidxni sa'csi huinälajz Jesucrist Dios. ⁸ Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. ⁹ Che bidzujn dxej baluuxni guiraa redzuun ni rlanj Dios gunni, laani gujcn nani rudeed laa bejn nani rusoob xtiidxni lo dojl par tejpas ¹⁰ sa'csi Dios gulälajni bixhojz ni sajcru, gujcn bixhojz sigajc gujc Melquisedec.

Rxhuŋriezgw gusa'nni xcälirililajzni

¹¹ Rlanjnu guiniinu xhidalduxhru diidx xcuent Melquisedec, niluxh naganduxh gusule'nuni lojt sa'csi nadyejctu, ditu gacbee. ¹² Agujc xchej huililajztu rediidx xcuent Jesucrist. Ariäjl gusule'tu rediidxre naj, niluxh alga rquiinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c bäs. Rlanjztu yäsactu le'ch lacuaa gautu yäjt, bää; nalajznu, redidxnagajn xten Dios. ¹³ Reni najc si'c bäs, rä' le'chtis, direni gumbesa'c redidxa'c xten Dios. ¹⁴ Niluxh rebeŋ guyajl rajw yäjt. Sigajcza redidxnagajn xten Dios najc par rebejn ni aguyajl lo xtidx Dios, renani ayu' xcäriejn, arumbeereni nani najc dzunsa'c, nani najcza dzunguijdx.

6 Nanab guisieedrunu xtidx Dios te churu xcäriejnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechljajz, xcuent redzuun ni rujn rejt bejn, näj yälirililajz xtidx Dios. ² Na'c guluiitisnu xcuent yälrobnis, näj yälrudzubŋaa yejc bejn, näj xcuent yälrbajnsac rebeŋgut, näj xcuent yälgujxtis par tejpas. ³ Alga do'o guisieedru xtidx Dios te churu xcäriejn, palga si'c guniidx Dios jiennu.

⁴ Yu' bejn ni abianij xcäriejn, ni acua' reyäl'nasa'c ni rudeed Dios, ni rbäz Sprit Dxan xten Dios neŋ las-tooreni, ⁵ luxh bidxagljazreni xtidx Dios näj yälribee xten Dios ni churu jääd. ⁶ Palga laareni guibisacreni lo sa' yäl'nabajn ni gojpreni galoo, diru gacdi guidxaa xmodreni stehuält, sa'csi dxejc sajcn si'c ni lagajc laareni gucuasacreni Xi'n Dios lo cruzj, nalajznu susanxtujyreni Jesucrist nez loj rebejn. ⁷ Beŋ guedxliuj ni biejn diajgn najc si'c najc yuj ni rä' nis che rijbtis nis-guij. Palga yujga gudeed yäl'nasa'c loj reni rujn dzuun lojni, sunle' Dios yujga. ⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajnnu huililajztu xtidx Jesucrist näjza xtiidxni ni ruslaa lo dojl. ¹⁰ Sa'csi Dios najc ni rujn yälgujxtissa'c, diza lajzni jääl ni rujntu la'tu näj yäl'sanälajz ni rajptu par laani che racnäjt rebejtznu lo yälirililajz, luxh guixe-guixee si'c rujntu. ¹¹ Naj rlanjznu tejpgatu chanuu ga'p lagajc yälrbalajzre dxe lultli, te gac guiraa ni cabäjtzu. ¹² Rlanjznu na'c gactu bejn ni rbedxitis, alga guntu sigajc bejn rebeŋ galoo, gopdzu'tzreni yälirililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni. ¹⁴ Scree gunii Dios: "Guliä sacnääl luj, sunidxäza xhidajl xi'nlu." ¹⁵ Cheni aguläjz Abram xchej, gusojb diidx, cua'ni nani gunii Dios lojni. ¹⁶ Sa'csi cheni niliipac bejn te diidx, rniireni diidxga por laj ste'ca bejn ni sajcru lojreni, sas che rusä'treni laj bejnga xhetru yu'di xhi gunreni bieje. ¹⁷ Rlanj Dios gacbeepac rexagdo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga. ¹⁸ Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yälrbexilajz loj renani gubig-guxuŋ lojni, loj reni sanuu loj yälirililajz xtiidxni nani abaniidxni loonu por lagajc lajni. ¹⁹ Laa ni'cni cabääznu ni rusudzu'tz lajznu si'c duu-guiib con ancl ni rniazdzu'tz te barcw. Si'c rusudzu'tzni lastoonu te jionnu cadro yu'ni detz ladró. ²⁰ Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpas si'c gujcz bixhojz nani laa Melquisedec.

Jesucrist najc bixhojzro si'c najc Melquisedec

7 Galoo che gujc Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadro bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. ² Dxejcti bejn Abram tzuu cuaa guiraa ni bejnna gaan, te badeedni tej cuani loj Melquisedec. Laj Melquisedec säloj "reii ni runsa'c yälgujxtis", dxejctiru reii xten guedx Salem sälojzani "reii xten yälrbexilajz". ³ Baluiilojni lojreni, niluxh dinu

gan chu najc xtdadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujctni si'c najc Xi'n Dios. Najctiszani bixhojzro par tejpas.

⁴ Naj colhunii, lacti te beŋsa'c, te beŋro najc Melquisedec. Lojni badeed toxtadgoldoonu Abram tejsa ni sajcro lo tejsa tzuu ni bejnii gaan. Luxh Abram najc bejn ni sajcro lo rexpejnii. ⁵ Leii xten Moisés, rnibee xca' rebixhojz ni najc xfamiļ Leví te cuaa lo sa'reni si'c ni badeed toAbram loj Melquisedec, mase najcreni rexagdo Abram. ⁶ Niluxh di Melquisedec gac xfamiļ Leví. Niluxh badeed Abram te cuaa xhixtenti loj Melquisedec. Dxejcti benle'ni Abram ni biannāj xtidx Dios. ⁷ Naj rut sajcdi guinii garenca, sa'csi nani sajcro runle' yejc nani guxiiru saj. ⁸ Naj rebixhojz ni rca' tejsa lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. ⁹ Ni'cni sajcu guiniinu xcuent Leví nani rca' te cuaa, lagajc laani agudijx te cuaaga che badeed Abram tejsa yejc tzuuga lo Melquisedec. ¹⁰ Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganājni rexajgni.

¹¹ Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibaŋsa'c rebejn ni huisanāj leiiga, dirureni niquiin niääd stee bixhojz ni di gac si'c Aarón, alga si'c najc bixhojz Melquisedec najcni. ¹² Sa'csi cheni rdxaa te cuaa bixhojz nanab nājza leiiga guidxaa. ¹³ Niluxh rnii xtidx Dios, Dad Jesucrist najc bejn xten garenca famiļ. Luxh nicla tej bixhojz gajd gac bejn xten famiļga. ¹⁴ Huenliisi najcni Dad Jesucrist te bejn xten xfamiļ toJudá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. ¹⁶ Luxh dini niajc bixhojz si'c rnii releii ni guyu' dxejc. Laani gujctni bixhojz xcuent yälrnibee ni najc par tejpas, ni rut gacdi gutzujl. ¹⁷ Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

¹⁸ Dxejcti gunijt leii sa'csi xlia'si gujctni, di niajcdi niujn bejn si'cni rniini. ¹⁹ Di xleii toMoisés niujn gaan ni-baŋsa'c bejn. Naj lacuaa leiiga rajpnu te xcälirililazsa'c; ni'c rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni. ²¹ Stecuaa rebixhojz gujcreni bixhojz niluxh et con didxliidire, con laj te beŋro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,
niluxh dini gusiech lajni, räjpni:
"Luj najclu te bixhojzro par tejpas,
lagajc si'c gujc Melquisedec."

²² Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés. ²³ Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz. ²⁴ Niluxh Jesucrist rajpni yäl nabajn par tejpas, naj najczani bixhojz par tejpas. ²⁵ Ni'c rajcza

ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajnii par tejpas te canabni lo Dios xcuent laareni.

²⁶ Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. ²⁷ Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojl. Dxejcti sajcu guibi'ni guze'cnini lo Dios xcuent xtojl rebejn. Niluxh Jesucrist tejtis huält gudejdnii trabajw, bejnini cheni cuajni lo cruz, baxhe'ni xtiejnii xcuent nuure, gujtni. Si'c gudijxni xtojl nu par tejpas. ²⁸ Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabaŋsa'c par tejpas.

Jesucrist najc nani rusiäjļ diidx

8 Diidx ni sajcro loj rediidx ni caniiinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. ² Neŋ yu' ni najc dxan, neŋ guidoo ni benchee Dios yu' bixhojzre, xhet neŋdi guidoo ni runchee reben lo guedxliuj. ³ Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojlreni, ni'cni nanab ga'p Jesucrist xhi gudeedni lo Dios. ⁴ Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regojn si'c ni rnibee xleii Moisés. ⁵ Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najcni najcreni balaa sa'csi balijdx Dios Moisés cheni agojl gunni xquidoo Dios, räjp Dios lojni: "Bahuii te gunlu guira'ti si'cpac ni baluiä lojlu lo dan Sinaí." ⁶ Niluxh xpixhojznu Jesucrist rujn dzuun ni sajcro, sa'csi najcni nani suga' galäii xnezyuj Dios loj reben guedxliuj, gusule'ni diidx ni gunii Dios cheni bejnii xhigabcoob, basa'nni didxcoob loj reben guedxliuj. Luxh didxcoobre sacduxhruni.

⁷ Paru niajc nusiejch leii ni badeed Dios galooli lo Moisés lajz rebejn, di niquiin niujn Dios ste xhigabcoob. ⁸ Niluxh bahuii Dios xhet cayunsa'c di reben guedxliuj, dxejc räjpni:

Naj rniliä sidzujn redxej che gunä stee xhigab,
jia'n stee diidx loj rexpejn Israel nājza loj rexpejn Judá te xca'reni didxcoob.

⁹ Xhet si'c di xhigab ni benä che bia'nä diidx loj retox-tadgoldooreni neŋ redxej ni gunazä ŋaareni te gulääreni lajdx reben Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰ Niluxh diidx nani runä xhigab rlazä jia'n diidx loj rexpejn Israel neŋ redxejre gac scree, räjp Dad:

Sunä chu rexleä lo xcäriejnreni, sucuaäza xtidxä neŋ lastooreni.

Dxejcti narä gacä Xtiosreni, laareni gac rexpenä.

¹¹ Rut chu tejdi guluii sa'ni,

nicla bejtzni, nicla chu stee bejn gäbreni, "colyembee Dad",

sa'csi alanumbee guiraareni narä, rebäz sigajc reben-gool.

¹² Narä sulaslazäreni susiaä redzundxuudx ni bejn-reni, diru lazä guizaj rextojreni, nicla latzsiaj ni bejn-reni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

Xquidoo guedxliujre näjza guidoo xhaguibaa

9 Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. ² Guc-chee guidoo dxejcti gojl te ladro galäiini te gujcnio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le' ³ Ni rojp yu'ga najc dejtz ladro, ro'c najc yudxanduxh. ⁴ Ro'c suga' te guiib cadro ru' yaal. Najcni ganax oor. Ro'c yu'za te guijn ni laa "arco de pacto", najcwni ganax oor, sigajc dejtzni, sigajcza nenäni. Nenä yu' te bo't ganax oor. Nen bo'tga, yu' yätxtiil ni laa mana. Lagajcza nen gujnga yu' bar xten toAarón nani biga', guyu' bid lojni, näjza guij cadro bacuaa Dios xleii toMoisés. ⁵ Yejc gujnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtoj rebajn. Ro'cti di gacdiru guiniirunu xcuentreni naj.

⁶ Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. ⁷ Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb ijz, te chanäni xtiejn reguidxaa ni gudeedni te jia xtojlni näjza te jia xtoj rebajn ni najc xpejn Israel. ⁸ Luxh guiraa reni'c ruluu Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. ⁹ Guiraa ni gujc galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj rebajn. ¹⁰ Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn te ria ganaxtis tiejxhreni che guidzujnli dxej cheni guchaa Dios guira'ti.

¹¹ Niluxh abiääd Jesucrist, naj laani najc bixhojzro xcuent redidxcoob ni sajcrü naj. Nacoob guidoro cadro biu' bixhojzre, nasa'cruni naj. Xhet con naadi bejn guccheeni. Dizani gac guidoo guedxliujre. ¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn ni ca'ni biu'ni yudxanduxh tejtis huält, te si'c baslaani nuure lo dojl par tejpas. ¹³ Reni basia xtoj rebajn galoo najc redee: xtiejn regon näjza redxib, näj cobdäj xten reguidxaa ni rejc nen guidodxanga; bastiojbnü guiro'preni yejc reni yu' xtojlni. ¹⁴ Palga basia redee xtoj rebajn, aticaxh xtiejn Jesucrist sajc gusia dojl, sa'csi rajpni yäl'nabajn par tejpas. Lagajc laani badeedni xtiejn ni lo Dios. Niluxh najcni renya sa'csi dini niujn dojl, rusiazani xcäriejn nu xcuent

retzuun ni xhet sajcdi, te chunu loj Dios ni nabajn par tejpas.

¹⁵ Ni'cni Jesucrist najc nani suga' galäii: nez lo Dios näjza nez loj reben guedxliuj xcuent didxcoob. Yälgujt xten Jesucrist najc te gudzucajni xtoj rebajn näjza xtoj renani bejn si'cni caj lo leii, te xca' guiraa reni agurejdx Dios yäl'nabajn par tejpas, si'c bia'n diidx galooli.

¹⁶ Didxcoobre najc si'c che rlajz tej bejn guinibee xho guidis xhixtenni che agojl guetni, nanab gucuaa bejnga lo te guijt xho guidisni, dxejcti gucuaani lajni. Niluxh xhet sajcdi guijtza che gajd bejnga guet.

¹⁷ Xhet sajcdi guijtza che nabañsijc nani bejn ni. Sajcni che agujt bejnga. ¹⁸ Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹ Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga näjza nis, bahuajdxni guid-xiil xniaa näjza te la' yajg balagbäz, hysopo, dxejcti bastiojbnü rejn yejc guijt cadro caj leii, näjza yejc rebejn. ²⁰ Dxejc guniini lojreni: "Rejnre najc seen sile'pac diidx ni abaxha Dios lojtu."

²¹ Sigajcza bastiojbnü Moisés rejn guidoo näj guiraa renani rquii rebixhojz che rajnreni Dios. ²² Leii xten Moisés rnibee jia guiralii con rejn, palga di rejn guixe', di xtoj rebajn jia.

Xtiejn Jesucrist rudzucaj dojl

²³ Ni'cni biquiinpac gujt remanre, bixe' xtiejn ni te basiani reni najc xpalaa reni yu' xhaguibaa, niluxh reni yu' xhaguibaa rquii guixe' xtiejn te ni sajcrü. ²⁴ Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te canini xcuent nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn ni. Di guiquiin jiu'runi balti huält. ²⁶ Palga nanab gunni si'cni rujn rebixhojz, sajpnü por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn ni lo Dios cheni gujtni, cuajni lo crujz te si'c badzucajni par tejpas xtoj rebajn. ²⁷ Guiraa bejn nanabpac guetreni tejtis huält, dxejctiru sidejdreni yälgujxhtis xten Dios. ²⁸ Sigajcza tejtis huält badeed Jesucrist xtiejn ni ni bixe' lo crujz te badzucajni xtoj xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälruslaa renani cabäjzni.

10 Sa'csi leii xten toMoisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gusa'cni rebejn nani guibig lo Dios, sa'csi di xtiejn man gudzucajpac rextojreni. ² Paru najc nibicajpac xtoj reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtojreni, diru xcäriejnreni gumbee dojl. ³ Niluxh yäl'rejt man näj yäl'rudeedreni rejn casob ijz rusnajtisreni lajzreni

xcuent dojl. ⁴ Sa'csi digacdi gudzucajpac regon näjza xtiejn redxib xtojł bejn.

⁵ Ni'cni che biääd Jesucrist lo guedxliuj räjpni lo Dios: Di rłajzlu xtiejn guidxaa niclaza regon niluxh abejnlu gacä nigui-guedxliuj.

⁶ Dilu nichagłajz yälrejc xten guidxaa niclaza yälruceed rejn, niclaza gojn ni ruceed rebejn te gusiani xtojłreni.

⁷ Dxejc räpä: "Narä basiälä te gunä si'cni rłajzlu Dad, Dios, (si'cni caj neņ reguijtz xcuent ni sacä)."

⁸ Che gulujx gunii Jesucrist diidxga: "Di rłajzlu, dizalu guidxagłajz xcälrejt guidxaa näjza regon niclaza xcälrejc guidxaa, niclaza yälruceed rejn xcuent xtojł bejn si'cni caj lo leii gun bejn." ⁹ Dxejcti räjpni: "Narä siälä, te gunä si'cpac ni rłajzlu, Dad Dios." Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. ¹⁰ Abasia Dios lastoonu sa'csi bejn Jesucrist si'c rłajz Dios cheni baxhe'ni xtiejn ni lo cruzj tejtis huält par tejpas.

¹¹ Guiraa rexpihojz Israel rujnreni dzuun guixe-guixee te ruceedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl. ¹² Niluxh Jesucrist tejtis huält baxhe' xtiejn ni lo cruzj te badzucajni xtojł rebejn par tejpas. Naj agurejni xladbee Dios cadro rnibeeni. ¹³ Ro'c cabäjzni guiraa ni rdxe'ch lojni te cuereni ladzni'ni. ¹⁴ Ni'cni tejtis huält cuajni lo cruzj te basiani par tejpas guiraa renani ahuililajz xtidxni. ¹⁵ Sigajcza rnii Sprit Dxan xten Dios loonu; najni:

¹⁶ Diidx nani jiannääreni neņ redxeyre gac scree, naj Dad Dios: sucuaä rextidxä lo xcäriejnreni, susäläza xtidxä neņ lastooreni.

Dxejcti räjpni:

¹⁷ Diru lazä guizaj rextojłreni nicla rextolguijdxreni.

¹⁸ Ni'cni, cheni abia xtojł bejn, diru quiqiiin guceedreni guidxaa te jia rextojłreni.

Nanab guibignu lo Dios

¹⁹ Ni'cni resa'nu, na'c guidxeybtu, sajz jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰ Naj yu' te nezyuj, nezsiucoob, nezyuj xten xcälınabaņcoobnu ni baxhalni che badzucajni ladroga. Ni'c säloj cheni biu'ni neņ yudxanduxh, badeedni laga-jc xtiejn ni lo Dios. ²¹ Jesucrist najc xpixhojzronu nani rnibee rexpejn Dios. ²² Ni'cni do'o guibigrunu lo Dios guideb lastosa'cnu, na'c guidxeybdinu, na'cza guitujydu. Con yälirililajzpac abia lastoonu xcuent rexhigabguijdx, abidiibza tiejxhnu lo nis-ya. ²³ Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴ Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzunsa'c. ²⁵ Na'c jiennu si'c rujn rebejn nani diru jiääd che rdxagsa'nu. Nanab guilidxnu resa'nu sa'csi naj asiäddzųgajx dxej ni guibi' Dad Jesucrist.

²⁶ Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc. ²⁷ Dxejcti guidxebetisnu guilääznu yälguixhtisduxh xten Dios

näj guiboo ni guze'c renani rdxe'ch loj Dios. ²⁸ Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o choņ ni nancheepac, räjpreni dini nusoob leii, gujt bejnğa, rut balaslajzdini. ²⁹ Maazru yälrusacsıduxh nanab ted renani ruläj yejc Xi'n Dios cheni direni gusobdiajg xtiidxni. Alga ruņo'nreni xtiejn ni ni baxhe'ni lo cruzj te basianini. Rusanxtujujzani Sprit Dxan xten Dios nani badeed didxcoob lojni.

³⁰ Anancheenu gunii Dios: "Narä susquixä bejn; loä siguijx bejn", räjp Dios. Stehuält guniini: "Dad sujn yälguixhtis rexpejn ni." ³¹ ;Cosduxh gac bejn ni jiajb ladzņaa Dios nani nabajņ par tejpas!

³² Niluxh colsnaj lajztu xho gujcti galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. ³³ Guyu' resa'tu gudéreni lojni, yu' reni basacsı la'tu nez loj rebejn. Guyu'za huält as-too gudejdzatu trabajw sa'csi cahuiitu rebejn nani basacsıreni, cadejdzareni trabajw. ³⁴ La'tu banaj lajztu renani yu' latzguiib, guideb yälrbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyälınasa'c ni sajzru, niluxh yu'ni par tejpas.

³⁵ Na'c gunijttu xcälirililajz xtidx Jesucrist, sa'csi yälirililajzga gun xca'tu yälınabajņ par tejpas. ³⁶ La'tu nanab cuedxitu te che abejntu ni rłajz Dios, dxejc xca'tu nani aguniini guniidxni. ³⁷ Sa'csi xtidx Dios ni bia'n rnii: Asiäddzųgajxhpac dxej ni jiäädni, asiäddzųgajxhpac dxej ni jiääd nani siääd, dipacni gaclaa.

³⁸ Renani nabaņsa'c sibannäj yälirililajz, niluxh palga yu' chutej ni guidxeyb chalilajz, dini'c gun guibaa lazä.

³⁹ Niluxh nuure dinu gac si'c reni rusaan yälirililajz te nireni loj dojl. Nuure najcnu renani rililajz xtidx Jesucrist te ļaa xaimnu par tejpas.

Yälirililajz

11 ¿Xhini'c najc yälirililajz? Yälirililajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni. ² Dios huinälajz retoxtadgoldoonu sa'csi huililajzreni xtiidxni.

³ Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

⁴ Gojpa toAbel yälirililajz badzubyaalni rexquidxaani lo Dios. Yälrbijbyaal xtenni sajzru loj yälrbijbyaal xten toCaın. Ni'cni gunii Dios najc toAbel beņsa'c. Naj mase agujt Abel, sanuutis racbeenu xcuent yälirililajz ni gojpnini.

⁵ Sigajcza gojp Enoc yälirililajz, ni'c sinä Dios Enoc xhaguibaa, guideb nabajņni, te na'c niejtni. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubaņsa'cni, baspaani lajz Dios. ⁶ Rut chu tejdi sajz guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzani sudeed Dios xcälınasa'cni loj renani rguilini, nalajznu renani rłajz gumbeepac Dios.

⁷ Gojpa toNoé yälirililajz. Che räjp Dios lojni siajbpac nisguij ni gajdreni fii, huililajzni. Bejn ni si'c ni räjp Dios.

Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpni yälrlililajzga, bejnni gubibde rebejn guedxliuj, guni-jtreni sa'csi direni nililajz xtiidxni. Dxejcti cua'ni yäl'n-abansa'c ni siääd xcuent yälrlililajz.

⁸ Sa'csi gojp toAbram yälrlililajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro chääni. ⁹ Gojp toAbram yälrlililajz, ni'c huiläjzni si'c benzijit loj reyuj ni räjp Dios gudeedni lojreni. Ro'c guläjzreni si'c lajdx benzijit. Guläjzneni neñ reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga. ¹⁰ Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹ Sigajcza gojp toSara yälrlililajz te mase anajcni beñgool niluxh agudejd chu xi'nni, cua'ni yäl'nibee xten Dios te gujcnani nan, guyu' te xi'nni, sa'csi huililajzni susoob Dios xtiidxni. ¹² Ni'cni mase siäddzungajxh dxej ni guet toAbram, guyu' xhidalduxh xajjni. Si'c rebalxh-aguibaa näj si'c reguibäzluje' xten yujxh ni tre' ro' nisdoo, si'c najcreni xhidalduxh, nicla gac guigabreni.

¹³ Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälrlililajz, bahuiireni lo yujga zitro, ni'c bibalajzreni, sa'csi anajreni najcreni benzijit, cansajsiireni lo guedxliuj. ¹⁴ Reni rnii si'c, rniliireni caguilsijceni cadro gac lajdxreni. ¹⁵ Paru niujnreni xhigab lajdxreni najc guejdx cadro biriireni, pet niajc nibisacreni ro'c. ¹⁶ Niluxh laareni rlaizreni te lajdxreni ni sajrcru, nalajznu lajdx Dios xhaguibaa, ni'c rguuilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

¹⁷ Gojpza toAbram yälrlililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: ¹⁸ "Isaac guniidx chu xhidajl xajglu, xagdoolu." ¹⁹ Sa'csi nanchee toAbram rajp Dios yäl'nibee te guspajjnni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰ Näjza toIsaac gojp yälrlililajz benle'ni toJacoob näjza toEsaú, räjpni xhini'c gun tejpgareni. ²¹ Gojpza toJacoob yälrlililajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojnni Dios. ²² ToJosé gojp yälrlililajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtuzjtni.

²³ Gojp rexuczajn Moisés yälrlililajz, ni'c cheni gojl Moisés, bacua'tzrenini choñ bäii, sa'csi bahuiireni bázdaanni. Direni niu xtidx reii ni gunibeeni, räjpni ju'treni báz niguii. ²⁴ ToMoisés gojp yälrlililajz, ni'cni che aguroobni di rlaizni nirilajni xi'n xindxa'p reii xten Egipto. ²⁵ Bejnne xhigab tednäjni trabajw rexpejn Dios lacuaa niujnni redzuun ni rchaglajz rujn rebeñ Egipto, sa'csi najc reni'c dojl, luxh tera'tsi ruspaareni lajz bejn. ²⁶ Par laani maazru sajz tedni lagajc trabajw ni gudejd Jesucrist lacuaa ni ajpni reyäl'nasa'c xten Egipto sa'csi

laani cabäjtisni reyäl'nasa'c nani churu gudeed Dios lojni. ²⁷ Gojp toMoisés yälrlililajz biriini lajdx reEgipto, dini nidxejb yälrdxe'ch xten reii, huinuutis gusudzu'tzni si'cni najc xhigabni, ruhuiini loj nani di guzeñ, nalajznu Dios.

²⁸ Gojp Moisés yälrlililajz bejnne lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. ²⁹ Gojp rexpejn Israel yälrlililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlaiz rebejn Egipto nidejd, gubi' nis, dxejc gulo'reni neñ nis.

³⁰ Xcuent yälrlililajz gurebän paderguij xten guedx Jericó, cheni basa' gajdz dxej caded huält rexpejn Israel guejdxga. ³¹ ToRahab, te gunaguujdx, gojnzani yälrlililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniä? Di galädi guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent reto-profe't. ³³ Guiraaareni gojp yälrlililajz ni'c bejnreni gaan xhidajl reguejdx, bensa'ceni yälguxhtis, cua'reni xcäl'racnäj Dios ni bia'n diidx xca'reni, basäuren ro' rebeedz. ³⁴ Guyu'reni neñ te balduxh luxh xhet gujcdireni, gojl baxunreni te di niejtreni con espad. Reni gujc beñrdxajg, guzutu'tzreni gujcreni nadipduxh, gujcreni beñduxh lo gueñ, barilaagwreni resoldaad xten reni rdx'e'ch lojreni. ³⁵ Guyu' regunaa ni cuasac rextogoolreni, gubansacreni lo rebengut.

Sgaiireni gujt xcuent yäl'rusacsí lacuaa nicäjbreni nusiech lajzreni te nusläa bejnreni sa'csi rlaizreni xca'reni stee yäl'nabajn ni sajrcru. ³⁶ Sgaiireni gudejd trabajw guniyaj bejnreni, gudinnaj bejnreni chiir, cuaduuzaren caden, guyu'zaren latzguuib. ³⁷ Guyu'za reni gujt che bacuaa bejn guj yejcreni o che gujcreni tio'p la' con sier. Guyu'za reni basacsí bejn te guro'nreni yälrlililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdej-dreni trabajw rusacsí bejnreni. ³⁸ Sa' rebejnnga di nungäjl rebeñ guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gauren nicla nis te yäreni; cuanzajreni nez neñ redajn, nez neñ rebiliää näj nez neñ guedduxh ni yu' neñ yuj. ³⁹ Guiraa rebejnnga gojp yälrlililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, ⁴⁰ sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laareni nani bia'n diidx guniidx Dios.

Guihuitisnu lo Jesucrist

12 Ni'c najcni si'cni suga'nu galäii guiraa rebejnre luxh cahuiireni xcäl'rilililaaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhid nuure lo xcäl'nabajnnu, te di jieednu chosaanu nez lo nezyuj ni sasanäanu nez cadro chonnu. ² Do'o guihuidzu'tz nez loj Dad Jesucrist nani guläxtiej, nani gu-

luuxza xcälirililajznu. Jesucrist gudejd trabajw lo crujuz, dini nitujy gujtni lo sa' yälgujtgä, sa'csi najnni cheni agudejdn trabajw, sica'ni yälrbalajz; naj agurejni xlad-bee Dios cadro rnibeeni.

³ Coljujn xhigab la'tu xho gudejd Jesucrist ladzñaa rebeñ dojl, te na'c guidxajgtu, na'cza jieedtu lajl ni cabäjtuni. ⁴ La'tu gajd xtiejntu guixe' lo yälrucuanäj dojl. ⁵ ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcälñaj Dad niclaza jieedlu che tiñajni luj.

⁶ Sa'csi si'c runnaj Dad renani sanälajzni, rujnni riaa guiraa renani rca'ni si'c xi'nni.

⁷ Palga gatijp lajzlu lo xcälñaj Dios, sica'ni luj si'c xi'nni, sa'csi ¿chu dad di gunnaj xi'nni? ⁸ Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redołgujdx. ⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rrajzni. ¿Xhicuent dinu cuadijg xtidx xtadnu ni yu' xhaguibaa te si'c jia'pnu yälñabajñ, ä? ¹⁰ Xtadnu lo guedxliujre bennajreni nuure tio'p-choñ dxej, te gac guesoobnu xtiidxni. Niluxh si'c runnaj Dios nuure te jia'pnu te yälñabanya, te gac nayazanu sigajc najcni laani. ¹¹ Guliini xhet xhi yälñajdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yälñajga rusooob xtiidxni, rca'reni te yälñabanya ni rbecdxilajzreni.

Riez guze'ni xtidx Dios

¹² Ni'cni colsudzu'tz reñaatu ni abadxajg, colsudzu'tz yecxhijbtu ni abadxajg, ¹³ te colquiiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Colquiiil xho cuedxinäjtu guiraa rebeñ. Colchanä te yälñabanya, sa'csi renani di guibanjadi, digacdi fiireni loj Dad Jesucrist. ¹⁵ Colhuisa'c te di gunijt chutejtu lo xcälracnäj Dios, colñatiro gac chu tejtü si'c te cuanlaa ni rujn daan, sa'csi sa' bejnga suxhiñni guiraa renani ahuililajz. ¹⁶ Nicla tejtü na'c ga'p stee gunaa te laad, nungäjł cuäznäjni chäältisni. Na'cza gactu bejñ ni di jiu xtidx Dios, si'c gujc toEsaú cheni bato'ni xcälñasa'cni ni najc xtenni sa'csi najcni xingan galoo xtadni. Bato'nini te cua'ni yälrajwtis. ¹⁷ Anajntu, cheni rrajzni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru ni-ajcđi nica'nini.

¹⁸ Colñatiro, sa'csi la'tu di'tu nibig lo te dajn cadro rajc rsiaj bejñ, te dajn ni galoo cayecduxh guiboo, cadro nacäjy, nacäiboo, cayajcza bedonduxh. ¹⁹ Diza diajgtu niejn xse' trompet, xse' Dios si'c biendiajg rexepeñ Israel agujc xchero. Luxh che biejn diajgredi rediidxga, direni nutiplajz, gunabduxhrene na'cru guiniini lojreni. ²⁰ (Sa'csi direni nutiplajz diidx ni caniiini, räjpni: "Palga ted te mantis guläj xhuj dajnga, colju'ni con guij.") ²¹ Te yälñadxebduxh najc nani guzeñ ro'c, lagajc to-Moisés räjp: "Cayacđitä yälrdxejb."

²² Niluxh la'tu agubigtu lo dajn xten Siön, cad najc lajdx Dios ni nabajñpac, nalajznu guedx Jerusalén ni yu'

xhaguibaa cadro yu' xhidalduxh xangl Dios, ²³ cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respit xten rebeñ nani abasia Dios te anajcreni bennasa'c. ²⁴ Agubigzanu loj Jesucrist nani suga' galäii nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jiäjł lajz Dios, luxh ni'c sajcrü loj nani rniab xtiejn toAbel. Xtiejn toAbel rniab quiiix nani bagu'ni.

²⁵ Ni'c colñatiro te di cuälaztu nani canii lojtu rextiidxni. Palga di rebeñ nidedbia sa'csi gulälaz nani baluii bejñ ni siääd guedxliujre, ¿xho jiennu tedbianu palga guilälaznu nani ruluii nani siääd xhaguibaali? ²⁶ Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa." ²⁷ Che gunii "ste huält", ni'c säloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälrdxejb näjza yälñadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

Xho guspaa bejñ lajz Dios

13 Colchanuu lo yälrinälajz sa'ni. ² Di gusaantu gudeedtu roliztu guidzujñ biooz, sa'csi loj reni bejñ si'c, yu'reni badeed rolizrene bidzujñ xangl Dios rolizrene, niluxh direni niacbee chu najceni.

³ Colñaj lajztu reni yu' neñ latzguuib, ascanu la la'tu ni yunäreni latzguuib. Colñajza lajztu renani basacsí bejñ, ascanu la la'tu ni cagusacsíreni sa'csi näjza la'tu najctu benguedxliuj si'c najceni.

⁴ Colga'p xpala'n yälguçhñaa te guiban-nayatu con chäältu sa'csi sujn Dios yälguçhtis rebeñ ni resnäj chääl bejñ näjza reni rusguee rebeñxteb.

⁵ Na'c chanälajztu meel, colguibalaznäj ni rajptu, sa'csi Dios agunii: "Dipacna gusanälu, dizana cuälazälu." ⁶ Ni'c dinu guidxeeb guiniinu:

Dad ni yu' xhaguibaa najc ni rcanäj narä; dina guidxebä xhitis ni gunnäj bejñ narä.

⁷ Colñaj lajztu renani baluii guiban'sactu, ni basule'za xtidx Dios lojtu; colhuii xho nabajñreni te sigajcza colchanä xcälirililajzreni.

⁸ Sigajc gujc Jesucrist naai, sigajcza najcni nadxej, sigajcza sajcnii par tejpas. ⁹ Na'c gusaantu gusiejchrene lajztu xcuent ste'ca yälruluii ni digac si'c najc xtidx Jesucrist. Sacduxh sudzu'tz lastoonu lo yälracnäj ni ruluii xtidx Dios, xhet lojdi yälrajwtis. Xhet sajcdi rebeñ nani rujntis xhigab xcuent yälrajw.

¹⁰ Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni neñ guidoguijd galoo. ¹¹ Sa'csi pxixhojzro xpejñ Israel rinä xtiejn reman neñ yu' ni laa dxanduxh te biäu lo dojl xten rebeñ, niluxh rize'ceni xpääl remanga te laad, dejtz guejdxga. ¹² Si'cza gujt Jesucrist te laad, dejtz guejdx, te basiani xtojł rebeñ xcuent lagajc xtiejnni. ¹³ Naj colcho' chonnu loj Jesucrist te laad dejtz guejdx te guideednu

trabajw näjza yälxtujy si'cni gudejd Jesucrist. ¹⁴ Sa'csi lo guedxliujre dxunlaasinu, niluxh caguiilnu laadxnu ni chu jiäädru, te ro'c guidxunnu par tejpas. ¹⁵ Guideb xcälracnäjä Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni näj jieļnu redij. ¹⁶ Na'cza jiälļajztu guntu huen, gacnäjä sa'tu, sa'csi reni'cni najc redzuun ni rdxaglajz Dios.

¹⁷ Coļcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Coļyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Coļnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. ¹⁹ Rniä lojtu, guiniabrutu loj Dios, te gun Dios jiojb guibi'ä jiälä lojtu.

Te didxle' näj lult xtixtios

²⁰ Dios xten yälrbedxilajz ni baspajņ Dad Jesucrist lo rebēņgut, Jesucrist najc baxtorduxh xten rexiiļ xcuent rejn ni bejn gusojb didxcoob xtēnni ni najc par tejpas. ²¹ Dios gun gactu beņsa'c, beņdxojņ loj xhitis te guntu ni rļajzni, näj gunni loj guiraa nuure si'c ni rļajzni xcuent Jesucrist. ¡Coļspaa lajz Jesucrist par tejpas! ¡Sugacni si'c!

²² Resa'nu, rniabä lojtu, coļcuedcxi lajztu, coļcuadiajg rediidx ni ruliļdxre, sa'csi riojbgā cacuaä te labäz guijtze lojtu. ²³ Coļyacbee abirii bejtznu Timoteu latzguiib. Palga guidzūņgajni ree, siädnäāni jiädhuiä la'tu.

²⁴ Coļgudeed xtixtios loj guiraa renani ruluii la'tu näj loj guiraa rebejtznu ni rililajz. Rebeņ Italia ruxhaļ xtixtios lojtu.

²⁵ Gacnäjä Dios guiraatu. Sugacni si'c.

Santiago

Santiaag rucuaa guijtjz loj renani nare'ch lo guedxliuj

1 Narä Santiaag, xmos Dios näjza xten Dad Jesu-crist, ruxhaĵä xtixtios loj guitzubitio'p cuaa rexpejñ Israel ni nare'ch lo guedxliujre.

Yälñajñ nani runiidx Dios loonu

² Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezyuj Dios, ³ sa'csi che rsiajctu reni'c, rsiajctureni te don la guliipac ahuililajztu xtidx Dios, dxejç rsieedrutu yälrbecdxilajz. ⁴ Dxejcti yälrbecdxilajz sajç gunni xtzuumni neñ lastootu, te gactu beñsa'c, bejñ ni aguyajl lo xtidx Dios, nani xhet cayäädxd xçälñajñni.

⁵ Palga yu' tejtü ni cayääd xçälñajñni, suguniabnini lo Dios, sa'csi Dios rudeedduxhni yälñajñ loj guira'ti bejñ, luxh dini guiniididxlaa lojni. Palga guiniab bejñni, sudeedza Diosni. ⁶ Niluxh che guiniabni, suchalilajzpacni, na'c guntio'p lajzni, sa'csi bejñ ni runtio'p lajzni najç si'c bāj ni sanä bej, nezree-nezre'c sääbni. ⁷ Nani najç si'c, na'c gunni xhigab yu' xhi xca'ni lo Dad Jesu-crist. ⁸ Sa'csi nani runtio'p lajzni, lo guiraa ni rujñni nadxej rujñni tej xhigab, guixee rujñni xte'ca xhigab, di gacdi chanuuni tejsi xhigab.

⁹ Te sa'nu ni najç nadolajz, suguibalajzni sa'csi najçni beñro sa'csi guläs Diosni, ¹⁰ sigajçza bejtznu ni yu' xhixtenni, suguibalajzni sa'csi abaluu Dios lojni najçni bejñ ni xhet sajçdini, sa'csi nägajç laani sinitlojni si'c rnitloj reguii ni yu' lo cuaan ni yu' loniaa. ¹¹ Sa'csi che rliejñ gubijdz näjza te belaa, li rgoĵ recuaanga, li riuii reguii ni çaj lojni, dxejç rtejbreni, dxejcti agunijt xçälñajzacrui. Si'çza sinitloj te bejñ ni yuduxh xhixtenni laĵ ni yu'ni lo xnezyujni.

Xhi xca'ni che tedni trabajw

¹² Chicbaa niguii ni rsiudzu'tz laĵ ni cadejñni trabajw, sa'csi che agunii Dios didxsa'c xcuent nani bejñni sica'ni coroj xten yälñabajñ par tejpas ni bia'n Dios didx gudeedni loj rebejñ ni sanälajz Dios. ¹³ Che gunijt tejtü, rujntu dojl, na'c gäbtu: "Dios bejñ banitä", sa'csi di gacdi quiquiil Dios te gunni cosguijdx, digacdi gunijt Dios, luxh sigajçza di gacdi gun Dios gunijt te bejñ, gunni dojl. ¹⁴ Niluxh tejtatu runijt che rcäjy xçäriejntu sa'csi rijajb yejctü guntu cosguijdx. ¹⁵ Che rijajb yejctü guntu cosguijdx, runijttu rujntu dojl, luxh dojl che abejntuni, riädñani yälgujt.

¹⁶ Sa'ä ni sanälazä, na'c gusaantu gusgueereni la'tu.

¹⁷ Guiraa recoshueen, guiraa recossa'c xhaguibaali

siäädreni loonu; Dios ruxhaĵreni, lagajç Dios ni benchee rebajl xhaguibaa, Dios nani di guçaa, sigajçtis najçni. ¹⁸ Lagajç xcuentni bejñ Dios gacnu xpejñni sa'csi huililajznu xtidxliipacni, te gacnu rebeñ galoo loj rexpejñni.

Xho nanab jiennu

¹⁹ Acanajntu recosre, sa'ä ni sanälazä. Niluxh tejtatu nanab gusquejñni te gucuadijgñi, per gaçlaani te guiniini, gaçlaazani te guidxe'chni, ²⁰ sa'csi xçälrdxe'ch bejñ dini gun xçälñasa'c Dios. ²¹ Ni'çni colçuälaz guiraa recosguijdx, guiraa recoslatsiaj ni ria'n. Guideb yäl-nadolajz colçhalilajz xtidx Dios ni basule'nu, ni yu'pac lastootu, sa'csi ni'ç najç ni sajç gusçlaa xaimtu lo dojl.

²² Niluxh baluui lo guira'ti bejñ najçtu bejñ ni rusoobpactu xtidx Dios, xhet bejñdi ni rucuadijgñtis xtiidxni, ni rusgueeni lagajç laani. ²³ Sa'csi palga najç te bejñ te nani rucuadijgñtis xtidx Dios, niluxh dini gusoob didxga, najçni si'c te bejñ ni ruhuii lojni loj te guihuajñ.

²⁴ Sa'csi che ruhuii xho najçni, sägajçni, riallazgajçni xho najçni. ²⁵ Niluxh nani ruhuidzu'tz lo leisa'c, nalajznu leii nani rusçlaa bejñ, luxh rusobpacni leiiga, nani lacuaa jiallajzni nani riejñ diajgñi, rujñpacni ni çaj lo leiiga, bejñga najç ni sajç yälrbalajzpac lo xhitis ni rujñni.

²⁶ Palga yu' tejtü ni rujñ xhigab najçni te bejñ ni ran-duxh Dios, niluxh di gacdi gusäuni ro'ni, guiraløj rniini, bejñga rusguee lagajç laani, luxh xhet sajçdi yälrajñ Dios xtenni. ²⁷ Yälrajñ Dios ni najç guliipac, ni xhet nu'chdi lojni najç scree: çahuii rebisiäjñ, näjza regu-naa ni agujt çäälñi che yu' xhi rquineni, näjza na'c säblajztu guntu nani rujñ rebeñ guedxliuj ni di çhalilajz xtidx Dios.

Nanab tebloj jiennänu guira'ti bejñ

2 Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'ç di gacdi guntu xhigab sajçru tej bejñ lo sabejñni. ² Palga guidzujñ te bejñ xquidoootu yu' niloor ñaani, najçwni ladsa'c, dxejcti jiu'za te bejñ nani xhet rajpdi, najçwni ladyujxh, lad-beed, ³ dxejcti la'tu jiuurutu nani najçw ladsa'cga, naatu: "Ree gurej lo yagxhilsa'cre", dxejcti gäblu lo bejñ ni xhet rajpdi: "Rec gusulii o gurej lo yujre", ⁴ çla xhet rujnditu xhigab garenca najç tej bejñ lo sa'ni, ä? Luxh dxejç acayajctü si'ç juejz ni rujñ xhigab guijdx.

⁵ Çolçgucuadijg, betzä ni sanälazä! Agule Dios bejñ nani xhet rajpdi lo guedxliujre te ga'preni yälrililaz-duxh, te lo xçälñnibee Dios xca'reni xçälñasa'c ni bia'n diidx gudeed Dios loj renani sanälajzni. ⁶ Niluxh la'tu

agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsitu, li rgobxhaxhrenei la'tu, rinäreni la'tu loj reguxhtis, ä? ⁷ ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸ Palga guliitu cagusoobtu leii xten xreiiu Dios, si'cni caj lo xquijtz Dios scree: "Colchanälajz sa'tu sigajc rinälajztu lagajc la'tu", laaca rujntu. ⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu bejn dojl, bejn ni rbälaz leii. ¹⁰ Palga yu' te bejn ni rusoob guiraa ni caj lo xleii Moisés, niluxh runijtni lo tejtis diidx ni caj lo leii, abani-jtpacni, najcni si'cni dini nusoob nicla tej diidx lo guideb leiiga. ¹¹ Sa'csi lagajc Dios ni gunii: "Na'c guesnäjlju bejn ni di gac chäällu", lagajc laani guniizani: "Na'c ju'tlu." Palga dilu guesnäjl bejn ni di gac chäällu, niluxh rugu'tlu te bejn, abanijtlu xcuent guiralii releii. ¹² La'tu colguinii, colguibajn si'c rebejn ni gun Dios yälguxhtis con xtiidxni ni rusläa bejn lo dojl. ¹³ Sa'csi renani di gulaslajz bejn, che gun Dios yälguxhtisreni, dizani gulaslajz laareni. Sajcru yälrlulaslajz lo yälguxhtis.

Yälrlilajz näj dzuun ni rujn bejn

¹⁴ Resa'ä, ¿xhi sajc palga guinii te bejn: "Ahuililazä xtidx Dios", niluxh dini gun dzuun ni riäjl gunni, ä? Sa' yälrlilajzre, ¿la susläanini lo dojl, ä? ¹⁵ Palga yu' te bejtnu o te bisiajnnu ni dini ga'p xhajnbi, luxh xhetiza xhi gauni, xhi yäni, ¹⁶ luxh gäb tejtü lojni: "Sucuedxi lajzlu jiilu, suguidxa' lajzlu, suguidxaj xque'lu", niluxh dini gudeed nani caquiinni, ¿xhi sajc rediidx ni räjpni lojni, ä? ¹⁷ Sigajcza yälrlilajz nani di guquiil bejn gunreni xtzuum Dios najc si'c te ni agujt, sa'csi dini guquiil bejn gunreni dzuun.

¹⁸ Yu'za reni naa: "Luj rajplu yälrlilajz, narä runä xtzuum Dios; baluii narä xcälrlilajzlu xhet näjdi xtzuum Dios, dxejcti narä suluiä xcälrlilajz xcuent rextzuum Dios ni runä." ¹⁹ La'tu rililajztu yu' tejtis Dios. Laaca rujntu, niluxh näjza rebejndxab rililajz yu' tejtis Dios, racdiiltireni, rdxebduxhrenei. ²⁰ ¿La di rlaiztu gacbeetu, bejnayääl? ¿La ditu gan, yälrlilajz ni di guichagnäjl xtzuum Dios najc te yälrlilajz? ²¹ Dios badzucaj xtojll toxtadgoldoonu Abram sa'csi bejn ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. ²² Colhunii xho tejsi junt sadxaag xcälrlilajz toAbram dzuun ni bejn ni, dxejcti sa'csi bejn ni nani gunibee Dios gunni, bejn Dios gujc xcälrlilajz ni sa' yälrlilajz nani rlaiz Dios ga'p rexpejn ni. ²³ Dxejcti huile' xtidx Dios cadre caj scree: "Abram huililajz ni räjp Dios lojni, ni'cni badzucaj Dios xtojllni, cua' Dios Abram si'c te bejnaya." Birilajzani "xamiigw Dios."

²⁴ Ni'cni ruhuiitu rca' Dios te bejn si'c bejnaya nez lojni xcuent xtzuum Dios ni rujnzani, xhet ganaxtis xcuent xcälrlilajz bejnaga. ²⁵ Sigajcza gusajc toRahab, ni gujc te gunadxab. Dios badzucajza xtojllni, bejn Dios xhigab najcni te bejnaya sa'csi bejn ni xtzuum Dios che badeedni rolizni bacua'tzloj tio'p xpejn Israel ni gujc guixhajz ni sagula'tz guejdxga, dxejc gucnäjnireni te

siireni ste'ca nez yuj. ²⁶ Sigajc ni di gacdi guibajn tiejxh bejn palga xheti sprit, sigajcza di gacdi guibajn yälrlilajz palga dini gun dzuun ni rnibee Dios gunni.

Rediidx nani rnii luudxnu

3 Resa'ä, na'c gac xhidajltu bejn ni ruluii xtidx Dios, sa'csi anajnnu rac yälguxhtisroru rebejn nani ruluii xtiidxni. ² Sa'csi guiragajcnu riennu xhidajl cuaa dojl. Palga yu' te bejn ni di gunijt lo diidx ni rniini, laani najcni te bejnsa'c, rajcza rnibeeni guideb tiejxhni. ³ Palga rusälnu guuib ni ru' ro' cabaii te chääni cadre rlaiznu jiini, rnibeezanu guideb xtiejxhni. ⁴ Colhunii rebarcwro, mase siolduxhrenei, luxh rebeduxh rulanaareni, niluxh capitán ni rusaj barcw lo nisdoo, te guibbäz ni caj xhajn barcw nen nis, con ni'ctis rinänini cadrotis rlaizni. ⁵ Sigajcza najc luudxnu, najcni te labäz tiejxhnu, luxh colhunii lacti didxro rniini. Najcni si'c te balbäz ni rajc ruze'c guiragajc reyajg ni yu' dajn. ⁶ Luxh luudxnu najc si'c te bajl. Rnii luudxnu guiraa redidxduudx ni rnii rebejn guedxliujre nani rdxech lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. ⁷ Rebejn sajc gusiadcooreni guiralajz guidxaa, guiraa mane', guiraa bäl, guiraa man lo nisdoo, abasiadcoo bejnreni, ⁸ per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. ⁹ Lagajc luudxnu rliä'pnu xpala'n Dios Xtadnu, lagajc laani rniyajnu sabejnnu ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn. Rebetzä, ¿xhet si'cni nungäjl di gacni! ¹¹ ¿La rbää bejn nisnejxh näjza nisrop lo tejsi bisie, ä? ¹² Betzä, ¿la caxajsi sajc xcaj aceitun loj te yagiiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yäl'najn ni siääd xhaguibaa

¹³ ¿Chuni'c lo guiraatu yu' xcäriejn ni, nanduxhni, ä? Suguluiini xho najcni xcuent xcäl'nabansa'cni, sugunni xtzuumni guideb yäl'nadolajz ni rudeed xcäriejn ni. ¹⁴ Niluxh palga yu' yälrdxe'ch lo sa'lu ni runnanläa lastoolu, näjza rujntu guira'ti parsi xcäl'nasa'c lagajc luj, na'c gaclu gualajz, sa'csi ni'c najc si'c ni caniiilu didxrusguee xcuent xtidxlii Dios. ¹⁵ Sa'csi sa' yäl'najnre, xhet xhaguibaadi siäädni, alga najcni yäl'najn xten guedxliujre, xten rebejn guedxliuj, xtenza rebejndxab. ¹⁶ Sa'csi cadre yu' yälrdxe'ch lo sa'ni, näj cadre rujn bejn guira'ti parsi xcäl'nasa'c lagajc laani, ro'c yu' biey, yu' guiralajz latsiaj. ¹⁷ Niluxh yäl'najn ni ruxhajl Dios, ganid-doo najcni naya, dxejcti rulecdxini xcäriejn bejn, dxejc rujn ni rajc bejn nadolajz lo sa'reni, rujnzani saru runnäjl bejn sa'reni, rulazlajz bejn sa'reni, rujnzareni guiralajz dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸ Renani rguuil yälrbedxi, yälrbedxi rbe'creni te xca'reni te yäl'nabannaya nez loj Dios si'c xcäl'nasa'creni.

Ni nabaññäj guedxliuj

4 ¿Casiääd rebiejy, reyälrdxe'ch lo sa'ni ni casiajctu? ¿La direni jiaäd xcuent lagajc xhigab ni yu' lastootu, ä? Lagajc rexhigabga rujn biejy neñ lastootu, ruscäyjreni xcäriejntu. ² La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilñäjtu sa'tu. Ditu ga'p nani rlanjtu sa'csi ditu guiniabni loj Dios. ³ Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu. ⁴ ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn reben guedxliuj, bejnğa rdxe'chreni lo Dios, ä? Ni'cni palga yu' chu tejtü ni rlanj chanuu lo ni rajc lo guedxliujre, bejnğa rdxe'ch lo Dios. ⁵ O ¿la rchalotu xlia'si caj lo xtidx Dios rediidxre: "Sprit ni baxha! Dios te cuääzni neñ lastoonu, randzu'ni nuurnu sa'csi rlanjni guinibeeni nuurnu"? ⁶ Niluxh runiidxru Dios xcälracnäjni loonu. Ni'cni rnii xtiidxni scree: "Dios rdxechnäj renani runnaro lagajc laareni, niluxh rudeedruni xcälracnäjni lo rebenñadolajz." ⁷ Coljiu'pac lo xnezyuj Dios. Colsudzu'tzpac te di guntu ni rlanj benđxab, te guxuñni lojtu. ⁸ Colguibigru lo Dios te guibigzani lojtu. Benđojl, colquii bnaatu, nalajznu na'cru guntu latsiaj; colgusia lastootu, la'tu ni runtio'p lajztu. ⁹ Sugacnaj lajztu, suchuti xliajs, colyonduxh. Colguchaa xcälruxiustu, colca' yälhuin, colguchaa xcälrbalajztu, colca' yälroon. ¹⁰ Colyajc si'c bejn ni xhetliidi sajz nez loj Dad Jesucrist, te laani guiliäsni la'tu gunni la'tu benro.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yälguhxhtis sa'ni, reni'c rniyaj xleii Dios, rujnreni yälguhxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii. ¹² Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajzca gunitloj bejn. La'tu, ¿chuxh najctu te guntu yälguhxhtis lo sa'tu, ä?

Dinu gan xhi gac guixee

¹³ Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. ¹⁴ Luxh nicla gantu xho gac xcälñabajntu guixee. Xcälñabajntu najc si'csi te za nani rienloj tera'tbäz, dxejcti rnitlojni. ¹⁵ Hueenru guiniitu scree: "Palga rlanj Dios sibaannu, te jiennu dee o dec." ¹⁶ Niluxh si'c ni rujntu naj, rajc gualajztu rniitu didxro; luxh guiraa redidxroga najc dojl. ¹⁷ Ni'cni ni najn xho riäjł gunni, palga dini gun si'c, rujnni dojl.

Rulijdxni rebejn ni yu' xhidajł xhixtenni

5 Colgucuardiajg xtidxä, bejn ni yu' xhidajł xhixtenu. Colyoön, colcuedxa' xcuent recasionduxh ni

sactu. ² Guiraa rexhixtentu nani rajptu aguxhijñ, luxh rexhajbtu agudajw rebaguiidni. ³ Oor näjza pla't xtentu agubibteijñni, aguxhijñni. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. ¡Xlia'si batiedajntu xhixtentu neñ redxej lultga! ⁴ ¡Colhüii! Ditu niguixsa'c loj reni bejn xtzuuntu, ni'cni laareni cayujñreni yälquij lo Dios xcuenttu. Luxh xhadi-ajgli Dios xten reangl ni yu' xhaguibaa abidzujñ yälquij xtentu ni cabe'c renani batie' xcälñasa'ctu. ⁵ Agubansa'cpactu lo guedxliujre, bejntu lanij si'ctis ni rlanjtu, abastio'tu lastootu neñ redxej xten yälrugut. ⁶ Gudiiltu xho bagu'ttu reben'sa'c luxh laareni dxiiis gusujreni, xhet bejndireni te na'c nugu'ttureni.

Colcuääz jiaädxhii Diostu

⁷ Resa'ä, dxitis colcuääz guidzujñ dxej cheni jiaäd Dad Jesucrist. Colhüii xho rujn bejn ni rbe'c binij, dxitis rbäjzni gac xcälñi la! ni riabj nisguigaloo näjza nisguij ni riabj lult. ⁸ Si'cza la'tu colcuääzdx, colgustioob lastootu sa'csi asiäddzungajx dxej ni jiaäd Dad Jesucrist. ⁹ Resa'ä, na'c chale'ctu xquej sa'tu, didi gun Dios yälguhxhtis la'tu, sa'csi asiäddzungajx dxej che guidzujñ Dios ni najc Juejz. ¹⁰ Rebetzbidä, colhüii xho gudejd reniguii nani bacuaa xtidx Dios trabajw galoo, xho guläzzareni. ¹¹ Colhüii xho rniinu chicbaa renani guläzdx lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yälrulasajz.

¹² Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguhxhtis la'tu.

¹³ ¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugoñni dij te guili-ä'pni xpala'n Dios. ¹⁴ ¿La yu' chu tejtü ni cayacxhuu, ä? Sucueedxni rebenğool ni rnibee neñ guidoo, te guiniabreni lo Dios xcuentni la! ni cagusälzareni se't lo cuajni con laj Jesucrist. ¹⁵ Luxh palga rililajzpacreni che canabreni, siajz benracxhuuga, siliäs Jesucrist bejnğa. Luxh palga bejnni dojl, sibicaj xtojłni. ¹⁶ Ni'cni colguxhobdojl lo sa'tu, colñab lo Dios xcuent sa'tu te jiajctu. Che rniabduxh te beñ naya lo Dios, dzunroza rujn Dios. ¹⁷ Elías, te bejn ni gunii xtidx Dios agujc xchero, gujzca te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj chon ijz garol. ¹⁸ Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyälñasa'c xtenreni lo guedxliuj.

¹⁹ Rebetzä, palga yu' chu tejtü ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰ sugacbee bejn nani racnäj guirii benđojł lo xnezyuguijdxni te guibisacni lo Dios, bejnğa agucnäjni te gulaa xaimni lo yälgujł, te gubicajza guiraa xtojłni, mase xhidalduxh najc xtojłni.

1 Pedro

Pedr cacuaa guijtz loj reni rililajz ni nare'ch

1 Narä Pedr, te apost xten Jesucrist, cacuaä guijtzre loj renani agule Dios gac rexejnni nani rbäjz si'c benzijt lo reguedx Ponto, Galacia, Capadocia, Asia, näjza Bitinia. ²Xtadnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenni xtzuunni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuecdxini lastootu lo guiraliiti.

Te yäl'nabajñ ni cabäöznu

³ Colguiliä'p xpala'n Dios ni najc Xtad Jesucrist, Dios nani xcuent xcäl'rulaslazduxhni bejnni gojpnu te yäl'nabañcoob sa'csi baspañsacni Jesucrist loj rebengut. Sa'csi rajpnu yäl'nabañcoob, ni'c nadippac lajznu.

⁴ Ni'cni laani suniidxni te yäl'rusalajz ni di nitloj, ni di xhiñ, ni di jiuui si'c riuii rebalajg. Yäl'rusalajzga aguluchedzu'tzni xhaguibaa par la'tu, ⁵ nani cayapdu'z'xcäl'milaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷ te guzeñ xho rililajztu. Xcäl'rililajztu sajrcru lo oor nani rnitloj, niluxh xcäl'rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl'milaagwrni, näjza xcäl'rdimbicha'ni.

⁸ Mase gajdtu fii lojni, sanälajztuni. Mase ditu fii lojni ñaj, ahuililajztu xtiidxni, rbalazduxhtu guideb yäl'rbalajz ni rut rajcdi rusule', sa'ni yu' xhaguibaatis, ⁹ sa'csi xcäl'rililajztu suslaa xaimtu lo dojl, sica'tu yäl'nabajñ par tejpas.

¹⁰ Luxh xcuent yäl'ruslaa dojlre, rebejñ nani gunii xtidx Dios agujc xchero, laareni abasulexgaareni xcuent xcäl'racnäj Diosre nani siääd lojtu. Luxh bisiedduxhreni, gunabdiidzareneni, ¹¹ te rlajzreni gacbeereni chu bejñ o gucpac gac nani cagusä't Sprit xten Crist ni yu' neñ lastooreni che gunixgaani xho nungäj ted Jesucrist trabajw, dxejrcru xcasacni yäl'rnibee. ¹² Baluii Dios lojreni, di rediidxga soob neñ redxej ni nabañreni, alga par la'tu najc rediidxga. Ñaj agunii rebejñ ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhañ Dios Sprit Dxan xtenni te cuäözni neñ lastooreni. Näjza rexangl Dios ni rbäjz xhaguibaa rlajz gacbeerureneni rediidxga.

Xcäl'nabañnayanu nez loj Dios

¹³ Ni'cni, colsanij xcäriejntu, colgusudzu'tz lastootu, guideb lastootu colyenloj yäl'racnäj xten Dios ni abia'n diidx xca'nu che guibisac Jesucrist lo guedxliuj. ¹⁴ Gactu si'c biuux nani rusooob xtidx xtadni. Na'cru xcäjbtu guntu redzunguijdx ni bejntu galoo che gajdtu gumbee Dios. ¹⁵ Dios ni gule la'tu najc dxan. Sigajcza la'tu, loj guiralii ni rujntu colyajc beñdxan. ¹⁶ Sa'csi lo xtidx Dios caj scree: "Sajctu beñdxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujñ yäl'guxhtis loj guiraa bejñ xcuent dzuun ni bejnni, la'tu riäjñ guidxejbtuni guiraa dxej ni nabañsijctu lo guedxliujre. ¹⁸ Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo rextadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu, ¹⁹ badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist. ²⁰ Gulipacni che gajdli guirixtiej guedxliujre, gule Dios Jesucrist, niluxh ñajru, neñ redxelult che gajd guedxliujre nitloj, biädluilojni par xcäl'nasa'ctu, ²¹ la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl'rnibee lojni, ni'cni ahuililajztu xtidx Dios, luxh Diostis cayenlojtu ñaj.

²² Ñaj sa'csi abasoobtu xtidxliini, te si'c abasiatu lastootu te gac chanälajztu sa'tu, ñaj guideb lastootu col'chanälajzpac sa'tu. ²³ Sa'csi acua'tu xcäl'nabañcoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. ²⁴ Galooli gunii Dios scree:

Guiraa rebeñ guedxliuj najc si'c recuaan, guiraa xcäl'nasa'creni najc si'c reguii ni rcaj lo cuaan, recuaan rgoj, lirteljza reguii xtenni,

²⁵ niluxh xtidx xtad Jesucristnu rsiudzu'tzni tejpas. Luxh diidxre najc diidx ni basule'reni lojtu.

2 Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntioj lajztu, na'c chuguij lajztu xhixten sa'tu, na'c guiniyaj sa'tu. ² Si'c riojl rebäznite' le'ch, si'cza col'quiiil xtidx Dios par sprittu. Coljiojl xtidx Dios te gustioobrui la'tu lo yäl'ruslaa lo dojl, ³ palga agucebeetu lacti hueen najc xcäl'racnäj Jesucrist.

Crist najc si'c te guij ni nabajñ

⁴ Colguibig loj Jesucrist ni najc si'c te guij ni nabajñ. Laani suniidx yäl'nabajñ par tejpas loonu. Rebejñ

badzucaj guijga, niluxh Dios gulenini sa'csi sacduxhni.

⁵ Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenti, te gactu repixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl-nasa'ctu con xprixtentu. Dee najc nani rchaglajz Dios.

⁶ Sa'csi galooli gunii Dios scree:

Agule'cä te bejn neñ guedx Siön, nalajznu Jerusalén, ni gac si'c te guisa'c, te guiro ni rsiuj squiin te yuro. Chutis bejn ni chalilajz xtiidxni, dini jianxtujy.

⁷ Lojtu ni ahuillajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu', lagajc guijga gujc guijpac ni baliib squiin xten yu'ga

⁸ näjza:

Te guij ni rliaj ni' bejn, ni ruzälta'reni, laareni riabreni sa'csi direni gusoob xtidx Dios, luxh agunibexgaa Dios nitlojreni.

Renani gule Dios

⁹ La'tu najctu te cuaa bejn ni agule Dios, tejgatu najctu rebixhojz ni najc si'c reii xten Dios. La'tu najctu te beñnaya, te beñsa'c, rexejñpacni. Aguleni la'tu te gusule'tu reyäl'nasacduxh ni bejn Dios ni gurejdxte che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. ¹⁰ La'tu galoo rut najcditu, niluxh naj najctu rexejñpac Dios. Galoo gajd Dios gulaslajz, luxh naj abalaslajz Dios la'tu.

Colguibajn lo xnezyuj Dios

¹¹ Rebetzä ni sanälazä, nabajntu lo guedxliujre si'c beñzijt, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl neñ lastoo bejn te cuälazreni xnezyuj Dios. ¹² Colguibañsa'c laj ni yu'tu loj rebeñzijt ni di gac xpejn Israel te palga guiniyajreni la'tu gäbreni najctu beñlatsiaj, che fiireni redzunsac ni rujntu, siliä'ppacreni xpala'n Dios che jiädsac Jesucrist te gunni yäl'guxhtis.

¹³ Ni'cni, sa'csi huillilajz xtidx Jesucrist, colgusoob xtidx guiraa reni rnibeetu lo guedxliujre, si'c najc presidento, ¹⁴ regubernadoor nani ruxhalni te rujnreni yäl'guxhtis rebeñdojl näjza te guiliä'pni xpala'n rebeñ nani laaca rujnreni. ¹⁵ Sa'csi Dios rlajz guntu recossa'c te cuedxitu rextidxnayääl ni rni reni di rlajz gumbee didxlii xcuent Jesucrist.

¹⁶ Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios. ¹⁷ Ga'ptu yäl'nadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidento.

Gudejd Jesucrist trabajw te baluiini xho jiennu

¹⁸ La'tu ni najc mos, guideb yäl'nadolajz colgusobdiaj guiraa xtidx reklamtu, xhet ganaxdi relamsa'c ni najc nadolajz, näjza relam ni najc beñguijdx. ¹⁹ Sa'csi rchaglajz ruhuii Dios te bejn palga sa'csi rililajz te bejn

xtidx Dios rujn bejn huant che rdejndi trabajw luxh xhet bejndini. ²⁰ Palga la'tu rujntu latsiaj ni'cni rusac-sini la'tu, zchi guntu gaan palga rujntu huant rdejntu trabajw? Niluxh palga la'tu rdejntu trabajw sa'csi rujntu redzunsac, luxh rujntu huant, ni'c najc laaca nez loj Dios. ²¹ Te guntu si'c gurejdx Diostu, sa'csi gudejz Jesucrist trabajw xcuenttu te guluini xho guntu che chanuutu lo xnezyujni. ²² Laani dini niujn nicla tej dojl, laani dini nusguee nicla tej bejn con didx-xhii. ²³ Che guiniyajreni lojni, dini nudzu' yäl'riiyajga. Che cadejndi trabajw, dini nudzu' diidx niluxh bateedni lagajc laani ladzñaa Dios ni rujn yäl'guxhtissa'c. ²⁴ Gudeed Jesucrist trabajw si'c te beñdojduxh, bacuaarenini lo cruz te ro'c gusacsiduxh tiejxhni xcuent xtojlnu, te na'c gunrunu dojl, te guibañsa'cnu lo xnezyuj Dios. Gudi'guijdxreni tiejxhni te basiajcnii la'tu. ²⁵ Sa'csi galoo gujcti si'c rexiiil ni rut rajpdi, rijreni nezree-nezrec. Niluxh naj agubisac-tu lo xpaxtoortu näjza nani randzu' xaimtu, Jesucrist.

Xho nanab guibañäjtü chäältu

³ Sigajcza la'tu, regunaa ni abachñaa, colgusoob xtidx chäältu, te mase yu' tejreni ni di chalilajz xtidx Dios, sililajz xtidx Dios sa'csi fiini xho rujntu mase xhet rniidilu. ² Sa'csi fiini xho riulu xtiidxni näjza xho rniilu nadolajz lojni, näjza xho nabaññasa'cluni. ³ Na'c gusucheetu ganax lo jiaatis, si'c najc guichniil yejcti, näjza biaooreni rcaj diajgtu, guejntu, ñaatu, näjza ladsa'c ni najc sacru. ⁴ Colgusuchenäj lastootu yäl'nadolajz, yäl'rbecdxi lajz, näjza yäl'sanälajz, sa'csi direni nitloj, luxh sacduxhrene nez loj Dios. ⁵ Galoo si'cza bejn regunaa ni gujc xpejn Dios ni huillilajz xtidx Dios, basucheereni lastooreni, basoobreni xtidx chäälreni. ⁶ Si'c gujc toSara, basobdiajgni xtidx toAbram, gu-niizani lo toAbram, Dad. Naj najctu si'c laani palga rujntu redzunsac, näjza na'c guidxejbdiu.

⁷ Sigajcza la'tu, niguii ni abachñaa, colguibaññasa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yäl'nabajn par tejpas. Colyejn si'c, te gucua diajg Dios che cuedx-guiniabtu lojni.

Renani rdejndi trabajw che laaca rujnreni

⁸ Dee najc ni cania loj guiraatu, saru colguibaññaj sa'tu. Colgulaslajz sa'tu, colchanälajz sa'tu si'c rinälajz te niguii bejztni. Gactu beñsa'c, beñnadolajz. ⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyäl'nasa'c ni guniidxni lojtu. ¹⁰ Sa'csi scree caj lo xtidx Dios:

Nani rchaglajz guibajñni, luxh rlajzani saru tedni redxej lo guedxliujre, sugudxojnii guinii ro'ni didxnaj näjza didx-xhii. ¹¹ Guibicajni loj redzunguujdx, sugunni redzunsac'tis. Suquiiilni yäl'rbedxi te ni'c chanuuni. ¹² Sa'csi ruhuii Dios rebejn ni rujn dzunsac, rucua diajzani xtiidxreni che rniabreni lojni.

Niluxh rudzuréni lojni, rbälazzani renani rujn latsiaj. ¹³ ¿Chu laa ni gun latsiaj la'tu, palga la'tu rbaali lajztu rujntu dzunsa'c? ¹⁴ Palga caxäjsi tedtu trabajw che guntu redzunsa'c. ¡Chicbaatu! Na'c guntu xhigab, niclaza guidxeyjtu xcälruchejbreni. ¹⁵ Colgusaan guinibee Dad Jesucrist neñ lastootu, gususin te gudzu'tu diidx loj reni rniabdiidx lojtu xhicuent runlojtu guibi' Jesucrist. Guideb yälñadolajz saru gudzu'tu diidx. ¹⁶ Colguibaŋsa'c te cuedxi xcälriejntu te che guiniya-jreni la'tu sa'csi nabaŋsa'ctu loj Crist, jianxtujy reni rniyaj la'tu. ¹⁷ Sa'csi hueenru tedtu trabajw che cayuntu te dzunsa'c, palga si'c rlaiz Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent rextojlñu. Xhetliidi xtojlni guyu' nez loj Dios, niluxh gudejdni trabajwduxh xcuent rebeñdojl. Bejnñi si'c te gac guibignu lo Dios sa'csi gujt tiejxh Jesucrist, luxh guyusac sprit xteni lo tiejxhni te gubansacni. ¹⁹ Che gajd xpřitni guibisac lo tiejxhni, huij spritni basule'ni diidx loj re-sprit ni yu' latzguuib. ²⁰ Respritga najc renani di nusoob xtidx Noé che basule'ni xtidx Dios lojreni. Guläiz Dios rebejnga guiraa redxey ni cayujn Noé barcwro agujc xchero. Baslaa Dios xcälñabajñ xhujntis bejñ, xhet gujcdireni gudejdreni lo nisguiro ni biajb guideb guedxliujre. ²¹ Che robnisnu naj, rusnaalajznu rebejnga; yälrobnisga ruluiloj xho ruslaa Diosnu lo dojl. Et sa'csi riäjt beed lo tiejxhnu neñ nisga, alga sa'csi dxejc rniabnu lo Dios guniidxni te xcäriensa'c, sa'csi sajx xca'nuni xcuent ni gubansac Jesucrist lo rebeñgut. ²² Che birii Jesucrist loj rebeñgut, biu'ni xhaguibaa cadro gurejni xladbee Dios te ro'c rniweeni loj rexangl Dios, näjza loj guiraa resprit ni rajc rniweeni, ni yu' lo guedxliuj näjza xhaguibaa.

Colyejn xtzuum Dios

4 Ni'cni sa'csi agudejd Jesucrist trabajw cuajni lo cruzj xcuentnu, sigajcza la'tu riäjñ guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, ² te guideb nabajñni lo guedxliuj, guibajñni si'c rlaiz Dios, diruni guibajñ te gunni redzunguijdx xten guedxliujre. ³ Sa'csi bejntu si'ctis ni rlaiztu galoo, bejntu si'c rujn rebejñ ni di gumbee Dios, bejntu si'cni rlaiz tiejxhtu, bejntu latsiaj, gusojztu, bejntu relanero, gudedcaj gusojztu, luxh bejntu cosxtu-iduxh bazuxhijbzatu loj rebanäbdxab. ⁴ Dxejcti rebejñ ni rujn recosga naj, rdxelojreni sa'csi dirutu gun ni rlaizreni, ni'c rniyajreni la'tu. ⁵ Niluxh laareni suureni nez loj Jesucrist ni agojl gun yälguixhtis loj guiraa rebejñ, rebejñ ni nabajñ näjza renani agujt, te gusule'reni xcuent nani bejñreni. ⁶ Ni'cni basule' Jesucrist xtidx Dios loj reni agujt, te mase che gubajñreni lo guedxliuj gujcreni yälguixhtis si'ctis ni rajc bejñ, dxejc gujtreni, naj sprit xtenreni sinuu guibajñ si'c ni rlaiz Dios.

⁷ Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusin xcäriejntu te saru cuedx-guiniabtu lo Dios. ⁸ Niluxh ni maazru sajx najc yälñanälajz resa'tu sa'csi che rinälajz-tu resa'tu, riallajztu xtojñ sa'tu. ⁹ Saru gurenäj bejñ ni

rdzujn rolizlu, na'c jiejytu. ¹⁰ Abaniidx Dios loj tejgatu te dzuun ni sajx guntu. Dzuunga colyacnäz resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtü najc xtzuumni guluiini xtidx Dios, suguiniini ascanu najcni xtiidxpac Dios. Palga tejtü najc xtzuumni gacnäjni sa'ni, sugunnini, guideb yälñadip yälñadaan ni rudeed Dios lojni, te guira'tis ni rajc sujñ guiliä'p xpala'n Dios xcuent Jesucrist. Sa'csi laatisni riäjñ chä'p xpala'nni, laatisni riäjñ guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab xhichani'c casiajctü. ¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist. ¹⁴ Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xprit Dxan xten Dios guideb xcälrdimbicha'ni neñ lastootu. ¹⁵ Gunatiro, andi gusaantu ted tejtü trabajw sa'csi bagu'ttu bejñ, o sa'csi gulajntu xhi xten bejñ, o sa'csi bejntu latsiaj, o sa'csi huichu'ni lo xcuent sa'ni ni xhet nungäjñdi gacbeen. ¹⁶ Palga yu' chu tej tedni trabajw sa'csi rililajzni xtidx Jesucrist, na'c guitujyñi, alga suguiliä'pni xpala'n Dios xcuent Jesucrist.

¹⁷ Abidzujñ dxej che ganid rexpejñ Dios ted trabajw. Luxh palga ganid nuurnu gacnu yälguixhtis luxh ahuililaaznu xtiidxni, xhocha gun rebejñ nani di chalilajz xtidx Dios xcuent Jesucrist! ¹⁸ Lo xtidx Dios caj scree:

Lacti naganlajz rliaa rebeñnaya lo dojl,
¿xhocha gunäjñi rebejñ nani di chalilajz xtidx Dios
näjza rebeñdojl?

¹⁹ Ni'cni, guiraatu nani cadejd trabajw xcuent xtidx Dios si'cni rlaiz Dios, colgudeed xpřittu lo Dios ni di gusguee, ni bencheetu, te chanuutis guntu ni riäjñ guntu.

Yälrulijdx loj renani ahuililajz xtidx Dios

5 Narä nacä te beñgool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebeñgool, ² colgajp renani rililajz xtidx Dios nani rajptu fiipactu xhi rujñreni. Colga'preni si'c te bejñ ni rajp xiil, colyejnñi guideb yejc, guideb lajztu. Colyejn si'c sa'csi si'c rlaiz Dios guntu, na'c gunlojtu meel. Colguibalajz cayajptu rexpejñ Dios. ³ Na'c guinibeetu lojreni si'c rniweeni te lam loj reni rujn xtzuumni, colguluiireni xho gunreni con xcälñabaŋsa'clu. ⁴ Che guibisac Jesucrist, ni rajp nuure, laani suniidxni xcuentnu, te yälñasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebeñgool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejñ ni runnaro lagajc laareni,
niluxh racnäjni rebejñ ni najc nadolajz.

⁶ Ni'cni guideb yäl'nadolajz coljiu lo Dios sa'csi rajpni yäl'rnibeduxh, te guiliä'pni xpala'ntu che gal dxej ni guibisacni. ⁷ Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

⁸ Colgusanij xcäriejntu, col'susiñ sa'csi rdxe'ch beñdxab lojtu, cansaxhiga'tzni si'c te beedz nialajz, caguilni chu guxhiñni. ⁹ Col'sudzu'tz nez lojni, guideb lastootu col'chalilajz xtidx Dios, sa'csi anajntu sigajcza cayunnäjni guiraa rebetznu ni nabajñ lo guedxliujre.

¹⁰ Che agudejdtu trabajw tiop-choñ dxej, Dios nani rajp guiraa yäl'racnäjä, nani gurejdx la'tu te näjza la'tu xca'tu xca'rdimbicha'ni xcuent lagajc Jesucrist, lagajc laani sunsa'cni la'tu, bejñ ni rsiudzu'tz lo xtiidxni, bejñ ni

nadip lajzni, bejñ ni di guidxejb. ¹¹ Laani rajpni yäl'rnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guijtzre lojtu. Runä xhigab najcni te bejñ nani huililazsa'c xtidx Dios. Abacuaä bale'si didixre lojtu te gulidxä la'tu, te guiniliä lojtu dee najc xcäl'racnäjäpac Dios. Col'sudzu'tz xcuent yäl'racnäjäre.

¹³ Rexpejñ Dios ni re' lo guedx Babilonia ruxha' xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxha'za xtixtios lojtu.

¹⁴ Col'guinii "xchan" lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

2 Pedro

Pedr rucuaa te guijtz loj reni ahuililajz

1 Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuii Dios loonu si'c beñnaya xcuent Xtiosnu Jesucrist nani baslaa nuuru lo dojl. ² Rniabä lo Dios gacnäduxhruni la'tu, guscuedxiruni lastootu, te gacbeerutu xtidx Dios näjza Dad Jesucrist.

Xho riäjł gac rexpejñ Crist

³ Sa'csi xcälřnibee Dios baniidx guira'ti ni rquiinnu te guibañsa'cnu, te gacnu beñnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälřdimbicha'ni, näjza guiraa xcälřnansa'cni. ⁴ Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejñni, sajcnu beñsa'c si'c najcni sa'csi abiriinu loj redzunguijdx ni chagłajz rujn rebejñ ni ruxhiñ guedxliujre. ⁵ Ni'cni nanab gacbeenu xho nabañnu lo guedxliujre. Siroobru xcälřrililajztu sacnäjni la'tu te guibañsa'cnu lo Dios; luxh sa'csi nabañsa'ctu, siroobru xcälřnajntu xcuent dzunsa'c näjza dzunguijdx. ⁶ Luxh palga guroob xcälřnajntu xcuent dzunsa'c näjza dzunguijdx sajç guinibeetu tiejxhtu te na'c guntu dzunguijdx. Che guinibeetu tiejxhtu, sixedxi lajztu. Che arajptu yälřbedxilajz, sajçtu beñsa'c, beñdxan. ⁷ Che anajçtu beñsa'c, beñdxan, sinälajztu resa'tu; che asanälajztu sa'tu, arajçtu yälřsanälajz sa'tu xten Jesucrist.

⁸ Palga la'tu rusoobtu guiraa rediidxre, luxh chanuutis caroobreni neñ lastootu, ditu guibañxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. ⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälłajzni xho basia Dios rextojłni nani bejñni galoo. ¹⁰ Ni'cni rniä lojtu rebetzä, colsejs, colguisieed xtidx Dios te gacbeepactu, guluulojzatu lo bejñ xho gurejdx, xho gule Dios la'tu, sa'csi lał ni chanuu gucuađajçtu rediidxga, dipactu gunijç lo Dios. ¹¹ Palga guibajntu si'c lo guedxliujre, siu'pactu xhaguibaa cadro rnibee Dad Jesucrist par tejpas.

¹² Ni'cni anasuga'a te gusnaä lajztu xcuent rediidxre, mase anajntureni, mase risutzu'tztu yälřrililajz xten didxlii ni yu' neñ lastootu. ¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre.

¹⁴ Ananä asiäddzungenajxh dxej ni xca' Dios narä, sa'csi

abaluii Dad Jesucrist ni'c loä. ¹⁵ Ni'cni cayunduxhä dzuun ñaj, te che guiquiinni sinaj lajztu xtidxä che agu'tä.

Renani bahuii loj yälřnasa'c xten Crist

¹⁶ Che basule'nu lojtu xcälřrnibee näj xcälřrdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcälřrdimbicha'ni. ¹⁷ Sa'csi che badeed Dios xtadnu yälřrnibee, yälřrdimbicha' lojni, dxejç biejn diajçnu gunii Dios, birii xse'ni neñ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." ¹⁸ Lagajc nuure biejn diajçnu xse' Dios che guniini xhaguibaali che guyunäjnu Jesucrist lo dajç ni najc dxan.

¹⁹ Ni'cni ñaj guliuru rediidx ni gunii reprofet. Ni'cni sujntu laaca palga gusobđajçlu rediidxga, sa'csi najçreni si'c te bajł ni rusanij te lajç ni nacäjy, susanijçreni xcäriejntu dxejłi ni jiääd bajł xhaguibaa. Dxejç lagajç laani susanij lastoonu. ²⁰ Niluxh ganiddoo nanab gacbeetu dee: nicla tej bejñ sajç guinii laatisni sajç guinii xhi säloj xtidx Dios, ²¹ sa'csi nicla tej diidx ni bacuaa reprofet dini gac diidx ni biajçtis yejçreni. Guiraliireni bacuaareni ganaxtis diidx ni badeed Xpřit Dxan Dios lojçreni gucuaareni.

Rebejñ nani rusguee

(Judas 4-13)

2 Niluxh galoo biricajza te cuaa bejñ ni basguee rexpejñ Israel, sigajçni siääd stee cuaa bejñ ni susguee la'tu. Laareni guluixhiga'tzreni didx-xhii nani rujn rusiejxh lajç bejñ xcälřrililajçreni, sibälazreni lagajç Dad Jesucrist nani gudijç xcuent xtojłreni. Niluxh renani rusguee, siojç nitlojçreni par tejpas. ² Xhidajłza bejñ sinajłreni lo xcälřnabañguijçreni, dxejçti ni'c gun sinijaj xhidajł bejñ xnezyuj xtidxlii Dios. ³ Sa'csi ruguilaçreni xmeeltu, xhixtentu, ni'c siädgusgueerene la'tu te xca'reni xhixtentu. Niluxh xcälřguxhtisreni nani gun Dios, näjza xcälřnitlojçreni cabäzgaçreni agujç xchero.

⁴ Najcni si'c sa'csi di Dios niälłajz rextojł rexangłni nani bejñ dojl, niluxh baxhałniireni gabijł, basäunireni neñ reguednacäjy cadro cabäjçreni dxej ni gun Dios xcälřguxhtisni. ⁵ Sigajçza rebejñ ni guyu' galoo, banitloj Diosreni, baslaa Dios xcälřnabajñ Noétis näjza sgaçdçreni, sa'csi basule' Noé xtidx guluii Dios. Luxh baxhałni nisguiro te biädnitlojni guiraa rebejñ nani di nucuađajç xtidx Dios. ⁶ Bejñ Dios yälřguxhtis xten guedx Sodoma näjza guedx Gomorra, base'cni reguejçdçga, gujçreni cobdäj. Si'c bejñ Dios te gacbee bejñ xho runnäj Dios rebejñ ni di gusoob xtidx Dios. ⁷ Gulää Dios

Lo't ni gujc te beŋsa'c lo reguejdxga, sa'csi guc-huin lajz ni xcuent relatsiaj ni bejn rebeŋdojlgā. ⁸ Guideb ni gulājs Lo't, te beŋsa'c, lo guejdxga, dxej, yāäl guc-huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi beŋsa'cni. ⁹ Anajn Dios xho racnājni rebeŋsa'c te rbāänireni lo retribajw ni cadejdreni, anajnza Dios xho gusacsini rebeŋdojlgā cheni guidzujnli dxej ni gunni xcālguxhtisreni.

¹⁰ Guliduxhni, sujnru Dios yālguxhtis loj rebejn nani rlajz gun si'ctisni rlajz tiejxhreni, nājza renani rbälaz xcālrnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'. ¹¹ Niluxh nicla tej rexangl Dios ni rajru yālrnibee lo rebejnre, direni guiniyaj, cue'creni xquejreni lo Dios.

¹² Luxh, rebejnğa najc si'c reguidxaa nani xheti xcāriejnreni, cabājztisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc nitloj reguidxaa, sigajcza sinitlojreni. ¹³ Bejnreni dojl, ni'c sinitlojreni, sidejdreni yālrusacsiduxh xcuent rextoljreni. Laareni rchaglajzreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu laj ni cayajc lanij cayaunājreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzaren i dojl, ruluiireni lastooreni te säblajzreni meel, najcreni bejn nani batzubde Dios, ¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yāllatsiaj. ¹⁶ Niluxh gudilnāj Diosni xcuent xtojlni, bejn Dios gunii te mandip si'c xse' bejn, te bascuääzni profe'tga, dini nusaan niujnni nani cayujnni, cayujnni si'c te bejn ni rajc yejcn i.

¹⁷ Rebejn latsiajre najc si'c te bisie cadre xheti nis, najczaren i si'c rexcājy ni sanā bej nezree nezrec che cabi' te bero. Laareni su'reni lo xcājy par tejpas che gun Dios yālguxhtis. ¹⁸ Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn ni rlajztis tiejxhreni, con yāllatsiaj rusgueereni rebejn nani entis birii loj reni rujn sa' dzunguijdxga.

¹⁹ Rusgueereni, rniireni rut gudxojnndini palga jiädnajl-nireni, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn, ni'c rusäuni nejn latzguiib. ²⁰ Sa'csi palga agubicaj te bejn loj redzunguijdx xten guedxliuj sa'csi huililajzreni xtidx Dad Jesucrist nani ruslaa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najcreni si'c che gajdreni gumbee xtidx Dios. ²¹ Huenru direni niembee xnezyuj Dios, quela che abiembeerreni nezyujga, cuälazreni didx dxan, xtidx Dios ni basule'reni lojreni. ²² Dxejcsii rsiojb diidx ni najc scree: "Rbisac te bā'cw loj xcālrdujbn i. Cuch ni entis gojz richusacni lo xpajnni."

Xho gac che guibisac Jesucrist

3 Rebetzä, dee najc ni rojp guijtz ni caguxhaäl lojtu; lo guiro'p guijtzre cagusnibä la'tu xcuent reyäl'rulidjdx ni gusnaj lajztu. ² Colgusnaj lajztu rediidx ni gunii reprofte' agujc xchero, nājza rediidx ni gunii Dad Jesucrist nani basule' reapost.

³ Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlajz tiejxhreni. ⁴ Siniabdiidxreni: "¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn i cheni guc-cheeli guedxliujre." ⁵ Niluxh che rniireni si'c, rlajzpac jiäl'lajzreni agujc xchero benchee Dios xhaguibaa xcuent xtiidxtisni, nājza guniitis Dios te si'c guc-chee guedxliuj, biriini nejn nis, naj tre'ni loj nisga. ⁶ Dxejcti gunitloj guira'ti ni yu' lo guedxliujga che biajb te nisguiro, gunitlojni. ⁷ Niluxh xhaguibaa nājza guedxliuj ni tre' naj, cayajp Diosreni xcuent xtiidxn i te checreni che guidzujn dxej ni gunni yālguxhtis, che gunitlojni rebeŋdojlgā.

⁸ Rebetzä, na'c jiäl'lajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. ⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabājzni gusiejch lajztu, sa'csi di rlajzni nitloj nicla tejt u.

¹⁰ Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siäädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre nājza guira'ti ni tre' lojni, guiragajcni sejcni.

¹¹ Sa'csi sinitloj guiraa redee, ni'c nanab guibannayatu lo guedxliujre, na'c guntu dojl. ¹² Colcuäjz dxejtis ni jiääd Dios lo guedxliuj. Dxejcti sejc xhaguibaa, sinitlojni, luxh guiralii ni yu' sialni lo guiboro. ¹³ Niluxh abasa'n Dios diidx loonu, ni'cni cayenloonu te guibacoob, te guedxliucoob, cadre gunreni ganaxtis dzunsa'c, xhetiru dojl.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabannayatu, xhetiru xtojltu. ¹⁵ Colhuui xhi dzuun bejn Dad Jesucrist ni'c rajpnu yālruslaa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yālnajn lojni. ¹⁶ Nejn guiraa rexquijtzni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxn i, sigajc runnājreni guiraa xtidx Dios, ni'cni sinitlojreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznāa renani gusgueetu, te na'c gunijttu xcālrsiudzu'tztu lo xtidx Dios. ¹⁸ Colgustioob xcāriejntu con yālracnāj nājza yālnajn xten Dad Jesucrist nani ruslaa nuure lo dojl. Suguiliä'pnu xpala'n Dad Jesucrist, naj nājza par tejpas. Sugacni si'c.

1 Juan

Xtidx Dios ni runiidx yäl'nabajñ par tejpas loonu

1 Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn di-agä rediidx ni guniini loä, gunazä ñaani. Laani najc Di-idx ni runiidx yäl'nabajñ par tejpas loonu. ² Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabaññaj Jesucrist Dios. Baluii Dios Jesucrist loonu. ³ Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtenu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu. ⁴ Cagucuaä rediidxre lojtu te guibal-azduxhtu.

Dios najc Bajl

⁵ Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzun-sa'cni. Xhet yäl'nacäydi yu' lo Dios. ⁶ Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. ⁷ Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiäza xtiejn Jesucrist Xi'n Dios lastoonu che riennu dojl.

⁸ Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. ⁹ Palga guicäjpnu lo Dios guiraa redojl ni cayennu, siällajzni xtojñnu, sudzucajni rextojñnu, sa'csi laaca rujñni luxh gulii najc rextiidxni. ¹⁰ Palga guinuunu dinu niujñ dojl, rniinu najc Dios si'c te bejn ni rñii didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

Racñäj Jesucrist nuunu nez loj Dios

2 Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl. Niluxh palga jiennu dojl, racñäj Jesucrist nuunu, rniini xcuentnu lo Dios, sa'csi xheti xtojñni. ² Gujt Jesucrist xcuentnu lo cruzj. Gudijxni rextojñnu lo cruzj. Luxh et rextojñtisnu gudijxni. Gudijxni rextojñ guiraa rebejn ni ñe' lo guideb guedxliuj.

³ Palga rusoobnu rextidx Dios, huenliisi rluui riem-beenu Dios. ⁴ Cheni rñii te bejn, "narä rumbeäni", niluxh dini gusoob rextiidxni, rusgueeni resabejnñi. Di lajzni nilii xtidx Dios. ⁵ Palga rusoobnu xtidx Dios, guli-ipc rinälaaznu Dios, ni'c najñnu nabaññajñuni. ⁶ Cheni rniinu nabaññajñnu Jesucrist, nanabpac guibañsa'cnu si'c gubajñ Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli. ⁸ Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yäl'nacäy. Baluii Jesucrist redidxcoobga loonu. Guliipac najc Dios si'c bajl. Dini guibajñ lo nacäy.

⁹ Palga chutis tejnu rñii, "nabañä lo nianij xten Dios", niluxh rdxe'chni lo resa'ni, lo yäl'nacäy yu'ni. ¹⁰ Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljaz gunni dojl. ¹¹ Niluxh palga rdxe'chnu lo resa'nu, nabajñnu lo yäl'nacäy sa'csi riennu dojl, sasaanu lo yäl'nacäy. Nicla gacbeenu canejz chonnu, sa'csi ruscäy beñdxab balojnu.

¹² Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo cruzj gudijx Jesucrist rextojñnu. ¹³ Cagucuaä rediidxre lo guejbtu, redad beñgool, sa'csi huililajz rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidx beñdxab.

Cagucuaä rediidxre lojtu rexi'nä, sa'csi rumbeetu Dios. ¹⁴ Abacuaä rediidxre lo guejbtu, redad beñgool, sa'csi numbeetu Jesucrist nani nabajñ galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx beñdxab.

¹⁵ Na'c guichagljaztu guntu renani rujñ rebejn nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejtü rehxixtenti ni ra'pnu lo guedxliuj, dxejc dinu chanälajz Dios. ¹⁶ Rebeñ guedxliuj ni di chalilajz xtidx Dios rchagljazreni rujñreni redzunguijdxre: rujñreni dzunguijdx nani rchagljaz tiejxhrene; rujñreni dzunguijdx nani rchagljaz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷ Luxh rnitlojpac guedxliuj. Sinitlojza guiraa reni rchagljaz rujñ rebeñ guedxliuj ni di chalilajz xtidx Dios. Niluxh palga gusoobtisnu xtidx Xadnu Dios, sibaññajñuni par tejpas.

Didx gulii näjza didx-xhii

¹⁸ Guejbtu resa'ä ni rililajz xtidx Dios, asiäddzungajxh dxej che gululoj niguii nani rdxe'ch loj Jesucrist. Abiejñ diajgtu siääd niguiiga. Naj yu' xhidajl reniguii nani rdxechlajz lo Crist. Ni'c alaracbeenu asiäddzungajxh dxejga che gululoj niguiiga. ¹⁹ Yu' xhidajl rebejn ni rdxech-

lajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

²⁰ Gule Dios Jesucrist. Jesucristre baniidx Sprit Dyan xten Dios loonu te gacbeenu xhini'c najc redidxliipac. ²¹ Et sa'csi ditu gan xhi diidx najc didx gulii bacuaä redidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc gulii, anajntu dina gusgueä la'tu.

²² Chutis ni naa di Jesús gac Crist Xi'n Dios, xhet gulii di rextidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios.

²³ Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴ Colgusoob rediidx ni biejn diajgtu galooli che huililajztu rextidx Dios. Palga rusooobtu redidxga, nabañajtu Dios näj xi'nni Jesucrist. ²⁵ Abia'n Jesucrist diidx guniidxni yälnabañcoob loonu. Naj ara'pnu yälnabajre, ra'pnuni par tejpas.

²⁶ Abacuaä rediidxre lojtu xcuent rebejn ni rlajz chalilajztu rediidx ni xhet guliidi. ²⁷ Baxhaļ Jesucrist Sprit Dyan xten Dios loonu. Rbäjzni neñ lastoonu. Dinu guiquiin chu stee bejn guluii loonu xhi diidx najc gulii, sa'csi lagajc Sprit Dyan xten Dios ruluii xtiidxni loonu. Naj ruluiini la'tu guiraa ni najc gulii, dini gusguee la'tu. Colguibañaj Jesucrist; colgusoob xtidx Jesucrist si'cni ruluii Sprit Dyan xten Dios lojtu.

²⁸ Naj guejbtu resa'ä, colguibañaj Jesucrist, te che jiädsacni lo guedxliuj sisiutzu'tznu nejz lojni, dinu gutuj nejz lojni. ²⁹ Anajntu laaca najc Dios. Anajntu renani rusooob xtidx Dios sasanäjreni Dios, ni'c najcreni xi'n Dios.

Rexi'n Dios

3 Bahuii xho huinälazduxh Dios nuure, ni'c anaj Dios nuure najcnu rexi'nni. Luxh gulii najcnu rexi'n Dios. Rebejn guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. ² Resa'ä ni rinälazä, nuunu rionälaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. ³ Che rnaj laaznu sidzujñ dxej gac tejganu si'c ni najc Jesucrist, dxejc rbañsa'cnu si'c ni gubajñ Jesucrist lo guedxliuj.

⁴ Di rebejn ni rujn dojl gusoob leii xten Dios. Che riennu dojl, runijntu lo leii xten Dios. ⁵ Racbeenu Jesucrist biääd lo guedxliuj, gujcnii niguii te gujc badzucajni rextojñnu. Laani dini niujñ dojl. ⁶ Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni. ⁷ Resa'ä, na'c chalilajztu didx-xhii ni rnii bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist. ⁸ Rebejn nani rujn dojl najc xi'n bendxab. Galodooli rujn bendxab dojl. Ni'cni biääd Jesucrist Xi'n

Dios lo guedxliuj te gudzucajni redojl nani rujn bejn xcuent bendxab.

⁹ Rebejn nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl, sa'csi najcreni xi'n Dios. ¹⁰ Si'c riebeneu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäjl chanälajznu resa'nu

¹¹ Lagajc rediidxre biejn diajgtu galooli che huililajztu rextidx Dios: colchanälajz resa'tu. ¹² Xhet si'c di toCain nani gujc xi'n bendxab. Bejnii dojl, bagu'tni bejtzni. Xhiciuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. ¹³ Na'c guidxelojtu che guidxechlajz rebejn lojtu. ¹⁴ Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yälnabajñ par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni. ¹⁵ Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yälnabajñ par tejpas. ¹⁶ Racbeenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäjl gacnäjnu resa'nu, mase guetnu lacuaa guetreni. ¹⁷ Chutis tejnu ni rajp xhidajñ xhixtenni, luxh dini gacnäj nicla tejnu ni xhet rajpdi, di bejnga chanälajz Dios. ¹⁸ Guejbtu resa'ä, na'c chanälaaznu resa'nu con rextiidxtisnu, na'c guiniitnisnu rionälaaznu resa'nu. Palga rionälaazpacnu resa'nu, sacnäjnu resa'nu.

Sisiutzu'tznu nez loj Dios

¹⁹ Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac beñsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najñ rexhigabga. Niluxh Dios anaj: renani rinälaaz resa'reni, reni'c najc rexi'nni.

²¹ Rniä lo guejbtu nani rinälazä, palga lagajc lastoonu rnii loonu, "cagusooblu xtidx Dios", sisiutijp lastoonu che rbedx-rniabnu lo Dios. ²² Xhitis ni rniabnu lo Dios, runiidxni loonu sa'csi rusooobnu xtiidxni, riennu redzun ni ruspa lajz Dios. ²³ Dee najc rediidx ni gunibee Dios gusoobnu: chalilaaznu xtidx Dios, diidx ni rnii xho gujt Jesucrist lacuaa nuunu, chonälaazzanu resa'nu si'cni gunibee Dios. ²⁴ Palga rusooobnu guiraa nani gunibeeni, nabañajñnuni, si'cza nabañajñni nuunu. Nancheenu nabañajñ Dios nuunu, sa'csi baniidxni Sprit Dyan xtenni te cuäaz neñ lastoonu.

Scree gacbeenu xhi didx najc guliipac

4 Guejbtu renani rinälazä, na'c chalilajztu rextidx chutis bejn nani naa, "rniä rextidx Dios lojtu". Ganiddoo colgula'tz rextiidxni te gacbeetu don chu xtidx caniiini, sa'csi xhidajñ bejn sinii lojtu, "nuunu rniinu rextidx Dios", niluxh caniiisireni si'c. ² Scree gacbeenu xhi diidx najc guliipac. Guiraa rebejn nani guini "Jesucrist, Xi'n Dios, ni biääd lo guedxliuj si'c

niguii", reni'c cayacnäj Sprit Dxan xten Dios, reni'c canii xtidx Dios. ³ Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxe'chduxh loj Jesucrist, luxh naj abidzujn rextzuun niguiiga lo guedxliuj.

⁴ Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neñ lastoonu abejnni gaan lo beñdxab ni nabajn lo guedxliuj. ⁵ Rebejn ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. ⁶ Nuunu najcnu xi'n Dios. Rebejn nani riembee Dios riu xtidxnu. Rebejn nani di gac xi'n Dios direni jiu xtidxnu. Scree gacbeenu chu rebejn rnii didxliipac. Scree gacbeezanu chu rebejn rnii diidx ni xhet guliidi.

Rinäälajz Dios rebejn

⁷ Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäjä nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh guli riembeenu Dios. ⁸ Palga chutis tejnu di chanälajz resa'ni, dizani gumbee Dios, sa'csi lagajc Dios racnäjä chanälaaznu Dios, racnäjäzani chanälaaznu resa'nu. ⁹ Abasule' Dios loonu lacti rinälajzni nuunu. Yu' tejtis Xi'n Dios. Abaxhañi Xi'nni lo guedxliuj te gudijxni rextoljnu lo cruzj te si'c guibañäjnni par tejpas. ¹⁰ Si'c racbeenu rinälajzpac Dios nuunu. Galoo dinu rinälajz Dios. Niluxh Dios huinälajz nuunu, ni'c baxhañi Xi'nni lo guedxliuj te gudijxni xtojlnu lo cruzj.

¹¹ Rniä lo guejbtu nani rinälazä, si'cni rinälajz Dios nuunu, sigajcza rälajzni chanälaaznu resa'nu. ¹² Nicla tej bejn gajd fii lo Dios. Niluxh palga chanälaaznu resa'nu, Dios nabajn neñ lastoonu, dxejc guli rinälajzpacnu Dios. ¹³ Nancheenu nabañäjnu Dios, sigajcza nabañäjpac Dios nuunu, sa'csi abaxhañi Sprit Dxan xtenni cuääz neñ lastoonu. ¹⁴ Narä näjza reapost abahuiinu loj Jesucrist. Caniä lojtu abaxhañi Xtdnu Dios Xi'nni lo guedxliuj te guslaani rebejn lo xtojlni. ¹⁵ Chutis tejnu ni rnii "Jesucrist najc Xi'n Dios", nabañäjni Dios, nabañäjza Dios bejnğa.

¹⁶ Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabañäjnu Dios, nabañäjza Dios nuunu. ¹⁷ Naj sanälaaznu Dios si'cni rälajzni luxh palga chanälaaznuni guidebtis ni guibajnnu, dinu guidxejb che guidzujn dxej ni gun Jesucrist yälguxhtis lo guedxliuj. Dinu guidxejb sa'csi guideb nabajnnu lo guedxliuj, nabañäjnu Dios si'c nabañäj Jesucrist Dios. ¹⁸ Palga rinälazsa'cnu Dios, dinu guidxejb, palga rinälajzpacnu di gacdi guideebnu. Palga guliipacnu rinälaaznu Dios, xhetliidi rdxejbdu. Nani rdxejb, rdejdnii trabajw, gajd bejnğa chanälazsa'c Dios.

¹⁹ Rinälaaznu Dios sa'csi ganiddoo Dios huinälajz nuunu. ²⁰ Palga chutis tejnu naa "rinälazä Dios" niluxh rdxe'chälajzni lo resa'nu, xhet guliidi xtidxni. Palga dinu chanälajz sa'nu nani cahuiinu, xhixh sajz chanälaaz-

zanu Dios nani gajdnu fii. ²¹ Agunibee Dios, nani rinälajz Dios chanälajzni resa'ni sigajc rinälajzni Dios.

Riennu gaan lo guiraa redolguijdx lo guedxliuj

5 Chutis ni rililajz Jesús najc Crist nani baxhañi Dios, ni'c najc Xi'n Dios. Palga rinälaaznu Xtdnu Dios, sigajcza sinälaaznu renani najc Xi'n Dios. ² Palga rinälaaznu Dios, palga rusoozbzanu xtiidxni, dxejc najcnu rinälaaznu resa'nu nani najc Xi'n Dios. ³ Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. ⁴ Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist. ⁵ ¿Chuni'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

Rediidx ni baluii Dios loonu xcuent Jesucrist

⁶ Biääd Jesucrist lo guedxliujre. Birobnis Jesucrist, baxhe'zani xtiejnii lo cruzj. Xhet ganaxdi te guirobnisni biäädni, näjza te guxhe'ni xtiejnii lo cruzj che biäädni. Sprit Dxan xten Dios canii rediidxre. Guliipac rextidxni. ⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnii lo cruzj che gujtni. ⁹ Palga rililaaznu xtidx rebejn ni rbäjz lo guedxliuj, nungäjli chalilaazrunu xtidx Dios. Rediidx nani rnii jioñ reni baluiloj tejsi diidx najceni con nani rnii Dios xcuent Jesucrist Xi'n Dios.

¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. ¹¹ Scree najc rediidx ni rnii Dios. Abaniidx Dios loonu yäl nabajn par tejpas. Yäl nabajnğa biädni Xi'nni, Jesucrist. ¹² Palga nabañäjnu Xi'nni, rajpnu yäl nabajn par tejpas. Palga dinu guibañäj Xi'nni, dinu ga'p yäl nabajn par tejpas.

Xtixtios con diidx ni rulijdx

¹³ Abacuaä rediidxre lojtu ni rililajz rextidx Jesucrist te gacbeepactu rajptu yäl nabajn par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. ¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl nabajn lojni. Niluxh yu' te dojroduxh. Chutis te bejn ni gun dojlğa, di Dios gudeed lo bejnğa yäl nabajn par tejpas. Dizana guiniä guiniabtu lo Dios xcuent bejn ni rujn dojroga. ¹⁷ Guiraa redzunguijdx nani rujn rebejn najc dojl. Niluxh yu' re-

dojl nani di gun gunijt bejn lo Dios par tejpas palga jiu bejn xtidx Dios.

¹⁸ Racbeenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di bejdxab gun gaan nuunu, te dizanu gusoob xtidx bejdxab.

¹⁹ Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx bejdxab.

²⁰ Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios gulii. Nabaññajnu Dios ni najc gulii, sa'csi nabaññajnu Jesucrist. Laani najc Dios ni najc gulii. Caguniidxni loonu yälñabajñ par tejpas. ²¹ Resa'ä, na'c guzuxhijbtu lo rebanäjb ni xhet guliidi. Sugacni si'c.

2 Juan

Diidx gulii näjza yälrinälaaznu resa'nu

1 Narä nacä beṅgool. Cagucuaä guijtzre lojlu nane' nani agule Dios, näjza loj rexi'nlu. Rinälazäpac la'tu luxh xhet xtebädi; näjza guiraa reni rililajz xtidx Dios sanälajztu. ² Nuure rinälaaznu la'tu sa'csi yuchee neṅ lastoonu rediidx nani najc gulii, luxh dilajznu jiaḷ rediidxre. ³ Xtadnu Dios, näjza Jesucrist Xi'nni, gacnäḷ nuunu, jiareni nuunu, guscuecdxi lajznu con xcälḷnajn didxlii näjza yälrinälajz.

⁴ Bibalazduxhä che gucbeä yu' rexi'nlu ni rusoob xtidx Dios si'c gunibee Dios loonu gusoobnuni. ⁵ Nane' ni gule Dios, diidx nani rniabä gusoob guejblu ḷaj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäḷḷpac chanälaaznu resa'nu. ⁶ Sinälaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

Rebejṅ ni rnii garenca diidx ni xhet guliidi

⁷ Balti bejṅ birii loonu, ḷaj cagusgueerani xhidajḷ bejṅ ni re' lo guedxliuj. Caniireni di Jesucrist niajc niguii che

biäädni lo guedxliuj. Sa' bejṅre najc beṅrusguee. Sa' bejṅre rdxe'chreni loj Jesucrist. ⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejṅ ni rlaḷz gugu'ch xtiidxpacni lo xtidx Jesucrist, di bejṅga gumbee Dios. Niluxh chutis bejṅ ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰ Palga jiaäd te bejṅ rolijztu ni di chasanäj xtidx Jesucrist, na'c xcäḷbtu jiu'ni rolijztu, na'cza guiniitu lojni, "Xchan. Biu'." ¹¹ Sa'csi chutis bejṅ ni guinii "xchan" loj te bejṅ ni di chasanäj xtidx Jesucrist, cayacnäḷzani redzunguijdx ni rujn bejṅga.

Rudeedni xtixtios

¹² Xhidalduxhru diidx rlaḷzä guiniä lojtu, niluxh di rlaḷzä gucuaäreni lo guijtz. Cabäzä jiaḷdhuiä lojtu ro'c te guiniä rediidxre lojpactu, te guibaalajztu. ¹³ Rexi'n bälḷlu, nani aguleza Dios, ruxhaḷ xtixtios lojlu. Ni'ctis najc ni rucuaä lojtu. Sugacni si'c.

3 Juan

Cagucuaani didxsa'c lo Gayo

1 Narä nacä te beṅgool. Caguxhaḷä guijtzre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rni-abä lo Dios gacnäjni luj, guniidxzani yäl'nadaanlu.

³ Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴ Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

⁵ Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riädreni lojlu. ⁶ Aräjpreni lo resa'nu ni rdxagsa' ree xho huinäälajz-lureni näjza xho gucnäjlureni. Laaca bejnlu gucnäjlureni, badeedlu xhi biquiinreni lo nejj che biriireni rolizlu. Si'cza nanab jiennu lo guiraa resa'nu, nalajznu rebejn ni ruluii xtidx Dios. ⁷ Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. ⁸ Si'cza nanab gacnäjnu rebejn ni riluii xtidx Jesucrist neṅ garen-garen guejdx, te si'c jiennänu xtzun Dios guiraa renani ruluii xtidx Dios.

Di Diótfefes niujn redzunsac

⁹ Abaxhaḷä te guijtz lo rexpejn Jesucrist ro'c. Niluxh Diótfefes rlajz guinibeeni lo resa'nu ro'c. Dini jiu xtidxä.

¹⁰ Ni'cni che guidzuna ro'c, narä siniä rediidxre lo resa'nu ro'c, che guidxaag sa'nu ro'c. Diótfefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riäd ro'c, mase rlajz chu tejtü fiireni. Luxh rlajzni gudxojni guidxagnäjtü rebejn nani ruhuii resa'nu ni ruluii xtidx Jesucrist.

¹¹ Sa'ä ni rinälazä, na'c gunlu redzunguijdx, bejn redzunsac. Nani rujn dzunsac ni'c najc Xi'n Dios. Chutis tej ni rujn redzunsac najc xpejn Dios. Chutis tej ni rujn redzunguijdx, di ni'c gumbee Dios.

Rniireni didxsa'c xcuent Demetrio

¹² Guiraa rebejn ganax didxsa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

Rudeedni xtixtios

¹³ Rlazä guiniä xhidalduxhru diidx lojlu, niluxh di rlazä gucuaä rediidxga lo guijtzre. ¹⁴ Runä xhigab di gaclaa jiädhuiä lojlu, dxejcti jieinu diidx.

¹⁵ Gulecdxi lajzlu. Rexamigwlu ruxhaḷreni xtixtios lojlu. Badeed xtixtios lo tejga reexamigwä ro'c.

Judas

Judas cagucuaa loj renani agule Dios

1 Narä nacä Judas, ni rujn xtzuum Jesucrist. Narä nacäza betz Jacob. Cagucuaä guijtzre loj renani agule xtdnu Dios, renani sanälazduxhni, nani cayapcheeni par Jesucrist. ² Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yäl'sanälajz.

Renani rului yäl'rusguee

(2 Pedro 2:1-17)

³ Rebetzä nani sanälazä, che cayunduxhä xhigab gucuaä lojtu xcuent yäl'ruslaa lo rextoljnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yäl'rillilajz ni basule'reni par tejpas loj rexpejn Dios. ⁴ Sa'csi abiuxhiga'tz gail bejn, renani galooli gunii Dios siädreni, niluxh sinitlojreni. Najcreni bejn ni di chalilajz xtidx Dios, najcreni benguidxduxh, rutzuréreni xcäl'racnäjä Dios, rujnreni xtujy, sanäreni te yäl'nabañdxuudx. Rbälazzareni xpaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejpas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. ⁶ Rexangl Dios nani di nucuadijg diidx, ni birii cadro rlajz Dios churen, reni'c basäu Diosreni cadro nacäi-boo te cabäzreni gun Dios xcäl'guxhtisni lojreni. ⁷ Si'c bejnni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii biräax, regunaa guyunäjzaren, regunabiräax. Dxejc gudejdreni trabawduxh huejcreni neñ guiboo par tejpas xcuent xtojreni, ni'c najc te yäl'rulijdx loonu.

⁸ Rebejn ni riu' lojtu najc si'c reben galoo ni bejn dojl. Nabajreni si'c ni bisieedreni lo guiraa nani rului yäl'rnixca, ruxhiñreni tiejxhreni, rbälazreni xcäl'rnibee Dios, rniyajzaren rexangl Dios. ⁹ Miguejl ni rnibeeru loj rexangl Dios, che gudil'diidxni bendxab yejc tiejxh to-Moisés, dini niniyaj bendxab, alga räjpni: "Sugun Dad Jesucrist yäl'guxhtis lojlu." ¹⁰ Niluxh rebejnğa rniyajreni nicla ganreni xhini'c rniireni. Niluxh nani racbeepac rebejnğa najc yäl'najn nani nicla niquiin nisieedreni, lala sa' nani rujnza reguidxaa, ni xheti xcäriejn, reni'c sujn nitlojreni.

¹¹ ¡Aii! ¡Riazanuren! Sanajlreni xnezyuj Caín, luxh te gunreni gaan meel ruxhunlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudil'naj Dios, luxh gunitlojni. ¹² Laareni najcreni te xtu-

iduxh lo rexchej ni rajc guidoo, direni guidxejb gauxchenäjreni la'tu, sa'csi xque'tisreni riuren. Najcreni si'c te xcäy ni xhet nisguij siädnäni, nani sanä bej nezree nezrec; najczareni si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abil-iäädx. ¹³ Laareni najc si'c nis ni räjs lo nisdoo, che caya-jc te bidonduxh, sää, siädni, carii xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejpas.

¹⁴ Xcuentza redee agunixgaaza Enoc ni najc xag-dodoo Adán, räjpni: "Bahuii, siädnä Dios xhidalduxh xanglni ¹⁵ te gunni yäl'guxhtis loj guiraa bejn te gusac-siduxhni guiraa rebejn ni di gumbee Dios xcuent rediduxh ni bejnreni, xcuentza redidxnaj ni guniyaj rebejndiduxhre Dios." ¹⁶ Rebejnre laa reni rmojm, rundojxhreni quej, rujnreni si'ctis ni rlajz tiejxhreni, rniireni guiraloj didxnaj, rniisireni didxsa'c loj rebejn te gun rebejnğa si'c ni rlajzreni gunreni.

Rulijdxni rebejn nani ahuililajz xtidx Dios

¹⁷ La'tu, betzä ni sanälazä, riäl' guinaj lajztu rediidx nani gunii reapost xten Dad Jesucrist, ¹⁸ sa'csi guniireni lojtu: "Neñ redxelult che guibisac Jesucrist, su' bejn ni suxhiznäjreni rextidx Dios, sujnreni si'ctis guisia' lajzreni." ¹⁹ Redee najc renani run rlia' rexpejn Dios lo sa'reni; rinuuzaren ni yu' lo guedxliuj, diza Xpirt Dxan xten Dios cuääz neñ lastooren.

²⁰ Niluxh la'tu rebetzä nani sanälazä, col'tioob loj xcäl'rillilajztu ni siäd lo Diostis, col'nab lo Dios xcuent yäl'rnibee xten Xpirt Dxan xtenni. ²¹ Col'guibajntis lo yäl'sanälajz xten Dios, col'susintis la' ni cayunlojtu yäl'rulaslajz xten Dad Jesucrist ni guniidx yäl'nabajn par tejpas.

²² Col'gacnäjä renani di chalilazsa'c te chalilajzpacreni xtidx Dios. ²³ Col'yacnäjä sgail te guibicajreni lo dojl, gudobxhajxreni, col'yejn xhigab lo guiboo cayejcreni. Col'yacnäjä sgail bejn, col'gulaslajzreni con yäl'rdxejb, niluxh col'naturu te di guntu lagajc dojl ni rujnreni. Gulälaz nani rujnreni, nani ruxhiñreni.

Redidx lult

²⁴ Col'guiliä'p xpala'n Dios nani racnäjä la'tu didi jiajbtu lo dojl, nani rujn sajz suutu lo xcäl'rdimbicha' Dios, nayadujtu, rbaduxh lajztu. ²⁵ Yu' tejtis Dios. Laatisni rajpni yäl'najn te guslaani nuurnu lo dojl xcuent ni bejn xtdnu Jesucrist. Col'guiliä'p xpala'nni, rajpni guirali yäl'rnibee, yäl'rdimbicha', galooli, näj naj, näjza par tejpas. Sugacni si'c.

Apocalipsis

Baluiloj Jesucrist lo Juan

1 Dee najc rediidx ni badeed Dios loj Jesucrist te gululojnini loj rexmosni, xcuent recos nani di gaclaa gac. Jesucrist baxhaĵ xangĵni lo Juan, te baluiini guiraa recosga lojni. ² Ni'cni bacuaa Juan lo guijtzre guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani roĵ guijtzre xcuent recos ni churu gac, renani riuza rediidxga, renani rguchee rediidxga neĵ lastooni sa'csi siäddzungajxh redxej che soob rediidxga.

Juan cagucuaa guijtzga lo gajdz guidoo

⁴ Narä nacä Juan. Cagucuaä guijtzre loj guigajdz reguidoo ni tre' lo región Asia. Dios guspajdz la'tu, guscuedxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz resprit ni suga' guideb gabi cadro rnibeeni, ⁵ näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubañsac lo rebengut, nani rnibeza lo guiraa rereii loj guedxliujre. Laani sanälazduxhni nuure, laani rudzucajni xtojĵnu con xtiejnni.

⁶ Laani bejnii gacnu te beĵro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrbibe par tejpas. Sugacni si'c.

⁷ Colgacbee! Laani sibisacni lo rexcäy, luxh guiragajc rebejĵ suhii lojni, nägajc renani gudzujd cuä' xcustii-ni. Guiraa rebejĵ guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc relet A con Z —rnii Dad Dios—. Nabañä nadxej, sigajcza gubañä nani, sigajcza sibana par tejpas, dipacna gacä ste'ca. Rapä yälrbibeuxhru lo chutis.

Bahuiä loj Jesucrist lo xcälrdimbicha'ni

⁹ Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rnibe Dios, ni rsiudznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhaĵreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. ¹⁰ Te dumingw, laĵ ni cayunäa Dios, guzacä astoo canixcaĵä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, ¹¹ najni loä:

—Narä nacä ganiddoo, nacäza lult. Lo te guitro bacuaa nani fiilu, dxejcti baxhaĵ guijtzga loj guigajdz

guidoo ni yu' nez Asia, neĵ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejcti gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäii guigajdz recandilieerga, suga' te ni najc Xi'n Dios nani gujcnii Xi'n Niguii, najcwni te lajd ni rdzujĵ lo ni'lini, lastoozani naliib te cinturoĵ gulajg ni najc ganaxduj oor. ¹⁴ Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcti rbebajl lojni. ¹⁵ Ni'ni rdimbicha' si'c guuib ni laa bronz che cayejcni lo guiboo. Xse'ni riejn nadipduxh astoo che riäjnt nisro neĵ regueuu. ¹⁶ Ladbee ca' ñaani gajdz balxhaguibaa; ro'ni rii te espaad ni guiro'p laad caj ro'ni; dxejcti lojni rujn si'c rujn loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni ñaani xladbeeni yecä, dxejcti guniini loä, najni:

—Na'c guidxejblu, narä nacä ni gubajĵ galooli, narä nacäza ni guibajĵ lult. ¹⁸ Narä nacä ni nabajĵpac; gutä, niluxh näj nabañä par tejpas. Rapä yälrbibe lo yälgujĵ näjza lo gabijl. ¹⁹ Ni'cni bacuaa recos ni abahuiilu, nani cayajc näj, näjza nani churu gac. ²⁰ Dee najc laa yälxhiga'tz xten regajdz balxhaguibaa ni bahuiilu lo ñaä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejcti gajdz gandilieerga sälojni guigajdz reguidooga.

Rediidx nani chää loj rexpejĵ guidoo Éfeso

2 Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa ñaani ladbee, näjza nani rsiaj galäii guigajdz gandilier oor, rnii rediidxre lojtu: ² Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu beñlatsiaj; näjza bala'tztu xho rujn rebejĵ nani rniireni najcreni apost ni rnii xtidx Dios, luxh direni gac, luxh la'tu gucbegajcti cagusgueereni bejĵ. ³ Rsiudzu'tztu, rujntu huant xcuent xtidxä, gajdtu guidxajg. ⁴ Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. ⁵ Ni'cni colguzaa lajztu caro banijztu, colgusiejch lajztu, colyejĵ lagajc redzuun ni bejntu galoo che guslojtu huililajztu xtidxä. Palga ditu gusiechlajztu, sudzucaä xcandilieertu cadro suga'ni. ⁶ Laaca rujntu rbälaztu xtzuum rebejĵ ni laa nicolaítas, sa'csi näjza narä rbixlazä xtzuumreni. ⁷ Nani yu' diajgni te cuadiajgni diidx, sucuadiajgni diidx ni rnii Spirit Dxan xten Dios loj reguidoo: loj renani gun

gaan lo dojl, gudedä gauni ninejxh ni rcaj lo yajg yälñ-abajñ, ni yu' xhaguibaa cadro yu' Dios."

Rediidx ni rniini loj rexpejñ guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: "Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: ⁹ Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejñ Israel, luxh direni gac. Najcreni xpejñ xquidobäz beñdxab. ¹⁰ Na'c guidxeyblu trabajw nani agojl tedlu. Aree beñdxab gusäl gaii sa'tu neñ latzguuib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yälñabajñ. ¹¹ Nani rlanj cuadiajg diidx sucuadiajg ni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojgga lojni."

Rediidx ni rniini lo rexpejñ guidoo ni yu' Pérgamo

¹² Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: "Nani ca' spaad ni caduxh ro'ni guiro'p laad rnii rediidxre lojtu: ¹³ Narä nanä caro rbäjztu, rbäjztu lo guejdx cadro rnibee Beñdxab. Rsiudzu'tztu xcuent xtidxä. Lałtis rsiudzu'tztu rililajztu xtidxä, mase neñ redxey cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadro rnibee Beñdxab. ¹⁴ Niluxh yu' tiop-choñ xtojltu. Lojtu nadxaag gaii bejñ ni rujn si'c bejñ toBalaam agujc xchero. Laani baseedni Balac xho gunni te jiajb rexpejñ Israel neñ dojl, baseednireni gaureni recos ni gurej lo dxan nez loj rebanäjñ, baseedzani rexpejñ Israel guesnäjreni chutis gunaa. ¹⁵ Sigajcza nadxaag lojtu gaii bejñ ni riu rediidx ni rusule' reni laa nicolaıtas. ¹⁶ Colgusiechxgaa lajztu, te di jiälğacä lojtu te gucuanääreni spaad ni yu' ro'ä. ¹⁷ Nani rlanj cuadiajg diidx, sucuadiajg ni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni."

Rediidx nani rniini lo rexpejñ guidoo ni yu' Tiatira

¹⁸ Dxejcti najni loä:

—Bacuaa rediidxre lo xangl Dios xten guidoo ni yu' Tiatira: "Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: ¹⁹ Ananä xtzuuntu, sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. ²⁰ Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejñ. Luxh xcälğuseedni cagusgueeni rexpeñä nani ahuililajz

xtidxä, te naj rujnreni cosguijdx, si'c yälresnäy ni di gac chäälni, rajwzareni nani gurej lo dxan xten rebanäjñ.

²¹ Aguläzä xchej te gusiechłajzni, gusaanni gunni dojl, luxh naaddini gusiechłajzni xcuent redzunguijdx ni rujni. ²² Luxh palga laani dini gusaan gunni redzuun nani rujni, narä siguixäni, gudedä te yälğacxhuro. Luxh sutedä trabajwduxh guiraa renani bennäjni dzunguijdx palga direni gusiejch łajzreni, palga direni guchaa xmoodreni. ²³ Sugutxhiä, sunitloä rexi'n gunaa-ga, te si'c gacbee guiraa rebejñ ni yu' neñ reguidoo narä nacä ni rula'tz rexhigab ni yu' xcäriejnreni, näjza yälğililajz ni yu' neñ lastooreni. Te gacbeezareni narä sunidxä lo tejgatu ni riäjł xca'tu xcuent redzuun ni rujntu. ²⁴ Dxejcti loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten beñdxab, xhetru rniädi lojtu, dirunä gotalä xtzuuntu. ²⁵ Colyapdzu'tz rextidxä nani arajptu dxejli ni guibisacä lojtu. ²⁶ Nani gun gaan lo dojl, näjza nani cagusoob xtidxä dxe lultli, lojni sudedä yälğnibee te guinibeeni renacion. ²⁷ Si'cni baniidx Xtađä yälğnibee loä, sudedä yälğnibee lojni, te guinibeeni guiraa rebeñ guedxliuj, gunnäjni yälğuxhtis lojreni te barguiib si'c rujn ni runchee guesbajñ, rli'a'ni guiraa regues nani xhet sajcdi. ²⁸ Sunidxäza bale' xhaguibaa ni rii rsildoo (ni säloj guibanäjnu Dios). ²⁹ Nani rlanj cuadiajg sucuadiajg ni diidx ni rnii Sprit Dxan xten Dios loj reguidoo."

Rediidx nani rniini lo rexpejñ guidoo ni yu' Sardis

3 Dxejcti najni loä:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejñ nabajntu, niluxh narä nanä ascanu agujttu, dirutu gun xtzunä. ² Colguibajñ, colğula'tzru nani rapsijctu xcuent rextidxä nani ameer nitloj neñ lastootu. Narä ruhuiä ditu niunsa'c dzuun xtenä nez loj Dios. ³ Colğusnaj lajztu rediidx ni basule'reni lojtu, nani abacuadiajgtu, colğusoob rediidxga, colğusiech lajztu. Palga ditu guibajñ, palga ditu guchaa xmoodtu, sidzuna nez lojtu si'c te gubaan, nicla gaantu cor guidzuna lojtu. ⁴ Niluxh yu' gaiisi bejñ lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjłreni. ⁵ Nani gun gaan lo dojl, ni'c sajç gacwni ladnol, luxh dizana guche'nä lajni loj xlibr cadro caj laj renani sibajñnäj Dios par tejpas. Sicäpäza nez loj Xtađä näjza nez loj guiraa rexquixhajg ni, bejñga najc rexpeñä. ⁶ Nani rlanj cuadiajg diidx, sucuadiajg ni diidx ni rnii Sprit Dxan xten Dios loj reguidoo."

Rediidx nani rniini lo rexpejñ guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: "Nani najc dxan, nani najc guliipac, nani rajp xliäi toDavid (ni säloj guiragajc yälğnibee), nani che ruxhalni, rut rusäuudi, nani che rusäuuni, rut ruxhaldi,

laani rniini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajç gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹ Suhuiitu xho gunä rebejn ni yu' lo guidobäz xten beñdxab. Rniisireni najcreni xpejn Is-rael, luxh direni gac; rusgueereni bejn. Narä sunäpac jiädzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gu-nibeä sutijptu, na'c jieedtu, ni'cni narä sacnäázatu che guidzujñ dxej tedtu trabajw. Luxh orça ameer guidzujñ lo guideb guedxliuj, luxh sidejd guiraa rebeñ guedxliuj trabajw, te guibee rebensa'c lo rebeñ guedxliuj. ¹¹ Narä di gaclaa jiälä; gopdzu'tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr neñ xquidoo Xtioozä, nalajznu, sajçni te bejn nani gac guinibee cadro yu' Dios. Sibajñni ro'c par tejpas, diruni guirii ro'c. Lojni gu-cuaä laj Dios näza laj guejdx xten Dios ni najç Jerusaléncoob, nani guirii xhaguibaa cadro yu' Dios; lojni sucuaäza laä ni najçza nacoob sa'csi najçni xpeñä. ¹³ Nani rlajz cuadiajg diidx, sucuadiajgni ni rniï Sprit Dxan xten Dios loj reguidoo."

Rediidx nani rniini lo rexpejn guidoo ni yu' Laodicea

¹⁴ Dxejcti najni loä:

—Bacuaa rediidxre lo xangl Dios xten guidoo ni yu' Laodicea: "Nani laa Amén (ni säloj sugacni si'c), nani najç testiigw ni rniliipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree: ¹⁵ Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni! ¹⁶ Ni'cni, sa'csi najçtu si'c nistiib, ditu gac si'c nisnaji, niclaza gactu si'c nislää, sibäro'ä la'tu. ¹⁷ Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najçlu beñ gubijn, te beñ probduxhlu, di lojlu jien, luxh suga'lu xhabäälü nez lo Dios. ¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujyulu suulu xhabäälü; gusi-iza unguent loä te chää balojlu, te jien lojlu. ¹⁹ Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. ²⁰ Colhunii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert las-tooni, siu'ä lastooni, te gacnäáni, te guibañsa'czani nez loä. ²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtaä cadro rnibeeni xh-aguibaa. ²² Nani rlajz cuadiajg diidx, sucuadiajgni diidx ni rniï Sprit Dxan xten Dios loj reguidoo."

Calä'preni xpala'n Dios xhaguibaa

⁴ Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejçru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaa ree, te guluiä lojlu recos ni churu gac che luux gac recosre.

² Lagajç dxejç astoocanu si'cni huij sprit xtenä xh-aguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. ³ Nani sobga' lo yagxhilga, rieñni si'c te guisa'c ni rbe-balsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbe-balsejs si'c guisa'c ni laa esmeralda. ⁴ Guideb gabi cadro rnibeeni suga' sgałbitajp yagxhil, loj reyagxhilga sobga' gałbitajp rebengool, najcwreni ladnol, yu' coron oor yejç teygareni. ⁵ Nez lo yagxhilro cadro rnibeeni riï reyälrdinya' näza guzii. Nez loj cadro rnibeeni cayałguij gajdz bajl ni najç gajdz Sprit Dxan xten Dios. ⁶ Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näza guideb gabini suga' tajp man, guideb nez lojreni näza nez dejtzeni yu' balojni. ⁷ Manganidga najç si'c te lion; man ni rojçga najç si'c te gonbäz; man ni riojnga rujn lojni si'c rujn loj te niguii; man ni rdajçga najçni si'c te bisiro cagutajt xhaguibaa. ⁸ Niluxh guidap remanga teygareni yu' xho'p xhigareni, guideb gabireni, näj nez neñreni liguidxa balojreni, niluxh direni gusilajz, dxej-yääl caniireni:

Dxan, dxan, dxan najç Dad Dios ni rajp yälrnibeduxh, nani yu' galooli, nani yu' ñaj, nani churu jiäd.

⁹ Guidap remanga rliä'preni xpala'n Dios, rusuxhi-jbreni rajnrenini, rdeedzareni xquixtios loj nani rnibee par tejpas. ¹⁰ Dxejç guigalbitap rebengool, suzuxhi-jbzareni loj nani rbej lo yagxhilro, te ganreni nani nabajñ par tejpas. Sucuaareni xcoronreni nez loj xyagxhilroni, siniireni lojni, säjpreni:

¹¹ Dad Dios baxhuaannu, Guejbpaclu riäjł xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiej guira'ti nani yu' ñaj, yu'reni sa'csi rlajz Guejblu chureni, ni'cni benchee Guejblu guiraareni.

Te guijtç näj te ni najç Xiil xten Dios

⁵ Dxejçru narä Juan bahuiä lo nani sobga' lo yagx-hilroga. Naani ladbee ca'ni te libr, najçni si'c te bil-iu guijtç. Caj diidx nez lojni caj diidx nez dejtzni, nadxe'ni, caj gajdz seii lojni. ² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäjł guxhal guijtçre? ¿Chuni'c riäjł gutiäjs reseiiire?

³ Niluxh nicla tej bejn di nidxäjł ni riäjł gutiäjs reseiiiga te guxhalni guijtçga; nicla xhaguibaa, nicla lo guedxliujre, nicla xhajiät nez neñ guedxliuj. Niclaza nidxäjł chu najç nuhii lo guijtçga. ⁴ Narä ronduxhä sa'csi nicla tej rut riäjłdi gutiäjs reseiiiga, niclaza ni riäjł goł guijtçga, niclaza ni riäjł fiitis lo guijtçga. ⁵ Dxejcti gunii te beñ-gool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid, abejñni gaan lo yälgu-jt ni'c ñaj riäjł guxhalni guijtçga, gutiäjszani guigajdz reseiiiga.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj. ⁷ Laani gubigni, cua'ni guijtzga, guläänini naa ladbee xten nani sobga' lo yagxhilroga canibee. ⁸ Che cua'ni guijtzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zarenitaz oor guidxa te ni najc si'c yaal. Yaalga najc guiraa reyälrebejdx, yälriab xten rexpejn Dios. ⁹ Cayolzarenit te dicoob ni najc scree:

Guejblu sacduxh,
riäljpac xca' Guejblu guijtzga,
gutiäjs Guejblu reseiiga, sa'csi bagu't rebejnlu,
näjza xtejnlu gudijx xcuent bejn lo Dios.
Gudijxlu xcuent bejn ni najc garen-garen raz,
ni nnii garen-garen didxsaj,
ni siääd garen-garen-guejdx lo garen-garen ladxbejn.
¹⁰ Badeedlu gacreni rei näjza bixhojz lo Dios.
Laarenit sinibeereni reben guedxliuj.
¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najczeni, xhidalduxh miyon najczeni.

¹² Dipduxh najc xse'reni, caniireni scree:
Sacduxh Xiil nani bagu'treni,
ni'c riälj xca'ni yälriabeduxh, yälrapduxh, yälmanduxh,
yälmilagwr.

Riäljza guiliä'pnu xpala'nni, guzuxhijbnu lojni ganunni, gudeednu xquixtios lojni.

¹³ Dxejcti biejn diagä xse' guiragajczeni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez neñ guedxliuj näj lo nisdoo, biejn diagä caniireni scree:

Loj nani sobga' lo yagxhilro cadro rnibeeni,
näjza loj ni najc Xiil xten Dios, laatisni sacduxhni,
guiliä'pnu xpala'nni, guzuxhijbnu nez lojni ganunni,
gäbzanu rinibeeni par tejpas.

¹⁴ Dxejcti guidap remanga rnigajczeni scree:

—Sugacni si'c.
Dxejcti guigalbitap rebengool bazuxhijbreni nez loj nani nabajn par tejpas, gojnrenini.

Guigajdz reseii

6 Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

² Dxejc bahuiä lo te cabai nol. Nani bijb dejtznit ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴ Dxejc bahuiä lo te cabai xniaa. Loj nani bijb cabai xniaaga badeedreni yälriabee gudzucajni yälñadoo, yälribedxilajz, lo guedxliujre, te ju't sa' rebejn. Badeedreni te spadro cua'ni.

⁵ Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäi guidap remanga, birii xse' te ni canii scree:

—Tej kil xob xca'lu gunlu dzuun tebdxej; choñ kil salbaad xca'lu gunlu dzuun tebdxej. Niluxh na'c guhua'lu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdap manga, najni loä:

—Gudaa te fiilu.

⁸ Dxejc bahuiä lo te cabai gojtz. Nani bijbni laa yälgujt, luxh dejtznit siädnaalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejniga con spaad, näj yälriiaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni' xpändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälgujxhtis loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt tejegarenit. Dxejc räjpreni lojreni cuäzsjczeni, gusilajzreni, la' ni guiza' resa'reni ni rusule' xtidx Dios, ni churu gugu'treni sigajc bagu'treni laarenit.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. ¹³ Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. ¹⁴ Dxejcti gunitloj guibaa si'cni rnitloj te guijtz che re'ni, rajcni te bilii. Guiraa redajn näjza reyuj ni re' galäi lo nisdoo biniibreni, bidxaa xladjreni. ¹⁵ Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajczeni baxunreni, huicuatzlojreni neñ rebiliä neñ redajn. ¹⁶ Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilro xhaguibaa näjza loj yälgujxhtis xten nani najc Xiil xten Dios. ¹⁷ Sa'csi abidzujn dxero xten xcälgujxhtisni, ¿chuni'c sajc suu nez lojni?

Tegayuu tiubitajp mi' rexpejn Israel

7 Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yej reyajg. ² Bahuiä lo stee xangl Dios, ni siääd nez cadro rliejn gubijdx, ca'ni sei xten

Gueb Dios ni nabajñ par tejpas. Dipduxh guniini lo guidap xangl Dios ni rajp yälñibee te gunreni daan lo guedxliuj, näjza lo nisdoo. ³ Räjpnj lojreni:

—Guläzsijectero, la! ni guicuaanu te seen lo cuaj reni najc xpejn Dios, te dxejcru sajç guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mi! bejn ni bibee loj rexpejn Israel. ⁵ Loj rexpejn Judá bibee tzubitio'p mi!; loj rexpejn Rubén bibee tzubitio'p mi!; loj rexpejn Gad bibee tzubitio'p mi!; ⁶ loj rexpejn Aser bibee tzubitio'p mi!; loj rexpejn Neftalí bibee tzubitio'p mi!; loj rexpejn Manasés bibee tzubitio'p mi!; ⁷ loj rexpejn Simeón bibee tzubitio'p mi!; loj rexpejn Leví bibee tzubitio'p mi!; loj rexpejn Isacar bibee tzubitio'p mi!; ⁸ loj rexpejn Zabulón bibee tzubitio'p mi!; loj rexpejn José bibee tzubitio'p mi!; loj rexpejn Benjamín bibee tzubitio'p mi!.

Benguixhuj ni najcw ladnolbäj

⁹ Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siää-dreni, garen-garen najc lajdxreni, näj raz xtenreni, näj xtiidreni. Suga'reni nez loj yagxhilro xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarenj zijñ. ¹⁰ Dipduxh rniireni, räjpreni:

Dios ni rnibee lo yagxhilro, näjza nani najc Xiilre, baslaareni nuure lo xtoj!nu.

¹¹ Suga'za guiraa rexangl Dios guideb gabi yagxhilro cadre rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, ¹² räjpreni:

Sugacni si'c. Loj Xtioistisnu colye'tz sacduxhni; colguiliä'p xpala'nni; laatisni rajpni yälñajñ; lojtisni colgudeed xquixhtios, laatisni colgan, colsuxhijb lojni; laatisni rajpni yälñibee näjza yälmi-lagwr.

Sugacni si'c par tejpas.

¹³ Dxejç gunii te bengool loä, najni:

—Renani najcw reladnolbäjre, çchu najczeni?

çCasiäädreni?

¹⁴ Dxejcti räpä lojni:

—Dad, anajñ Guejblu.

Dxejç najni loä:

—Redee najc renani agudejd yältrabajwduxh, renani abia rextoj!reni sa'csi xtiejn Xiil xten Dios agudijx xtoj!reni. ¹⁵ Ni'cni suga'reni nez loj yagxhilro xten Dios dxej-yääl cayujñreni xtuunni neñ xquidooni. Ni'cni sac-näj nani sobga' lo yagxhilroga guiraa renani suga' nez lojni, sunäjtisni laareni. ¹⁶ Dirureni guiliaan, niclaza jioj!reni, diza gubijdx guze'c lojreni, dizarenj gacnanlaa. ¹⁷ Sa'csi nani najc Xiil xten Dios ni sobga' galäii loj yagxhilro xten Dios, laani cayajpnireni si'c xilbäz, sinänireni cadre yu' nisya ni rudeed yälñabajñ par tejpas. Suspijdz Dios nisbee balojreni, dirureni goon par tejpas.

Ni rajc gajdz seiiga

8 Che batiäjsni ni rajc gajdz seiiga, gucdxi xh-aguibaa si'cti med or. ² Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³ Dxejctiru biääd stee angl, ca'ni te bacue ni najc ganax oor, bazujñini nez loj piändxan. Badeedreni lojni naclejñ yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. ⁴ Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios. ⁵ Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojñini lo guedxliuj. Dxejç guyu' te guziduxh, bidinyaduxh, gujca te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusiñreni te guisloj gojreni retrompe'tga.

⁷ Che bi! trompetganid, guixob näj guiboo nu'chreni rejñ gusloj cayajbreni loj guedxliuj. Dxejcti huejç ni riojñ la' guedxliuj, huejçza ni riojñ la' reyajg näjza guiralii recuaan.

⁸ Che bi! ni rojç xangl Dios trompe't ni ca'ni, ascanu yu' chu bacuaani biajb si'c te danro ni cayejç loj nisdoo. Dxejcti gujç ni riojñ la' nisdoo si'c rejñ. ⁹ Dxejcti gujç ni riojñ la' rebäj! näj guiraa reman ni yu' loj nisdoo. Gunitlojza ni riojñ la' rebarcw ni sazaj lo nisdoo.

¹⁰ Che bi! ni riojñ xangl Dios trompe't ni ca'ni, biajb te balro xhaguibaa, cayejçni si'c te balguejd. Bitejbni loj ni riojñ la' regueuu, näjza cadre rliejñ nis. ¹¹ Laj bajlga najc Ajenjo, ni säloj te cos ni nañladuxh. Ni riojñ la' nis gujç nis nañladuxh. Dxejcti gujç xhidalduxh bejn xcuent nisnañlaaga.

¹² Che bi! ni rdajp xangl Dios trompe't ni ca'ni, guxhi- jñ ni riojñ la' gubijdx, näjza ni riojñ la' bäii, näjza ni riojñ la' rebal xhaguibaa, bicäjyreni. Dxejcti dirureni guzanij ni riojñ la' dxej, näj ni riojñ la' yääl.

¹³ Dxejcti bahuiä xhaguibaa, biejn diagä si'c te bisij cagutajñ nez galäii xhaguibaa. Biejñ diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä rebenj guedxliuj che guisloj goj! schoñ rexangl Dios retrompe't ni ca'reni. Sidejd rebenj guedxliuj trabajwduxhru.

9 Che bi! ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xh-aguibaaga cua'ni läii ni ruxhal ro' gabijl. ² Baxhaltini ro' gabijl, dxejç huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³ Dxejcti lo gujxhga birii betzsu gusujreni guideb lo guedxliuj. Cua'reni yälñibee gacreni nialajz si'c nialajz renaxejb. ⁴ Cua' remanga yälñibee na'c gunreni daan loj reguixa', loj recuaan, loj reyagbajñ; rebejñtis nani xhet beedi xten Dios çaj lo cuajreni, reni'c gusacsíreni. ⁵ Cua'reni yälñibee na'c ju'tni bejn,

gaili bäii gusacsíreni xcälñayanreni bejn. Luxh xcälñayanreni najc si'c yälñayan cadro rauya' te naxejb te bejn. ⁶ Neñ redxejga, siguiil rebejn yälgujt, luxh direni guidxälni. Luxh mase rlaizreni guetreni, sibicaj yälgujt lojreni.

⁷ Rebetsure najc si'c recabaii ni suchee te chääreni lo guer. Yejceni yu' te ni najc si'c te coron oor; luxh lojreni rujn si'c loj rebejn. ⁸ Xquichejcreni si'c najc xquichejc gunaa; reläyjreni najc si'c läjy lion. ⁹ Luxh guideb tiejxhrenei caj si'c guilib ni rusäudzu'tzreni. Rubeduxh rexhigaareni, si'c rubej che ruxun xhidalduxh cabaii näj xcañreni che agojl chääreni guer.

¹⁰ Xhibaanreni najc si'c xhibaan naxejb, xcuchreni yu' yälñayan te gusacsíreni reben guedxliuj gaili bäii.

¹¹ Yu'za ni nrabee lojreni, xangl beñdxab ni birii gabijl. Xtidx hebree laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejn ni lascanu siädäni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. ¹⁴ Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufates.

¹⁵ Dxejcti baslaani guidap reanglga te ju'treni ni riojn la' beñ guedxliuj. Luxh gule Dios reanglga parpac dxejga, bäiiga, ijzga. ¹⁶ Biejn diagä bal najc guiraa resoldaad ni rbijb cabaii: najceni tio'p gayuu miyon.

¹⁷ Scree bahuiä lo bacañ recabaiiga näjza renani bijb recabaiiga. Lastoo reni bijb recabaii caj te guilib, najcni xniaa näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr. ¹⁸ Ni riojn cuaa bejn gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejn nani di replaagre nugu't, direni nusiejch laizreni xcuent ni cayujn ñaareni, te rajñreni rebeñdxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi sareni. ²¹ Diza rebejnga nusiejch laizreni xcuent xcälrugutreni, xcälrujnreni yälbidxaa, xcälresnäjreni bejn ni di gac chäälni, niclaza xcälgubaañreni.

Te angl ni ca' te guijtz

10 Bahuiä stee xangl Dios ni rajp yälñibeduxh, siädjiäjtne xhaguibaa, li yu'ni neñ bäj, yejcti dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ² Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, ³ dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. ⁴ Che guluix gunii guziiga, narä rlaiz nücuää lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

⁵ Angl nani suj ni'ni loj nisdoo näjza loj yuj, guläs ñaani ladbee nez xhaguibaa. ⁶ Guniliini diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjpnii:

—Diru redxejre gaclaa. ⁷ Che guidzujntis dxej ni agojl gol ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸ Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladzña angl ni suj te laad ni'ni loj nisdoo, stelaad ni'ni lo guedxliuj.

⁹ Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcti nejxh si'c dzujn.

¹⁰ Dxejcti cua'ä libre'ga lo ñaa anglga, dxejc gu-dauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj reñei.

Tio'p niguii ni rusule' xtidx Dios

11 Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb neñga. ² Na'c gutiexhlu gabi lole' guidooga, sa'csi ni'c acua' rebenzijtne te tiubio'p bäii chaläjsreni guedxdxan si'ctis ni rlaizreni.

³ Narä sudedä yälñabee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te miñ tio'pgayuu gayojn dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios. ⁵ Palga yu' chu bejn rlaiz gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjñ guet chutis ni rlaiz gun latsiajreni. ⁶ Guiro'p redade'ga rajp yälñabee te gusäureni xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yälñabee te guchaareni nis te gacni rejn, rajpzareni yälñabee te jiadgusacsí xhitis plaag lo guedxliuj, si'ctis huält ni rlaizreni. ⁷ Che luux gusule'reni xtidx Dios, dxejcti ni najc si'c te man nialajz sirii gabijl te jiadchagdijñ guiro'preni. Sujnni gaanreni, sugu'tnireni. ⁸ Dxejcti jia'n guiro'p rebeñgutga lad caii xten guejdx cadro bacuaareni Dad Jesucrist lo cruzj. Guejdxroga rbälajzareni Sodoma näjza Egipto. ⁹ Chon dxej garol guiraa rebejn ni siädä guedxbäz, ni siädä guedxro, ni najc garen-garen raz, ni rnii garen-garen xtidx guiraa rebejn guedxliuj, suhuii loj guiro'p rebeñgutga, direni gusaan guiga'tzreni neñ baa. ¹⁰ Guiraa renani nabajn lo guedxliujre sibalazduxhrenei sa'csi gujtreni. Luxh sa'csi rbalajzduxhrenei, suxhalzareni xhi xca' sa'reni; sa'csi guiro'p redade' ni basule' xtidx Dios baxhal tra-

bajwduxh lojreni. ¹¹ Che gudejd choṅ dxej garolga, baspaṅsac Diosreni, dxejcti huitiesacreni. Guiraa reni bahuii lojreni, bidxebduxhreni. ¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Coḷchä'p jiaare.

Dxejcti huä'preni xhaguibaa lo te za, luxh guiraa reni rdxe'ch lojreni, bahuiireni huä'preni xhaguibaa. ¹³ Lagajc orga gujc te xuduxh, gurebä'n tej lo tzuu la' guejdxga, gujt gajdz miḷ bejṅ lo xu ni gujc ro'c. Rebejṅ ni bia'n ro'c bidxebduxhreni, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujṅ ni riojṅga.

Ni rajc gajdz xangl Dios goḷ trompe't

¹⁵ Che biḷ ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälṅnibee guedxliuj agudejd ladzṅaa Dad Dios näjza Jesucrist;

luxh laani sinibeeni par tejpas.

¹⁶ Gaḷbitajp rebeṅgool nani sobga' lo tron xtenreni cadro rnibee Dios, biabrolojreni nez loj Dios te calä'preni xpala'n Dios. ¹⁷ Räjpreni:

Xquixtioste Guejblu Dios, nani rajp yälṅnibeduxh, nani najclu, nani gujclu, nani churu gac, sa'csi acua'lu xcälṅnibeduxhlu te agusloj canibeelu.

¹⁸ Bidxe'ch rebeṅ guedxliuj lojlu, luxh abidzujṅ dxej guidxe'chlu lojreni, gunlu yälṅuxhtis rebengut, te gudeedlu cossa'c loj rexpejṅlu,

lo renani gunii xtidx Dios, lo renani huililajz xtiidxlu, lo renani rusuxhijbni nez lojlu;

rebeṅproob sigajc rebeṅro.

Abidzujṅza dxej che cuäcajlu renani bejn daan guedxliujre,

te nitlojreni par tejpas.

¹⁹ Dxejc bixal xquidoo Dios ni yu' xhaguibaa, neṅ guidooga bien te guijṅ cadro yu' guij cadro caj rediidx ni bia'n Dios loj rexpejṅ Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

Te gunaa näj te ni najc si'c te gutiatzro

12 Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnii yu' te coronṅ ni nac-chee tzubitio'p balxhaguibaa. ² Gunaare nuxi'nni. Rbedxa'ni sa'csi agusloj cayu' yooob xque'ni te gaal xi'nni, cadejdni trabajwduxh. ³ Dxejcti bahuiä stee seen xhaguibaa: te manxniaa ni rujṅ lojṅni si'c loj te gutiatzro, manduxhni. Yu' gajdz bitiuwejcni, sojb tzuu xca'chni. Tejga yejcnii yu' te coronṅ, najceni gajdz coronṅ. ⁴ Dxejcti xhibaanni cagobxajxhni ni riojṅ la' rebalxaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵ Dxejcti gojl xi'n gunaaga,

najcni te niguii, luxh te bar guuib nungäjl guinibenäjni lo guiraa rebeṅ guedxliuj. Guläsgajceni bäzga te sanäreni xhaguibaa cadro rnibee Dios. ⁶ Dxejcti baxuṅ gunaaga, siini nez loj reyubijdz cadro yu' te lajt ni basuchee Dios te cuäzṅni, te ro'c guyaannini te miḷ tio'p gayuu gayojṅ dxej.

⁷ Dxejc guyu' gueṅ xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglṅni gudilṅduxhni, ⁸ niluxh direni niujṅ gaan, luxh di niajcdiru nia'n manga näjza resa'ni xhaguibaa. ⁹ Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Beṅdxab, ni laaza Satanäs, ni rusguee guideb guedxliujre.

¹⁰ Dxejcti biejn diagä xse' te ni canii dipduxh xhaguibaali, räjpni:

—Abidzujṅ yälṅrusḷaa lo dojl, näj yälṅmilagwr, näj yälṅnibero xten Dios, näjza yälṅnibee xten Jesucrist, sa'csi agulääreni bejṅ nani entis rbe'c xquej rexpejṅ Dios loj Dios dxej-yääl. ¹¹ Laareni gujc bejnreni gaan loj beṅdxabre, xcuent xtiejṅ ni najc Xiil xten Dios, näjza sa'csi huililazsa'ceni xtidx Dios, dizareni nidxejb mase niejtzareni. ¹² Ni'cni, guiraa la'tu ni yu' xhaguibaa näjza gueb xhaguibaa, coḷquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt beṅdxab lo guedxliuj, luxh cadxcheduxhni sa'csi anajṅni guxii dxej rajpni.

¹³ Che gucbee gutiatzroga abacuaarenini lo guedxliuj, birinajṅni gunaa nani guyu' xi'ngaanni te gusacsini. ¹⁴ Dxejc badeed Dios lo gunaaga tio'p xhiga xten bisiro, te gac gutajṅni nez lo reyubijdz cadro nac-chee cadro cuäzṅni. Choṅ ijc garol guyu'ni ro'c, nacuatzlojṅni lo bälga. ¹⁵ Dxejcti ro' gutiatzrore birii nis si'c te gueuu te nuslo'ni gunaaga. ¹⁶ Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷ Dxejc bidxcheduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

Tio'p manduxh

13 Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coronṅ. Yu' gajdz bitiuwejcni cadro caj diidx ni rniyaj Dios. ² Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälṅmilaagwrni lojṅni, näjza tron cadro rbejṅni, näjza xcälṅnibeduxhni. ³ Dxejcti bahuiä te yejcnii najc ascanu yu' chu batiuugni con madxed, ameer guetni, luxh biajṅ cadro gurujṅ yejcnii. Ni'cni rdxeloduxh guiralii rebejṅ guedxliuj, sanajṅreni manduxhga. ⁴ Bazuxhijbreni gojṅreni gutiatzroga sa'csi badeedni xcälṅnibeeni lo manduxhga, dxejctiru bazuxhijbreni gojṅzarenii manroga, räjpreni: —¿Chu stee najc si'c manrore, ä? ¿Chu laa ni gac guichagdijṅni, gucuanäjni?

⁵ Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za

chu badeed ga'pni yälrnibee tiubatio'p bäii, gunni si'ctis ni rlajzni. ⁶ Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xh-aguibaa. ⁷ Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. ⁸ Dxejcti guiraa rebejn guedxliuj sazux-hijbreni, sagajñreni manroga, guiraa rebejn nani di lajreni nicaj lo libr xten yälñabajñ xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

⁹ Palga yu' chu rlajz cuadiajgni, sugucuadiagsa'cni.

¹⁰ Palga yu' chu nungäjñ jäuu neñ latzguuib, siäupac-ni. Chutis ni ju't te bejn con te madxed, con madxedza guetni. Ni'cni renani anumbee Dios, riäjñ gunreni huant, chanuutis chalilazsa'cni xtidx Dios.

¹¹ Dxejcti bahuiä loj stee manro, cariini neñ yuj. Sojb tio'p xca'chni si'c xca'ch te xiil, rniini si'c rni te gutiatz.

¹² Luxh rnibeezani si'cni rnibee manroga lagajc nez loj manroga, rujnzani rusuxhijb rebejn guedxliuj loj manrogalooa ni gurujc yejcti, luxh biajc yejcti. ¹³ Manroga ni birii neñ yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn. ¹⁴ Rusgueeni rebejn nani nabajñ lo guedxliuj xcuent remilagwrro nani rujnni nez loj manrogalooa. Guinibeeni gun rebejn guedxliuj te banäjb si'c najc manroga nani batiuug madxed yejcti, luxh biajca yejcti. ¹⁵ Dxejcti man ni rojppa baspajñ banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganreni. ¹⁶ Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc beñro, guiraa reni najcza beñbäz. ¹⁷ Gunibeezani digacdi sii, digacdi guto' bejn palga xhet seendi caj ñaani o lo cuajni. Seenga najc laj manga o numbr xten laj manga. ¹⁸ Dee rquini yälñajñ. Renani rajp yälñajñ sugulabreni xseen manga, numbrga najc si'c xnumbr bejn; numbr xten manga najc xho'p gayuu gayoñbixho'p.

Dij ni roj te gayuu tiubitajp miñ

14 Che bahuiä stee, bahuiä suga' Xiil xten Dios yejc dajn ni laa Siön. Sujanäjni te gayuu tiubitajp miñ bejn nani caj lo cuajreni laj Xiil näj laj Xtadni. ² Biejn digä rubej xhaguibaali, rubeduxh, riejnni si'c rubej xhidajñ gueuro, näj te guziro; riejnzani si'cni riejn che cayoñ xhidajñ bejn ni roj arp. ³ Cayoñreni te dicoob nez loj tronj cadro rbej nani rnibee, näjza nez loj guidap reni najc si'c man ni nabajñpac, näjza nez loj rebeñgool. Rutliidi gujc bisieedi dijga, xtebtis tegayuu tiubitajp miñ bejn nani guñaa lo rebeñ guedxliuj. ⁴ Reniguiire najc renani gajd xhiñ con gunaa; nicla tejreni di niesnäj te gunaa, najcreni beñ dxan. Laareni rinajñreni Xiil xten Dios cadrotis säani. Redee guñaa lo rebeñ guedxliuj si'c te gojn lo Dios näjza lo Xiil xten Dios. Goinre najc si'c gonganid ni rudeed bejn xten te cose'ch. ⁵ Nicla tej didx-xhii di guirii ro'reni, sa'csi xhetliidi xto-

ñreni, nayareni suga'reni nez loj tronj cadro rnibee Dios.

Rediidx nani bazule' jionj rexangl Dios

⁶ Dxejcti bahuiä loj stee xangl Dios, rutajtni nez galäii xhaguibaa, siädñani diidx ni najc par tejpas xten Dios te gusule'nini loj rebeñ guedxliuj, guiraa lo reguedxro, guiraa lo reguedxbäz, loj rebeñ ni najc garen-garen raz, nani rnii garen-garen xtiidreni. ⁷ Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujñ or gunni yälguxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

⁸ Dxejcti siädñajñ stee angl nani canii:

—Abiajb, abiajb guejdxroga nani laa Babilonia, sa'csi baquiiñi guzojz guiraa reguejdx xten guedxliuj xcuent xcäl-latsiajñi, xcuent dojlñ ni bejnñi guideb lagaa; najcni si'c reni rä' nejç.

⁹ Dxejcti biädñajñ ni riojñ xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo ñaani, ¹⁰ sidxechduxh Dios lojni, di xcälguxhtisduxh Dios tedcaj lojni. Sidejdpacni trabajwduxh neñ balro näjza azufr nez loj rexangl Dios näjza nez loj Xiil xten Dios. ¹¹ Luxh gujxh xten reni cayejc säp' nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojñ manroga näjza reni gojñ banäjb ni najc si'c manroga, chutisza ni rca' seen xten lajñi. ¹² Ni'cni renani huililajz xtidx Dios, reni rusoozza xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn diagä xse' te ni caniiñi loä xhaguibaali:

—Scree bacuaa: “Chicbaa rebejn ni guet ñajñi nani riililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yälñasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coronj ganaxduj oor yejcti, dxejcti ñaani ca'ni te guiboñ ni caduxh ro'ni. ¹⁵ Dxejcti birii te xangl Dios loj xquidoo Dios, dipduxh caniiñi loj ni sobga' loj bäjga, räjpni:

—Basäl xquiboñzlu, batiuug, te batie' yälñasa'c, sa'csi agojl or guire' yälñasa'c, guideb guedxliuj aguyajñi.

¹⁶ Dxejcti nani sobga' lo bäjga basniibni xquiboñzlu, batiuugni yälñasa'c ni caj lo guedxliujre.

¹⁷ Dxejcti stee xangl Dios birii neñ guidoo ni yu' xh-aguibaa, ca'zani te guiboñ ni caduxh ro'ni. ¹⁸ Dxejcti birii stee xangl Dios nez loj piändxan xten Dios. Laani rajpni yälrnibee lo balro. Dipduxh guniini, räjpni loj ni ca' guiboñ ni caduxh ro'ni, räjpni:

—Basäl xquiboñzlu nez ni' reyaguub, batiuug guiraa resesim uub ni yu' lo guedxliujre, sa'csi aguyajñreni.

¹⁹ Dxej batiuug anglga guiraa reresim uub ni yu' lo guedxliujre nalajznu rebenguijdx, basälñireni neñ tanc cadro guläjreni yejcn i sa'csi rdexchduxh Dios lojreni. ²⁰ Dxejcti baläjreni yejcn reuub nez orii te guejdx. Biriiduxh rejn yejcreni, gutiäs rejnga, bidzujñ rejnga ro'li recabaii, gujcn i si'c che riu' nisro gueuu, biäjtni si'cti choñ gayuu mil metr guideb gabi cadro baläjreni yejcn reuub.

Guigajdz xangl Dios näj lult xcälgujxhtis Dios

15 Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejpgareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yälrdxe'ch xten Dios.

² Dxejcti bahuiä loj tej ni najc si'c te nisdoos ni najc si'c biidr nu'chni bajl. Dxejcti galäi nisdooga suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios. ³ Cayol'reni dij xten toMoisés ni gujcn xpejn Dios, cayolzareni dij xten Xiil xten Dios. Scree najc dija:

Sacduxh, ruscheloy guiraa redzuun ni rujn Guejblu, Dad Dios, ni rajp guiraa yälñibee.

Rujn Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

⁴ Bahuii, Dad, çchu laa ni di guidxejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni, siädgajñreni Guejblu,

sa'csi abaluiloj guiraa rextzunsa'cpac Guejblu.

⁵ Dxejcti bahuiä xhaguibaa, bixal ro' yu' ni najc dxanro neñ guidoo, cadro yuchee guj cadro caj xleii to-Moisés. ⁶ Ro' yudxanroga birii gajdz xangl Dios ni ca' plaag te gusacsíreni reben guedxliuj. Najcwreni te ladliñ ni najc nolbäj, ni rdimbichaduxh. Dejd si'c te cinturoñ lastooreni ni najc ganaxduj oor. ⁷ Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcälgujxhtisro Dios nani nabajñ par tejpas. ⁸ Gudxaj guidoo ni najc yudxanroruga gujxh ni siädä xcuent xcälmilaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

Rexhijg ni guidxa xcälgujxhtis Dios

16 Dxejcti biejn diagä xse' te ni canii dipduxh xquidoolini, caniiini loj guigajdz rexangl Dios, räjpni:

—Colçhäj, colçhasloj guigajdz rexhijgga lo guedxliuj, colca' rexhijg ni guidxa xcälgujxhtis Dios.

² Angl galoo ni huij, baslojni ni yu' neñ xhijg ni ca'ni lo guedxliuj. Dxejcn loj guiraa rebejn nani caj xseen manduxh, reni rusuxhijb, rajñreni banäjb ni najc si'c man-

roga, birii tiejxhni te guedxyanduxh ni najc si'c cancer.

³ Dxejcn ni rojp anglga baslojni ni yu' neñ xhijg ni ca'ni loj nisdoos, te bejnii gubixhloj nisdooga gujcn i si'c rejn xten te bengut. Dxejcti gujt guiralii reman ni yu' lo nisdoos.

⁴ Ni riojñ anglga baslojni ni yu' neñ xhijg ni ca'ni loj regueuu näjza cadro rliejn nis. Gubixhlojreni gujcreni rejn. ⁵ Dxejcti biejn diagä gunii angl ni rajp yälñibee lo nis räjpni:

—Huenduxh najc Guejblu Dad ni najc naj sigajc gujcn Guejblu galoo, dxanduxh najc Guejblu sa'csi cayujñ Guejblu yälgujxhtis redzunguijdx. ⁶ Sa'csi laareni baxhe'reni rejn, bagu'treni rexpejnlu näjza renani gunii xti-idxlu, luxh naj badeed Guejblu rejn cayä'reni. Si'cpac nungäjñ gacreni.

⁷ Dxejcti biejn diagä canii steeni lagajc lo piändxan, räjpni:

—Guliiacni Dad Dios ni rajp guiralii yälñibee, xcälgujxhtis Guejblu najc laaca, si'c riäjñ gacni.

⁸ Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñibee guze'cnäjni rebejn guiboo. ⁹ Guiralii'reni gusloj cayejcreni, lacti nanladuxh, dxejcn gusloj caniyajreni Dios ni rajp yälñibee loj recosga. Niluxh direni nusiechlajzreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadro rnibee manroduxh. Bicäjy guideb cadro rnibee manduxhga, luxh rebejn rauya'tisreni lujdxreni sa'csi cayajcreni yälñayanduxh.

¹¹ Guniyajreni Guejb Dios ni yu' xhaguibaa sa'csi rajcreni yälñayanduxh, xcuentza rexquedxnayanreni. Luxh direni nusiechlajzreni xcuent xtojñreni.

¹² Dxejcti ni rajc xho'p anglga cua'ni xhijgni, baslojni ni yu' neñ xhijgga loj gueuro ni laa Eufates. Gueuga gubidzlii nisni te guc-chee te nezyuj xten rereii ni jiädä nez cadro rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii choñ spritguijdx ni najc si'c bedz, ¹⁴ sa'csi najcreni resprit xten beñdxab, rujñreni milagwr, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälñibee che guidzujñni lo guedxliuj. ¹⁵ "Narä siädxhiga'tzä si'c riädä te gubaan. Chicbaaza renani cabäjz, cagutie'chreni bacañ lojni che guibi'ä si'c rujn nani najcw guiraa xhajbni, te na'c guiga'ni xhabäälñi, jianxtujyni che guibi'ä." ¹⁶ Dxejcn gutie'reni guiraa rebejnre te lajt ni laa lo didx hebre "Armagedón".

¹⁷ Dxejcti ni najc rgajdz anglga cua'ni xhijgni baslojni ni yu' neñ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejcn guyuduxh yälrdinya' näj guziro. Gujca te xuroduxh lo guedxliuj, te xu sa' ni gajdpac gac. ¹⁹ Che gujcn xuroga, biräjz guedxroduxhga, gujcn choñ la', dxejcti gurebän guiraa reguejdx guideb guedxliujre. Dxejcn banaj lajz Dios guedxro ni laa Babilonia, bialoj bejn

Dios yälguhxhtis guedxga. ²⁰ Li gubicaj, gunitloj reyuj ni tre' lo nisdoo, gunitlojza redajn. ²¹ Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcnj.

Gun Dios yälguhxhtis te gunadxab

17 Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis. ² Guiraa rereii lo guedxliujre bennäjreni gunaaga dojl, sigajcza guiraa reben guedxliuj bennäjreni gunaaga dojl. Gusos-näjreni gunaaga bejnreni si'ctis ni rlajzreni.

³ Dxejcti huinäni narä si'c lo te baca| nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuvejcnj, sojbza tzuu xca'chni. ⁴ Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. ⁵ Caj te diidx lo cuajni, luxh rut racbeedi xhi sälojni. Scree rni diidxga: “Babilonro, xnan regunadxab, xnan recosdxab ni rajc lo guedxliuj.” ⁶ Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷ Dxejcti gunii anglga loä, najni:

—Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuvejcnj näj tzuu xca'chni. ⁸ Manroga ni bahuiilu gubajjni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtz xten yäl|nabajn xten Dios, guijtz ni guc-chee che birixtiejli guedxliuj, rebejnğa sidxeloduxhreni che fiireni loj manroga nani gubajn galoo, ni gunitloj, niluxh naj agubansacni.

⁹ Ree nanab ga'pni yäl|naj. Gajdz rebitiujejcnj säloj gajdz dajn cadro sobga' gunaaga, ¹⁰ sälojzarenj gajdz reii. Agujc gaii reiiga ni cayajb. Tej rereiiga canibee naj. Stee reiiga churu jääd. Luxh che jääd lult reiiga, guxii dxej guinibeeni. ¹¹ Manro ni gubajn galoo, ni agunitloj naj, ni'c rac xhujn reii, najczani tej loj guigajdz rereii, luxh sinitlojni, sejtni par tejpas.

¹² Guidzuu rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yäl|rnibee teb or, nalajznu guxii dxej. ¹³ Tejtis xhigab gun rereiiga, gudeedreni xcäl|nadipreni, xcäl|rnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rereii. Luxh renani siädnajni najc reni agurejdxni, reni aguleni, sisiudzu'tznäjrenini.

¹⁵ Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa bejn guedxliuj, guiraa bejn ni rni garen-garenca xtiidxreni, ni siäd garen-garen reguejdx. ¹⁶ Guitzuu reca'chga näjza manroga ni bahuiilu,

sidxe'chreni loj gunadxabga, suro'nreni gunadxabga, susa'nreni gunadxabga xhabäälni, sawreni bältiejxhni, suze'creni gunadxabga lo guiboo. ¹⁷ Sa'csi abasniib Diosreni te gunreni tejsi xhigab, te gudeedreni xcäl|rnibeereni lo manroga che guidzujnli dxej ni chale' guira'ti ni gunii Dios gac. ¹⁸ Gunadxabga ni bahuiilu säloj guedxro ni rnibee loj guiraa rereii loj guedxliuj.

Xho jiajb guedx Babilonia

18 Dxejcti bahuiä loj stee xangl Dios ni siädjajt xhaguibaa. Siädnäni yäl|rnibeduxh, xcäl|rdim-bicha'ni bazanij loj guedxliujre. ² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadro rbäjz reben dxab, ro'c rcazaj guiralii cuaa spritdxab, najczani xpitiääz guiraa reman xhaguibaa ni najc mandxab, mandxuudx. ³ Sa'csi guiraa reben guedxliuj agusojzreni xcuent dojl ni bennäjreni gunadxabga, guiraa rereii loj guedxliuj bejn dojl guläs-näjreni gunadxabga, luxh guiraa reben guedxliuj ni ruto' abejnreni ganduxh, agujcni ri'cw xcuent recosdxab ni rujn gunabdxabga.

⁴ Dxejcti biejn diagä xse' stee nani canii xhaguibaa:

—Colguirii guejdxga rexpenä, te di näj la'tu gunnäjtu gunadxabga dojl, te di tedtu trabawduxh lo replaag xteni. ⁵ Sa'csi yuduxh rextoljni, abidzujnreni xhaguibaali, luxh abanajza lajz Dios rextoljni.

⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnni laani. Nen co'p cadro badeedni gu' bejn (te trabajw ni bateedni bejn), lagajc nenga coljejn te ni najc tio'p huält maazru fuert yä gunadxabga, nalajznu tedni trabajw tio'p huält. ⁷ Lacti gulä'p gunaaga xpala'nni, gubajjni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajjni, sigajcza gac-huin lastooni sa'csi bejnni xhigab nen lastooni: “Narä sobga'ä ree si'c te rein, te benroduxh, dina gacä biuud, ni claza gac-huin lazä.” ⁸ Ni'cni tejsi dxej siajb yejcnj guiraa replaag xten Dios: yäl|gujt, yäl|huin lajz, näj yäl|riaan, luxh sejczeni lo balguiboo, sa'csi rnibeduxh Dad Dios ni gun xäl|guxhtisni.

⁹ Guiraa rereii lo guedxliujre ni bennäj gunaadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadro cayejcnj.

¹⁰ Zijtru sisiujreni sa'csi rdxejbreni replaag xten gunadxabga, dxejcnj siniizarenj:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujn yäl|guxhtis yejclu.

¹¹ Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni.

¹² Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yag-doo, näj guiraloj cos saru, ni nacchee läi elephant, näj cos saru ni nacchee bronz, näj guiib, näj märm,

¹³ näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza

arinsa'c, nájza triuu, nájza gon, nájza rexiil, nájza cabaii, nájza gare't, nájza bejn ni ruto'reni tiejxhrenei, xaimreni. Guiraa reni'c ruto'reni. ¹⁴ Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recos-sa'c, recossaruduxh agubicajreni lojtu, luxh di gacdiru guidxäl bejn reni'c.

¹⁵ Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhrenei, sac-huinuxh lajzreni, ¹⁶ säjbreni:

—Aii, aii, riaduxhnu guedxrore, nani gojtnei ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷ tera'tbäztis baralii recosro ni najc xhixtenni, guxhijjreni.

Guiraa recapitän xte barcw, nájza guiraa remarineer, nájza rebejn ni rij biaj lo rebarcw nájza guiraa reni rujn dzuun lo nisdoo, gusujreni zijt, ¹⁸ nájza laareni cahui-ireni cayäjs gujxh guejdxga, cabedxa'reni, caniiireni:

—Xhi stee guejdx najc si'c najc guedxrore, ä?

¹⁹ Bachajreni yuyo! yejcreni sa'csi rac-huin lajzreni, binduxhrenei, guredxa'reni:

—iAii! iAii! Riaduxhnu guedxro sa'csi xcuenttis guedduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijj guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejn lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xladcaiilu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jiejn xcälrdimbicha' te bajl ni cagusanij; diruza guibi' jiejn xse' bi'n náj dxa'p loj te sa' sa'csi rexpejllu ni ruto' gujcreni bejroduxh lo guedxliuj sa'csi basgueezalu reben guedxliuj xcuent rextzundxablu.

²⁴ Nen guejdxga bidxälza xtiejn renani gunii xtidx Dios, nájza xtiejn rexpejn Dios, nájza xtiejn guiraa reben guedxliuj ni bagu'treni.

19 Che gulujx recosre, biejn diagä lascanu xse' xhidaltro bejn ni canii xhaguibaa, cayäjpreni:

iColguiliä'p xpala'n Dios!
Xtentis Dios, xtenni najc yälruslaa lo dojl,
náj yälrdimbicha', náj yälmilagwr.

² Sa'csi xcälguuxhtisni najc ganax laaca, huentis najcni, sa'csi abejnni yälguxhtis gunadxabga nani caguxhijj reben guedxliuj xcuent xcäl'nadxabni.

Abejn Dios yälguxhtisni, agudijxhni xcuent xtiejn rexpejn Dios ni baxhe' gu-nadxabga, che bagu'tniren.

³ Guibi' guniizaren:

—iColguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool nájza guidap reman-bajnga bazuxhijbreni, biabrojreni gojñreni Dios ni rbejn lo tron cadro rnibeeni, caniiireni:

—Sugacni si'c. iColguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,
guira'tu ni rujn xtzuun Dios,
guira'tu ni rajntu Dios, rebenro sigajc rebenadolajz.

Sa' xten Xiil xten Dios

⁶ Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, nájza si'c che caguidxaduxh guzii, caniiireni:

iColguiliä'p xpala'n Dios!

Sa'csi Gueb Dios, Dad xtenu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujn dxej guchñaa Xiil xten Dios, aguzucheeza dxa'p.

⁸ Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza anglga löä:

—Bacuaa diidre: “Chicbaa renani bidon jääd lo xsa' Xiil xten Dios.”

Guniizani löä, najni:

—Rediidre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni löä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, nájza bejtzu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zaren xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgulii. Entis laaca rujnni yälguxhtis, entis laaca rucuaani che rujnni guej. ¹² Rebalojni rbebajl, yejcnii yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni. ¹³ Najcwni te lajd ni nadiini rejn; lajni najcza Xtidx Dios. ¹⁴ Guiraa resoldaad guibaa xten Dios siädnajlni najcwreni ladnol, ladnaya, bijbzaren cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguib. Sujnzani yälguxhtis loj reni rdexchlajz lo Dios, si'c ruläjreni yec uub che rbääreni bin, si'c sujnz Dios ni rajp guiralii yälrnibee. ¹⁶ Lo xhajbni nájza cuä' cujdni caj lajni: “Reii xten rejeii, Dad xten redad.”

¹⁷ Bahuiä loj te angl suga'ni galäii gubijdx, cabedxa'ni caniiini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸ te gautu xpääl rereii, näjza xpääl recapítan, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbáz sigajc rebenro.

¹⁹ Dxejcti bahuiä loj manro näjza loj rereii guedxliuj, abire'reni te gucuanäjreni nani rbijb cabainol näjza guiraa resoldaad xtenni. ²⁰ Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajñreni neñ te bal guiboduxh ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gu-dajw xpäälreni.

Te mił ijz

20 Dxejcti bahuiä loj te xangl Dios ni siädjiäjt xhaguibaa, siädñani liäii ni ruxhal guedro ni laa gabijl. Ca'zani te cadenro. ² Anglre gunaaz gutiatzroga, ni gujc bäl galooli, ni najcza beñdxab, ni laaza Satanás. Bacuaduunini te mił ijz. ³ Basälñini neñ gabijl, te ro'c basäunini, bacuaani liäii te na'cru gusgueeni reben guedxliuj lał ni guiza' te mił ijz. Che guiza' reijzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälñrniee te gunreni yälñuxhtis. Dxejcti bahuiä xaim rebejn nani biru' yejcní sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubañsacreni loj reben gut, gurenäjreni Jesucrist te laani gunibenäjreni te mił ijz. ⁵ Dee najc yälñbañsac galoo lo reben gut. Niluxh stecuaa reben gut, direni guibañsac che guisa'li te mił ijz. ⁶ Chicbaa rebejn nani guibañsac ganiddoo, najcreni beñdxan ni agubicaj xtojñreni. Ni rojp yälñgujt di guidzujñ lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mił ijz.

⁷ Che guiza' te mił ijzga, suslasacni Satanás neñ gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo.

⁹ Huä'preni lo te camp cadro gulagduxh. Gudäyjreni guideb gabig cadro rnibee rexejñ Dios neñ guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni. ¹⁰ Dxejc bacuaareni beñdxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsñreni sidejdreni trabawduxh dxej-yääl par tejpas.

Yälñuxhtis ni gujc nez loj tronronol

¹¹ Dxejcti bahuiä lo te tronronol näjza lo nani sobga' lojni te rujñni yälñuxhtis. Nez lojni gunitlojli guedxliuj

näjza guibaa, xhetru lajtdi bidxäjl par laareni. ¹² Bahuiä lo reben gut, benro sigajc beñnadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejnñi yälñuxhtis reben gut xcuent ni bejnreni, xcuentza rediidx nani caj loj reguijtzga. ¹³ Guiranejz biäd reben gut: nisdoo batzuug reben gut ni yu' lojni, gabijl näjza yälñgujt batzuugza reben gut ni yu' lojreni. Dxejcti bejn Dios yälñuxhtis tejgareni xcuent ni bejnreni. ¹⁴ Dxejcti bacuaani yälñgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälñgujt ni rojp. ¹⁵ Guiraa bejn ni di lajni nidxäjl lo xlibr yälñabajñ bacuaazani reni'c lo bajlga.

Xhaguibacoob näjza guedxliucoob

21 Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruzza nisdoo. ² Narä Juan, bahuiä lo guedx Jerusaléncob, guedxdxan, siädjiäjtñi xhaguibaali cadro rnibee Dios. Sucheduxhni si'c rsi-uchee te dxa'p nani agojl guchña. ³ Dxejcti biejn di-agä te xse' te ni canii dipduxh, ascanu lo tron cadro rnibee Diosli carii se'ga, scree caniiini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexejñni. Sibannäj lagajc Gueb Diosreni. ⁴ Sutia Dios guiraa nisbee balojreni te na'cru goonreni. Sinitloj yälñgujt, xhetru xliajdsi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajczalilajz bejn rediidxre.

⁶ Dxejcti najzani loä:

—Agujcní. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxliä'ä nis yäni, nalajznu yälñabajñ par tejpas. ⁷ Chutis nani gun gan lo dojl, sica'zani guiraa dee si'c yälñasa'c, luxh narä sacä Xtiosni, laani sacni xi'nä. ⁸ Niluxh renani rdx-ejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejcz guiboo näjza sufr par tejpas. Dee ni najc yälñgujt ni rojp.

Guejdx Jerusaléncob

⁹ Dxejcti lo guigajdz xangl Dios ni ca' guigajdz xhijg ni guidxa guigajdz reyälñuxhtis xten Dios, birii tejni, najni loä:

—Gudaa, te guluiä lojlu dxa'p nani guchña Xiil xten Dios.

¹⁰ Dxejcti bejnñi gunixcałä, huinani narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtñi nez lo Dios.

¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹² Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejga portonnga. Loj tejga portonnga, caj laj tej retzubitio'p cuaa xten rexpejn Israel.

¹³ Choñ portonnga caj nez cadro rliejn gubijdx, yu'za choñ portonnga nez ladbäw, yu'za choñ portonnga cadro räaz gubijdx. ¹⁴ Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

¹⁵ Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonnga, näjza padeerga. ¹⁶ Guejdxga najc cuadraad: sigajc ni siolni, sigajcza ni gulajgni. Dxejcti cua'ni biquii barejxni guejdxga, barejxni tio'p mił tio'p gayuu kilómetros tejga laad. Sigajc siolni, sigajcza gulajgni, sigajcza jiaani. ¹⁷ Dxejcti barejxni padeerga, yu'ni gayonbitajp metr seguñ mediid xten bejn, sa'csi ni'c najc ni cagutiexhnäjza anglga.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹ Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda; ²⁰ ni rgaiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rrtzuuga najc crisopraso; ni rtzubiteebga najc jacinto; ni rdzubitio'pga najc amatista. ²¹ Guitzubitio'p portonnga najc tzubitio'p perl. Tejga portonnga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

²² Dina nuhuiä nicla tej guidoo neñ guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. ²³ Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzanij ro'c. ²⁴ Rebejn guedxliuj ni rililajz xtidx Dios sajz sareni lo bianijga, luxh regeii ni siääd lo guedxliujre siäd-näzarení xcälrnibeereni, näj xpala'nreni ro'c. ²⁵ Di ro' reportanga jäüu rdxej, luxh ro'c xhettiza yääl. ²⁶ Ro'c chanäzarení yäl'nasa'c näj xpala'n reguejdxro ni yu' lo guedxliuj. ²⁷ Niluxh di gacdi pac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

22 Dxej baluii anglga te gueuro loä, cadro yu' nisya xten yäl'nabajn. Rdimbicha'ni si'c te guihuajn, luxh cariini lo tron cadro rnibee Dios näjza Xiil xten Dios, ² rdejdní loj nezyujro ni rdejd galäii guejdxga. Guiro'p laad gueuga sojb reyajg xten yäl'nabajn, lojreni rcáj tzubitio'p cuaa ninejxh neñ tebijz, tejga cuaani tejga bäii; luxh rebalajg ni rcáj lo reyajgga najc te gusajcni rebeñ guedxliuj. ³ Dxejcti ro'c xhettiru yälrdzubde, sa'csi ro'c yu' tron cadro rnibee Dios näjza Xiil xten Dios, ruzuxhijbza rexpejnñi, rajnreni laareni. ⁴ Suhuiireni lojpacni si'cpac ni najcni, sicajza laj Dios lo cuajreni. ⁵ Ro'c diru yääl chu. Luxh reni rbäjz ro'c di

guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Siäddzungajxh dxej ni guibisac Jesucrist

⁶ Dxej naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhałni xangłni te baluilojni loj rexpejnñi guira'ti nani agojl gac.

⁷ —Sajngalu gan, siojb jiała. ĩChicbaa nani riu rediidx ni caj lo libbre!

⁸ Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangł Dios nani baluii loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtzuumni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo libbre. Bazuxhib loj Diostis.

¹⁰ Dxej najni loä:

—Na'c gusäuulu guijtzc cadro caj rediidxre xcuent nani churu gac, sa'csi asiäddzungajxh redxej ni chale'reni. ¹¹ Luxh lał ni guidzujñ dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujñ dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

¹² Gunajtiro:

—Siojb jiała, luxh siädnaä xhi gunidxä loj tejgatu si'c ni riäjł xca'tu xcuent dzuun ni bejntu. ¹³ Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

¹⁴ Chicbaa renani riu xtidx Dios, najcreni si'c ni rguuib xhajnreni te sajz jiu'reni nez porton xten guejdxga, sajcza gauni ninejxh ni caj lo yajg xten yäl'nabajn par tejpas. ¹⁵ Per dejtz guejdxga chajia'n reni najc si'c bā'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchaglajz rniidix-xhii te gusgueeni.

¹⁶ Narä Jesucrist, abaxhalä xanglä lojlu te gusule'ni lojtu diidix xcuent guiraa redee, te gusule'zalu rextidxä neñ reguidoo loj rexpenä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit Dxan xten Dios näjza chääl Xiil canii, najreni:

—Coltaa.

Suguniiza nani riejn diajgreni diidixre, gäbreni:

—Coltaa.

Sujiäädza chutis ni cayojł, sujiädyałxia'ni nis yäl'nabajn par tejpas.

¹⁸ Sa'csi narä rniłiä'ppac lojtu, guiraatu ni riejn diajgtu rediidx ni caj lo guijtze xcuent recos ni churu gac, palga yu' chu tejtü gutajlru diidix ni caj guijtze, suteedru Dios bejnnga replaag yejcní loj ni caj lo guijtze. ¹⁹ Palga yu' chu gudzucaj loj rediidx ni caj lo guijtze, sudzuca-

jza Dios nani nica'ni lo yajg xten yäl̄nabaj̄n par tejpas,
näjza lo guedx Dxan, ni caj xcuentreni lo guijtzre.

²⁰ Nani cagusule' diidx xcuent guiraa redee guniini,
najni:

—Gullipacni siojb jiäl̄ä.

Sugacni si'c. Gudaa Dad Jesucrist.

²¹ Sujiääd xcäl̄racnäjä Dad Jesucrist lo guiraatu. Sugac-
ni si'c.